

近代中國史料叢刊第三十輯

沈雲龍主編

李忠節公（鑑堂）奏議

李秉衡著

文海出版社印行

木 〇 〇 〇 〇
 〇 〇 〇 〇 〇

木 木 木 木 木
 木 木 木 木 木
 木 木 木 木 木
 木 木 木 木 木



WZ187/02

中華民國
十九年印

遼寧作新印刷局印刷

序

予童時喜聽鄉人說故事每於豆棚瓜架下聞父老談說部中包
孝肅海忠介虎虎有生氣爾時童子無知每欲得其詳父老輒漫
應之曰即如今之于三大人銅錘李是也于公名蔭霖兄弟行居
三籍隸今吉林榆樹縣去吾家百里而遙固耳熟能詳至李公則
究不知爲何許人也光緒癸卯予與五常王蘭谷孝廉同應春官
試抵都與于公長君筠厚遇蘭谷曾爲于公撫鄂幕客於茶餘酒
後與筠厚多談于公遺事兼及李公緣二公交甚篤故筠厚兼得
其詳予藉此始稍知李公梗概焉嗣予與蘭谷同官龍沙與筠厚
不相見者十餘年庚申予都轉東甌恆因公往來京師及甲子赴

都筠厚以刊成于公遺集見贈遂又談及二公當年往事筠厚泣然告予曰庚子吾父撫湖北嗣又調豫李公以欽差大臣前四川總督巡視長江水師因公由魯撫調川督適臨清戕殺德國教士德人藉口索我膠州灣公據理力爭德人隱諷中朝不使到任朝廷不忍久置閒散遂命公以欽差大臣巡視長江水師及拳匪事起聯軍偪津沽朝旨徵調各省兵勤王長江各督撫如兩湖張文襄兩江劉忠誠聯銜奏請李公督師北上吾父命余偕蘭谷送公於揚州藉詢北上機宜公性固剛烈吾父甚懸注也比抵揚見公於古廟中公告余曰汝父念我甚感此次之戰必無倖理如皇上西巡命我扈蹕我尚可生否則有死而已我年逾七十尚復何憾

只恨此戰啟自拳匪殊可惜也言罷欷歔不置并下階前行數步
回顧余曰歸告汝父我步履尙健勿念也及津沽不守敵迫京師
公督師適到喘息未定立即激戰暑熱飢疲公與從者入一逃民
土室覓水漿不得見瓦盆盛菘豆少許飭弁覓水煮之與衆將同
飲復督師力戰以各省協調之兵將帥士卒皆不相洽又溽暑遠
行數千里倉猝以當強敵遂戰敗於河西務仰藥以殉從公死者
公門生王公廷相王公天方教人由翰林出爲山西學政慕公爲
人入公幕而同死焉公殉難後朝旨賜卹蔭子予諡忠節飾終之
典甚優卒以德人抗議遂將卹典撤銷國人不察因公督師力戰
外人又持異議論者多列公於主持拳匪諸臣之內德人之憾公

因公力爭割讓膠州灣也公之力戰冀衛京師以紓君父之難也
成敗利鈍豈暇計哉及戰敗從容以身殉之此公在揚州所逆計
也竟至撤銷卹典國史不得立傳使公千載後復蒙不白之冤此
眞不平之事矣予亟詢公之遺裔已否歸遼東故里並有無遺集
筠厚曰公諸子皆物故諸孫遠在彰德尙有公外孫施君今墨在
京可詢焉未幾筠厚以公奏稿函予曰如兄能代刊誠盛德事予
詳加檢閱僅奏稿無他函牘未附公門人某君所撰事畧一紙蓋
公得名多在官州縣時好微行謁事每暗携銅質武器以自衛其
所稱銅錘李者以此也民間甚或演爲彈詞如包公案施公案之
類以歌詠之某君所撰事畧多未詳及至公爲封疆後事蹟均在

奏牘中其署桂撫時法越之戰鎮南關一役論者多歸功於馮蘇諸將而公調護將帥運籌帷幄有足多焉嘗於翁文恭日記張文襄全集及時人筆記中約畧見之奏牘格於體例公不能自道其詳也予即欲校刊并欲爲公在清史補傳因走商於清史館袁君潔珊袁君欣然曰正欲搜集公之史料惜無人知之此天假之緣也適予移長奉天省政校理未竣以疾罷歸因恐散佚無以對良友之託遂籌羨餘二千金屬袁君代爲付刊刊資有不足則袁君任之剗剗將竣袁君屬予識其顛末予以爲自古忠臣烈士爲天地正氣所鍾天特生之以綱維人紀天必不使之湮沒與草木同腐設清史已成予雖得刊此書安知他年不斷簡殘編爲無知小

兒覆瓿以盡千載後有誰知烈烈李公其人乎而適值清史將成未成之際袁君適在史館雖當時外人厄之時議誹之清廷隱忍不敢表揚又孰知三十年後得吾兩人與公生時不通姓字者而先後成之謂非佛說夙緣也乎亦公英靈有以默啟之也不然抑胡相值之巧耶惜筠厚蘭谷皆作古人不及見矣書成原稿由其孫送省立圖書館珍藏其孫學誠現任康平稅捐局長學強充天津市土地局員亦均予與袁君爲之推轂公名秉衡字鑑堂今遼寧莊河縣人墓在今河南彰德安陽縣城西其家即僑寓於此並識之以告世之欲知公家世者

中華民國二十年庚午十二月前奉天省長鄉後學雙城翟文選

序

韓昌黎有云莫爲之後雖盛弗傳信哉斯言夫古人往矣而其精神意氣常往來於後人之心目閱千百世而追思不置者何也蓋古人雖往而其嘉言懿行垂之簡策不與之俱往已爾清季山東巡撫李忠節公鑑堂籍隸吾奉海城世居岫巖石嘴子村起家丞倖游擢至封疆大吏其事略見國史及其家乘至其爲國爲民抒之盡籌形諸奏牘者即其近習之人猶或未能詳悉矧時地睽隔乎公殉國事距今三十年當時文獻猶有存者民國戊辰秋適吾省當軸以編輯省志相屬緣揆求文藝得公奏議稿若干篇編維公之生平於時政多所建白論者謂公之精勤似陶士行倔彊似

趙忠簡對外抗直如林文忠持己清廉如湯文正余少時旣聞公
泄官之風節心嚮往之私心竊計以爲一旦筮仕得效奔走於公
之門下雖爲之執鞭所欣慕焉洎光緒丁酉科余適與公之第三
公子政寬同年膺選觀其言論丰采粹然儒者如李固在太學人
莫知其爲李司徒之子也者即公之教有義方概可見矣今讀其
遺稿覺向日所崇拜者至此益不能自己爰與同事袁君潔珊擇
其簡且要者爲之編次付之手民印行若干部公之海內俾傳永
久雖謂公至今存可也中華民國十九年歲在上章敦牂十二月
遼寧省遼陽縣白永貞謹識

李秉衡列傳 清史稿

李秉衡字鑑堂奉天海城人初入貲爲縣丞遷知縣光緒五年除知冀州歲飢發倉粟不給州俗重紡織布賤爲釀金求遠遷易糧歸而裁其價以招民民獲甦越二年擢知永平府部議追論劫案貶秩李鴻章上其理狀請免議不獲時稱北直廉吏第一以張之洞薦超授浙江按察使未到官移廣西十年平峒寨亂晉二品秩明年法人假越事寇邊秉衡主龍州西運局是時財匱戰士不得餉蹂屍輿廝無人過問秉衡益節儉汰浮費無分主客軍給糧不絕戰卹功賞力從厚復創設醫局治負傷軍士身自拊循之日數四雖末弁亦延見殷殷勗以殺敵報國護撫命下驩聲若雷動與

馮子材分任戰守諒山之捷彭玉麟等疏言兩臣忠直同得民心亦同功最盛予優敘重申前命爲護撫整營制舉賢能賞遺越南游衆越事漸告甯新任巡撫沈秉成莅官迺乞病去二十年東事棘召爲山東巡撫至則嚴紀律杜苞苴以威海旅順筦鑰北門遂率師駐煙臺聞旅順不守劾罷丁汝昌龔照燠等以警威海守將旣而日軍浮三艦窺登州秉衡悉萃精兵於西北而築城以戎備寡爲日軍所誘而獲時論詬之其時大刀會起主仇教勢漸張二十三年會衆戕德國教士德使海靖要褫秉衡職編修王廷相力爭之徒督四川海靖請益堅迺罷免於是秉衡隱安陽居三年剛毅入樞廷薦之起入都廷相慕其名往訪遂訂交朝命秉衡詣奉

天按事奏廷相自隨既至糾不職者數人皆廷相微服所誦知者
還會御史彭述疏請整飭長江水師詔使秉衡往秉衡固辭太后
責勉之遂行歲餘拳禍作枋事者矯詔趣戰電各省諸疆臣失厝
商之鴻章於是定畫保東南約秉衡與焉無何又請募師入衛至
京入覲太后力主戰遂命統張春發陳澤霖夏辛酉萬本華四軍
出屯楊村河西塢戰纔合張萬二軍先潰澤霖自武清移壁聞礮
聲軍皆走秉衡不得已退通州疾書致各將領述諸軍畏葸狀飲
金死事聞優詔賜卹諡忠節聯軍索罪魁請重治以先死免議詔
視職奪卹典

李忠節公家傳文登于霖逢

公諱秉衡字鑑堂奉天海城縣籍居岫巖後劃歸莊河其先山東人乾隆間由福山縣之桃源鄉遷岫巖南石嘴子邨父輝德嘉慶丙子科舉人大挑一等以知縣分江蘇歷金山縣六子公行三生而英異童年即勤學博覽羣書兼習武術隨任江南調揚州大營辦理營務處以軍功保知縣指省直隸聞粵寇陷蘇耗誓入賊尋親馳至徐州牛馬莊有匪徒據寨僭稱王途爲之梗遂挺身投刺相見匪首亦爲動容慨然撥騎卒持旂送盡界始返過此爲我軍防地見者訝從天降蓋行旅不通久矣又南訪遇父已奉差來江北驚喜過望乃攜家航海東旋復到直歷各州縣治行爲畿南第

一其署完縣也民素強悍有聚衆抗官案委辦立解補棗強縣城久圯匪往來莫或禦公粗製旂幟火器募丁壯傭工濬濠築圩賊至則豎旂幟迎之復令鄉民徙於城內助登陴賊窺伺無可乘乃折回會代者至百姓大恐請留者以數千計制府劉武慎公破例調某他署從民願也初兵差出棗境孔道要路咸有定所公先期諭市民多備食物躬監於市給值者與以物務使兩得其平兵差相謂曰盡如棗強豈惟民利亦吾利也彼官諉不聞民匿不出我輩無所得食能束手待斃乎時僧忠親王陣亡山東直隸南境搖動調赴大名山東沿河一帶防堵公常以偏師渡運河擊賊疊有斬獲就近署清豐縣東撫閻文介公以勞奏咨及直防解嚴乃赴

蔚州升任曾文正公督直甫下車即以賢能登荐牘得旨嘉獎蔚
俗賭博病民又多虛估金穀日賣空買空爲害尤烈治必從嚴同
治九年父憂去李文忠公督直檄再下再辭終制始出光緒三年
委辦安州水災不假手胥吏戶口必親查票必親填日歷風霜冰
雪每夜歸膝至足皆腫災民感實惠四年直省苦旱甯津接壤山
左盜多訟繁歷數任率撤參以去僉云非李牧不勝任乃以直隸
州署縣篆下車即停徵免徭先時民多強借均糧案至此又久不
兩人心惶惶旦夕告變遂廣勸富紳借資以救災戶期秋收歸償
官爲出印券立曉示闔境務各守分守分爲良民良民必救滋事
者爲亂民亂民必誅一日而書捐者計京帑數十萬千民始無恐

邑人高某素結官署欺平民忽在鄉募勇鄉人報册者已數千公假商辦鄉團約紳董到署立將高拏獲解津其餘念鄉愚無知概不究提到名册焚燬之衆紳出乃恍然調任冀州冀亦荒旱州民以織布爲生商販不至益重因公因以錢交紳商收布遠運得價購糧運回平糶周而復始又廣勸設義當息准三分期限一年本盡即止當候贖免雜稅民皆稱便上官即取其法飭通省行焉旋授永平府知府鮑春霖師駐永值遣散防營幾起變公隨機因應幸無譁擾民賴以安未數月以冀任盜案部胥需索置不聞竟鑄職去乃廷旨復特授山西平陽府陞廣東高廉欽道又陞浙江臬司未抵任調廣西時法占安南桂帥督師出關調辦後路糧台至

龍州值諒山失守法人進逼鎮南軍無固志紛紛潰散入關而公屹然不動分飭州縣沿途截留潰卒飛芻輓粟以接濟之於是桂營廣營楚營退者有所歸傷者有所恤守者有所食乃各稍稍成軍公調和諸將勉以大義龍州一帶隱然如長城旋奉命以臬司護巡撫諸軍謹躍士氣大振乃出關勦敵一戰而挫法人於文淵又敗之於摩沙蹙之於邱驟於是克復諒山法人敗績論功當以公居首時彭剛直公在廣東抗疏保奏云護撫李秉衡以至誠至公激厲將士楊玉科戰歿輿尸通衢無人過問乃親迎其喪慟哭厚殮諸軍感泣創設醫藥局日必兩三次往視多賴全活於客主各軍將領苦心調和糧餉軍火不分東局西局但擇其急者便宜

應之在軍自奉刻苦濫費冒支力持不予戰卹功賞則搜括騰挪力從其厚一無吝惜護撫命下歡聲雷動桂省軍民若慶更生即楚軍廣軍諸大將無不虛心相聽願爲盡力云云而當事者實深忌公阨其陞賞公夷然處之惟日與屬吏撫輯流亡綏定邊民遣散勇營安插有方關內外居者幾忘戰事久之晉秩布政使司仍攝撫篆會朝廷遣內臣勘界公與議不合乃上疏乞休二十年夏特起公爲皖撫會中日失和山左爲畿輔屏藩改命公鎮撫之公受代後亟馳守煙台敵氛日迫賴從容坐鎮及旅順威海相繼失守議款耗至公電阻疏爭至於再四事定後策兵備籌河防朝夕不遑凡遇教案持平辦理恆與總署辯論再三由是忤權臣意思

有以中傷之適膠島事起時公已陞川督方主武閣轉達總署增兵籌餉與德人力爭如膠州割讓則此後事不可爲旋奉電旨敵情強橫朝廷決不動兵卒鑄公二級以膠島畀德而後已公忠憤填胸先機引退遂辭川督卜居河南安陽縣安陽宋韓魏公故里也地多名勝策蹇登臨寒儉如儒素將有終焉之志二十五年二次召見命赴奉天查辦事件還又命巡閱長江水師疏辭不獲越明年循漢江而下正在籌辦江防而北方拳匪之亂作徵兵入援公遵諭北上迨抵都津沽已陷各國聯軍即日將至命幫辦武衛軍公倉猝率師兵非素練將不用命軍火又不足然猶忠義激發陣斬敵人進至北倉直薄郡城而聯軍衝壓寡不敵衆將士潰敗

公遂仰藥以殉公亡而兩宮西狩外兵入都震驚九廟宮闕蹂躪國勢乃不可支矣計公一生入則撫民出則應敵人稱忠節其去鎮南關也手書云二十五年官多無心孽無營求事晉藩護撫有二萬債無一月糧諒關大捷保六千員無私親朋此撫心自問可少安於歸去者也嗚呼此足以見公生平矣娶于氏有賢行子四政均二品廕生通判用政範戊子鄉試臚錄知縣早卒政寬丁酉選拔以知縣分發河南政吉殤女三孫六學口早卒學富官直隸知縣學誠山東候補知縣學強荐任職學正學方皆幼

附三代履歷

曾祖諱協祖諱枝楸父諱輝德字丙齋嘉慶丙子舉人大挑一

等以知縣用分發江蘇金山縣知縣

公由太學生報捐知縣歷任直隸棗強縣知縣蔚州知州冀州
直隸州知州永平府知府山西平陽府知府廣東高廉兵備道
浙江按察使廣西按察使廣西布政使安徽巡撫山東巡撫四
川總督歷署直隸完縣知縣甯津縣知縣清豐縣知縣代理武
邑縣知縣護理廣西巡撫歷兼兵部尙書兵部侍郎都察院右
都御史都察院右副都御史安徽山東提督四川廣西提督軍
務山東鹽政節制山東各鎮安徽各鎮廣西通省兵馬歷保以
直隸州知州用先換頂戴賞加運同銜賞戴藍翎賞加一級以
知府在任候陞並賞換花翎以知府在任儘先補用奉上諭傳

旨嘉獎賞加二品銜交部從優議賞給頭品頂戴歷充光緒乙酉科廣西鄉試監臨官廣西武鄉試主考官拔貢會考官甲午科山東鄉試監臨官山東武鄉試主考官丁酉科拔貢會考官奏派山西練軍營務處兼統精兵馬步三營奏派辦理廣西大軍後路事宜兼總理前敵營務處奏派廣桂滇越各轉運事務欽命督辦廣西後路軍務欽命會辦廣西前敵軍務欽命督辦廣西越南善後事宜欽命粵桂越南勘界事宜欽派廣西閱兵大臣山東閱兵大臣欽差查辦奉天事件大臣欽差巡閱長江水師大臣欽差幫辦武衛軍事務大臣光緒二十年萬壽慶典恩賞大福壽字八絲緞袍褂料帽緯恩賞二品廕生光緒二十

五年內召奉懿旨恩賞西苑門內乘船並恩賞太監扶掖恩賞
福字光緒二十六年內召奉懿旨恩賞紫禁城騎馬並在紫禁
城西苑門內乘坐二人肩輿御賜福字三次御賜克食生於道
光十年三月二十五日辰時薨於光緒二十六年七月十八日
卯時享壽七十一歲殉難直隸通州營次誥授光祿大夫建威
將軍殉難事聞優詔悼惜賜卹照總督例欽派直督前往奠醑
靈柩回籍沿途地方官妥爲照料准入城治喪並加恩予諡忠
節入祀昭忠祠欽賜子廕生江蘇試用通判政均以直隸州知
州仍歸原省補用孫學富舉人准其一體會試

李忠節公奏議目錄

卷一

奏陳嚴防廣西土匪摺 光緒十年十二月 日

奏報接護廣西撫篆日期摺 光緒十一年二月二十八日

奏各軍克復文淵諒山等處分別獎卹各員弁摺 光緒十

年三月二十四日

奏停戰撤兵並請飭催各省協餉摺

光緒十一年三月二十四日

奏查明已革藩司敗退情形摺 光緒十一年三月二十四日

奏克復諒山馮子材厥功最偉片

光緒十一年三月二十四日

奏增募營勇親兵片 光緒十一年三月二十四日

奏遣撤准軍鼎字五營片 光緒十一年三月二十四日

奏遵旨保獎出力人員片 光緒十一年三月二十四日

奏楊牛氏殉節請旌片 光緒十一年三月二十四日

奏現存營勇均照准軍營制給發餉項片 光緒十一年二月二十四日

奏關外諸軍撤回邊界布置邊防情形摺 光緒十一年四月初八日

奏分遣鄂軍回鄂就餉片 光緒十一年四月初八日

奏現在留防各軍營數片 光緒十一年四月初八日

奏調度諸軍會籌辦理情形摺 光緒十一年四月初八日

奏報省河陡漲成災妥籌撫恤摺 光緒十一年五月二十二日

奏續報被水災區較廣寬籌撫恤摺 光緒十一年六月初八日

奏謝從優議敘摺 光緒十一年七月初四日

卷二

奏邊軍月餉酌中畫一摺 光緒十一年七月二十二日

奏勘修鎮南關城并存撫義民摺

光緒十一年七月二十二日

奏知縣陳鳴謙起病調營差遣片

光緒十一年七月二十二日

奏革道趙沃起解出境並飭催前進片

光緒十一年七月二十二日

奏飭署藩臬各缺片 光緒十一年七月二十二日

奏謝簡授廣西布政使摺 光緒十一年七月二十四日

奏統軍大員陳嘉積傷病故請優卹摺

光緒十一年八月初三日

奏提督劉先胥等陣亡請卹片 光緒十一年八月初三日

奏查明已革撫臣被參各款摺 光緒十一年九月二十五日

奏查明知府延昌等被參各款摺 光緒十一年九月二十五日

奏知縣陳鳴謙瘴故請卹片 光緒十一年九月二十五日

奏據情密懇勅封越南嗣子摺 附單 光緒十一年十月初三日

奏請將積勞瘴故道員張桂林等優卹片 光緒十一年十月初三日

奏明妥籌賑撫辦理情形摺 光緒十一年十一月十七日

奏請將積勞病故知府龍溥霖優卹片 光緒十一年十一月十七日

奏籌修陡河石橋平樂沿河緯路以工代賑片 光緒十一年十一月十七日

十一月十七日

奏勘界大臣鄧承修到龍會商界務片 光緒十一年十一月十七日

奏裁減勇營以節餉需摺 光緒十一年十二月十九日

卷三

奏病體增劇懇請開缺摺 光緒十二年正月二十八日

奏遵辦裁營節餉抽調綠營訓練摺 光緒十二年二月初六日

奏章京關朝宗在營瘴故請飭部優卹摺 光緒十二年二月初六日

奏貴縣土匪廖彩爵聚眾抗官飭營搜勦片 光緒十二年二月初六日

奏籌議廣西邊隘移添提督鎮道並請撥的餉摺 光緒十二年

年二月二十五日

奏陳指撥廣西邊餉省分請減免別項解款片 光緒十二年

二月二十五日

奏各府防勇親兵未能撤裁摺 光緒十二年三月初七日

奏陳龍州重地籌款建城片 光緒十二年三月初七日

奏查明梧關經費病商過甚分別免減經費浮收摺 光緒十

二年三月二十一日

奏覆西省團練開礦現在似難舉辦摺

光緒十二年四月初八日

奏報拏獲貴縣土匪廖彩爵摺 光緒十二年四月初八日

奏拏獲宣化縣漏匪雷麻大就地正法片

光緒十二年四月初八日

奏拏獲煽結哥老會匪徒景清寅綁赴軍前正法片 光緒十

二年四月初八日

奏辦理資遣招墾摺 光緒十二年六月十六日

奏暫留蔣宗漢緩赴新任摺 光緒十二年六月十六日

奏儲備將材片 光緒十二年六月十六日

奏假滿謝恩摺 光緒十二年六月十六日

奏報廣西賑款數目並請將餘款修繕路摺附單 光緒十

二年九月初三日

奏西省實無閒款解部摺 光緒十二年十月初三日

奏報梧州兩廠課稅節年征收撥支銀數摺 光緒十二年十

月二十九日

奏請蠲緩永安等州縣地丁兵米摺 光緒十二年十一月初

三日

奏嚴禁州縣隱匿命案及索費摺 光緒十二年十一月十六

日

奏查明各省欠解協餉請撥的餉片 光緒十二年十一月十

六日

奏查明西省礦產無可開採田州改流甚善摺 光緒十二年

十二月初十日

奏報辦賑收支數目摺附單 光緒十二年十二月初十日

卷四

奏查明廣西釐稅尙無朦弊中飽及裁大滄江釐卡摺 光緒

十三年正月二十四日

奏懲辦害民蠹役葛明片 光緒十三年四月十二日

奏請止法人入龍通商以杜後患摺

光緒十三年閏四月初二日

奏邊軍裁撤四營以符原奏摺 光緒十三年五月十二日

奏報起程回省摺 光緒十三年六月初四日

奏遵旨臚舉將才摺附單 光緒十三年六月初四日

奏請開缺回籍調理摺 光緒十三年七月十三日

奏寬免革職處分謝恩摺 光緒十三年十月初一日

奏武緣縣土匪藍妙涓滋事勦捕片 光緒十三年十月二十九日

奏邊營長夫早已通減尙難全裁摺 光緒十三年十一月二十七日

奏候選教諭吳國彥恃符妄爲請斥革片 光緒十三年十一月二十七日

奏請爲已故撫臣劉長佑建立專祠摺 光緒十三年十二月十五日

奏請爲已故總兵陳嘉建立專祠摺 光緒十三年十二月十五日

奏請爲已故撫臣張凱嵩建立專祠並將事蹟宣付史館摺

光緒十三年十二月十八日

奏陳已革千總甘沛棠審明定擬摺

光緒十三年十二月十八日

奏請監禁甘沛棠片 光緒十三年十二月十八日

奏勦辦西隆州苗匪情形片 光緒十三年十二月十八日

奏副將李應章瘴故請卹摺 光緒十三年十二月二十四日

卷五

奏謝授安徽巡撫摺 光緒二十年五月二十二日

奏請假一個月片 光緒二十年五月二十二日

奏報到任日期摺 光緒二十年八月十五日

奏請將曹州府知府毓賢暫緩引見摺

光緒二十年八月二十七日

奏裁併各局片 光緒二十年八月二十九日

奏分別籌款免借商本摺 光緒二十年九月初一日

奏查明御史所奏匪徒一節據實覆陳摺

光緒二十年九月二十一日

奏藩司無庸赴京祝嘏摺 光緒二十年九月二十二日

奏查明道員被參各款據實覆陳摺

光緒二十年九月二十三日

奏總兵王連三遵旨北上摺 光緒二十年十月初五日

奏報黃河普慶安瀾摺 光緒二十年十月初六日

奏沿河一帶請照義賑辦法撫恤摺

光緒二十年十月初六日

奏調朱采等來東片 光緒二十年十月初六日

奏報馳抵煙臺一帶籌辦海防摺 光緒二十年十月十二日

奏各省電報及所奉電旨按月彙報片

光緒二十年十月十二日

奏保青州副都統訥欽可勝總統之任片
光緒二十年十月十二日

奏海防重要請添募勁旅摺
光緒二十年十月十二日

奏緩赴膠澳片
光緒二十年十月十二日

奏查明被參知縣請革職摺
光緒二十年十月十八日

奏參副將馮義德摺
光緒二十一年十一月初二日

奏甄別不職各員摺
光緒二十一年十一月初二日

奏旅順失守如何懲辦將士請訓示片
光緒二十一年十一月初二日

奏東網民困商疲懇免二文加價摺
光緒二十一年十一月初四日

奏本年豆收歉薄請改徵粟米摺
光緒二十一年十一月初十日

奏本年麥收歉薄請改徵粟米摺
光緒二十一年十一月初十日

奏預籌防河經費摺 光緒二十年十一月十四日

奏查明補卹陣亡各員摺

附單

光緒二十年十一月十四日

奏請將貽誤軍機之將領明正典刑摺

光緒二十年十一月十六日

奏海防緊要請安設腰撥以資馳遞摺

光緒二十年十一月二十日

奏謝恩賞壽字大緞帽緯摺 光緒二十年十二月初一日

奏機器局購硝籌撥銀兩片 光緒二十年十二月初三日

奏懇恩旌表貞女夏陸氏片 光緒二十年十二月十三日

奏調山西候補知府錫良來東片

光緒二十年十二月十六日

奏派候補道李希杰等督辦河工片

光緒二十年十二月十六日

奏謝御賜福字摺 光緒二十年十二月十九日

奏代藩司恭謝恩賞摺 光緒二十年十二月二十日

奏劾知縣郭秉鈞等六員摺 光緒二十年十二月二十二日

奏學政年終密考片 光緒二十年十二月二十二日

奏查明榮成縣失守情形摺 光緒二十年十二月二十八日

奏調董福祥軍來東片 光緒二十年十二月二十八日

卷六

奏倭船如到煙臺應開礮轟擊摺

光緒二十一年正月初三日

奏請將閩得勝等五員革職片 光緒二十一年正月初三日

奏請飭海軍轟擊倭船片 光緒二十一年正月初三日

奏設車局接遞各軍摺 并單 光緒二十一年正月初六日

奏威海失事自請嚴議摺 光緒二十一年正月初九日

奏請旨撥管片 光緒二十一年正月初九日

奏添撥機器局經費片 光緒二十一年正月十九日

奏報起支弁兵餉銀日期摺 光緒二十一年正月十九日

奏文登甯海失守請議處地方官摺 光緒二十一年正月十二日

奏設馬撥以遞文報摺 光緒二十一年二月初四日

奏報收復甯海文登摺 光緒二十一年二月初七日

奏報收復榮成情形摺 光緒二十一年二月十五日

奏調總兵張紹模等來東片 光緒二十一年二月十五日

奏查明昌膠等處團練並無藉端滋擾摺 光緒二十一年二月十八日

奏報黃河凌汎期內防護情形摺
光緒二十一年二月十八日

奏爲叩謝天恩摺
光緒二十一年二月二十一日

奏歷城等縣設立車局日期片
光緒二十一年二月二十一日

奏派員採購軍糧設局轉運扣餉歸還片
光緒二十一年二月二十一日

奏請援案截留京協各餉摺
光緒二十一年二月二十一日

卷七

奏議覆漕運鐵路摺
光緒二十一年三月初一日

奏推廣河運事宜三條片
光緒二十一年三月初一日

奏順天購糧平糶經過東省免徵稅釐片
光緒二十一年三月初一日

奏糧船護照逾限照常完稅片
光緒二十一年三月初一日

奏謝天恩摺 光緒二十一年三月初二日

奏藩司湯聘珍請赴前敵代奏摺 光緒二十一年三月初三日

奏遵旨詳查丁汝昌等死事情形摺 光緒二十一年三月初三日

奏覆漕督松椿署漕督鄧華熙被參各款摺 光緒二十一年三月初三日

奏劾漕運總督松椿等片 光緒二十一年三月初三日

奏挑濬北運河估需經費數目摺 光緒二十一年三月十七日

奏王連三新募各營請撥餉項摺 光緒二十一年三月十七日

奏請將殉節道員戴宗騫事蹟宣付史館摺 光緒二十一年三月十七日

奏請將傅鳳翔等附祀優卹片 光緒二十一年三月十七日

奏報濟陽高家紙坊漫口堵築合龍摺 光緒二十一年三月十九日

奏章高元車驟等銀請由月餉扣還片 光緒二十一年三月十九日

奏東省文武各官養廉核扣三成數目摺 光緒二十一年三月二十二日

奏壽張等縣援案僱勇作正開支口糧片 光緒二十一年三月二十二日

奏力阻和議摺 光緒二十一年三月二十五日

奏副將張福興病故請卹摺 光緒二十一年三月二十九日

奏緝勦土匪先將現辦情形覆陳摺 光緒二十一年三月二十九日

卷八

奏再瀝愚忱力阻和議摺 光緒二十一年四月初一日

奏報桃汛安瀾摺 光緒二十一年四月初八日

奏招募鄉兵請飭部籌餉片 光緒二十一年四月初八日

奏山長孫葆田請獎片 光緒二十一年四月初八日

奏東省添募勇營分別起支薪糧津貼摺 光緒二十一年四月初十日

奏送盧昌詒引見摺 光緒二十一年四月二十日

奏請免加東軍柴草銀兩片 光緒二十一年四月二十日

奏查覆武弁李承卿被參各節摺 光緒二十一年四月二十日

奏因病籲請開缺摺 光緒二十一年四月二十二日

奏保前臺灣布政使于蔭霖片 光緒二十一年四月二十二日

奏登州鄉團出力擬請獎卹摺 光緒二十一年四月二十七日

奏提督夏辛酉登防不可輕離片 光緒二十一年五月十八日

奏明保山西候補知府錫良片 光緒二十一年五月十八日

奏陳曹州府屬勦辦土匪情形摺

光緒二十一年五月十八日

奏請弛禁沿海糧食照常販運出入片

光緒二十一年五月二十日

奏協濟直隸賑銀五萬兩片

光緒二十一年閏五月初十日

奏陳已革道員李耀南才堪任用摺

光緒二十一年閏五月十九日

奏懇續假摺

光緒二十一年閏五月十九日

奏委署司道各缺摺

光緒二十一年六月初二日

奏錫良暫緩赴沂州府知府任片

光緒二十一年六月初二日

奏順天運米平糶限滿照常納稅片

光緒二十一年六月初四日

奏規復河防營舊制摺

光緒二十一年六月十五日

奏伏汎盛漲通工搶護情形摺

光緒二十一年六月二十二日

奏揀員請補省會道缺摺 光緒二十一年六月二十二日

奏查明知縣被參各款摺 光緒二十一年六月二十二日

奏道員李清和委辦上游河工片 光緒二十一年六月二十
二日

卷九

奏臺莊營參將員缺緊要揀員擬補摺 光緒二十一年七月
初三日

奏東省新海防捐輸銀兩請暫免提解摺 光緒二十一年七
月初三日

奏報黃河秋汛情形摺 光緒二十一年七月初五日

奏請將買料不實人員革職片 光緒二十一年七月初五日

奏審明越獄盜犯摺 光緒二十一年七月初八日

奏報河工委員積勞病故懇卹摺 光緒二十一年七月初八
日

奏東省捐建故撫專祠落成懇入祀典摺

光緒二十一年七月初八日

奏續撥黃河防汛經費銀五萬兩片

光緒二十一年七月初八日

奏報黃河防汛經費銀數摺

光緒二十一年七月初八日

奏東海關洋藥釐金暫供海防軍餉摺

光緒二十一年七月十四日

奏報銷假摺

光緒二十一年七月十四日

奏調江蘇候補道李光久片

光緒二十一年七月十四日

奏黃河水勢漸落籌款堵築上下游漫口情形摺

光緒二十

一年七月二十七日

奏請獎卹勦匪出力員弁摺

光緒二十一年八月十四日

奏總兵夏辛酉緩赴新任仍留登防片

光緒二十一年八月十四日

奏剿撫回匪全在得人密陳管見摺 光緒二十一年八月十四日

奏沂州營副將員缺請以陳大勝補授摺 光緒二十一年八月二十二日

奏查海豐縣賊匪拏辦情形摺 光緒二十一年八月二十二日

奏保舉人才摺附單 光緒二十一年八月二十五日

奏沂州營副將員缺緊要懇仍以陳大勝請補摺 光緒二十

一年八月二十六日

奏災區需賑孔殷請留本年新漕以資散放摺 光緒二十一

年八月二十六日

卷十

奏報黃河各工防護穩固摺 光緒二十一年九月十三日

奏東省新海防捐輸銀兩請暫緩解部摺
光緒二十一年九月十三日

奏陳管見摺
光緒二十一年九月十六日

奏齊東縣城遷徙驛站改道協撥夫馬工料核入奏銷造報

摺
光緒二十一年九月二十二日

奏東省賑務仿照義賑章程變通辦理摺
光緒二十一年九月二十二日

奏壽張等縣僱勇起支口糧片
光緒二十一年九月二十二日

奏查覆徐州鎮總兵陳鳳樓被參各款摺
光緒二十一年九月二十二日

奏道員積勞病故請卹片
光緒二十一年九月二十二日

奏東綱疲累已深商民交困懇免加價摺
光緒二十一年九月二十五日

奏赴上下游查看漫口工程片
光緒二十一年九月二十五日

奏查明甯海等縣被擾懇蠲緩糧賦摺 光緒二十一年十月二十一日

奏齊東縣北趙家漫口堵築合龍摺 光緒二十一年十月二十一日

奏新造抬槍解呈督辦軍務處驗放片 光緒二十一年十月二十一日

奏查看黃運兩河大概情形及回省日期片 光緒二十一年十月二十一日

奏裁撤煙台練軍片 光緒二十一年十一月初九日

奏山東歷辦礦務並無成效現擬封禁以靖地方摺 光緒二十一年十一月十一日

十一月十一日

奏覆遵旨籌辦摺 光緒二十一年十一月十八日

奏預籌來年黃河防汛經費摺 光緒二十一年十一月十八日

奏山東整頓南運局籌出款項擴充機器情形摺 光緒二十一年十一月十八日

一年十一月十八日

奏恩蔭外用恭謝天恩摺 光緒二十一年十一月 日

奏東綱疲累課懸懇恩豁除釐頭減引摺 光緒二十一年十一月二十一日

奏遵旨查明知縣被參各款摺 光緒二十一年十二月初四日

奏壽張縣高家大廟漫口堵築完竣摺 光緒二十一年十二月初四日

奏山東境內南運河工程請歸東省試辦摺 光緒二十一年十二月十六日

奏東省舊有各營自二十年七月爲始作正開報片 光緒二十一年十二月十八日

奏辦理平糶折耗本銀數目片 光緒二十一年十二月十八日

奏謝賞福字摺 光緒二十一年十二月二十一日

奏東省海防並內地勇營練軍分別裁撤調回歸伍摺光緒

二十一年十二月二十四日

奏河臣到任需時來年應用物料預爲儲備摺光緒二十一

年十二月二十四日

卷十一

奏瀝陳礦務利害情形摺光緒二十二年正月二十四日

奏撥款修培隄埝片光緒二十二年正月二十四日

奏山東南運額引未能全銷摺光緒二十二年正月二十七

奏凌汎期內黃河兩岸防護平穩摺光緒二十二年正月二

奏請免扣甯海等十二州縣軍需三成摺光緒二十二年二

奏南運河工程暫歸東省試辦片

光緒二十二年二月十五日

奏查明署任知縣被參各款摺

光緒二十二年二月十八日

奏查勘呂家窪決口情形摺

光緒二十二年二月二十五日

奏查明福山縣被參丁書通賄舞弊各情摺

光緒二十二年三月十四日

奏預購稽料以防伏汎片

光緒二十二年三月十四日

奏挑濬北運河估需經費數目摺

光緒二十二年三月十四日

奏嚴核關稅提款充公摺

光緒二十二年三月二十五日

卷十二

奏敬據管見摺

光緒二十二年四月初一日

奏東省餉需萬絀請將土藥稅釐銀兩暫行截留摺

光緒二

十二年四月初一日

奏山東河工處分請飭部仍照舊例核議摺

光緒二十二年四月二十三日

奏報籌辦河工並出省查勘海口日期摺

光緒二十二年四月二十三日

奏查看黃河形勢請仍由鐵門關舊河入海摺 光緒二十二年五月十七日

年五月十七日

奏籌撥挖河築隄經費請截留京餉片

光緒二十三年五月十七日

奏留臬司暫緩交卸片 光緒二十二年五月十七日

奏下游利津北岸趙家菜園漫溢請將在工各員分別參處

摺 光緒二十二年五月二十四日

奏請將誤工之已革副將徐天慶等從嚴參辦片 光緒二十

二年六月十三日

奏辦理曹單等處會匪情形摺
光緒二十二年六月二十四日

奏請飭催曹州鎮總兵萬本華迅速來東片
光緒二十二年六月二十四日

奏民教相讎情形請旨飭議豫弭後患片
光緒二十二年六月二十四日

奏查覆永阜場大使唐寶珍並無侵蝕鹽釐情事片
光緒二十二年六月二十四日

十二年六月二十四日

奏東省認還洋債並無專款可撥摺
光緒二十二年七月初十日

奏報出省赴下游河工日期片
光緒二十二年七月二十八日

奏黃河上中下三游分飭道員管理片
光緒二十二年七月二十八日

奏核減山東通省錢糧折收錢數摺
光緒二十二年七月二十八日

奏請將副將周保林等降革片 光緒二十二年七月二十八日

奏節逾白露黃河險工搶護平穩摺 光緒二十二年八月初五日

奏遵旨相度地勢撥款建造火藥庫摺 光緒二十二年八月初八日

奏山東現辦河工革除積弊情形摺 光緒二十二年八月二十八日

奏東省兵餉支絀請敕部撥留京餉片 光緒二十二年八月二十八日

奏請獎勵陳壽清杜榮秀片 光緒二十二年八月二十八日

奏請敕部撥餉添練勇營摺 光緒二十二年八月二十八日

奏請議卹已故知縣劉鑑片 光緒二十二年八月二十八日

奏請獎勵緝捕勤能各州縣片 光緒二十二年八月二十八日

奏請敕照會倭使定期撤軍片 光緒二十二年八月二十八日

卷十三

奏查看黃河尾閘形勢擬由蕭神廟入海并將趙家菜園呂

家窪漫口堵合摺 光緒二十二年九月十一日

奏節屆霜降黃河一律安瀾摺 光緒二十二年九月二十三日

奏山東境內南運河工程請仍歸河督經理摺 光緒二十二

年九月二十六日

奏請將督辦南運河工之候選道馬開玉等獎敘片 光緒二

十二年九月二十六日

奏陳山東河工未能確有把握情形摺 光緒二十二年十月十五日

奏報出省查勘河工日期片 光緒二十二年十月十五日

奏報趙家菜園漫口堵築合龍摺 光緒二十二年十月二十四日

奏籌辦西韓家堵口情形片 光緒二十二年十月二十四日

奏參規避取巧及人地不宜之州縣請分別懲處摺 光緒二十二年十一月十四日

光緒二十二年十一月十四日

奏報呂家窪合龍日期摺 光緒二十二年十一月二十八日

奏中俄新約受制太甚請敕改議摺 光緒二十二年十二月初二日

奏東省黃河隄埝卑薄擇要修培請截留京餉摺 光緒二十二年十二月十八日

光緒二十二年十二月十八日

奏預籌光緒二十三年黃河防汛經費懇准照數撥用摺 光緒二十二年十二月十八日

光緒二十二年十二月十八日

奏報由下游河工回省日期片

光緒二十二年十二月十八日

奏謝賞福字摺

光緒二十二年十二月十八日

奏保徵收釐金出力之知縣懇恩給獎摺

光緒二十二年十二月十九日

奏請將不能約束勇丁之遊擊馬振武等分別懲處片

光緒二十二年十二月十九日

奏參不職之牧令教職摺

光緒二十二年十二月十九日

卷十四

奏明山東減收錢糧折數及釐定收漕章程通飭立碑摺

光緒二十三年正月初十日

光緒二十三年正月初十日

奏陳海防緊要密保水師提督彭楚漢摺

光緒二十三年正月初十日

奏請免扣甯海等十二州縣及首領佐雜部提軍需三成摺

光緒二十三年正月十二日

奏凌汎漫口限期籌堵摺 光緒二十三年二月初二日

奏德州等四州縣僱募壯勇請援例作正開銷片 光緒二十

三年二月十二日

奏東綱鹽斤擬請分別加耗加課摺

光緒二十三年二月十二日

奏參買料不實之知縣請交部議處片

光緒二十三年二月十二日

奏副將在營積勞病故請優卹片

光緒二十三年三月十五日

奏西韓工堵口現辦情形並請添撥銀兩摺

光緒二十三年三月十五日

奏參前濟東泰武臨道張上達片

光緒二十三年三月十五日

奏調勞乃寬來東差委片 光緒二十三年三月十五日

奏請將積勞病故之巡檢優卹片 光緒二十三年四月初八日

奏陳東省酌減錢漕辦理情形摺 光緒二十三年四月初八日

奏參買料斤重短少各委員請懲處摺 光緒二十三年四月初八日

奏報桃汛防護平穩暨西韓工現辦情形摺 光緒二十三年四月初九日

奏參荒謬不職之守備請革職摺 光緒二十三年五月初二日

奏陳韓工籌辦情形摺 光緒二十三年五月初二日

奏參買料不實各委員請懲處片 光緒二十三年五月初二日

奏江浙兩省海運漕船初次收口放洋日期船數片 光緒二十三年五月初二日

十三年五月初二日

奏韓工暫請停辦摺 光緒二十三年五月十七日

奏利津縣北嶺子西灘兩處民埝漫溢片

光緒二十三年五月十七日

奏陳河工情形並報回省日期片

光緒二十三年五月十七日

奏報夏辛酉服滿片 光緒二十三年五月十七日

奏挑濬北運河估需經費數目摺

光緒二十三年五月二十六日

奏參試用從九請革職片 光緒二十三年五月二十六日

奏設河安中營片 光緒二十三年五月二十六日

卷十五

奏寬免嚴議謝恩摺 光緒二十三年五月二十九日

奏陳西灘北嶺漫口情形摺 光緒二十三年六月初九日

奏東綱商捐軍餉銀兩仍請按照海防例給獎摺 光緒二十

三年六月十一日

奏陳裁汰勇營情形摺 光緒二十三年六月十六日

奏明豫省請裁駐東嵩武三營摺

光緒二十三年六月十六日

奏拏獲用藥迷拐幼孩匪徒審明懲辦片

光緒二十三年七月初三日

奏審明疎防越獄之禁卒人等按例定擬摺

光緒二十三年七月初三日

奏捐建已故將軍善慶專祠並懇列入祀典摺 光緒二十三

年七月初三日

奏伏汎期內黃河險工搶護平穩摺

光緒二十三年七月六日

奏西韓家堵口現籌接辦摺 光緒二十三年八月初二日

奏節逾白露黃河險工搶護平穩摺

光緒二十三年八月二十七日

奏謝補授四川總督摺

光緒二十三年九月初九日

奏報利津縣西韓家漫口堵築合龍日期摺

光緒二十三年九月十六日

奏報銷光緒二十二年黃河防汛經費摺

光緒二十三年九月十七日

奏山東文闡價買民田添建號舍摺

光緒二十三年九月二十九日

奏請以北嶺口門及陳莊新河爲入海之路摺

光緒二十三年

年九月二十九日

奏保治行卓著之郡守牧令摺

光緒二十三年九月二十九日

奏節交霜降黃河一律安瀾摺

光緒二十三年九月二十九日

奏請嘉獎在籍翰林宋書升片

光緒二十三年十月初六日

奏密保道員蔣兆奎知府盧昌詒摺

光緒二十三年十月十五日

奏密參登州鎮總兵章高元摺 光緒二十三年十月十五日

奏保直隸補用知府勞乃寬片

光緒二十三年十一月初三日

奏東省機器局添建槍廠購買機器籌撥各款銀兩摺 光緒

二十三年十一月初四日

奏交卸撫篆並因病請假摺 光緒二十三年十一月初六日

奏因病請開川督缺片 光緒二十三年十一月初六日

卷十六

奏赴奉查辦事件途次拏獲匪首摺

光緒二十五年八月十八日

奏報到藩日期摺 光緒二十五年八月二十九日

奏密籌奉省防軍統制辦法片

光緒二十五年八月二十九日

奏查明仁育兩軍總統被參各款摺

光緒二十五年九月初七日

奏密保錫振張國林二員片

光緒二十五年九月初七日

奏請飭奉天將軍趕築營壘片

光緒二十五年九月初七日

奏查奉省情形臚陳管見摺

光緒二十五年九月初八日

奏密參奉天府尹恒壽及刑部侍郎英煦片

光緒二十五年九月初八日

奏密保盛昱文悌玉恒請調奉任用片

光緒二十五年九月初八日

奏保知縣增韞請破格擢用摺

光緒二十五年九月初八日

奏請獎勵義州知州高欽片

光緒二十五年九月初八日

奏參奎華陳善寶片

光緒二十五年九月初八日

奏查明知府被參各款請立予罷黜摺

光緒二十五年九月二十四日

奏請嘉獎懷德縣知縣范貴良片

光緒二十五年九月二十四日

奏馬民澤等偽造電報片

光緒二十五年十月初四日

奏請收回巡閱長江水師成命摺

光緒二十五年十月十八日

奏謝不准辭巡閱長江摺

光緒二十五年十月二十日

奏懇賞假一箇月摺

光緒二十五年十月二十五日

奏懇續假一箇月摺

光緒二十五年十二月初四日

奏銷假前往長江摺

光緒二十五年二月初二日

奏報巡閱長江行抵差次日期摺

光緒二十六年三月十二日

奏謝賞頭品頂戴摺

光緒二十六年三月初九日

奏密劾長江提臣摺 光緒二十六年四月二十六日

奏密保提督彭楚漢片 光緒二十六年四月二十六日

奏報巡閱行抵蘇省酌定下游駐所摺 光緒二十六年四月二十六日

奏參不職之總兵遊擊摺 光緒二十六年四月二十六日

奏請嘉獎周芳明高光効李金彪等片 光緒二十六年四月二十六日

奏派兵北上並親率衛隊前進摺 光緒二十六年五月三十日

奏報遵旨赴京起程日期摺 光緒二十六年六月初三日

奏報與敵兵接戰情形摺 光緒二十六年七月十七日

李忠節公奏議目錄終

李忠節公奏議卷一

奏陳嚴防廣西土匪摺 光緒十年十二月 日

奏遵 旨督屬認真稽查以防內患並將現存水陸防營關單恭摺覆 奏仰祈 聖鑒事竊 臣夢元於光緒十年十一月十日承准兵部火票遞到軍機大臣傳諭光緒十年十一日奉 上諭廣西向多伏莽本年匪徒莫夢弼滋事業經派除現聞各處土匪尙未淨盡亟應隨時防範以遏亂萌該撫新帶兵出關尤應豫防內患著責成張夢元李秉衡督飭所真稽查如有積匪糾黨情形立即嚴拿究辦不得養癰貽患得妄拿無辜轉致驚擾尤須慎選牧令整飭吏治爲正本清

計該藩臬兩司身任地方責無旁貸務當正己率屬除暴安良以副委任並將該省兵勇除調赴軍營外現存若干何人管帶駐防何所先行詳晰奏聞等因欽此時值臣秉衡奉撫臣調赴龍州辦理後路事宜啟行出省臣夢元謹將奉到諭旨恭送一體欽遵臣等伏查粵西地方未靖伏莽素多值茲關外用兵攘外必先治內仰蒙聖明洞燭訓諭周詳俾得恪遵辦理莫名欽感現在越南有事太平鎮安兩府皆爲邊要之區其餘各郡邑或係省城重地或係煙瘴巖疆或與滇黔邊境犬牙相錯或與湖南廣東壤地毘連兼多地雜苗獠土司環列必須嚴密防範以杜匪徒生心是以歷年各府廳州所屬皆設有水陸防營分駐鎮攝防營之外

並飭該府縣酌募壯勇隨時巡查緝捕偵有匪徒糾夥潛滋即由該地方官通稟調撥防營合力撲除上年出師越南以來有將腹地防勇調派出關察看地方情形仍不可無勇駐防者即隨時募補填紮未敢稍涉疏虞而匪徒莫夢弼猶敢糾黨滋事未必不因關外多故冀圖乘隙騷擾誠如 聖諭尤應豫防內患臣等現已遵 旨通飭各屬認真稽查並行各防營小心防範如有積匪糾黨情事立即嚴拿究辦不得養癰貽患仍不得妄拿驚擾就目前而論尙無糾黨滋事情形但廣西爲昔年洪逆倡亂之地山深箐密易藏奸宄匪徒出沒無定頻年節次搜剿總難悉臻靖謐更有土棍劣衿或因爭占山場或因挾嫌構釁輒糾匪徒擾害尤出意

計之外臣等惟有凜遵 諭旨隨時督飭地方文武防營認真查
察拿辦整躬率屬講求吏治以期戢暴安良仰副 朝廷屢念邊
陲之至意所有各防營駐紮之處及管帶銜名勇數理合開列清
單敬呈 御覽謹合詞恭摺覆 奏伏乞 皇太后 皇上聖鑒
訓示再現因 臣秉衡奉調出省往返函商是以覆奏稍遲合併陳
明謹 奏清單不載

奏報接護廣西撫篆日期摺 光緒十一年二月二十八日

奏爲恭報 微臣接護撫篆日期叩謝 天恩仰祈 聖鑒事竊 臣
於本年二月十六日接兩廣總督 臣張之洞電開總署初九日來
電本日奉 上諭廣西巡撫著李秉衡暫行護理等因欽此知會

欽遵查照到臣聞 命自天悚惶無地旋於二十七日准前撫臣
潘鼎新委員將廣西巡撫關防齎送前來聲明歷任移交之 王
命旗牌仍存省署敬謹收儲當即恭設香案望 闕叩頭謝 恩
祇領任事伏念臣籍隸奉天由江蘇直隸州縣蒙 恩簡任知府
改發山西仰邀 特達之知 簡放廣東高廉道浙江按察使均
未履任復奉 諭旨調補廣西按察使勦辦思恩土匪戡事蒙
恩賞加二品銜會以關外軍務喫緊撫臣奏派出省籌辦大軍後
路事宜駐紮龍州甫經兩月庸愚自省懼駑効之無能艱鉅交投
戴 鴻施之逾格茲復恭承 寵命權領疆符固非臣力所克勝
何敢不竭 臣心所當盡惟有將後路布置周密糧餉軍火隨時籌

運接濟前敵無誤要需而於地方應辦事宜亦當認真經畫遇有
緊要軍情邊務仍與督臣及廣西提臣往復函商熟籌妥辦不敢
以暫時攝篆稍涉因循以冀仰酬 高厚生成於萬一除將接印
日期恭疏 題報外所有感激下忱理合恭摺具陳叩謝 天恩
伏乞 皇太后 皇上聖鑒謹 奏 光緒十一年六月初四日
奉 旨知道了欽此

奏各軍克復文淵諒山等處分別獎卹各員并摺 光緒十一

年三月二十四日

奏爲官軍在關前隘擊退大敵克復一州一府及諒山省城連破
巢壘謹將戰勝攻取情形詳晰陳明並擇其尤爲出力及陣亡員

弁先行開列清單籲懇 天恩從優獎卹以昭激勸恭摺仰祈

聖鑒事竊自本年正月法人退出南關以後仍踞文淵該處右通長定府治芄葑爲去牧馬高平要道節據探報芄葑已有敵蹤如由水路順流而下即可窺伺龍州前撫臣潘鼎新方駐海村約會幫辦軍務前廣西提督馮子材分撥萃字五營扼紮扣波免爲敵據並囑臣元春督軍出擊即於正月二十八日親率提督陳嘉方友升副將陳桂林所部鎮南親軍毅新各營馳赴芄葑三十日將抵該墟敵已聞風先遁教匪猶聚扣波萃軍先於二十七日掩至進擊奪其大象一隻臣與馮子材慮其一戰即退必有狡謀保無麇聚文淵別圖侵突因即商同回顧關內仍前分紮關前隘幕府

塘一帶以重根本馮子材先在關前隘築長牆以衛營壘兼屯高嶺添挖深濠又以總兵王孝祺勳字八營禁萃軍之後臣在幕府督飭各軍高壘深溝以防內犯二月初一二日法騎哨探逼近南關均爲萃軍督帶遊擊楊瑞山擊退拾獲拋棄衣帽多件繳驗並據南官密報法由北甯運到麪餅偏碼不計其數馮子材料其必來圖我不如先發制人一面分告王孝祺及臣元春戒備策應挑派精銳於初五晚往襲文淵四更既入其柵敵伏不動而於兩旁高嶺先築數營環礮下擊勳軍哨長藍翎守備王金可中礮陣亡萃勳兩部勇丁死傷尤夥比及天明收隊初六日復與接仗相持至暮互有傷亡臣由幕府聞報馳援敵已退走次日初七大股直

撲關前萃軍先鋒礮壘新築未成遽爲所奪兇饑甚張及臣趕到督軍合力抵禦殲其黨衆不少我軍損折亦多維時前福建藩司王德榜統領定邊楚軍從山隘來助行距文淵八九里偵知萃軍先鋒營失利即揮隊折回向南關一帶抄截提督張春發翻過山坳見南關道有法衆數千驟馬二三百匹馱有軍火即時帶隊衝擊其衆接戰遂驅馱運退後王德榜督飭各營奮勇直前斃敵無數而敵攻關前隘諸營愈猛至夜方休馮子材戒飭將弁嚴陣以待臣亦豫調提督蔣宗漢廣武軍及方友升親軍各營齊至初八日清晨敵分三股來攻每股二三千衆臣與馮子材力守長牆派陳嘉蔣宗漢方友升陳桂林王孝祺各率所部分應左右兩路法

人炸礮動以千計聲震山谷子如雨落諸軍奮呼迎敵不避兇鋒敵多堅拒突有悍黨拚命搶濠直欲衝入長牆臣與馮子材立懸重賞激勵將士指揮奮擊我軍勇氣百倍爭欲立功勤軍哨長花翎都司劉治鰲許炳煊首先陷陣擊中法目數名正在割取首級劉治鰲忽爲炸礮中腦許炳煊忽爲槍子穿胸登時殞命諸軍氣憤填胸無不一以當百縱橫盪決敵勢不支於是臣與馮子材親督各軍大開營柵一擁而出敵衆中槍紛紛倒地自相踐踏死屍山積餘皆敗潰我軍從後追奔楊瑞山督帶五營適由扣波調回抄出摩沙沿途攔截綜計殲斃千餘檢斬數百奪取槍礮乾糧無算陳嘉督軍左嶺正與礮台踞衆力戰王德榜從甫谷橫出其後

敵勢遂分陳嘉亟飭各營爭搶山頂礮台蔣宗漢陳桂林及副將李應章等身先士卒一鼓而上奪回先鋒礮壘王孝祺擊敗右路一股亦與左路併力奪台綜計陣斬三晝及一二晝法目首級二十餘顆法教各黨三百餘顆各軍乘勝追出關外敵仍退入文淵時已二更即行收隊是日王德榜所部楚軍將近南關遇敵馱運軍火騾馬張春發等督隊攔擊斃敵甚多奪獲騾馬五十餘匹其前隊知軍火已無接濟移槍回擊楚軍張春發督軍力拒提督楊文彪肅得龍吳次漢副將周文斌等併力協助遊擊王榮勝守備歐福陞持槍步戰敵尤憚之各將弁奮不顧身爭先奪回失壘遊擊馮興賢欲奪他營甬近牆邊被礮擊中左膀負傷退回其壘遂

爲鎮南營所得王德榜督軍進勦直至文淵法人一夕數驚正可及時進取初十日午後馮子材督軍出關四路並進環攻文淵擊斃紅衣褲法日一人其衆奪屍而去如鳥獸散立將州治克復臣與馮子材會商進取王德榜別由閒道合攻邱驛十一日黎明楚軍進至板洗距墟十餘里敵欺其孤軍深入猝由太路悉衆來撲張春發楊文彪蕭得龍等各率隊伍分別迎抄敵遂大敗奪其營壘二座我軍進逼邱驛法衆憑濠死守副將石成玉等奮勇先登槍傷卻走環攻不下收隊回營十二日清晨臣等進次巴坪築營未定法先來犯當經商定分頭迎擊臣督毅新鎮南廣武親軍等營出中左二路馮子材督萃軍勤軍等營出中右二路中路甫及

界牌遇敵接仗擊斃其黨甚多左右兩軍已抄敵後其衆自相驚
亂王德榜已攻取東邊三壘我軍遂薄邱驪敵營如虎負嵎急切
未能遽下因復熟籌方略激勵戎行飭令戮力圖功務須滅此朝
食陳嘉蔣宗漢方友升陳桂林及提督和述廷等同率奮勇大呼
猛撲排牆互進殊死不退始將其壘攻克奪獲開花礮八尊軍火
無算各軍追至墟街敵復回拒遊擊陳國亮守備林作亨蔣得貴
千總吳芳儒均爲礮子穿胸陣亡遊擊陳顯道亦受重傷先是十
一日馮子材派楊瑞山督率數營繞道渡河期於十二黃昏齊伏
諒山城外至是各軍旣克邱驪諒山法衆震懼砍斷浮橋我軍追
至河邊敵皆撲水逃命淹沒不計其數各將領尋水淺處渡河三

路並集併力猛攻楊瑞山伏兵齊起大呼縱擊遂於十三日辰刻克復諒山省城其衆不虞我軍星夜飛來相率驚潰派隊追殺迭有斬擒復得開花礮八尊軍火米糧山積臣與馮子材王德榜等陸續入城一面出示安撫越民派陳嘉率鎮南各營六成行隊並挑毅新七營奮勇會同王德榜楚軍四營道員魏綱鄂軍四營赴谷松一路追勦馮子材派萃軍前後三營赴屯梅一路追勦都司馮紹珠把總梁有才率隊於十四日遇敵接仗由五台而至屯梅敵皆敗潰屯梅爲長慶府治當夜克復生擒五畫法目一名教匪一名其衆歸併谷松我軍次日又復進攻觀音橋破其巢壘陣斬五畫法目及法兵首級各一十五顆陳嘉王德榜及已革提督王

洪順等掃蕩而前
法目二畫兩名一
餘顆奪獲槍礮米
要駐紮據探法衆
前撫臣潘鼎新亦
旨革職即行回至
重寄敢不勉竭庸
外 生成雖去秋
力卻強敵迅奏膚
斃累千奪獲軍火

洵足以申 天討而快人心中外臣民同深慶幸 臣元春行間待
罪仰沐 矜全僥倖觀成實賴諸軍之力 臣秉衡身居後路又復
渥蒙 聖慈暫護撫篆尤不容一息偷安惟當黽勉圖維以期共
濟然非督臣通籌全局顧念兼圻多撥勁軍寬籌餉械安能奏效
若此之速 臣等連奉二月十三日兩次電 旨初七初八勝仗各
員蘇元春李秉衡查明請獎將士奮勇可嘉著蘇元春李秉衡優
給獎賞以示鼓勵等因欽此仰見 聖明策勵戎行微勞必錄之
至意查關前隘之捷各軍賞銀二萬兩楚軍賞銀一萬兩係 臣元
春及馮子材王德榜於臨陣時許給克復文淵州賞銀一萬兩係
馮子材許給均經照數提發又克復諒山省各軍賞銀三萬兩係

督臣原定之數亦由東省轉運局照數解交另有生俘斬馘法目
法兵功賞銀兩均經查驗明確分別等差按名發給綜計爲數亦
不下二萬兩臣等隨時散給宣布 皇仁將士感激涕零莫不歡
如挾纊其餘陣亡受傷員弁兵勇卹死養傷各項銀兩亦經查照
向章一體發給歷次在事尤爲出力人員節經各統領臚列戰功
逐案請獎未及隨時核辦自應併案保奏聽候 鴻施惟統領勤
字各營頭品頂戴記名提督廣西右江鎮總兵博奇巴圖魯王孝
祺統領定邊楚軍各營 賞穿黃馬褂頭品頂戴革職福建布政
使達冲阿巴圖魯王德榜統領鎮南軍各營 賞穿黃馬褂記名
提督新授貴州安義鎮總兵訥恩登額巴圖魯陳嘉均係曾任現

任總兵藩司大員又統領廣武軍各營 賞穿黃馬褂記名提督

達桑阿巴圖魯世襲雲騎尉蔣宗漢統領親軍各營 賞穿黃馬

褂頭品頂戴記名提督哈豐阿巴圖魯方友升分統定邊楚軍

賞穿黃馬褂頭品頂戴記名提督哲爾精阿巴圖魯世襲雲騎尉

張春發均屬職分較崇如何破格 施恩之處出自 聖裁非臣

下所敢擅擬其餘先後復城擣穴卓著戰功文武員弁核其勞績

先行擬請並將節次打仗陣亡員弁一併分別開列清單恭呈

御覽相應籲懇 天恩俯准從優給予獎卹以勵有功而慰忠魂

此外前敵後路在事出力人員仍俟臣等逐一查明再當彙案保

奏傷亡兵勇花名人數另行咨部辦理所有官軍擊退大敵克

復州府省城連破巢壘詳晰情形并先行開單分請獎卹緣由理
合合詞恭摺會同幫辦軍務前廣西提督臣馮子材兩廣督臣張
之洞由驛具 奏伏乞 皇太后 皇上聖鑒訓示謹 奏
清單不載
光緒十一年五月十七日留中

奏停戰撤兵並請飭催各省協餉摺

光緒十一年三月二十四日

奏爲遵 旨停戰依限撤兵會籌辦理情形此後邊防倍關緊要
擬請 飭催各省協餉以濟要需恭摺仰祈 聖鑒事竊臣等仰
荷 鴻慈忝膺重寄遵於龍州諒山營次先後受篆接事業經恭
摺專差齎進叩謝 天恩臣等自顧庸愚深懼不能勝任會值事
機得手之際敢不力圖補救以期早靖邊氛自二月十三日克復

諒山省城以後臣元春與幫辦軍務前廣西提督馮子材統領勦軍廣西左江鎮總兵王孝祺統領楚軍前福建布政使王德榜等商派各營分頭追擊累戰皆捷連克敵巢敵壘斬馘甚多奪其輜重敵猶分踞船頭郎甲添貲增黨其勢復張所有詳晰情形另由臣等會摺奏報臣等正在部勒將士寬籌餉械一經就緒即當大舉進攻關於二十五日接兩廣總督臣張之洞電稱總署二十二日來電本日奉旨法人現來請和於津約外別無要求業經允其所請約定越南宣光以東三月初一日停戰十一日華兵拔隊撤回二十一日齊抵廣西邊界宣光以西三月十一日停戰二十一日華兵拔隊撤回四月二十二日齊抵雲南邊界條文未定之

前仍恐彼族要挾背盟伺隙卒發不可不嚴加防範著傳諭沿海各省將軍督撫並雲南廣西督撫及各路統兵大臣督飭防軍隨時加意探察嚴密整備毋稍疎懈是爲至要等因欽此轉電到營當即通飭各軍一體欽遵查照停撤仍嚴防範勿墮狡謀初三復接督臣來電續奉三月初一日電 旨停戰期前法如進犯自應盡力堵剿停戰期後如彼前來攻撲該防營偵探確實即由將領照會法官告以現已停戰毋再進兵倘彼置若罔聞仍來撲犯即行實力勦辦一面將照會原文即電總署存案庶不令藉口我先開戰別生枝節等因欽此仰見 聖謨廣運冀策萬全凡我戎行同深欽感復經恭錄分別移行欽遵查照去後臣等一面往復函

商豫籌拔隊撤回之法因將前敵左路谷松中路觀音橋所駐各營先行撤退概於十一日拔隊回紮諒山邱驛一帶後路各營即於巴坪文淵那陽崗樸等處逐節分屯統俟二十一日撤進南關分布關前隘隴甯隘由隘幕府塘憑祥土州甯明州等處右路牧馬各營亦令先移鄴嶺繼紮歸順鎮安廳各隘均屬廣西邊界亦與款約相符此後邊防倍關緊要所有主客各軍除准軍鼎字五營業經遵 旨遣撤由臣等派員查點確數按名發給三關月餉以作川資交前撫臣潘鼎新帶同啟行另片陳明外尚有廣桂楚鄂等軍綜計不下八十營應如何分別去留容俟臣等函商督臣悉心經畫再行奏明辦理惟念太鎮兩府沿邊一帶幅幘遼闊路

徑紛歧布置防軍需營不少粵西庫款支絀籌餉無從關外用兵
兩年若非仰賴 聖慈飭撥各省關協餉源源解濟安能士馬飽
騰現計光緒九年分協餉四川一省尙欠解銀二萬九千五百兩
有奇十年分協餉湖北湖南四川江蘇江西五省共欠解銀一十
九萬五千五百兩現已由臣秉衡分別咨催迅籌速解相應請

旨飭下四川湖北湖南江蘇江西各督撫將未解之項趕緊分批
掃數解粵以濟要需各疆臣體 國公忠顧全大局自無不及時
速解共恤兵艱臣等實不勝延望之至所有遵 旨停戰撤兵先
籌大概及請 飭催協餉緣由理合詞會同幫辦軍務前廣西
提督臣馮子材兩廣總督臣張之洞由驛具 奏伏乞 皇太后

皇上聖鑒訓示謹 奏 光緒十一年五月十七日奉 旨知道
了四川等省欠解協餉著戶部查明咨催速解欽此

奏查明已革藩司敗退情形摺 光緒十一年三月二十四日

奏爲遵 旨查明已革藩司敗退情形及東西兩省奏報互異緣

由據實覆陳恭摺仰祈 聖鑒事竊臣秉衡於本年三月初三日

接准兵部火票遞到軍機大臣傳諭光緒十一年二月初八日奉

上諭廣西關外各軍疊次失利本日已明降諭旨將潘鼎新王

德榜革職並派蘇元春督辦軍務李秉衡護理廣西巡撫矣王德

榜自赴廣西寸功未立上年派署提督堅不受篆意存推諉去冬

挫敗未加嚴譴尙冀其自知愧勵勉圖功乃本年正月南關之

役據潘鼎新電稱馮子材王德榜二十八營飛催不至掣肘萬分等語究竟該兩軍因何奉調不到並王德榜挫敗退縮情形著李秉衡確切查明據實具奏毋稍徇隱關外各軍後路餉械仍著該護撫源源接濟勿任缺乏欽此復於初四日接准兩廣督臣密咨二月十九日總署來電本日奉 旨彭玉麟等電奏十三日攻克諒山等語將士奮勇進勦甚屬可嘉軍事功罪賞罰必期允當此次獲勝係何軍出力並連日攻勦情形著李秉衡據實秉公電奏前因王德榜前年派署提督竟不遵旨受篆豐谷挫敗大損軍威並催援南關不至是以降旨革職並寄諭李秉衡查辦該藩司豐谷之敗由於猛進失利及無後門槍等情潘鼎新前已奏及雖非

怯退其爲僨事則一惟潘鼎新奏稱戒令王德榜不可輕進該司不待期會遽行進紮該督則稱桂軍失期不至諒山之役潘鼎新奏稱催援罔應該督則謂徵調屢更彼此互異著蘇元春會同李秉衡將以上各節迅即確查具奏毋稍徇隱欽此等因臣元春亦接准咨同前由欽奉之餘仰見 聖訓周詳同深感悚臣秉衡伏思王德榜去冬失利在臣未至龍州以前及其調援南關在臣已至龍州之後初旣傳聞大略嗣經查確真情且復采訪輿評與臣元春互有質証當上年十一月間王德榜駐營崗板約桂軍規取船頭崗板無險可憑時虞敵制故先期移紮豐谷以待桂軍移拔會合進攻殊法目偵知悉衆來爭新壘王德榜督軍苦戰死傷頗

多因少後門槍且子藥已盡勢難抵禦雖失利由於猛進猶能退保車里力竭兇鋒桂軍聞警馳援已經無及既而法以全力直撲諒山潘鼎新初飭楚軍赴威坡攔頭迎擊繼令仍回車里抄襲敵後軍情變幻瞬息不同雖徵調屢更亦有不得不然之勢其後南關告急因王德榜遠在百餘里外未及立時赴到馮子材新軍初到糧械不齊均屬情有可原業經潘鼎新於正月二十七日奏報軍情摺內陳明當事機喫緊之時或不免有措詞過激之處及後通觀全局立論自易持平誠知早在 聖明洞鑒之中無待臣等之瑣瀆惟查王德榜夙稱能軍豐谷之挫固因力竭回屯後路南關之援亦實趕赴不及馮子材熟悉邊情素有威望新軍初到且

由東路以至南關程途復遠於王德榜其不能朝發夕至更屬實在情形迨至二月中關前陞文淵州諒山省歷次大捷復城擣穴馮子材王德榜尤爲卓著戰功臣等先經遵旨據實電奏在案所有查明王德榜一軍挫敗並非退縮及所奏彼此互異均屬有因緣由理合恭摺由驛具奏伏乞皇太后皇上聖鑒訓示再後路餉械由臣秉衡欽遵籌辦源源接濟合併陳明謹奏

光緒十一年五月十七日奉旨知道了欽此

奏克復諒山馮子材厥功最偉片

光緒十一年三月二十四日

再前廣西提督馮子材上年經兩廣總督臣張之洞奏派募統萃字全軍出關協剿嗣復奉旨幫辦軍務該提督昔曾二次出

關蕩平寇亂廉勇素著紀律嚴明爲廣越軍民悅服比以邊事孔
急起病田里重効馳驅當諒山旣陷關門迭警敵燄方張軍心不
固內地岌岌可危獨能憤激誓師先發制敵諸將領因而爭自圖
功戮力戰陣敵亦知其得衆疑有內應多自搏戰故此番斬馘眞
法獨多敵遂不支保關克諒大振 國威厥功甚偉該提督年近
七旬戰輒草履身先是蓋忠義根於天性故氣能鼓之不爲少衰
而其熟悉邊事群情所向尤爲無兩臣近在龍州於該提督知之
最悉迭奉 諭旨飭查何軍出力何敢壅於 上聞至署廣西提
臣蘇元春之屢著戰功久邀 聖明垂察他如王德榜之截擊克
捷陳嘉之勇冠全軍王孝祺蔣宗漢等之臨陣奮勇已將戰事情

形會同蘇元春合詞具 奏外 臣秉衡謹再附片陳明伏乞 聖

鑒謹 奏 光緒十一年五月十七日奉 旨知道了欽此

奏增募營勇親兵片 光緒十一年三月二十四日

再前撫臣潘鼎新在海村營次節據善後總局司道詳稱粵西伏莽未淨防範亦嚴值邊防喫緊之時恐有乘隙蠢動尤應加意防緝請派補用副將劉錫萬補用遊擊廖守祥各募勇一營駐紮省垣以備調遣又梧州爲兩粵扼要之區民情浮動據該府梁俊請撥防勇一二營以資鎮壓附近無勇可派商派補用遊擊刁經裕募勇一營赴梧駐防又據左江道呈稱前敵軍情緊急南甯府爲後路轉運重地請派補用遊擊岑國祥廣東候補知縣雷振瀛各

募勇一營協防郡城並願糧運各等情無不隨時批准照辦又查上思州與越南接界該處向有教堂尤難保無乘機勾結情事前撫臣遴派記名提督蘇元章募勇二營前往駐防以昭慎重又臣秉衡原奉 奏派辦理後路事宜駐紮龍州糧餉軍火咸集於此大軍齊赴前敵留防只有一營當經稟商前撫臣派記名總兵王正明募勇一營彈壓地方稽查遊勇另募親兵小隊三百名爲看守各局巡防要口之用各專責成亦均照准以上增募營勇親兵係於上年十二月本年正二月陸續成軍前撫臣未及奏明移交到臣除將招募成營日期勇丁名數造冊咨報外理合附片陳明伏乞 聖鑒訓示謹 奏 光緒十一年五月十七日奉 旨該

李思館奏請
年一
部知道欽此

奏遣撤淮軍鼎字五營片 光緒十一年三月二十四日

再臣秉衡於二月二十七日准前撫臣潘鼎新咨開二月二十五日准北洋大臣電開總署二十四日來電本日奉 旨據李鴻章奏潘鼎新電報交卸回里淮軍擬給資遣歸等語此軍前交蘇元春接統現在實存若干著蘇元春李秉衡確切查明妥爲遣撤即責成潘鼎新嚴加約束倘沿途滋生事端惟潘鼎新是問等因欽此轉電到營查淮軍既奉 旨遣撤長途數千里亟應籌給川資以免沿途滋事淮軍前在直東剿匪事平回皖均照每月餉數發給三關廣西距皖較遠水陸交挽惟餉項艱窘應請仍發三關以

期數用等因到臣查淮軍鼎字五營隨前撫臣駐紮海村距諒山百數十里臣元春未及查點此次回至龍州山臣秉衡督同營委各員逐一點驗綜計各營除願留撥補他營缺額外實存勇數二千三百八十三名內籍隸安徽者一千二百八十三名連營哨員弁共應發銀一萬七千三十四兩有奇其餘四川兩湖貴州兩廣各省者一千零八十八名以道途之遠近定川資之多寡酌擬每名給銀四川七兩兩湖六兩貴州五兩廣東四兩廣西三兩連營哨員弁共應發銀五千九百七兩有奇二共計銀二萬二千九百四十餘兩當飭收放局員照數提出分別備文送交潘鼎新兌收並發交營員分次散給責成原帶將領沿途約束毋許滋事徽省各

勇先於三月初四日隨同潘鼎新起程回籍各省勇丁亦於初八九十等日陸續啟行均尙安靜理合附片陳明伏乞 聖鑒謹

奏 光緒十一年五月十七日奉 旨戶部知道欽此

奏遵旨保獎出力人員片 光緒十一年三月二十四日

再臣等正繕摺間准督臣電開總署十三日來電本日奉 旨廣西官軍奮勇可嘉所有出力員弁兵勇著蘇元春李秉衡查明保奏候旨分別獎賞蘇元春馮子材等督軍力勦戰功卓著一併候旨施恩昨據蘇元春等電奏王德榜獲勝情形著俟奏摺到日再降諭旨等因欽此知會欽遵查照臣元春自知負咎方切悚惶乃蒙 逾格矜全尙復錄其勞勩 天恩高厚感激涕零竊念主客

各軍同心禦侮南關大捷遂克諒山非馮子材王孝祺王德榜諸臣之力不及此此次單開在事尤爲出力文武緣在外域迭著戰功併案請獎與尋常內地勦匪不同臣等仰體 皇仁不得不稍從優異茲復欽奉前因尤見 聖澤覃敷期於普徧之至意惟有乞 恩俯准照獎於以策勵戎行仍俟臣等逐一查明前敵後路出力員弁兵勇另行彙案保 奏理合附片陳明伏乞 聖鑒謹 奏 光緒十一年五月十七日留中

奏楊牛氏殉節請旌片 光緒十一年三月二十四日

再據統領廣武軍提督蔣宗漢轉據分省補用知府楊汝翼稟稱該員胞叔原任廣東高州鎮總兵記名提督二等男楊玉科有妾

牛氏隨孀在籍去秋因聞叔病請假入關就醫遣來侍疾十一月間由該員送至南甯知叔病痊早赴前敵未及送眷回里本年正月忽聞叔在南關打仗陣亡該員不敢聲張馳往龍州扶柩歸葬二月十三日行至南甯始向告知凶耗牛氏撫棺大慟痛不欲生三日不進勺水迨十五晚設祭哭奠之後乘間仰藥自盡解救無及當經殮殮與叔遺櫬一併運回湘省該氏節烈可矜稟請核明轉稟由該統領呈請 奏乞 恩予旌表前來 臣等查楊玉科爲國捐軀業經前撫 臣潘鼎新奏請從優 賜卹其妾楊牛氏遠來侍疾遽失所天矢志從亡實屬深明大義可謂忠節萃於一門合無仰懇 天恩准其旌表 臣等謹附片陳明伏乞 聖鑒訓示

謹 奏 光緒十一年五月十七日奉 旨楊牛氏著准其旌表
禮部知道欽此

奏現存營勇均照准軍營制給發餉項片

光緒十一年三月二十四日

再廣西營勇餉章凡招自鄰省者每名日支銀一錢三分米八角
三勺就本省招募者日支銀八分米八角三勺經前撫臣徐延旭
念出關各勇無論鄰省本省同罹瘴鄉未便輕重懸殊奏明將邊
防各營勇募自本地者每名日加銀三分在案嗣前撫臣潘鼎新
到粵接辦軍務除隨帶之蘇元春楊玉科方友升等湘勇各營及
由皖招募之鼎字等營准勇均按照准軍營制支食薪糧外而桂
勇各營仍照舊章支發各軍因餉章不一勇丁戰守同此艱辛往

往有所藉口自諒山挫陷後經前撫臣潘鼎新與署提臣蘇元春等查明各營勇除潰散傷亡並嚴汰疲弱外覈實歸併共計淮湘桂軍實存四十六營酌照淮軍營制勇丁每名月支銀四兩二錢營哨員弁什長親兵護勇火勇長夫等以次遞爲增減每營勇數均查照淮軍營制編補足額即自本年二月初一日起無論淮湘桂軍照此一律發給以昭畫一而期用命潘鼎新未及奏明即值卸事移交到臣覆查無異除飭善後局將餉章開列送部並將遵旨遣撤鼎字淮勇五營另片奏明外謹附片籲懇 天恩飭部查照伏乞 聖鑒謹 奏 光緒十一年五月十七日奉 旨該部知道欽此

奏關外諸軍撤回邊界布置邊防情形摺

光緒十一年四月初八日

奏爲關外諸軍撤回邊界布置邊防謹陳籌辦情形恭摺仰祈

聖鑒事竊臣等前將遵旨停戰依限撤兵會籌大概情形於本

年三月二十四日由驛馳奏在案當三月初一日停戰以後分

踞船頭郎甲五畫法曾備文知會請照津約分期撤兵還守邊界

臣元春在諒山營次遴派委員分赴其營覆文通好旋據歸報該

酋以禮接待言詞尙屬恭順隨飭谷松威坡觀音橋屯梅等處原

駐各軍從十一日起陸續拔營連環退紮即於二十一日齊進南

關臣與馮子材及諸統將公同商酌並函會臣秉衡從長計議亦

復意見相同竊思法越構兵已經三載此次大彰天討使其震

懾軍威赴津請和仰邀 俞允誠爲柔遠恤藩固圉安民起見凡有血氣欽感同深惟查粵西邊界分隸南太鎮各府幅幘遼闊幾及千里除鎮南水口平而三關之外隘卡紛歧指不勝屈設防貴扼其要因派記名提督安義鎮總兵陳嘉率毅新鎮南全軍紮鎮南關而以記名提督方友升親軍二營繼其後又派記名提督蔣宗漢率廣武全軍紮關前隘同扼諒山來路其撫標中軍一營紮羅隘以杜間道總兵馬盛治率熙字各營紮歸順州之平孟隴邦各隘總兵蔡簡宸率簡字一營紮鎮安廳之那坡百南各隘分扼牧馬保樂來路此爲主軍馮子材萃字全軍初紮平而關一帶茲於四月初一日奉 旨督辦欽廉一帶防務自應欽遵辦理所部

各營如何調紮由馮子材妥爲布置其王佳
隘以扼文淵來路王孝祺勤軍暫紮彬橋
景字十營分紮下凍土州一帶以通鎮邊
此爲客軍無事則訓練操防蓄養精銳務
仍當確探敵情毋稍疎忽如其背盟尋釁
兵以期無患臣等知識短淺忝膺重寄深
諸臣和衷共濟隨機應變殫竭血忱庶幾
意除俟續後如何情形隨時奏報外所有
由理合合詞恭摺會同督辦欽廉防務前
廣總督臣張之洞由驛具 奏伏乞 皇

再臣元春於三月二十三日進至龍州與臣秉衡等晤商防務旋於二十九日回駐憑祥土州居中調度合併陳明謹 奏 光緒十一年五月二十四日奉 旨覽奏布置邊防情形尙爲周妥仍著蘇元春等隨時會商妥爲辦理欽此

奏分遣鄂軍回鄂就餉片 光緒十一年四月初八日

再鄂軍四營於本年正月到防前撫臣潘鼎新即委湖北補用道魏綱統領請由鄂省發給十二關足餉業經附片 奏明在案另飭先行就地添募親兵小隊二百名由營支發月餉並令續增四營由楚招募所需招募經費亦經咨明湖南巡撫發銀六千兩即在應解廣西協餉項內動支嗣因停戰撤兵潘鼎新即飭該道停

止增募臣等會商將其四營調回龍州該軍夙資鄂餉道遠恐難及時解濟據其稟請回鄂就餉洵屬實情自應准行以示體恤已囑將親兵小隊二百名妥爲遣撤其餘衡勝一營安勝二營定勝一營仍交魏綱及總兵張壽安胡定坤分帶回鄂以專責成除分咨湖廣總督湖南巡撫查照外理合附片陳明伏乞 聖鑒謹

奏 光緒十一年五月二十四日奉 旨該部知道欽此

奏現在留防各軍營數片 光緒十一年四月初八日

再前撫臣潘鼎新更定邊軍各營餉章從本年二月初一日起酌照准軍營制一律支發共計歸併四十六營經臣秉衡於三月二十四日附片陳 奏在案除遵 旨遣撤准軍鼎字五營外續復

裁撤鍾德祥德字二營並將撫標中軍中前二營歸併一營右路
熙字六營歸併五營毅新鎮南廣武等軍歸併三十營汰弱留強
冀歸實用綜計先後撤去十營現在留防兵勇三十六營理合附
片陳明伏乞 聖鑒謹 奏 光緒十一年五月二十四日奉
旨該部知道欽此

奏調度諸軍會籌辦理情形摺 光緒十一年四月初八日

奏爲欽遵 諭旨調度諸軍會籌辦理情形恭摺仰祈 聖鑒事

竊臣元春於本年三月初四日在越南諒山營次承准軍機大臣
字寄光緒十一年二月初八日奉 上諭廣西關外軍務屢次失
利潘鼎新調度乖方本日已降旨將該撫及王德榜均即革職並

令蘇元春督辦廣西軍務矣王德榜所帶各營即著蘇元春接統
竭力整頓妥籌撫馭王孝祺各營及湖南新撥周家盛暨廖長明
所帶各營均歸該提督節制調遣此外潘鼎新所部各軍尙有若
干營均應歸併調度該提督久經戰陣現在膺此重任務當調和
將士聯絡軍心邊境要隘應如何分派扼守必先自立於不敗之
地再圖進取廣西巡撫已令李秉衡護理各軍後路餉械並諭源
源接濟該提督隨時互商辦理馮子材一軍前據彭玉麟等電請
調回廣東業經諭令與潘鼎新酌辦軍情瞬息千變該軍應否調
回著彭玉麟張之洞悉心籌商定議具奏將此由六百里各諭令
知之欽此遵 旨寄信前來跪讀之餘仰 聖訓之周詳冀戎機

之慎重當即恭錄移行一體欽遵查照維時諒山克復已閱兩旬且經奉 旨停戰撤兵不能不變通辦理所有湖南新撥之周家盛等營聞已早入粵境廖長明等營尙未由湘起程經 臣秉衡函商 臣元春飛書阻其前進復經兩廣督 臣電奏奉 旨依議遵即恭錄飭知分別折回中止以節糜費准軍鼎字五營先已奏明遣撤回籍尙有撫標中軍中前二營亦係潘鼎新隨帶在防經 臣秉衡派員點驗汰弱留強歸併一營冀收實用亦已交 臣元春節制調遣此外方友升統帶撫標親軍二營蔣宗漢統帶廣武軍十營先由潘鼎新撥歸調遣與 臣原部毅新鎮南熙字等軍除遣撤歸併外綜計尙不下四十營其王孝祺勤字八營與馮子材萃字十

八營均係東軍前者轉戰經旬克奏奇捷此後邊防兩粵唇齒相依應如何布置聯絡並顧兼籌商請督臣隨時裁奪惟王德榜統帶楚軍十營自湘遠來出關最久當奉命交臣接統其軍之日正所部膚功迭著之時臣以該藩司夙號知兵已著成效未便更張與臣秉衡往復函商似應暫緩交替以繫士心並將奉旨飭查各節逐一查明據實奏覆固知聖明洞鑒自有權衡惟應靜候恩施以昭激勸目下邊防布置正在需人可否將所部十營仍歸王德榜統帶以期將士相習有裨邊陲臣元春近在一方亦當遇事熟商不敢稍存歧視擬俟將來詳約既定無有他虞再當察看情形請旨辦理臣等爲通籌全局起見理合合詞恭摺會

同督辦欽廉防務前廣西提督臣馮子材兩廣總督臣張之洞由驛具 奏伏乞 皇太后 皇上聖鑒訓示謹 奏 光緒十一年五月二十四日奉 旨覽奏已悉王德榜一軍著仍遵四月二十日諭旨辦理俟事定後應撤應留由李秉衡等酌度奏明請旨 欽此

奏報省河陡漲成災妥籌撫恤摺

光緒十一年五月二十二日

奏爲省城河水陡漲淹沒田廬損傷人口災象已成現飭動款開倉妥籌撫恤恭摺馳陳仰祈 聖鑒事竊臣在龍州防所接見因公南來各員詢知四月以後桂林府屬雨水太多恐致傷稼正在行查辦理間接據藩司張夢元鹽法道慶愛會稟稱入夏以來附

省地方天雨過多河流不時泛漲五月初一日大雨如注連宵達旦山水同時漲發宣洩不及初二日自寅至辰河水陡長二丈有餘勢極洶湧維時城外樓居民人先見青氣倏變白氣後變黑氣水即隨之而至聞係上游發蛟近河民房多被沖倒對河東州一帶尤甚男婦丁口多有淹斃省城東西南文昌行春伏波等門被水灌入城內街市水深二三尺不等民房及書院廟宇亦有倒塌淹斃人口尙未查明實數據桂林府知府秦煥臨桂縣知縣全文炳稟報相同初四日水漸消退被水難民一時無從覓食該司道已飭桂林府督同臨桂縣會同紳士查辦撫恤並移參將蔡瑞祥邀集城紳往會東州紳士分設粥廠六處又派保甲局員會同城

紳在東西南北及文昌五門外分設粥廠七處先濟難民日食諸紳篤念桑梓幫籌賑恤甚屬急公民情亦尙安靜此次水勢泛濫臨桂沿河鄉村及上下游地方被淹之處恐已不少已遴委各員分赴上下游靈川興安全州陽朔平樂各州縣會同地方官查看被水輕重情形據實飛稟分別酌辦臨桂縣屬四鄉即飭全文炳確勘辦理等情前來臣伏查粵西兵燹之餘元氣未復伏莽猶多此次猝遭水災小民蕩析離居深堪憫惻若不及早廣籌賑濟必致流離失所值此邊防未定之時設有莠民乘機滋事關繫匪輕現在省城內外雖設粥廠而被災較廣就食維艱非寬籌賑撫斷難有濟臣已分別函飭先由司提用局存梧州歸公經費銀一二

萬兩就被災處所先行散放撫恤並令開倉放米分給災黎仍當另籌接濟一面遴委誠實可靠之員分赴被水各州縣會同地方官周歷災區確切查勘務將被災輕重情形淹斃人口若干迅速據實稟報以憑核辦倘有隱匿敷衍情弊定即從嚴參辦臣暫護撫篆奉職無狀致地方遭此奇災實深惶悚惟有力圖補救以期稍贖愆尤仍俟查明詳細情形另行奏報外所有省城被水淹沒田廬損傷人口災象已成現在速即動款開倉妥籌撫恤各緣由理合會同兩廣總督臣張之洞恭摺由驛馳陳伏乞 皇太后皇上聖鑒訓示謹 奏 光緒十一年六月十八日奉 旨另有旨欽此

奏續報被水災區較廣寬籌撫恤摺

光緒十一年六月初八日

奏爲續報被水災區較廣亟應寬籌撫恤以重民生謹陳辦理情形恭摺仰祈 聖鑒事竊臣前因省城河水陡漲淹沒田廬損傷人口災象已成先飭動款開倉妥籌撫恤曾將辦理緣由於本年五月二十二日由驛馳 奏並附片陳明梧州府城亦復被水併飭一體撫恤在案臣於拜摺後連日接據桂林府屬之義寧永福全州靈川陽朔梧州府屬之懷集藤縣潯州府屬之桂平平南貴縣泗城府屬之凌雲等州縣先後稟報各該地方紛紛被水總在五月上旬蓋因大雨連宵宣洩不及或江流盛漲或山潦橫行人口因有損傷田廬亦多淹沒實爲數十年未有奇災小民蕩析離

居殊堪憫惻竊維救災宜急救粵西之災尤急誠以地方瘠苦伏莽未清又際邊防未定若不迅速力籌賑恤廣爲撫綏設有莠民乘機滋事其患何堪設想臣與司道函商原提局存梧州歸公經費銀一二萬兩不敷分撥現雖設法勸捐仍屬緩不濟急因於前撫臣勞崇光昔年倡設同善局內提出當本銀一萬兩又於提存各閒款儘數搜羅動用銀一二萬兩由藩司張夢元暨善後局司道察被災重輕酌發款多寡遴委廉幹多員會同地方州縣分投確查核實散給務使民沾實惠不致有失所之虞此外續有報災仍當另籌撫恤統俟查明災歉詳細情形應徵本年糧賦如何分別請蠲請緩再當詳晰具奏籲懇 天恩以冀仰副 聖主矜災

恤民之至意所有被水災區較廣續籌動款撫恤緣由理合會同
兩廣總督臣張之洞恭摺由驛馳陳伏乞 皇太后 皇上聖鑒
訓示謹 奏 光緒十一年八月初五日奉 旨覽奏已悉疊經
降旨諭令妥籌撫恤并欽奉 懿旨發款賑撫即著李秉衡督飭
印委各員認真經理務使實惠及民毋任一夫失所欽此

奏謝從優議敘摺 光緒十一年七月初四日

奏爲恭謝 天恩仰祈 聖鑒事竊臣於龍州營次接准部咨光
緒十一年五月十五日內閣奉 上諭蘇元春李秉衡奏官軍迭
次克城破壘請將出力陣亡員弁分別獎卹一摺護理廣西巡撫
按察使李秉衡轉運後路糧械俾無缺乏允宜一體加恩李秉衡

著交部從優議敘欽奉 慈禧端佑康頤昭豫莊誠皇太后懿旨
蘇元春所部各軍尤爲出力兵勇著共賞給內帑銀五千兩馮子
材王孝祺王德榜所部各軍尤爲出力兵勇著共賞給內帑銀五
千兩由蘇元春李秉衡分別發給以示鼓勵欽此其陣亡之總兵
孫得勝等均著照所請分別從優議卹餘均照所議辦理該部知
道單二件併發等因欽此欽遵交出到部咨會前來當即恭設香
案望 闕叩謝 天恩並恭錄 諭旨咨行署提臣轉飭一體遵
照去後伏念臣忝居後路未効前驅幸將帥之和衷喜師徒之奏
捷方愧運籌鮮濟迺邀甄叙從優在 聖慈賞不逾時微勞必錄
而臣下力難負重圖稱靡由惟有將邊防應辦事宜會同署提臣

悉心經畫勉竭涓埃之報仰酬 高厚之施所有微臣感激下忱
理合恭摺具 奏叩謝 天恩伏乞 皇太后 皇上聖鑒謹
奏 光緒十一年 月 日奉 旨知道了欽此

李忠節公奏議卷一終

李忠節公奏議卷二

奏邊軍月餉酌中畫一摺光緒十一年七月二十二日

奏爲通籌邊軍餉章酌中畫一期歸節省而經久遠并前已發加餉邀免追繳據實瀝陳顛懇 天恩俯賜照准恭摺仰祈 聖鑒

事竊臣秉衡於六月二十四日准戶部咨議覆前奏營勇餉章暫行量予加增一片光緒十一年五月二十三日奉 旨依議欽此

恭錄咨照轉咨臣元春一體欽遵等因查鈔錄原奏內稱廣西剿辦洪逆軍需成案壯勇由本省雇募者每名日給鹽菜銀八分由鄰省雇募者每名日給銀一錢三分歷經查照辦理光緒四年間剿辦李揚才案內廣西本省壯勇口糧仍係照案發給并未加增

十年正月間前廣西巡撫徐延旭奏出關本省壯勇每名每日加銀三分當經臣部查與歷次銷案不符行令仍遵成案辦理在案今據李秉衡奏稱自本年二月初一日起無論湘淮桂軍均照准軍營制每名月支銀四兩二錢等語查各省營勇餉章向來多寡不同歷經分別支銷不能一律辦理即云廣西出關壯勇所領口糧較少亦豈能以每月向領二兩四錢者猝改爲四兩二錢之多除湘淮各營勇餉仍照各省向章辦理外至現在之廣西本省壯勇擬於每月支餉銀二兩四錢外酌加銀六錢共月給銀三兩以示體恤即自本年二月初一日爲始一俟撤回關內仍照舊章支給請旨飭下臣等遵照辦理等語在部臣誠爲慎重軍需杜涉

虛糜起見惟臣等通籌大局事有難行曷敢稍事遷就不以直陳
查桂軍節制本視他省爲輕使與他軍駐非一地統非一人猶可
無慮相形即如往年桂軍出關悉征土匪用防營支防餉勉支猶
易其後雖有客軍而餉出鄰省軍自爲統亦尙無辭迨前撫臣潘
鼎新隨帶湘軍來粵續又調募淮勇多營同一統帥同一地方而
湘淮餉厚始相形見絀不無繁言前者觀音橋紙作社等戰桂軍
尙能奮往其後拒敵谷松威坡兼旬苦戰卒以力弱不支還屯邊
隘每謂效命不後於湘淮營章獨絀於桂餉因之益多缺望又值
敵勢方張尤慮兵心渙散潘鼎新日擊情形因商同臣元春就各
軍汰弱留強減營增餉核實歸併共成四十六營自本年二月初

一日起均照准軍營制每名月給四兩二錢期於餉歸一律無所藉口維時臣秉衡督辦後路事宜奉文照辦潘鼎新旋即卸事未及奏明移交到臣隨於三月二十四日附片具陳奉旨該部知道欽此欽遵傳知各營莫不感頌皇仁共圖奮勉今部議援章核駁凡現在關外廣西本省之壯勇只准於例支二兩四錢之外加以六錢撤回關內仍循舊章臣等苟可遵照亦何敢再三陳請惟當諒山關門失控大局岌岌可危審機度勢若不立予變通幾於不可收拾乃自加餉以後桂軍皆爭先恐後萬衆一心未幾即有關前隘大捷旋經克復文淵諒山連下威坡山莊谷松等堅壘一轉移間軍事轉鈍爲利未始非餉歸一律之明效若於加餉既

發之後復勉從部議勢必仍行追繳縱不以後日號令不足示信
爲慮而勇丁日需食用旋得旋罄無論遣撤亡故早歸無著即現
在行間亦無從措手情實然也且當大軍撤關之日正戰士立功
之初 朝廷方錄微勞 懿旨特頒內帑鼓勵戎行有加無已臣
等又何能於甫經加增之餉詳約未定之時遽行議減旣難議減
於前即難追還於後此自二月以還與未奉部咨以前所發加餉
不能不邀免追繳之實在情形也邊關內外悉屬瘴鄉水土惡劣
龍州憑祥關前隘分設醫局自本年春起日施藥千餘劑瘴故勇
丁且不下二千餘衆而邊徼荒瘠多軍久駐物價百昂錢復奇絀
山蔬每斤至四五十文銀每兩僅易錢千二百文內外銀賤食貴

今昔異形如照日給八分舊例食用尙不能給又安能約束訓練
選用精強然當此軍用浩繁餉項支絀臣等受 恩甚重何敢不
力求撙節以爲持久之圖再四籌商計惟哀多益寡減湘淮餉所
不得不減即增桂餉所不能不增擬請毋論湘淮桂軍每營正勇
五百名月餉每名一律支三兩二錢較之本省舊章固多八錢而
視桂勇募自鄰省舊章每名已減七錢若計湘淮餉數每名且減
一兩矣查現存三十六營內湘軍十營淮軍一營桂軍二十營桂
軍募自鄰省者五營照部定舊章分軍分餉統計三十六營每月
共需餉七萬數千兩如臣等所請無分本省客軍均照每名月支
三兩二錢連營哨什長雜支夫價各款每營月需餉二千兩零合

三十六營而計每月共支餉七萬二千兩內外核與部章並無懸殊似此前後增減胥歸一律既無此絀彼盈之迹視前餉數亦所減實多仍與部臣節餉之意隱相符合畫一酌中殆無逾此此邊軍餉制必須因時制宜之實在情形也竊維邊關防務非計日所能蒞事善後實爲創始而沿邊袤延千數百里各軍均須緊屯隘口嚴加控扼日處蠻煙瘴雨之間與前此防軍撤回腹地者迥不相侔必有以固結其心志方足收他日緩急之用爲邊圉鞏固之謀合無仰懇 天恩俯念廣西邊軍久征關外克奏奇績於前所有已加餉銀免其著追七月以後各軍口糧即照三兩二錢一律支銷以示體恤而免紛歧其腹地防營仍照舊章辦理不得援以

爲例仍當隨時汰弱留強益期裁省臣等爲恤軍節餉核實經久起見是否有當仰懇 聖明洞察 恩准施行除將營制餉另章行詳細報部外臣等謹合詞恭摺會同兩廣總督臣張之洞由驛具陳伏乞 皇太后 皇上聖鑒訓示謹 奏 光緒十一年九月十五日奉 旨戶部議奏欽此

奏勘修鎮南關城并存撫義民摺

光緒十一年七月二十二日

奏爲勘修鎮南關城駐軍合力助工以期固圉節費并隨時存撫義民謹陳辦理緣由恭摺仰祈 聖鑒事竊臣等前因關外諸軍撤回邊界謹將籌辦情形於本年四月初八日恭摺由驛馳 奏五月二十四日遞回原摺後開軍機大臣奉 旨覽奏布置邊防

情形尙爲周妥仍著蘇元春等隨時會商妥爲辦理欽此跪讀之下感悚同深伏查粵西沿邊千數百里隘卡紛歧外通越南諒山高平太原宣光等省實屬防不勝防惟有嚴鎖鑰以扼要衝庶可安常而應變則修復鎮南關城實爲今日先務之急關去諒山四十里爲出越北圻正路前經轟毀一片焦土中外無阻臣等詳度熟商工難少緩由臣元春督飭駐防南關之提督方友升副將陳桂林先行籌辦臣秉衡馳往會同勘估工程查看舊基低下未得形勢關東數十武有土山關西里許有石壁皆高聳可俯瞰關外諸峯實據形勝就壁鑿磴以便上下築大礮臺於其巔土山頂亦築臺對峙傍關左右各副一小礮臺接兩山就高下築東西關城

分投存撫酌給錢米以資養贍並勘度荒地願留者發給籽種牛具蓋屋之資令其開墾沿邊安插以繫流亡之心各義民旋聞諒山一帶尙能安堵陸續歸去臣仍飭給路費此後惟當於內附者無使失所安土者聽其自然以廣皇仁而免事端臣等仍嚴飭各營認真稽查操練毋稍疎虞以期固圉綏疆仰副委任所有臣等履勘關門力籌修復並存撫義民緣由理合詞恭摺會同兩廣總督臣張之洞督辦廣東欽廉防務前廣西提督臣馮子材由驛馳陳伏乞皇太后皇上聖鑒訓示謹奏光緒十一年九月十五日奉旨知道了即著督飭員弁認真修築並將流徙入關越民隨時存撫關成工竣後即繪圖貼說呈覽欽此

奏知縣陳鳴謙起病調管差遺片

光緒十一年七月二十二日

再前任崇善縣知縣陳鳴謙於上年六月內因病稟請開缺回籍調理當經前撫臣潘鼎新照例題請開缺由司委員驗明陳鳴謙患病屬實並無捏飾規避應准回籍調理病痊尙堪起用復經題報在案嗣該員在省就醫尙未回籍業已調治痊愈例得由任所督撫驗看起病臣秉衡因布置邊防差委需人查該員樸誠廉勇歷著循聲堪以調管差遺據報於本年六月初二日到龍州行營驗看差遺惟病痊起用人員例應赴部引見今該員調管差委未能即行赴京擬懇天恩准以該員到營當差之日作為起病到省日期俟差遺事竣再行送部除飭將起病供結照例辦理咨

部查照外臣秉衡謹附片陳明伏乞 聖鑒訓示謹 奏 光緒
十一年九月十五日奉 旨著照所請吏部知道欽此

奏革道趙沃起解出境並飭催前進片

光緒十一年七月二十
二日

再臣秉衡於本年五月二十九日接奉軍機大臣傳諭光緒十一
年五月初四日奉 上諭已革道員趙沃前有旨定爲斬監候罪
名解交刑部監禁業經潘鼎新飭司辦理該革員究於何日起程
現在行抵何處著李秉衡飭催迅速前進毋許逗留一面將起解
日期先行奏聞將此傳諭知之欽此遵 旨傳諭前來臣查該革
員趙沃經前撫臣潘鼎新派員押解到省由司詳委補用同知張
鴻芬補用通判胡昱宣解赴刑部於本年四月二十四日由省起

程是月二十九日已入湖南永州府境趨行前進現在計當行過
湖北地方除恭錄 諭旨咨會沿途湖北河南各撫臣飭催迅速
前進外理合附片陳明伏乞 聖鑒謹 奏 光緒十一年九月
十五日奉 旨知道了欽此

奏飭署藩臬各缺片 光緒十一年七月二十二日

再臣秉衡於七月初七日欽奉初六日電 旨張夢元已調補福
建布政使著李秉衡傳知即由廣東乘輪迅赴新任毋庸來京請
訓廣西布政使著該護撫派員署理欽此當既恭錄行知張夢元
欽遵辦理自應遵 旨派員署理藩篆以便張夢元交卸起程查
鹽法道慶愛在粵年久熟悉諳練前曾歷署兩司印務措置裕如

堪以署理藩司篆務臬司係臣本缺前經帶印出省駐紮龍州辦理後路事宜本年舉行乙酉科鄉試兩司政務較繁非有在任之員難資統馭應另遴員接署惟在省別無實缺司道左江道彭世昌係正途出身甫經調省委充監試難以兼顧查有候補道沈康保老成穩練辦事細心堪以署理臬司篆務慶愛所遺鹽法道員缺查有桂林府知府秦煥堪以暫行兼護除分檄飭遵並將臬司印信派員齎送省城交沈康保接收外臣謹會同兩廣總督臣張之洞附片具 奏伏乞 聖鑒謹 奏 光緒十一年九月十五日奉 旨吏部知道欽此

奏謝簡授廣西布政使摺 光緒十一年七月二十四日

奏爲恭謝 天恩仰祈 聖鑒事竊臣於龍州防次接准部咨光緒十一年六月十一日奉 上諭福建布政使著張夢元調補廣西布政使著李秉衡補授等因欽此當即恭設香案望 闕叩頭謝 恩伏念臣奉職粵西籌防後路初陳臬事愧駑効之無能暫護疆符感 鴻施之逾格茲復仰承 簡命擢任藩司殊恩旣畀乎再三自省彌增其兢惕查藩司有察吏理財之責桂省當防邊善後之時本年五月上旬各屬地方被水災區較廣臣咎難辭贍軍貴裕餉需率屬先嚴操守念流民之未輯賑恤宜周慮伏莽之猶多清除不易如臣禱昧深懼弗勝現計撫臣張曜來粵需時奉旨令臣仍護撫篆臣俟將來交卸後另行奏請 陛見冀祇聆

乎 聖訓俾有遵循期殫竭夫愚衷勉圖報稱庶幾仰答 高厚
生成於萬一所有微臣感激惶悚下忱理合恭摺叩謝 天恩伏

乞 皇太后 皇上聖鑒謹 奏

奏統軍大員陳嘉積傷病故請優卹摺

光緒十一年八月初三日

奏爲統軍大員積傷病發在營身故臚陳生平戰績籲懇 天恩

俯准優卹並請將所遺員缺迅 賜簡放恭摺仰祈 聖鑒事竊

統領毅新鎮南各軍貴州安義鎮總兵記名遇缺 簡放提督頭

品頂戴訥恩登額巴圖魯 賞戴花翎 賞穿黃馬褂雲騎尉世

職陳嘉於本年七月初四日在龍州營次傷發病故 臣元春等親

理其喪妥爲照料後事另行遴員接統所部各軍所遺安義鎮總

兵員缺緊要相應請 旨簡放以重職守查該故員陳嘉係廣西
荔浦縣人起家軍旅忠勇性成當同治七年隸臣元春部下勦辦
黔苗委帶勇營大小數百戰克府廳州縣城以十計苗寨苗巢以
百計全股殄滅無遺苗疆肅清以該員功爲最光緒七年因臣丁
憂給假治喪撫臣奏派該員代統臣軍駐防寶慶時逾四月深得
軍心上年三月隨臣來粵勦土匪莫夢弼於思恩臣秉衡始與識
面見其樸誠勇敢口訥訥不言功而每戰身先非他將比心竊異
之及其出關禦敵也初捷於船頭聯捷於陸岸於紙作社敵驚奇
勇爲之奪氣冬暮敵大至該員指揮將士鏖戰數晝夜力不支受
創昏倒左右掖之去旣覺揮刀叱退者誓不還卒能激勵將士轉

敗爲功今春二月遂有關前之捷旣而克文淵復諒山悉破威坡
山莊堅老谷松諸壘臣等奏蒙 恩旨褒嘉 特頒珍物並 賞
給頭品頂戴雲騎尉世職是其功績卓著盡在 聖明洞鑒之中
惟該員隨臣元春十有七載竭忱報 國實有同心今臣奉 命
督辦邊防正資臂助乃因傷病卒殞厥身邊事方殷使人扼腕蓋
其老於戰陣久歷瘴鄉積病已深被傷尤重當谷松初下病正亟
強之回諒聞警呼卒昇以行仍赴軍三月班師駐關前隘病加劇
臣秉衡遣醫往視屬來龍就醫不聽臣因勘修南關工程之便復
赴其軍敦勸歸後屢函促之始來來已不可爲矣傷遍體如刻畫
然損一目嘗潰脫碎骨盃許鉛子未出者尙十數每云歷戰陣出

血過斗年未五十時苦不支此番受峻補之劑百餘卒無起色固知其非死於病也疾革部將來視猶問營務敵情及關城工作無他語臣元春適因會商防務來龍州與臣秉衡日一往視仍喃喃計軍事臣秉衡竊謂多年心目間似此將領實未數遇時艱未已需才孔殷如陳嘉其人用之捍邊衛內未嘗不有裨益與臣之洞函牘論及亦深韙其言不虞其中道云殂此臣等所以同聲嘆息深爲國家惜良將之不易得也合無仰懇天恩俯賜破格優卹並將該故員生平戰績宣付史館以彰忠藎而勸勤事出自高厚矜全臣等謹合詞恭摺山驛具陳伏乞皇太后皇上聖鑒訓示謹奏光緒十一年十月初五日奉旨另有旨欽此

奏提督劉先胥等陣亡請卹片 光緒十一年八月初三日

再臣元春所部各軍及臣秉衡隨帶員弁凡有打仗陣亡積勞瘴故者均經隨時查明奏請 恩施飭部議卹在案嗣據統領升字各營記名提督方友升統領勤字各營右江鎮總兵王孝祺原統龍字各營記名提督董履高分統毅新各營補用副將陳桂林及營務處道員陳嘉績等先後呈報頭品頂戴記名提督額騰依巴圖魯劉先胥在鎮南關督勇修工積染炎瘴身故兩廣委用記名提督達春巴圖魯王正國因在營患病觸發舊傷身故又游擊陸鳳山守備朱允成蔣得貴董正旭千總董履功衛千總董正善外委董履宗六品軍功李本宏均於上年十二月在谷松威坡打仗

陣亡拔補把總李禎祥六品軍功鍾祥麟均於本年二月在谷松
打仗陣亡又同知銜山西候補知縣楊耀彬鹽提舉銜廣西試用
通判黃芝擬保縣丞分省補用湖南廩生王宗亮廣西前補永甯
州吏目吳家璟廣西候補巡檢譚景麟州同銜廣西試用典史王
湜猷擬保教諭貴州歲貢生吳宗杰均係派在前敵或轉運軍火
或採辦軍糧或偵探軍情無不備嘗艱險卒以積勞中瘴致病先
後身故臣等覆查該各故員或爲 國捐軀或急公效命若不乞
恩賜卹何以風示後來惟有仰懇 聖慈准將提督劉先胥王
正國二員照軍營立功後瘴故例從優議卹游擊陸鳳山等十員
弁照陣亡例從優議卹知縣楊耀彬等七員名並照軍營立功後

瘴故例從優議卹以慰忠魂凡在戎行同深觀感再龍州舊有昭忠祠係前提臣馮子材捐資創建奏明有案臣等擬將近年用兵關外歷次陣亡瘴故各員弁悉行附祀其中容俟查明列祀再行造冊咨部合併聲明臣等謹附片陳請伏乞 聖鑒訓示謹 奏

光緒十一年十月初五日奉 旨劉先胥等楊耀彬等均著照軍營立功後瘴故例從優議卹陸鳳山等均著照陣亡例從優議卹餘依議該部知道欽此

奏查明已革撫臣被參各款摺 光緒十一年九月二十五日
奏爲查明已革撫臣被參各款謹據實覆陳恭摺仰祈 聖鑒事
竊臣於本年五月二十九日在龍州防次承准軍機大臣傳諭光

李思館不考諸 卷二十一
緒十一年五月初四日奉 上諭有人奏已革廣西巡撫潘鼎新營私誤國請旨治罪查抄一摺據稱潘鼎新欺飾僨事退縮媚嫉罪不容誅其散放軍餉乾沒剋扣種種漁利且有販賣烟土運銀還家情事以致大失人心查辦趙沃受賄十萬金藉藉人口等語前因潘鼎新調度乖方業已降旨革職茲據所奏營私貽誤各節如果屬實厥罪甚重著李秉衡張夢元按照所參各情秉公確切查明據實具奏毋得稍涉瞻徇自干咎戾原摺均著抄給閱看將此由五百里各傳諭知之欽此等因欽奉之下臣當即恭錄行知布政使臣張夢元欽遵一體確查去後臣一面遵派委員接見屬吏逐一查訪詳稽案牘考證人言謹爲我 皇太后 皇上陳之

如原奏內稱去歲八月十四日陸岸之役所攻非賊無所謂勝十
八日賊犯船頭蘇元春接仗營官陣亡者三受傷者五兵勇死者
千計所殺眞洋人四教匪數百而蘇軍精銳殆盡遂退谷松二十
日賊犯郎甲四面合圍親軍數十人翼方友升以出計方軍生還
者二百餘人周壽昌援軍生還者六十餘人而營官二十餘員兵
勇四千餘名全行覆沒潘鼎新乃有疊獲大勝之奏一節臣查陸
岸船頭之戰八月十四日提督蘇元春督飭將士在陸岸對河接
仗斬殺甚多南岸亦被我軍轟毀兵船一艘十八日彼船駛至陸
岸水陸撲犯復經蘇元春與總兵陳嘉分兵鏖戰乘勝進擊挫其
兇鋒迭次獲勝尙非虛飾然兵凶戰危將士奮不顧身實有損折

所稱蘇軍精銳殆盡則亦傳聞之過郎甲一役方友升力戰受傷官兵死傷較多並無全行覆沒之事惟時當炎熱瘴疫交侵因傷因病後先死者近三千人曾經奏明有案原奏又稱十月二十八九日我軍又敗陣亡官勇甚衆所得賊級則土人貪賞殺其外出偵探者潘鼎新又有紙作社大捷之奏一節臣查紙作社之捷蘇元春所部各營或當晚埋伏或次晨接應陣斬兵目三畫二畫一畫四名兵級十一教級二共計十有七顆解經潘鼎新驗明飭發龍州懸示商民共見莫不稱快其爲並非土人殺其偵探可知原奏又稱十二月二十二日谷松慶戰諸軍請領偏碼不得敗守威坡二十七日賊復來犯正力戰間潘鼎新忽撤龍字等五營回諒

山各軍驚恐二十八日再戰遂至大潰潘鼎新聞前軍告警即於二十八夜棄諒山觀音岩逃回南關本年正月初五日逃回幕府初九日逃至憑祥晚得賊入南關之信復宵遁海村再遁龍州一節臣查谷松一路蘇軍紮當敵衝十九日禦其大股苦戰三晝夜軍皆力竭退守威坡並非因請領偏碼不得之故總兵董履高身被槍礮重傷昇回醫治所部龍字營勇亦復調紮諒山蘇軍續經血戰六晝夜將士傷亡接踵終以援乏不支潘鼎新於二十九日回守南關蘇元春仍在關外堵扼正月初五日總兵楊玉科親率所部歸至文淵以守關自任是晚潘鼎新遂至幕府初九夜復至憑祥次早扼紮海村并無直至龍州之事原奏又稱王德榜一軍

本欲駐軍高平爲諒山犄角而潘鼎新故令僻處那陽其地水土惡劣病歿者半且進則策應無人守亦轉運莫繼憤恚獨出以致於敗馮子材一軍於十二月到防二十七日馳至尙樸距諒山僅六十里潘鼎新飛員阻止勒回派站正月初三日馮軍馳至南關潘鼎新面晤馮子材辭色慚怒有守關何須萃軍之語又勒回派站一節臣查王德榜楚軍當二次出關之初自請獨當高平一路潘鼎新業經商定後因敵勢偏重東南一面派紮那陽王德榜約貴軍規取船頭先期移紮豐谷詎新壘甫定彼族偵知併力來爭桂軍馳援不及王德榜督軍苦戰子葍已盡勢難抵禦退保車里尙非令處僻地策應無人憤恚致敗馮子材正月初三日見潘鼎

新面商戰守之策答稱守關不須萃軍尙有廣武等軍足恃仍令速回派站以顧東路詢據王德榜面述移查馮子材咨覆均屬相符原奏又稱自潘鼎新抵粵舊時營勇全數裁撤而欠餉或三四月或五六月每營僅予銀千兩令其自散軍士大譁降賊者爲之力戰不降者麤聚高平諒山之間梗阻運道潘鼎新乃按月報銷乾沒鉅款將領薪水初許每月百金旋改三十金採辦物價先令墊給繼則多方勒措悉以入己文武員弁紛紛求去幕府一空一節臣查潘鼎新到龍州之初舊時營勇並未全數裁撤要皆汰弱留強歸併足額曾經奏明遣散二十餘營既非足額又非原人勢難補算前任欠餉且亦實在無款可籌祇能分給遣資每營大小

不一或給二千數百金或給一千數百金不等詢據蘇元春面稱
上年六月潘鼎新商請該提臣將已革道員趙沃原帶右路防軍
十六營飭派副將馬盛治前往遣撤經趙沃解繳銀一萬一千五
百兩又龍州收放局一次解銀四千九百五十一兩二次解銀三
千六百兩綜計二萬五十一兩均經散給清訖復詢據補用道趙
濟川面稱上年六月奉派遣散固邊右固邊中克字等三營共發
過實銀三千三百兩另試用知府魏綬先遣散固邊副前固邊副
中捷字等三營所發銀數亦同是潘鼎新原奏之言尙非假飾至
關外用兵已久歷年散勇彼募此汰覓食無方流蕩不歸日聚日
多尙非潘鼎新任內始有之事將領薪水每月百金並未改少亦

無勅措墊給採辦物價之事若謂員弁求去幕府一空由於瘴故者多人皆視爲畏途不願久留並無別故原奏又稱本省月餉各省協餉均是庫平而放餉則用省平繼則改用湘平每百平餘四兩每月已剗扣六千餘兩又龍州銀一兩易錢一千五百有奇潘鼎新令釐局解錢每兩作錢一千五百餘而發餉則僅予一千三百文計每餉銀一萬得利千餘金臨戰懸賞戰後輒騙去歲五月觀音橋之戰騙賞銀七千餘兩統將黃玉賢受逼而死在南寧時即買雲南烟土十餘萬運往廣東一帶販賣嗣以運回舊軍裝爲名運銀還家共已六次每次三萬沿途派撥扒船護送人人共知一節臣查桂軍發餉向不扣平通省皆然自潘鼎新到營後因隨

帶湘勇皆扣湘平遂將關外各營勇餉一律每兩扣湘平四分有款可稽其提解南甯釐錢到營係備發襍支各項之用并非抵發勇餉統將黃玉賢督戰有功瘡勞瘴故業經潘鼎新奏請 賜卹當觀音橋獲勝之後黃玉賢稟請發給賞號潘鼎新批飭不發事誠有之不聞有因騙賞銀受逼而死之說至於販賣烟土運銀還家查烟土至十餘萬運銀至六次之多自難掩人耳目歷向南甯行店沿途扒船逐一查明僉稱並無其事尙屬可信原奏又稱查辦趙沃一案受賄十萬金藉藉人口諒非無因而曖昧不明難以究詰一節臣查趙沃因北甯失守獲咎奉 旨拿問潘鼎新委員審訊欲令繳還已領所部各營二月分餉銀趙沃以時逾數月餉

見發_法勢難追繳自問辦理不善辜負 天恩情願將該革員名下領過薪水公費銀兩全行繳出另行籌款湊足萬金呈交營務處遣解蘇元春行營藉資遣撤各營之用嗣因不敷支發又續措解一千五百兩迨八月中旬潘鼎新忽飭後路糧台迅速籌款照數發還並經附片奏明趙沃既治其罪即不應再令罰款雖餉項萬分支絀亦非區區萬金所能補助等語始而趙沃不敢領回及至冬間奉到 批旨始於十一月內領出詢之蘇元春及俸滿開缺龍州同知蔡希邠等所言無異此固在官在營文武員弁所共見繳項係屬湊助遣資有趙沃親供及營務處申文可據其非受賄不辯自明以上各情均係就 臣見聞所及據實覆陳既不敢稍

涉瞻徇自干咎戾亦不敢率行附會有負 聖明必求覈實之心
謹恭摺由驛具 奏伏乞 皇太后 皇上聖鑒訓示再此案奉
旨飭派臣與張夢元確查因該藩司在省供職未悉其詳密商
由臣就近查明會銜具奏嗣張夢元調補福建藩司已於七月二
十一日交卸赴任距粵愈遠訪詢益難接其來稟云已自行奏明
不及附銜覆奏是以未及會銜合併陳明謹 奏 光緒十一年
十一月十八日奉 旨知道了欽此

奏查明知府延昌等被參各款摺

光緒十一年九月二十五日

奏爲查明知府等員被參各款據實分晰覆陳恭摺仰祈 聖鑒
事竊臣於本年七月初十日在龍州防次承准軍機大臣傳諭光

緒十一年六月初八日奉 上諭有人奏廣西署南甯府知府延昌貪鄙不職於積穀行鹽等事自佔商股並欲借收鹽規索賄任用勇日家丁種種不法知縣張秉銓奉旨勒令回籍仍敢潛來粵西招搖撞騙因案索賄請飭查明分別革辦等語著李秉衡確切查明據實參奏原片著抄給閱看將此傳諭知之欽此等因即恭錄 諭旨並抄原片密行兩司遴派廉正可靠之員前往南甯按照所參各款逐一確查據實稟復隨據署布政使慶愛署按察使沈康保詳委柳州府知府熊壽山即由任所就近馳赴南甯查覆去後臣於九月十五日接熊壽山來稟據稱張秉銓查已參革其自稱爲調任藩司張夢元義子該府前在省寓並無所聞其向陳

得貴索賄招搖撞騙既經控告有案犯事係在關外南甯無從察訪應請照案咨查該府專就延昌被參一案連日訪察自紳民商賑以及文武寅僚旁詢周諮互相印證應照原參各款逐一分晰據事直陳如原參延昌貪鄙不職積穀防邊給引行鹽紳民招商集股初有端倪該府始欲不費一錢自佔數股繼欲借收鹽規索賄五千因不滿所欲竟至商局擄取招牌踏破燈籠一款查此件延昌奉文行縣飭照部文如何行鹽積穀通諭國防局紳會議稟覆核辦嗣據前任全州學正周南候選府經歷程湖邀集股分稟認試辦經縣稟府據情轉稟尙未奉批該紳等即請縣發告示取萬豐字號於上年九月二十日開張適是月二十九日爲前明王

文成誕期城鄉士紳畢集舉人莫以瑩等遂同各士紳二十餘人
赴府以病民等詞具稟延昌傳問周南等責其何以並不候批遽
行開張限令三日閉歇至十月初五日周南等仍未閉歇復傳周
南未到延昌即至該鹽行將萬豐招牌摘取並踏破燈籠此禁閉
鹽行之情形也至於始欲不費一錢自佔數股繼欲借收鹽規索
賄五千訪詢並無其事又原參勇目彭姓私收妓規一款查延昌
任內並無彭姓勇目惟由潯隨帶至邕之龐啟貴管帶府署扒船
稽查河道曾有私收河下流娼規費之事又原參家丁劉姓強取
遷龍司巡檢潘保治之妻爲妾一款查潘保治爲現任南甯府同
知潘保泰族弟當向潘保泰詳問據稱潘保治原娶王氏前在常

州原籍因髮逆陷城殉難及來廣西續娶曹氏復因生產身故隨納曹氏使女從主姓曹氏爲妾生一子二女現與潘保泰眷屬同住省城另有後買使女名采香於潘保治病故後經曹氏憑媒嫁與延昌家人劉麻爲妻潘保泰與潘保治既係同族兄弟其言自屬可據劉麻既非強取職官之妻爲妾延昌自無所用其袒苴惟勇目私索流娼規費延昌難辭失察之咎其禁閉鹽行因未奉批准行遽先開辦致爲閩邑士紳稟控恐釀事端限令閉歇不遵自往擷取招牌本無不是惟踏破燈籠一舉未免稍形激切然究無佔股索賄之事尙屬爲公起見等情並據兩司據稟核明轉詳到營臣復密咨左江鎮總兵劉光裕因其在任多年且與延昌同城

所參各款自必確有見聞應併由該鎮秉公查覆期歸核實旋准
劉光裕查明咨稱實因上年九月開設官鹽鋪後各鄉紳民來城
祭祀王文成聽說鹽鋪開張僉以爲於民不利一時鼓噪欲去不
依一面公稟道府延昌恐人衆滋事飭令閉歇不聽親往摘取招
牌商民悅服餘與熊壽山先後查覆大致相符臣維南甯紳民招
商集股試辦行鹽原屬遵奉部行之舉但欲地方有裨必須衆論
僉同當上年稟辦之初臣在臬司任內風聞該郡士民慮增鹽價
有防日食不欲舉行而二三嗜利壟斷之徒慫恿有司遽行開辦
甫及一旬城鄉士紳數十人赴府公稟若非延昌顧念地方押令
閉歇幾致激成事端臣於十二月間道出南甯采訪官吏賢否衆

論咸以延昌此舉能願輿情羣相歌頌如果簞簞不飭臣亦何敢
稍事姑容即如前署臨桂縣補用直隸州知州張秉銓自丁憂後
夤緣差遣派赴軍營遇事招搖人言藉藉既而回籍服闋起復重
來省城日以營求委署爲事經臣於六月初八日附片具 奏甄
別庸劣各員以該員趨附干求廉隅罔恤請即革職業經奉 旨
欽遵在案原參謂其自稱爲張夢元義子一節委員熊壽山稟稱
在省並無所聞 臣復密飭司道府縣等一體訪察亦據復稱並
未聽人傳說原參又謂陳得貴一案該員向其索賄萬金許以無
事先收贓銀千兩已而陳得貴正法其子向督撫具呈追索原贓
有案一節 臣已咨請兩廣督 臣查覆一面飭承檢查前撫 臣任內

檔案並無陳得貴家屬控追呈詞並准督臣張之洞咨覆飭查檔
案本任及前任均無陳得貴之子赴控呈詞既未控追其先收贓
銀千兩之說自屬傳聞未確張秉銓業經革職既據查無其事應
請免其置議前署南甯府知府延昌早經飭回潯州府知府本任
被參各款亦已確切查明並無佔股索賄及袒芘家丁情事惟於
查河勇目私收流娼規費該府失於覺察究有不合相應請 旨
將延昌交部照例議處所有查明知府等員被參各款據實覆陳
緣由理合恭摺由驛具 奏伏乞 皇太后 皇上聖鑒訓示謹
奏 光緒十一年十一月十八日奉 旨延昌著交部照例議
處欽此

奏知縣陳鳴謙瘴故請卹片 光緒十一年九月二十五日

再前任崇善縣知縣陳鳴謙上年因病開缺臣查該員樸誠廉勇以即用知縣到省歷任永淳縣上思州補崇善縣實心實政民有去思邊地需才知其在省調治已愈札調來龍業經附片奏明正當修築關城即委馳赴鎮南關辦理要工深資得力其時瘴癘方盛關軍死亡相繼或勸其宜少自恤若弗聞者仍日雜工作於瘴雨溽暑中不爲稍輟卒以致疾在營瘴故良吏難得臣於該員實惋惜之合無仰懇 天恩飭部將前任崇善縣知縣照軍營瘴故例從優議卹以爲實力將事者勸出自 逾格鴻慈臣秉衡謹附

片陳明伏乞 聖鑒訓示謹 奏

奏據情密懇勅封越南嗣子摺

附單
三日

光緒十一年十月初

奏爲准雲貴督臣密咨越南國王嗣子遣使齎函求代奏請 錫

封頒發國印業經繕呈原書請 旨定奪抄送摺稿並遞到該國

與臣書函謹將原書照繕呈 進恭摺密陳仰祈 聖鑒事竊臣

於光緒十一年九月十六日在龍州防次准雲貴總督臣岑毓英

密咨本年八月二十八日據統帶石頭灞灑各汛防營總兵覃修

綱報稱越南遣使禮部尙書充協督軍務阮光碧等行抵滇境新

街地方詢據稱說奉越南國王嗣子阮福明遣齎書函二封一投

雲貴總督一乞轉遞廣西巡撫懇予一體據情代奏籲請 錫封

等情並將原書二封呈繳到營除將原書繕呈 御覽請 旨定

專抄送摺片各稿密咨查照並將與臣書函轉遞前來臣查越南
國久列藩封疊遭外侮議和而後仍橫被驅逐是既與條約第一
款內所謂驅逐原指越之匪黨而言者顯係相背豈惟失信於我
朝抑亦貽譏於外國該國王嗣子阮福明播遷廣治何以圖存
所叙各情殊堪矜憫雲貴督臣岑毓英通籌全局披瀝上陳擬請
飭下總理各國事務衙門與法人理論如何存越宗社如何安
置越王務使各得其所民心悅服彼此通商方無窒礙等情誠爲
切中竅要臣管蠡之見亦實相同伏念 聖明自有權衡無庸再
事瀆請謹將遞到該國與臣原函繕單恭呈 御覽除咨覆雲貴
督臣外所有准咨送到越南國王嗣子書函據情代奏緣由理合

恭摺由驛密陳伏乞 皇太后 皇上聖鑒訓示謹 奏 光緒
十一年十二月初一日留中

謹將越南國王阮福時嗣子阮福明齋來原函照繕清單恭
呈 御覽

越南先國王阮福時嗣子阮福明肅稟 天朝護理廣西巡撫部
院李大人臺前竊下國仰蒙 天朝封植預列職方數百年於此
矣福明先父王阮福時於光緒九年六月十六日以病奄逝國人
推其弟阮福昇權攝國事嗣而阮福昇自料衰病身荷弗堪是年
十一月初一日推讓於福明先父王之嫡嗣子福昊即福明之親
兄也光緒九年六月日與十一月日節經備將原由稟達前廣西

撫部院大人暨兩廣督部堂大人鈞照祈爲代題 九重天遠不知已未得達嗣至光緒十年六月初十日福明先兄阮福昊又病沒遺囑以福明按次當立以繼福明先父王阮福時之嗣福明業於是月十二日權攝國事以待命於 天朝奈接近內地之北圻各省既被法人佔據沿海港口又被他封禁致水陸俱梗下情無由上達且數年以來法人兵船節於下國滋事光緒九年七月日法全權何繼栳將兵船闖來下國都城外之順安汎口攻破各屯壘要迫定約二十七款以換甲戌年舊約光緒十年五月上旬法全權巴德那又將兵船數多闖來順安汎口步兵逼到下國都城外江岸排列礮輛要迫改定和約十九款以換光緒九年七月日

何繼栳所定之約又迫取原奉 錫封國印火化又迫令盡撤都城外諸屯壘礮輛尋復派他五圈官管兵數百逼駐城內右邊鎮平臺處又迫令撤去原置城面礮輛二百餘輛這礮粗重抬撤不及他率兵擅將鐵釘塞礮信門數十輛又北圻各省官吏他自行廢置脅捉民夫多至數萬驅之戰地節承 天朝官兵進剿所到之地官吏人民或向路或隨抬餉火或通問消息爲他窺得便一概罹之於罪即如興安省巡撫阮文慎爲他射殺廣安省巡撫黃文煒海陽省巡撫阮文風海安總何督文關節次被他脅捉將下火船駛去社村民亦間多被燒殺甚酷月前二十一日他都統又將火船六艘趁入順安汎口兵千餘登陸就城隅右角號鎮平臺

處與他原派兵合駐似此橫迫情形萬難急忍下國業於月前二十一夜與他相鬪自是夜丑牌至二十三夜辰牌殺得他兵大半奈他砮礮甚烈而下國礮力難敵福明業率臣僚避往城外之右置各省據險駐紮勸勵國內臣民再圖後舉竊念錫封國印乃福明先祖父受於天朝也下國都城社稷土地人民亦皆天朝所錫予也曩者福明先兄阮福昊在日國印已不能守福明又不能保守都城社稷致爲他據佔土地人民亦爲他蹂躪福明上得罪於天朝次得罪於祖父以爲天下萬國笑罵恥孰甚焉福明雖冲齡而人非木石豈不知奮獨是下國弱小而國印旣失福明又未蒙得錫封名未正則事難成呼父號天此情何極下國

幸得近附貴治下向上等情貴部院在所稔悉輒敢披佈血誠陳
訴伏望大救災恤難之仁不忍棄置以事代 題俾下國得以復
覩 天日永列職方非惟福明頂戴不忘而祖父亦銜感無既於
地下矣臨楮不勝惴慄翹懇之至再事屬關重本應奉表 奏上
第福明未得預列 錫封且國印經爲他奪致繕稟文用手押記
謹委陪臣黃佐炎阮光碧奉遞極知冒瀆罪所難逃理合併叙薰
風在候遙禱榮禧不一茲肅稟光緒十一年六月初四日阮福明
記

奏請將積勞瘴故道員張桂林等優卹片

光緒十一年十月初三日

再三品銜廣西試用道張桂林上年委辦前福建藩司王德榜定

邊楚軍營務親臨前敵艱險不辭今春二月關外累捷無不分督各營摧堅陷陣克城破壘卓著戰功經臣會同督辦軍務提臣蘇元春隨摺保獎請以道員遇缺儘先題奏並請 賞加布政使銜已於五月十五日奉 旨照准欽遵在案該員感激思奮停戰撤兵之後仍與王德榜駐防由隘講求邊守不懈初心日奔馳於蠻烟瘴雨之中於八月初八日在營病故又楚軍委員分省補用知府劉世恩擬保分省補用縣丞湖南廩生周鴻模萃軍差弁儘先拔補把總廣西武生董正榮隨營差遣深爲得力均以積勞染瘴先後在營病故殊堪憫惻由王德榜暨督辦欽廉防務前廣西提督馮子材分報前來合無仰懇 天恩飭部將布政使銜廣西遇

缺儘先題奏道張桂林照軍營瘴故例從優議卹分省補用知府
劉世恩擬保縣丞廩生周鴻模儘先把總武生董正榮均照軍營
瘴故例分別議卹並准其入祀永州龍州昭忠祠以慰忠魂而勸
勤事臣謹附片陳明伏乞 聖鑒訓示謹 奏 光緒十一年十
二月初二日奉 旨張桂林著照軍營瘴故例從優議卹劉世恩
等均著照軍營瘴故例分別議卹餘依議該部知道欽此

奏明妥籌賑撫辦理情形摺 光緒十一年十一月十七日

奏爲廣西被水成災地方遵 旨妥籌賑撫謹將辦理情形恭摺
具陳仰祈 聖鑒事竊臣前因本年五月初二日省城河水徒漲
淹沒田廬損傷人口災象已成亟應賑撫旋又接據桂林梧州潯

州泗城等府屬州縣稟報各地方被水總在五月上旬人口因有
損傷田廬亦被淹沒小民蕩析離居救災宜急當將查辦緣由於
五月二十三及六月初八等日兩次 奏報先後請提省局存儲
梧州歸公經費銀一二萬兩並於前撫臣勞崇光昔年倡設同善
局內提當本銀一萬兩又於提存各閒款儘數搜羅銀一二萬兩
飭司遴員分赴被水之區確勘賑恤均欽奉 諭旨著確切查勘
認真賑撫毋任一夫失所欽此旋准督臣張之洞咨開准兵部火
票遞到光緒十一年七月初三日內閣奉 上諭欽奉 慈禧端
佑康頤昭豫莊誠皇太后懿旨發給廣西銀三萬兩即由戶部撥
放俾資賑撫等因欽此張之洞等務當仰體 聖慈軫念災黎有

加無已至意核實散給毋任稍有弊混等因欽此欽遵咨行到粵
當經臣恭錄 恩旨通行宣示無不歡呼感激共戴 鴻施伏查
被水之區經省局司道遴委准補柳州府知府熊壽山桂林府同
知趙慶蕃等分投查勘並由該管道府督同各該地方牧令會同
勘明各受災村莊四萬餘戶大小丁口至二十萬以外按戶賑恤
需費甚鉅臣兩次請提之銀難敷散放一面設法籌挪一面勸諭
捐助而廣西素稱瘠苦措集維艱正深焦慮仰蒙 懿旨特發帑
金又得督臣張之洞力顧兼圻統籌並濟先由東省派委多員携
帶銀五萬兩分赴廣西被災各屬會同地方官散賑該委員等辦
理認真實能有濟並有上海協賑公所江浙閩粵好義紳民籌集

銀兩延江蘇紳士嚴作霖親携來粵酌濟貧戶各災民迭沾惠澤不致流離東省委員分賑銀數已由督臣專摺具奏嚴作霖先行帶來銀六萬兩分歷災區自行查看情形酌量分給仍復續行籌濟銀兩好義不倦跋涉遠來尤爲難得應俟辦理完畢再由臣會同督臣奏陳至西省放賑之款蒙 恩飭發三萬兩戶部咨由廣東撥解先於西藩庫應放各款騰挪墊用解到歸還又 臣請提之項已將上年提到梧州府應解公費支充思恩勦匪軍需外餘存銀一萬一千五百六十六兩六錢並提存各閒款銀一萬二千八百二十三兩六錢同善局當本銀一萬兩又新授撫臣張曜奏請提撥梧州府本年應解公費已據解到銀一萬一千兩此外官紳

商民捐輸之資陸續解交到局計雲貴總督臣岑毓英捐銀一千兩廣東巡撫臣倪文蔚捐銀七百兩前貴州巡撫臣林肇元捐銀四百兩臣捐銀四百兩調任藩司張夢元捐銀三百六十兩各道府廳州縣捐銀三千七百九十九兩省城紳士靳邦慶曹馴等捐銀四百八十六兩各屬商民捐銀一萬二千二百四兩四錢綜計已收賑銀九萬四千七百三十九兩六錢按查明各地方受災輕重分別撥發桂林府屬被災較廣情形亦重先後發銀三萬八千二百六十兩梧州府屬次之潯州平樂柳州等府屬又次之審其等差以定多寡梧屬先後發銀二萬兩潯屬發銀一萬兩平屬發銀六千兩柳屬發銀四千兩均由該管知府督同印委各員按照

田廬丁口核實散放廣西地瘠民貧生計多艱此次水災爲歷來所未有各戶田廬淹沒物產蕩然困苦殊甚其水冲房屋每間例給修費銀八錢難資修葺臣與省局司道往返函商諮詢紳耆酌量加銀八錢以廣皇仁而昭矜恤發過各戶銀數無不榜示通衢使衆周知以杜弊混除提發外尙存銀一萬五千餘兩並督臣於原撥五萬兩之外續後籌解銀一萬五千兩以備助修興安陸河平樂緯路工賑之用又撫臣張曜捐項二千兩及催提梧州府欠解本年公費銀兩均備支數不敷續請補發以工代賑之用統俟散放事竣有無盈絀再當核明辦理竊維此次災賑蒙恩發帑並由督臣撥解暨外省義捐以及粵西廣勸捐輸力籌提撥綜

計爲數已二十餘萬兩災黎實惠均沾困苦藉蘇察看民情甚爲
安帖除已嚴飭各州縣將被災處本年錢糧分別蠲緩先行停徵
核明造冊另行奏懇 恩施外所有籌辦賑撫情形理合會同兩
廣總督臣張之洞恭摺由驛具 奏伏乞 皇太后 皇上聖鑒
訓示再泗城府屬被水地方消退較速查未成災已由臣就近督
同地方官捐廉酌加撫恤民情安靜合併陳明謹 奏 光緒十
二年正月十三日奉 旨覽奏均悉著即督飭印委各員認真散
放務使實惠均霑毋任稍有弊混以副軫念災黎至意餘依議欽
此

奏請將積勞病故知府龍溥霖優卹片

光緒十一年十一月十七日

再補用道請補泗城府知府龍溥霖上年調管差遣出關防勦染瘴致病艱險備嘗前撫臣潘鼎新因徐延旭奉旨拿問解京惟該員堪以委解慮其病莫能興乃該員毅然請行不稍延却嗣緣舊病復發於十月間行至直隸邯鄲縣途次身故據其家丁呈報業經奏明並將泗城府遺缺另行遴員請補在案臣查龍溥霖需次數年歷署桂林平樂等府篆務實心任事卓著循聲爲通省知府中不可多得之員乃因邊徼從軍染患瘴癘猶復力疾遠行不辭勞瘁卒殞厥身核與近閱邱鈔雲南迤南道沈壽榕赴部引見在四川中途病故念其前在軍營著有勞績奏奉恩准從優議卹之例相符合無仰懇天恩准將已故知府龍溥霖照軍營

瘴故例從優議卹以勸勤事出自 逾格矜全臣謹會同兩廣總督臣張之洞附片陳請伏乞 聖鑒訓示謹 奏 光緒十二年正月十三日奉 旨龍溥霖著照軍營瘴故例從優議卹該部知道欽此

奏籌修陡河石橋平樂沿河繚路以工代賑片

光緒十一年十一月十七日

再桂林府屬興安縣海陽山爲湘灘兩江發源之所其流直下水潭勢頗湍急向於分水潭建石隄五十餘丈形如鐮嘴以分水勢北砌石壩曰大天平引水出全州趨湖南爲湘江南砌石壩曰小天平引水入桂林爲離江自分水潭南至牯牛陡達靈川縣界北至興安縣屬何家陡通全州沿河三十餘里皆於兩岸築長隄

各隄壩悉以巨石深埋河底爲根脚砌石築土而成名曰陡河南
船往來農田灌溉利賴甚溥本年五月蛟水爲災分水隄及大小
天平沿河隄岸沖塌甚多石脚亦被沖翻若不乘此冬令水淺及
時修復不獨舟楫難通殊於農田水利大有關繫又省城東門外
對河東州地方花橋一道文昌門外長橋一道俱係往來要道亦
以巨石建造均於五月被水沖塌損及石脚亦應亟籌修復又平
樂府一帶沿河繹路被水坍塌官商轉運牽挽爲難溜急灘高深
虞失事亦宜籌修以便行旅據該府縣稟經省局司道委員勘估
共需費銀五萬兩上下請籌款興修前來臣查興安縣陡河隄壩
東洲文昌門各橋俱屬不可緩之要工必應趕緊修理當此水災

之後俾貧民藉資備食以工代賑洵爲一舉兩得督臣張之洞統籌兼顧深知西省陡河工程平樂綽路均關緊要惟恐款項不敷以賑餘銀兩協助又先後另籌解銀一萬五千兩以冀速成除飭確估實需工料若干刻期興修先將賑餘動用並催提梧州府本年續解公費一併收作修費應用事竣核實具報外理合附片具陳伏乞 聖鑒訓示謹 奏 光緒十二年正月十三日奉 旨知道了欽此

奏勘界大臣鄧承修到龍會商界務片

光緒十一年十一月十七日

再臣於本年八月十五日欽奉 上諭越南北圻與兩廣雲南三省毗連其間山林川澤華離交錯未易分明此次既與法國勘定

中越邊界中外之限即自此而分凡我舊疆固應剖析詳明即約內所云或現在之界稍有改正亦不得略涉遷就本日已降旨派周德潤前往雲南鄧承修前往廣西會同各該督撫辦理勘界事宜即著岑毓英等各委明幹之員帶同熟悉輿地之人周歷邊境詳加履勘繪具圖說以備考證一俟法國勘界大臣到後即由周德潤鄧承修與岑毓英李秉衡會同勘定該大臣等務當詳細慎審按照條約持平辦理是爲至要等因欽此臣查廣西邊界外通越南宣光高平諒山等省自鎮安府屬小鎮安廳轄境起至南甯府屬上思州轄境止延袤二千餘里自應先行委員查勘繪圖貼說以備勘界大臣到日覆勘當即遴派隨營委員甘肅候補班前

先補用道陳嘉績廣西遇缺儘先補用知縣吳慶蒂指發廣西候
補班補用知縣嚴家驥並由提臣蘇元春委派熟悉將弁分投前
往會督該管府協各文武派出地方熟習員紳逐一履勘繪圖貼
說先後呈繳前來鴻臚寺卿鄧承修已於十月二十一日行抵龍
州與臣查看圖說互相考證應候將來履勘再行隨時具奏理合
會同督臣張之洞附片陳明伏乞 聖鑒謹 奏 光緒十二年
正月十三日奉 旨知道了欽此

奏裁減勇營以節餉需摺 光緒十一年十二月十九日

奏爲欽遵 懿旨裁減勇營以節餉需恭摺覆陳仰祈 聖鑒事

竊臣於龍州防次承准軍機大臣字寄光緒十一年八月二十二

日欽奉 慈禧端佑康頤昭豫莊誠皇太后懿旨前據侍郎薛允升奏請飭裁減勇營將中外各旗營加餉訓練一摺當經諭令軍機大臣會同戶部妥議並令醇親王一併與議茲據會議具奏據稱竭天下十分之物力八分以養兵勇斷非經久之道今欲酌加旗營餉需惟有將各省營勇裁減浮濫每省每年各裁節銀二三十萬兩分批解部以供加餉練兵之用各省設立善後各局名目繁多尤應大加裁併等語各省募勇向多糜費上年辦理海防又復紛紛添募現當軍事敕定本應認真裁減汰弱存強果能裁無用營勇爲有益要需實屬根本至計著各直省將軍督撫破除成見迅將各該省現有勇營切實覈減查照該部所指虛伍空額老

羸幼稚雜費冗弁及無事長夫各節逐一確查認真裁汰並將存留各營按日訓練無事常如有事庶幾緩急可恃其裁勇所節之餉從光緒十二年起每省每年可得若干先行奏明專款存儲分批解部備用至各省紛紛設立各局如軍需則既有善後總局又有善後分局報銷籌防支應製辦軍械轉運等局地方事宜則有清查藩庫營田招墾官荒交代清源發審候審清訟課吏保甲刊刻書籍採訪忠義等局種種名目濫支濫應無非爲位置閒員地步各防營奏調咨調候補人員開支公費諸多冒濫均堪痛恨尤應一併大加裁汰並著於本年十一月內定議迅速覆奏當此時事艱難餉需支絀裕國必先理財而耗財莫如冗濫刪一分浮費

即可多一分正用各將軍督撫等務當通盤籌畫掃除積習總以覈實二字爲主毋稍觀望推延原摺均著抄給閱看將此由五百里各諭令知之等因欽此又光緒十一年九月初九日欽奉 慈禧端佑康頤昭豫莊誠皇太后懿旨前據左宗棠議覆海防善後事宜請裁額兵並減沿海水師艇船給事中秦鍾簡亦有請裁水師防勇之奏經醇親王軍機大臣總理各國事務王大臣會同李鴻章詳籌奏稱各省額兵存營多寡不一應就該省情形酌量裁減上年新募之勇除滇粵邊防酌留若干營外餘可全行裁撤舊有各營可裁十分之一二沿海舊設水師及紅單艇船可裁等語前有旨令該將軍督撫裁減兵勇以節餉需訓諭諳諳至爲明切

此次復令王大臣等參酌衆議體察情形期於必可施行籌定辦法現在經理海防善後需款甚鉅籌餉甚難必須將糜費之款痛加刪節各該將軍受國厚恩務當仰體朝廷宵旰焦勞綢繆未雨之意懷遵疊次諭旨破除成見切實辦理一面將如何裁減及每年所節餉銀若干詳晰具奏將此由五百里各諭令知之欽此先後遵 旨寄信前來 臣跪誦再三仰 慈訓之周詳爲根本之至計敢不懷遵辦理以期稍補時艱伏查粵西地處極邊素稱瘠苦常年支用已屬爲艱自法越構衅連歲籌防計調募勇丁至七八十營撥用餉銀至數百萬兩款無可籌動須隣省協濟是力除糜耗實爲要圖 臣奉 命暫護疆符接辦邊事既將可節之費加意

減裁嗣因停戰撤兵又將關外各營節次裁併只存三十二營內地先因邊情喫緊增募之營亦經陸續遣撤又以邊營月餉較重難乎爲繼與提臣蘇元春熟商核減定爲每勇月支銀三兩二錢以期經久均已 奏明在案此時勘界事宜猶未辦定關外游勇滋蔓可虞未便示人以弱惟當裁營節餉之際又不得不設法裁併力求撙節所有三十二營擬請於十二年正月起先裁八營通減長夫腹地防勇亦再酌裁二營一俟勘界既定邊務就緒仍將邊軍再裁四營約計每年共可節餉二三十萬兩但廣西軍餉本絀全賴隣省協助久在 聖明洞鑒之中前奉 諭旨飭查常年出入款項臣已分晰開列清單將入不敷出實情具摺陳 奏今

擬每年裁節二三十萬兩雖本省仍無存儲可以解部而各省應撥粵西協餉即可從此減解自有餘存以備部撥是裁營節餉雖與他省情形稍殊而其中有裨京餉要需似無二致至通省綠營額兵前於同治年間因餉項無資迭經裁減及半迄未募補各營亦有巡防緝捕及護解過境餉鞘人犯之責其勢實難再裁其設局一層廣西向無善後分局及籌防支應名色亦無清查藩庫營田招墾官荒清源清訟課吏刊刻書籍採訪忠義等局前已將辦理軍需必須設立之善後總局軍火等局及地方事宜應設之交代等局造具清冊報部查核分別開支公款外籌捐辦尙無濫支濫應位置閒員情事各防營所用隨營員弁多已裁汰惟臣及提臣

行營各有派辦事件不能不調用人員亦經遵照部章造冊送部
備查應俟邊事粗定實留營勇若干裁定若干另行續奏並將挑
留各營認真訓練以備緩急不敢稍涉因循勉期仰副 宵旰憂
勤通籌全局之至意所有遵籌裁營節餉情形謹據實覆陳恭摺
由驛具 奏伏乞 皇太后 皇上聖鑒訓示謹 奏 光緒十
二年二月二十九日奉 旨據奏擬裁各營每年可節省餉銀二
三十萬尙屬切實即著照所請行其挑留各營務當認真訓練俾
成勁旅該部知道欽此

李忠節公奏議卷二終

295-1

李忠節公奏議卷三

奏病體增劇懇請開缺摺 光緒十二年正月二十八日

奏爲微臣病體增劇重任難勝籲懇 天恩俯准開缺回籍調理

恭摺仰祈 聖鑒事竊臣素有肝陽上沖之証每遇焦勞過度即

時觸發自光緒十年冬間奉 命前赴龍州辦理後路事宜時值

軍書旁午昕夕不遑加以水土惡劣異常遂致時愈時發猶可勉

強支持上年十一月十八日會同勘界大臣鄧承修進駐南關商

辦界務會議數次莫展一籌迭經會同電 奏陳明正當焦灼之

深復感烟瘴之毒牽引舊疾時發不止入春以來愈形委頓披閱

公牘即覺頭昏氣逆力難支撐據醫者云肝燥血虛非得靜心調

養難望速痊伏思臣受恩深重當此邊局未定何敢自惜其身
惟恐無補時艱負疚滋甚現幸鄧承修經理界務諸臻妥協督臣
張之洞兼轄統籌盡心補救提臣蘇元春督辦邊防布置裕如舉
凡中外及地方一切要務斷不致稍有貽誤惟有仰懇天恩准
臣開缺回籍調理一俟病體漸愈即當趨覲慈顏求賞差使
不敢稍耽安逸自外生成廣西巡撫員缺緊要請飭令撫臣
張曜迅速赴任至臣本任藩司員缺並祈簡放以重職守所有
微臣積受烟瘴觸發舊疾萬難支持據實陳請開缺調理緣由理
合恭摺具奏伏乞皇太后皇上聖鑒訓示謹奏光緒
十二年四月二十六日奉旨著賞假一個月毋庸開缺欽此

奏遵辦裁營節餉抽調綠營訓練摺

光緒十二年二月初六日

奏爲迭次欽奉

諭旨飭令裁營節餉先經兩次覆陳尙有未盡

事宜續行詳晰具奏恭摺仰祈

聖鑒事竊臣於龍州防次承准

軍機大臣字寄光緒十一年八月二十七日奉

上諭各省勇營

糜費甚鉅已欽奉

懿旨令各將軍督撫汰弱留強核實辦理惟

向來撤勇一事流弊滋多不可不謀之於豫且此次撤勇固貴節

省餉項移作要需尤在整飭營規練成勁旅各省勇營虛伍已成

通病其始勇丁遇有事故從緩募補將截曠銀兩中飽久之竟有

初招時已短數成者統領派員點驗則移東補西以掩一時耳目

冒餉尅扣百弊叢生此等情形朝廷早有所聞姑不追咎既往現

當歸併之始必應嚴申禁令倘仍有虛伍之弊即以軍法從事並著將如何歸併之處先行切實陳明不得稍涉含混勇數既裁營員自隨之而減如實有久經戰陣之員月給薪糧作爲額外留於該省差委仍酌予限制此亦儲備將才之一策全在各統領激發天良秉公遴選設又藉此肥己或安置私人或浮開公費一經查出立予重懲至遣撤勇丁如竟任其所之散而無稽老弱流離可憫驕悍生事堪虞必須先事綢繆詳加規畫其無欠餉可領者酌予川資遴派委員分起分路管帶回籍庶於約束之中寓體恤之意以上數條該將軍督撫均當悉心體會認真經理此外如尙有未盡事宜各抒所見奏明請旨並將新招之勇與舊有之勇如何

裁汰如何整頓實存現勇若干節省餉銀若干明晰聲叙經此次訓飭之後其各痛戒瞻徇破除積習務使裁撤之營安靜無事存留之勇訓練益精方爲不負委任至各省綠營宜如何變計操演或仿直隸練軍章程或照各該省原有抽練章程一體舉辦並著於撤勇時一併妥籌具奏將此由五百里各諭令知之欽此即遵旨寄信前來臣跪誦之餘仰見 皇太后 皇上明見萬里洞燭無遺務爲久遠之規不憚再三之戒如 臣禱昧莫報涓埃敢不仰體 宵旰之憂勤以冀勉圖補救於萬一伏查上年奉到七月初五日 上諭籌辦邊防如何添設提鎮專官確覈兵勇營數經與兩廣督臣往復函商由張之洞主稿會銜具奏又欽奉九月初

九日 皇太后懿旨飭令裁減兵勇以節餉需亦經臣欽遵切實
辦理由驛具奏在案臣維各省勇營虛伍通病早在 聖明洞鑒
之中仰沐 矜全不咎既往若再不知感奮何以昭 國紀而副

皇仁當與提臣蘇元春嚴申軍律通行將領宣布各軍責令激
發天良母任因循玩法邊防各軍前經奏明先裁八營後即已汰
弱留強充補足額其遣撤之勇業與提臣詳加規畫如無欠餉可
領者無不酌予川資遴派員弁管帶回籍並無老弱流離驕悍生
事至若久經戰陣之員月給薪糧作爲額外留省差委誠如 聖
諭亦儲備將才之一策應俟裁定營勇後與提臣秉公遴選期收
實效仍酌定名數隨後奏陳斷不敢安置私人浮開公費同干咎

戾又查廣西綠營兵丁前於光緒六年經升任撫臣張樹聲籌議參酌直隸練兵章程就省標抽練二營提標抽練二營左右兩江鎮標各抽練一營合三千人酌加練餉立營操練升任撫臣慶裕履任以後照案辦理嗣因越南防務喫緊餉需支絀且查各標抽練之兵已練數年槍礮技藝漸能精熟復經調任撫臣倪文蔚前任撫臣潘鼎新先後奏明概行飭歸營汎停支練餉現在邊防營勇需餉甚繁尙待鄰省協濟若復抽練綠營加餉無從籌措惟是兵丁非練不精豈能因噎廢食當查西省綠營兵丁按月操練歷有定章平日非不訓練但須定一考察章程驗其勤惰不任稍涉懈怠自能日見精熟今擬撫標及提鎮各標營弁兵每月於常操

之外月底調集合操一次由撫臣及提鎮諸臣親臨校閱嫻習者
獎拔之生疎者責罰之合操之日哨官每員給日食銀一錢兵丁
每名給日食銀五分此項銀兩爲數無幾即由善後局籌給臣與
提臣現駐邊關未能親閱即委得力之員代閱其外協管弁兵即
責成該管官按期訓練按季遴員前往校閱一次覈其功過分別
勸懲仍於校閱之日一律發給日食以昭公溥如此認真考察使
知奮勵儆惕餉不加而兵自精倘該管官有不知振作玩忽因循
即當立予嚴參以示懲儆庶幾仰副 聖主通籌全局整飭戎行
之至意所有遵 旨飭籌續行具奏緣由理合會同兩廣總督臣
張之洞督辦邊防廣西提督臣蘇元春恭摺由驛馳陳伏乞 皇

太后 皇上聖鑒訓示謹 奏 光緒十二年四月初六日奉

旨覽奏已悉即著將留防各營認真訓練務成勁旅其綠營兵丁據稱於常操之外調集合操亦當切實辦理毋得徒託空言欽此

奏章京關朝宗在營瘴故請飭部優卹摺

光緒十二年二月初六日

奏爲遵 旨請 卹恭摺仰祈 聖鑒事竊臣等於光緒十一年

十二月十一日電 奏勘界章京工部郎中關朝宗於初十日在

廣西鎮南關營次受瘴身故懇請照例 優卹十三日恭奉電

旨關朝宗瘴故可憫照請賜卹俟奏到降旨等因欽此仰見 聖

慈矜垂勞勩無遠弗周凡在關大小員弁無不同深感泣臣等查

該章京由庶常改部在總署行走多年練習勤慎此次經臣承修

奏帶來桂辦事精詳萬里閒關不辭勞瘁南關爲著名邊瘴向無村落館廨被兵不餘片瓦軍士則十生九死使臣以下結茅塚墓間毒濕歊蒸重以積屍之氣中者輒病人有戒心該員素負體強深夜辦公受病不治誠如 聖諭實可憫傷臣等時值交涉殷繁入春以後俱在病中暫未具 奏茲謹縷陳俯懇 天恩將四品銜保舉無論題選咨留郎中工部虞衡司員外郎關朝宗照軍營積勞瘴故例從優 賜卹以勵勤勞實出自 逾格鴻慈伏乞

皇太后 皇上聖鑒訓示謹 奏 光緒十二年四月初六日奉旨關朝宗著照軍營瘴故例從優議卹該部知道欽此

奏貴縣土匪廖彩爵聚衆抗官飭營搜勦片

光緒十二年二月初六日

再潯州府屬素稱不靖之區近年雖漸就安謐而昔之漏網逸匪
尙多未獲誠恐潛匿滋事疊飭各地方官認真緝拿茲於光緒十
一年十二月初四日據署貴縣知縣裘彬稟稱查有昔年因爭產
糾黨滋事拒捕逃逸之匪徒廖彩爵潛回縣屬中屯村地方伏匿
該縣當派壯丁會同防營哨勇於十一月二十二日黎明往捕該
匪竟敢率黨迎拒放槍中傷勇目蕭亞富等八名衆寡不敵祇得
退回正擬再添勇役前往圍捕探聞該匪拒傷勇丁後添糾游匪
以圖負固中屯村距縣城一百四十里地極險僻舊有村人防賊
所築圍牆礮樓復經該匪加築安礮兵單難期得力潯郡雖有靖
邊後軍防勇一營正值冬防緊要之際已分赴桂平武宣平南等

縣巡緝未便全行調集請添派管勇至縣俾速撲除等情當經臣飭派升用知府陳如金督帶靖邊前軍一營前往拿辦十二月二十二日馳抵該縣而潯州府知府延昌亦酌調該府防營勇丁兩哨同日到縣會商辦理查得該匪村四面道路紛歧山徑崎嶇且附近之六陳六活等村多非善類不無通匪之人必須布置嚴密當派管帶靖邊前軍參將龍殿甲督隊取道龍山等處由前路進管帶靖邊後軍參將王化祥督隊由桐嶺後路進適值連日天雨未能合圍本年正月初三日稍霽各軍同時出隊進逼匪巢各以開花礮轟擊迎面礮樓匪亦以礮還擊相持逾時樓已洞穿龍殿甲督隊直薄圍牆該匪憑牆抗拒延昌陳如金懸賞鼓勵期於必

克把總蕭宏亮汪雨露率勇拚死踰牆中賊伏礮同時陣亡並亡
勇丁十名受傷弁勇二十二名時已黃昏當即收隊初四日有匪
來犯營壘經我軍擊退陳如金與延昌會商挑選奮勇乘夜潛攻
四更時分直逼賊巢踰牆而入一齊施放火具北風正烈匪屋皆
燃賊驚慌亂竄我軍大隊接應擊以槍礮傷斃多名餘匪由山後
奔逸黑夜未能窮追匪巢礮樓圍垣俱已毀平次早查驗匪骸不
能辨認仍即分投躡緝首要各匪務獲究辦現在地方居民均甚
安謐等情由印委各員稟報前來臣查該匪負固抗拒傷斃弁勇
行同叛逆雖經即時攻克而匪首未獲餘孽未盡該處與武宣來
賓等縣境地相接山深箐密易於潛蹤除嚴飭上緊躡緝搜捕務

將首要各匪悉數殲擒毋任再有伏匿潛滋並脅從概免究治加
意安撫外理合附片陳明伏乞 聖鑒訓示謹 奏奉 旨知道
了即著嚴飭各營上緊搜捕務將首要各匪悉數殲擒毋任漏網
以靖地方欽此

奏籌議廣西邊隘移添提督鎮道並請撥的餉摺光緒十二

年二月二十五日

奏爲遵 旨籌議廣西邊隘分營扼紮請撥的餉酌移提督駐所
另設柳州總兵並擬添設邊關道員以資分任鎮撫繪具圖說恭
摺覆陳仰祈 聖鑒事竊臣等於光緒十一年七月二十八八月
初二等日先後承准軍機大臣字寄光緒十一年七月初五日奉

上諭鎮南馬白二關爲滇桂入越邊要處所現當和議甫成越南游匪爲患關內亦多伏莽此後分界通商中外人民往來尤夥必須大枝重兵添紮要隘以戢奸宄而靖人心著岑毓英張之洞張凱嵩李秉衡悉心會商將如何添設提鎮專官確覈兵勇營數或留現在得力勝兵以充新額汰腹地無用常卒以省空糧何處總紮何處分防一切通盤籌畫繪圖貼說縷晰覆陳候旨定奪其新設各營尤須選練精實能戰能守一兵得一兵之用勿以疲弱應汰之兵濫竽充額用副朝廷慎固邊防消弭隱患之至意將此由五百里諭知岑毓英張之洞張凱嵩並傳諭李秉衡知之欽此仰見 聖主鞏固邊防精核武備之至意臣等無任欽服當即公

同詳加籌議伏查廣西南邊綿亘二千餘里原設隘所一百零九處分卡六十六處與越南之諒山高平宣光等省接壤山箐紛歧路路可通而鎮南關至龍州一路較爲寬平故曩爲中越使命商賈往來之通衢東出太平南甯西出歸順鎮安之總匯且自龍州以東河灘漸廣舟行下水直達潯梧其視全桂腹地東省上游據有建瓴之勢實爲兩粵利害所關當此款議旣成外防游匪內靖伏戎鎮南一關尤爲中外鈐轄 聖諭所謂紮要隘添重兵者無以易此惟南關固居極衝而關之中後關之左右各路均須擇要設防而後氣力不形單薄不致有腹背受敵肘腋乘虛之慮大要分爲三路鎮南關口及關以內之關前隘再近內之憑祥土州爲

中路自關以東明江廳轄
之愛店隘上思州轄之百
轄之平而水口兩關下凍
頻岫隘隴邦隘小鎮安廳
等處爲西路以上各隘皆
地段較長原有防軍三十
籌經久之計而越境游勇
便示人以弱勢難多議裁
營併爲二十四營以十二
六營分防西路路寬者築

禁阻成所預造地營營外多栽刺竹無事則各分守地督飭操練有事則酌量緩急抽調赴援俟冬間界務大定再當裁去四營中路酌減兩營西路酌減兩營以節餉需以後全桂大勢注重邊防必宜有大將親臨控制調度擬請將廣西提督由柳州移駐龍州原有提標制兵五營擬撥中軍參將一營隨來龍州以資策遣而符體制將原屬新太協之龍憑營都司改爲龍州城守遊擊隸於提督照例設該遊擊中軍守備新太協駐紮太平府距龍最近應併將新太協副將率其所轄左營都司雋彝營都司共兩營改爲專屬提督毋庸轄於左江鎮其新太協右營守備一營應即裁汰柳州東屏桂省北控黔湘苗疆緊要擬請添設柳慶鎮總兵一員

鎮守柳州慶遠義甯融懷等處地方駐紮柳州府以提標存留左
右兩營遊擊改爲鎮標左右兩營左營卽爲該鎮中軍提標前後
兩營應俟邊軍規模詳定後卽行裁汰所汰之兵發給一年餉銀
兵米俾資改業官弁遇缺另補並撥柳州城守都司一營附近之
慶遠協副將義甯協副將融懷營參將率其所屬各營俱統轄於
柳慶鎮其沿邊常駐二十營提督爲總統其下酌設分統現在提
臣蘇元春係奉 旨督辦邊防之員熟習邊情深孚衆望一切自
統歸調度以後若提 臣不兼督辦者亦宜於防勇內指定十營屬
於提督本標以厚兵力龍州開關通商重兵所萃宜有文職大員
同任邊事擬請設太平歸順兵備道一員總轄全邊駐紮龍州廳

以左江道所屬太平府全境暨東邊南甯府屬之上思州西邊鎮安府屬之小鎮安通判歸順州隸之沿邊統屬一道以期聯絡一氣上思州即撥歸太平府屬小鎮安歸順距太平較遠應升歸順州爲直隸州小鎮安改爲鎮邊縣加通判銜屬於歸順州該道兼轄太平一府歸順一直隸州所有漢土廳州縣土司管理整飭邊防監督關稅以及經理一切中外交涉事宜設道庫大使一員經管關稅瑣務應用繙譯委員由該道選擇調委惟查左江道駐南甯轄泗鎮南太四府鹽法道駐省轄桂平梧鬱四府州今左江道既撥出太平一府而鬱林州遠在全省東南一隅距南甯止五百餘里距省將及千里督察難及諸多不便該州屬之博白陸川等

處毗連廣東高廉素爲匪徒出沒之區擬撥鬱林直隸州改屬左江道以協形勢而資治理其需餉之數沿邊水土惡劣瘴癘薰蒸百物昂貴與腹地情形迥異與向年防勦土匪尤相懸殊若照內地桂勇餉章萬難得力應照從前奏案正勇月餉三兩二錢以及營哨各費俱照現章合計邊軍二十營加以軍火軍裝轉運製造修台築壘電局雜支各費以及遣處游勇撫卹邊氓所費不貲而軍火尤爲鉅款每月至少亦需銀六萬兩現就本省儘力搜羅再能此後釐金不致短收地方安謐每年可得三十萬兩計每月仍短實銀三萬五千兩無可再少目前二十四營所需尙不止此數非藉外省接濟無從支持查現准戶部咨以後滇餉除四川原解

練餉抵捐兩項共銀二十八萬五千兩照常撥解外再由湖南月協銀二萬兩四川月協銀三萬兩是滇省一年外協的餉已有八十八萬五千兩之多廣西所請協餉歲僅四十二萬尙不及雲南之半實係刻苦節省免致部撥爲難惟有仰懇 天恩飭部指撥近省有著之款可否仿照從前西征協餉近日東北邊防經費考成按月源源撥解以濟急需而免遲誤所慮者新約原有法稅較輕之議關稅開收以後三聯票暢行沿江釐金必然大減彼時稅釐能否相敵尙不可知擬請 敕部於此項關稅留充邊餉除該關費用外免撥他用若稅多於釐則請減協餉稅釐並絀則續請加撥應俟屆時據實奏明請 旨辦理至通省綠營馬步戰守兵

丁原額二萬二千七百一十五名同治四年五年兩次裁減一萬零九百八十二名迨十二年與光緒元年三年二次復補新增六百五十二名較之原額裁將及半所存實不爲多茲擬將提標裁汰前後兩營新太協裁汰右營一營其內地勇丁迭次裁減尙有水陸二十餘營散布防遏常患不敷近日懷集貴縣博白等縣迭有聚匪滋擾之事未敢過涉空虛現復將腹地防勇騰挪裁撤兩營各營長夫一律裁減以冀稍資節省此外兵勇一時實難再裁其沿邊之新太協鎮安協上思營都司各營將來徐加體察或就龍州現存勇營內改勇補兵或裁兵留勇藉此日分防之舉卽爲將來併省之階此外無論兵勇如有可裁之處自當行之以漸力

圖擄節以期減一冗食之軍即省一艱難之餉至改勝軍以補新額誠爲經久至計但綠營規制細密其間分汛地段挑拔章程俸薪等差推補缺項一成不易必須周詳貫通方無窒礙目前猝難定議且綠營積習驟難更改久在 聖鑒之中而兵餉自有通行例章邊關吃緊處所若照綠營辦法則恐難資飽騰若改稱練軍比照直隸練軍章程餉數並不能減其與勇名異實同而轉成常設之標營永久之經費竊擬俟兩三年後體察敵軍距邊遠近各隘緩急餉源盈歉內地伏莽能否漸清邊腹通籌或尙能再加併省倘作爲額兵規制既難猝定既定即不便屢改似只可就目前事勢力量斟酌維持如有因事變通隨時議奏較爲活便據廣西

藩臬兩司會同善後局司道核議會詳前來 臣等疊次往復函電
熟商並將圖說郵寄參考意見相同謹遵 旨先行縷晰覆陳並
將沿邊要隘分布重兵駐防處所繪圖貼說恭呈 御覽其添設
鎮道等官建置經費各事改撥標兵管汛詳細章程暨其餘未盡
事宜仍俟陸續陳奏是否有當伏候 聖明裁奪飭部議覆施行
所有籌議廣西邊防分布營屯核計餉需移駐提督添設鎮道改
撥標兵酌減勇營各緣由理合會同督辦邊防廣西提督臣蘇元
春合詞恭摺具奏伏乞 皇太后 皇上聖鑒謹 奏

奏陳指撥廣西邊餉省分請減免別項解款片

光緒十二年

二月二十五日

再指撥協餉必宜於休戚相關道里略近暨力量能及之處方可
有恃今爲廣西邊防計廣東爲督臣兼轄之地誼同一家湖南則
唇齒相倚又處上游兩省利害旣切轉輸較便近年廣東竭力籌
濟固不待言湖南協助最多次則四川湖北又次則江蘇省及江
海浙海兩關若於歷年協解較多之省關分別等差酌量派撥或
有實濟惟各省疆臣及藩運司道雖皆能公忠協力而各省均非
庫款充裕之時惟有顧懇 聖恩敕下戶部此次於各省指撥廣
西邊餉若干即將該省原派別項實解之款減撥若干俾得騰挪
兼顧庶於邊防大局藉可支持不獨爲桂省一隅計也至廣東現
處極窘之際本省現支撥解要款均極浩繁洋債過多餉源已竭

義則不能不顧力則萬難再籌然論廣西意計所及則廣東協餉較他省爲可恃可否將廣東應解固本京餉銀十二萬兩懇 恩免解俾移此款以濟桂餉蓋直隸練軍餉項固屬綑繆要需而廣西邊關設防尤當前敵衝要在直隸來源較廣當不計此區區必廣東有可羅掘方可不誤協解否則左支右絀難爲無米之炊雖將藩司重處嚴參亦仍無益若部臣於固本一款必不允改撥則此次廣西邊餉懇 恩准免派撥以免兩誤出自逾格 鴻慈謹將各省關情形略陳梗概以備戶部覈酌是否有當謹合詞附片具陳伏乞 聖鑒訓示謹 奏

奏各府防勇親兵未能撤裁摺

光緒十二年三月初七日

奏爲遵 旨查明粵西各府廳防勇及州縣親兵未能裁撤據實
覆陳恭摺仰祈 聖鑒事竊臣承准軍機大臣字寄光緒十一年
十一月二十八日奉 上諭御史李士琨奏粵西各府廳設有防
勦勇丁歲糜餉十數萬且素無紀律所在滋事又各州縣添養親
兵百十名倚勢侵凌並有逞兇訛索擾害百姓情事請飭裁汰等
語各省無益勇丁現飭次第裁撤若如所奏各情更爲地方之害
即著李秉衡查明飭裁以節餉需而靖閭閻原片著抄給閱看將
此諭令知之欽此遵 旨傳諭前來臣查粵西餉項支絀防營月
需餉銀多待隣省協濟籌解維艱時虞匱乏是以臣上年接護撫
篆布置邊防即與提臣蘇元春籌議將可裁之營可節之費迭次

裁節嗣因欽奉 諭旨飭令裁勇節費復經通盤籌畫又將邊關腹地各營分別酌裁具摺覆奏並聲明俟勘界事定再當裁遣邊軍數營凡有可裁者無不量加裁汰不敢稍存泄視至於各府廳防勇各州縣親兵則有未能裁撤之勢不敢不寔據陳明查粵西地處蠻荒各府廳所屬箐密山深伏莽未靖竊發時虞兼之各屬鄉村民情浮動游匪最易生心非有防營彈壓於平時戒備於未事難免時有意外之慮近年如鬱林州大竹根思恩縣五峒土匪滋擾得以隨時撲滅比來貴縣漏匪廖彩爵潛伏中屯地方亦得及時往捕皆因設有防營辦理迅速西省腹地十餘年來尙無大股賊匪肆擾未始非其明效既設防營其州縣親兵似覺多此名

[REDACTED]

此

奏陳龍州重地籌款建城片 光緒十二年三月初七日

再龍州在前明時本係土府自 國朝改設流官以後由通判而
同知隸太平府轄爲鎮南關及平而水口二關孔道承審上龍下
凍兩土屬均與越南接壤向未建築城池上年邊事粗定籌備方
始將來定地通商擬移提督添設道員同駐斯州以資控制舉凡
轉運屯儲關稅等項悉萃於斯無一不關緊要是龍州實爲全邊
重鎮非建城池無以昭慎重臣既函商督臣並與提臣就地查勘
均以爲然惟周圍五里非砌甃石難期堅固工程浩大核實估計
約需七萬金左右雖籌款萬分不易而關係邊防甚重不得不竭

力經營以期濟事業經遴委廉幹大員相度工款隨籌隨辦將來
核實造冊報銷謹先附片陳明伏乞 聖鑒訓示謹 奏 光緒
十二年五月初七日奉 旨該部知道欽此

奏查明梧州關經費病商過甚分別減免經費浮收摺光緒十

二年三月二十一日

奏爲查明廣西梧州關經費病商過甚應即免抽並裁革各項浮收
規費以期恤商保餉暨嚴禁書吏整頓釐務清理訟獄各節據實
覆陳仰祈 聖鑒事竊臣之洞於光緒十年六月承准軍機大臣
字寄閏五月初七日奉 上諭有人奏廣西梧州關稅加費過多
請飭永遠全裁等語又有人奏廣西積弊太深亟宜剔除一節所

陳梧關弊竇大畧相同均應確查嚴禁至所稱釐金各卡應行酌量裁併州縣案件株連太多請飭隨到隨結不得拖累無辜藩司衙門吏房爲肇慶黃姓盤踞百弊叢生應飭查明驅逐各節該省積習相沿必應嚴查禁革著張之洞潘鼎新按照所奏各條確切查明將一切弊端悉行釐剔毋得有名無實等因欽此當經臣之洞咨會前廣西撫臣潘鼎新據實查明會奏疊次札飭西布按二司會查各在案潘鼎新迄無一字答覆嗣據西兩司覆稱潘鼎新於光緒十年奏明梧關公費解交省局亦未准抄摺咨會臣秉衡在臬司任內以越事緊急奉 旨駐龍辦理後路事宜旋蒙 恩命暫護撫篆又奉光緒十一年六月十八日 上諭張曜奏廣西

被水成災擬籌賑款一摺據稱廣西梧州府向有應徵稅銀軍興以後加徵養勇經費每年約計十六七萬此後勇營裁減徵款未停現值籌賑艱難請飭將本年經費全行提充賑務等語著李秉衡查明先將本年經費提歸賑需嗣後此項經費應酌減若干其餘提歸公用之處並著奏明辦理欽此經臣秉衡一面先提充賑一面恭錄轉行署廣西布政使慶愛署按察使沈康保查辦其梧州一案經臣等疊次委員密訪西省委知府黃宏藻東省委直隸州知州陳占鰲通判徐敦詔降補知縣楊光銓鹽大使周志端從九品張祖恩先後分別密查並會委奏留差遣河南候補道朱壽鏞覆加確查會同西藩臬兩司核議稟覆去後茲據覆稱查原奏

295-1

內稱梧州府關稅自咸豐七年後加抽經費爲招集鄉勇保衛地方起見凡往來貨物於正稅銀一兩外加抽銀一兩每年合計約加抽銀四五十萬兩均收銀而不給票肆意侵漁無從查考加費過多請飭永遠全裁一節查梧關加抽經費實係咸豐初年艇匪土匪肆擾前任梧州府知府陳瑞芝募勇勦捕經費無出集商籌議按貨抽捐以供勇費有稅費相等者有費多於稅者嗣後賊平勇少而經費如故商人屢以爲言乃減去舊數之半先設分局十二處陸續裁撤光緒六年復將木雙分局裁去或由粵東會館經費局抽收或由水旱兩關帶抽茲經委員改裝易服前往向來往商民分投密訪或伴作商賈赴關納稅或潛搭貨船觀其收費並

傳訊該局司總梁寶琛等暨平碼館商董茂興公昌聚豐信全昌等調集水旱關各帳簿暨書巡等私簿互相參核計該府每年所收經費約銀十萬兩有奇實無三十萬至五十萬兩之多梧州自兵燹後正稅未能足額即以經費撥補又廣西巡撫藩臬鹽道衙門辦公不敷歷年於梧關經費項下撥解公費此款早年出自稅餘後因軍興稅絀改在經費內動支從前係每年三萬兩此外雖有節壽之說收與不收視乎上司光緒十年減爲一萬二千兩裁去節壽餘作該府陸勇兩營及護關扒船之餉費惟查歷年經費之數官收雖不過十萬有奇而商人所費實不止此吏胥巡役家丁地棍船戶浮收包吞皆所不免雖無檔冊可稽追出書巡分銀

底帳及船戶木商完經費底簿按月核計全數約畧可知約計每
年大率收銀十七萬兩實爲商民巨累此外尙有因頭一款爲原
奏所未言及此款係由書吏算船估稅而起定例權算米穀豆麥
各船之法以長一丈廣一丈深五尺爲五因一因五千斤五五共
作二萬五千斤他貨二三因至七八因不等皆有定則書吏欺愚
商賈如米則謂例應七因今私讓爲六因應納使費若干故曰因
頭商人懇囑關吏不令報足十成甘於稅外私納規費名爲讓減
一因實已暗增一因先則商人利其隱漏繼則關吏踵事多求旣
屬病商亦兼蠹稅計暗加因數每年約銀二萬兩私得因頭每年
約銀五萬兩係書巡幕丁所得又有外費一款係書巡府差人等

所得每年約銀六千餘兩又有現費一款乃上下水零星貨物若缸瓦桂碎爆竹彩錢筆竹木梢等類皆例不收稅之物係查船丁巡所得每年約銀五千兩又有柴火銀一款乃無稅無費之物每柴一束收錢一文係充該廠日用每年約銀一萬三千兩合而計之正稅尙屬有限而商賈於正稅之外所費至二十餘萬兩商民怨苦實不能堪羣蠹縱橫人思染指積弊之深至斯而極查該廠經書七名算房七名銀房十名即官銀匠巡役四十四名內正總四名亦稱籤子手亦稱尺手書巡皆五年一換經書算房銀房及正總更換時各納充費一千兩上下不等此條最爲諸弊之根查梧州一區既有例設稅廠又有釐金總局又有經費局一日之內

三次權徵百金之貨完至什一實爲病商苛政且經費一局商民費至二十餘萬而國家並不能用其分文尤出情理之外况徵斂愈重商賈愈困趨避走漏句串影射愈多西省稅釐大局將不可問自應將經費一項即行裁免抽收以蘇疲商而保正餉並將該府所募勇丁兩營全數裁撤以節糜費由西省另派防營駐梧巡查彈壓令該府於經收正稅自行竭力稽徵不得藉口缺額別圖彌補從前該廠徵解稅項係前後遞推牽搭淡旺不均或淡月而所解極多或旺月而所解甚少應改令按照定額計日攤解以免藉口賠累此後該廠徵稅俱按定則估算不准浮加一因其餘吏役私收之因頭外費現費等項一律禁除永免商累並刊給三

聯印票分別存發報查其廠書巡役充規概行禁革惟根蒂不除弊端決不能斷應將廠書算房銀房籤子手尺手等名目年限一概革除廠中查船核算繕寫記簿俱改用司事籤手尺手改募巡丁既無報部額缺充滿年限即可隨時召募隨時革換庶可杜賄充婪索之弊惟向來各項人等仰給此廠者不下數百家此次裁除太鉅若不爲酌籌飯銀限一定數必致另開需索刁難之弊防不勝防甚至包串漏越轉虧正款擬令按正稅之數每兩止許收飯銀五分分給司事巡丁一切人等統在其內不准多取分毫亦不准別立名目查梧州釐局向有商捐三江緝捕解一項及鹽包小釐一項以養護商扒船每兩五分每年約銀一萬二千兩現經

臣秉衡飭將此項緝捕牌委員勇役扒船概行裁撤另派水師扒船巡護緝捕筭鹽包捐項概行免交計以此項抵稅廠飯銀之數每年商民尙可少納銀七千餘兩此外貨船一隻有紅單銀一錢有掛號錢上水一百文下水二百文有收旗錢三十文皆散役差艇所得爲數甚微應准均仍其舊又查上項所開柴火銀一項銷路甚廣取之甚微積之甚鉅無稅無費尙不至爲商民之累此項銀一萬三千兩即遵 旨提充公用查西省鄉闈經費例銷止一千九百餘兩不敷甚鉅向係由各州縣派捐銀一萬四千餘兩其餘由外籌補各屬瘠苦難支應即於此項內按年提銀七千兩解存司庫備支科場經費以後各州縣應攤闈費立案永遠免派至

舊日院司道公費二萬二千兩原係辦公之需臣秉衡及司道等均未提作私用惟現既停抽經費不宜累及該府惟有極力撙節擬裁減一萬六千兩即以柴火銀餘款六千兩分季解交善後局分充巡撫藩臬鹽道各衙門辦公之需並將此次裁革減定各項數目榜示該廠十里外並勒碑水陸通衢人人共見永遠遵行計稅費均按例定因法徵收一項裁減約二萬兩經費一項官私裁除約十七萬兩因頭一項裁除約五萬兩外費現費兩項裁除約共一萬二千兩緝捕解捐款鹽包小釐兩項除抵充飯銀外裁減約七千餘兩通計此後商賈過梧關者每年約可省銀二十五萬餘兩若有浮收勒索逾於定章之外者被人告發或經查出嚴

行參辦並嚴禁梧州府永遠不准餽送上司節壽如有私送私收者與受均一律參處又原奏內稱廣西藩司衙門有吏一房吏二房向係廣東肇慶府人黃姓充當而作弊惟吏一房尤甚盤踞日久視缺分之肥瘠索取規費一節查廣西正佐各缺原有詳定輪委酌委章程前藩司張夢元謹小慎微在任日每有缺出必詳核輪委超委各冊照章辦理現署藩司慶愛一本定章間有人地未宜改爲酌委者隨時稟由臣秉衡酌定始行懸牌詳委傳到各員面給委劄不經書吏之手官場並無間言似無延擱索規之弊至補缺本有定例無論酌補輪補之缺均詳由臣秉衡悉心核定分別題奏辦理又官員繳憑例應於到任後扣明程限有無逾違

具結列批送司按季彙繳其間有聲扣舛錯駁查更正以致稽延亦事之所有並無半年後始行繳憑之事至藩署吏一房書吏前藩司張夢元於到任時查閱卯冊見係黃姓居多且多籍隸肇慶者業已分別更換吏二房書吏查無黃姓之人署藩司慶愛隨時訪察各書尙無弊竇其有承充年滿者概行撤換一有弊端立予革究又原奏內稱廣西釐金各卡自桂林順流而下省垣上下關兩卡陽朔縣城一卡平樂府城一卡昭平縣城一卡梧州府城三卡自梧州府溯流而上則至藤縣一卡濠江一卡平南縣之白馬塘一卡大烏墟一卡桂平縣之大湟江墟一卡潯州府城兩卡又自潯州府分南北河溯流而上其南河則橫州之南鄉墟一卡永

涇縣城一卡南甯府城三卡宣化縣之三江口一卡右江平馬墟
一卡百色城一卡其北河則至武宣縣屬之濁水河一卡柳州府
城兩卡融縣長安墟一卡古宜墟一卡慶遠府之懷遠鎮一卡皆
大河船隻所常經其餘窮鄉僻壤私設之卡尙難盡悉各卡有督
辦有幫辦有委員司事有赤手巡丁除耗費侵漁外報解不過十
中一二賸削商民應於府城舊設釐卡酌量裁併其外卡除擇緊
要者酌留一二處其餘概行刪汰一節查廣西地瘠山多舟楫可
通之處乃有商賈聚集是以開設釐卡皆在濱河口岸而四境多
與雲貴廣東湖南等省連界支河歧出並無扼要總口堪以歸併
抽釐不得不於桂平梧潯南甯百色柳州慶遠等府屬沿河市鎮

設立正分各卡或管抽收或司查驗設卡之數雖似較繁實因杜絕繞漏並非節節重徵蓋西省釐金章程凡商民囤貨發行時抽落地釐金一次販運貨物由鄰省入境者抽入境釐金一次由本省運赴鄰省者抽出境釐金一次無論落地入境出境均止抽收一次經過各卡票驗放行概不重抽辦理多年歷久相安水路設卡之外陸路只泗城府屬汪甸卡一處稽查滇省繞道入粵之貨其餘僻遠之區實無一卡歷來設卡之所必先詳由撫臣批示大張曉諭方無抗違更不能任意私設至各卡有督辦幫辦委員司巡等名目則係量釐務之繁簡分別酌派其應支薪水等費向有定章不能任聽虛耗歷經查察整頓將行爲卑陋聲名平常之試

用縣丞蔣錫熊吳林森從九品尹鑒一史葛森徐溥試用通判程
銑先後參革並將開報含混之通判陶用中加平漁利之司事丁
憂湖北巡檢孫新原即孫仲裘參革究辦在案近年釐數每年總
在六七十萬之間廣西貧瘠省分貨少商稀抽數尙不爲絀似無
侵隱之弊如果報解不過十之一二則每年收數當在四五百萬
從何有此鉅款所議裁汰釐卡一節查前次給事中劉曾弢靖先
後奏請查辦均經澈底查核凡有可裁之卡已欽遵 諭旨節次
裁去二十餘處無可再裁經前撫臣覆奏有案臣等亦知抽釐爲
不得已之舉如能隨時裁撤以恤商艱原屬善政無如邊防孔殷
餉需緊迫廣西別無可籌之款惟有仍請循舊辦理嚴飭承辦卡

員倍加謹慎力杜煩擾容俟防務漸緩再行體察情形酌議裁併
又原奏內稱州縣案件株連太多候質之人概行監押書差私行
拷撲停給粥飯必索詐得遂而後已炎暑薰蒸禁卒又不打掃圉
圍以故死於饑餓拷撲瘟疫者纍纍該管官定有月報限期各州
縣多空文回覆其寔案件仍延擱不辦一節查各州縣辦理一切
案件先經升任撫臣張樹聲仿照直隸清訟章程將積案監禁管
押逸犯四種分別管收除在四柱按月冊報專派委員將各屬月
冊逐案詳核隨時飭催訊結分別功過自理詞訟只准一原一被
一證或證至二三人而止令頭門外懸挂粉牌將在押人名案由
月日及有無刑具逐一開載儻有私押私刑准該家屬喊稟並由

省隨時委員密查如並未懸牌及開報不符者懲處臣秉衡起家州縣於恤民一端時兢兢以此爲意前在臬司任內深恐各州縣有名無實復經通查各屬未結各案應辦者依限詳辦應釋者取保開釋各州縣陸續稟報遵行雖才具長短不一尙不至延擱不辦其候質之人分別取保候訊並非概行羈押並嚴飭各州縣清查監獄羈所勿令禁役勒索凌虐曾經委員密查分別懲儆尙無十分荒謬情弊署臬司沈康保到任後仍不時嚴加查催惟州縣斷不能人人勤明差役更不能忘情訛詐惟有隨時密訪隨時重懲一有被控及查出者不稍寬貸或可獄少冤民此又非章程文檄所能爲功者也據該司道等先後查明議擬分別稟覆前來臣

等伏查此次 飭查各節以梧州經費爲最要此事從前曾經言官論及此次奉發一片一摺皆論此事其爲病商厲民亦可想見此次臣之洞委員往查書巡等許以重賄加以恐嚇該委員堅拒不聽因遂造言傾陷希冀撤回 臣等察知狡謀不爲所動然則積弊之深澈查之難更可概見現經裁撤經費局革除廠書籤手裁減公費禁止節壽改章立案勒石永遵當可於恤商保餉均有裨益丁憂梧州府知府梁俊未能禁止書巡多取病商疊經飭查復不據實稟明查禁節費充公咎無可辭惟經費一局歷任相沿弊端積重已久未便專責一人致有偏枯且該府平日居官尙能辦事似可量予從寬相應請 旨將梁俊以同知降補以示薄懲其

嚴禁藩署書吏盤踞把持以及整頓釐務清理訟獄各節均係實在情形至光緒十年梧州解存公費臣秉衡與西藩臬兩司鹽道俱係存局充公並未移作私用臣秉衡上年先已奏明提作賑撫水災之用在案十一年臣秉衡等公費亦已遵旨提解再此件因臣等六次委員密查始得查核詳寔且須察度情形會商定章是以覆奏較遲合併聲明所有權查嚴禁釐剔一切弊端各緣由謹合詞恭摺據實覆陳伏乞 皇太后 皇上聖鑒謹 奏 光緒十二年五月十一日奉 旨另有旨欽此

奏覆西省團練開礦現在似難舉辦摺

光緒十二年四月初八日

奏爲欽奉寄 諭飭查團練開礦兩條體察粵西現在情形似難

舉辦據實覆陳恭摺仰乞 聖鑒事竊臣於正月十三日在鎮南關防次承准軍機大臣字寄光緒十一年十二月十四日奉 上諭翰林院代奏編修鍾德祥條陳時務一摺據稱廣西與越南接壤法人偏處北圻在在均須防範游勇匪徒所在多有深恐內外交訌辦理費手亟宜舉辦團練以資鎮壓該省煤鐵等礦甚多均應採辦以開財源而利器用等語所陳兩條係爲靖內禦外興利裕餉起見惟舉行團練事同創始開辦礦務資本須籌均應詳慎圖維切實規畫著張之洞李秉衡體察該省情形悉心妥議具奏原摺著分別抄給閱看將此由四百里諭知張之洞並傳諭李秉衡知之等因欽此遵 旨寄信前來跪誦之餘仰見 聖明俯采

芻言期裨時務之至意臣查廣西太鎮兩府邊界處處壤接越南在在均須防範而內地伏莽未淨宜籌備於無形誠有如鍾德祥原奏所云者是以邊軍非留二十餘營不敷分布腹地亦派有營勇常以巡防若舉辦團練便可裁營而節費開採煤鐵遂資利用以豐財值茲時事艱難軍餉支絀亟應認真籌辦何可視爲緩圖當經飭行省局司道迅速體察妥議去後茲據覆稱迭次公同詳察情形延訪紳士相與講求辦法僉以辦團一事當咸豐初元洪逆倡亂土匪蠡起前撫臣鄒鳴鶴曾議定團練章程飭行辦理在省城設團練總局舉前翰林院修撰龍啟瑞御史朱琦爲督辦各州縣城鄉並皆設立團局遴派士紳以充團總挑集丁壯訓練發

給軍械口糧勉以勦賊立功從優保獎人皆踴躍思奮通省一律
勃成其始尙知急公力圖禦侮然亦僅止扼守要隘自衛鄉村遙
應官軍藉壯聲勢鮮能遠道應調努力從戎其後流弊日滋尾大
不掉咸豐季年賊氛逼省勉調團練助守歲暮思歸竟爾紛然自
散漸至擅作威福尋仇相攻州縣官事權不屬號令不行轉成地
方之害故同治年間前撫臣張凱嵩奏陳善後時政有戢強團之
條大費整頓迨升任撫臣劉長佑再撫西粵改團練局爲保甲局
裁撤團總飭由牧令改派鄉正甲長分團編甲而清理之按戶酌
出丁壯歸鄉正甲長遞相稽查約束定期講武守望相助祇令自
衛鄉里免其徵調遠出丁壯有過報官責懲鄉正甲長行爲不善

由牧令隨時查察更換比年以來始漸相安是辦團之獲益少而流弊多必萬不得已而行之今欲復辦團練派團總籍練丁期於平時有利無弊臨事應調過征再三籌議殊無善策等語臣查所陳皆係實在情形細閱鍾德祥原摺內稱擇青年丁壯籍爲團勇平時聽其散處有事合編成營卽寓兵於農之法原屬美善惟兵農之分久矣非應募入伍而欲臨時悉聽徵調其勢已有所難況兵非練不能用綠營額兵尙議編爲練軍立營操演各省所招防勇亦飭勤加訓練方期得力今以耕作之農民僅於每月朔望操槍一日遂謂能臨大敵堪備非常恐無如此容易臣愚思維至再鍾德祥辦團籍丁以備出戰之議既有難行且無實際惟就近年

按戶出丁訂期講武之法責成地方官認真辦理使之自衛身家稍輔兵力之不逮似於實事或尙有裨至採辦煤鐵一節查得產鐵之區皆有商人請設爐座開採照例按爐納課造冊報部因出產不旺鐵質亦不甚精良有獲利甚微旋開旋請封閉者亦有開採三五年礦砂已竭呈請停辦數年後礦苗復見又請設爐者是鐵礦一項各屬早經開採勿庸再行招商惟應認真稽查毋任私設爐座朦混漏稅已飭地方官實心經理以裕稅課其煤炭一項物產各有所宜廣西地土不甚產煤鮮有開採之處上年東商以富川縣屬有煤可採赴督臣張之洞東撫臣倪文蔚衙門呈請試辦由東委員會同地方官勘明開採苗不甚旺質亦不精用於火

輪不甚得力價值甚低僅敷工本致商情不甚踴躍容察看有無成效及他處有無可採分別籌辦期收自然之利以裕餉而益民除拊循島埠保衛華商一節應由督臣另行具奏外所有遵 旨查明粵西辦團開礦實在情形理合會同兩廣總督臣張之洞恭摺由驛具陳伏乞 皇太后 皇上聖鑒訓示謹 奏 光緒十二年六月初六日奉 旨知道了欽此

奏報拏獲貴縣土匪廖彩爵摺 光緒十二年四月初八日

奏爲查拏貴縣逸匪首要均經檢誅地方安靖謹陳辦理情形並將陣亡營弁請 旨飭部議卹恭摺仰祈 聖鑒事竊貴縣逸匪廖彩爵潛回縣屬中屯村糾黨拒捕據該署知縣裘彬稟經臣飭

派升用知府陳如金督帶營勇前往查拏該管知府延昌亦調防營到縣會商辦理節經攻破巢壘斃匪多名而匪首在逃臣復嚴飭上緊購捕務獲究懲於本年二月初六日附片 奏明在案嗣據陳如金延昌會稟探得匪衆多係脅從自被官軍毀巢以後追捕甚急俱已星散惟匪首廖彩爵帶死黨十餘人潛匿於武宣縣境即派弁勇並密札縣廓鎮巡檢陳啟燠隨帶親兵協同躡捕而該匪狡詭異常巖洞深藏不時更易追尋輒無實在下落經臣責成印委各員廣購眼綫加懸重賞期於必獲勿任日久稽誅陳如金等以鄉團熟悉情形尤諳路徑迭次遴派士紳導引分投查緝偵知該匪又回匿貴縣邊境古占後山經管帶防軍參將王化祥

龍殿甲各派哨弁帶勇往捕有匪數人在山瞭望遙見勇至即越嶺而逃哨弁李國周督勇追趕格殺一名餘均逸去跟蹤躡緝二月十五日追至六活村搜擒匪妻廖陸氏並匪黨周老旺解經陳如金等訊供究出匪首廖彩爵隨帶死黨七八人伏匿獅子山巖內當派外委龐啟廣巡檢陳啟燠酌帶親兵馳往掩捕十七日清晨我軍將抵岩邊該匪竟敢出而抗拒兵勇合力環擊登時斃匪二名生擒周老輝周老榮周老組三名龐啟廣放槍擊中廖彩爵左腿揮衆上前始就擒縛餘匪三人拚死衝鋒奪路狂奔追擊不及我軍亦被拒殺一名受傷三名當將各犯解回研訊仍飭嚴拏逃匪務獲究辦卷查該匪廖彩爵昔年爭占其兄家產糾黨毀屋

槍擊兄子廖祖勵及雇工潘頂升斃命拒捕逃逸漏網有年今復潛回本村添黨負固抗拒其妻廖陸氏亦復聽從放槍拒捕傷勇匪夥周老旺等無不抗官助惡據供各情歷歷如繪由陳如金延昌稟請核辦前來臣查核所稟均屬實在情形該匪首夥各犯暨犯婦廖陸氏皆係罪不容誅即經批飭就地正法並將廖彩爵梟示以昭炯戒一面查拏逸犯寬免脅從務使暴戢良安庶幾地方一律靖謐此次貴縣匪徒糾黨圖逞經陳如金等攻破匪巢擒誅首要辦理尙爲迅速在事人等不無微勞足錄除地方官有應捕之責知府陳如金參將王化祥龍殿甲非同微員末秩不敢邀請議叙外其營哨武弁團練士紳可否由臣酌保數人咨部給獎以

示鼓勵出自 天恩五品藍翎儘先拔補把總蕭宏亮守備銜儘先拔補千總汪雨露前於進攻中屯賊巢中礮捐軀殊堪憫惻相應請 旨飭部照陣亡例議卹其餘傷亡勇丁仍俟查明造冊報部照例議給卹賞所有拏辦貴縣逸匪業經竣事緣由理合會同兩廣總督臣張之洞恭摺由驛馳陳伏乞 皇太后 皇上聖鑒訓示謹 奏 光緒十二年六月初六日奉 旨覽奏均悉此次出力各員著准其酌保數人咨部給獎蕭宏亮汪雨露均著交部照陣亡例議卹欽此

奏拏獲宣化縣漏匪雷麻大就地正法片

光緒十二年四月初八日

再宣化縣漏匪雷麻大閉全彰前當關外軍務喫緊之際乘機思

逞經左江鎮道飭派勇營緝拏未獲臣於上年秋間責成該地方官捕獲夥黨多名就地懲辦仍飭嚴拏首要務絕根株曾經附片奏明在案自去冬以迄今春節據南甯府知府何昭然該縣知縣蕭憲章等多方購捕續獲悍目多名該首匪因捕拏嚴緊潛逃遠地三月初間據綏人赴臣營稟報查得雷麻大潛匿附近邊境臣即飭派親兵同往捕拏是月初六日將雷麻大獲解到來派員驗訊確係該犯正身據供歷年搶劫拒捕戕害兵差並糾衆結盟拜會圖攻武緣縣城情事歷歷如繪該犯罪大惡極未便久稽顯戮即飭就地正法傳首犯事地方懸竿示衆以昭炯戒仍飭上緊捕拏閉全彰務獲嚴辦臣秉衡謹附片陳明伏乞 聖鑒謹 奏

光緒十二年六月初六日奉 旨知道了欽此

奏拏獲煽結哥老會匪徒景清寅綁赴軍前正法片 光緒十

二年四月初八日

再臣接准提臣蘇元春咨訪聞南關地方近有匪徒煽結哥老會情事當經密飭各營嚴拏旋據管帶毅新前營遊擊楊昌魁稟據所部勇丁楊洪春報稱有舊日認識曾在各處當勇之景清寅邀伊同結哥老會未經允從報請拏辦隨帶哨勇於本年正月初五日將該匪犯景清寅拏獲搜出隨帶哥老會號片數十張解送到營當即委員提訊供係四川三台縣人曾在貴州等處當勇因事被革出營就在各處游蕩流入關外遊匪夥黨該匪夥多有曾結

之...
卷二十一
哥老會者伊亦入會領得號片隨帶在身來至邊關潛蹤窺探欲誘人入會伺隙勾結滋事尙無人信從後遇舊識之楊洪春邀同結會未允即被拏獲等情不諱詰以曾在內地何處結會堅不供認等因經臣派員提訊供亦無異查該犯以革勇流入游匪潛來邊關窺探欲煽結哥老會以圖乘隙滋事實屬膽玩應即嚴辦示儆當與提臣會商派員將該犯景清寅綁赴軍前正法仍飭各營員及地方官隨時認真查緝毋任奸匪潛匿煽結滋生事端理合附片陳明伏乞 聖鑒謹 奏 光緒十二年六月初六日奉旨知道了欽此

奏辦理資遣招墾摺 光緒十二年六月十六日

奏爲籌辦善後酌定資遣招墾章程以清邊圉而遏亂萌恭摺仰
祈 聖鑒事竊臣於上年四月初一日准督臣電開總署三月二
十五日來電本日奉 旨越地義民岑毓英李秉衡隨宜措置朝
廷不爲遙制等因欽此又於八月初二日承准軍機大臣字寄七
月初五日奉 上諭鎮南馬白二關爲滇桂入越邊要處所現當
和議甫成越南游匪爲患著張之洞李秉衡悉心會商通盤籌畫
詳晰覆陳用副朝廷慎固邊防消弭隱患之至意等因欽此經臣
欽遵於上年四月初八日本年二月二十八日先後會同覆奏在
案伏念 聖主厯系邊陲時勞宵旰臣等責任所在曷敢不及早
圖維查越南游勇之患已多歷年所迨法併越地民懷忠憤爰舉

義旗遊勇亦紛然往附實則陽爲義民陰肆刦掠無所不爲所恃我嚴邊備彼未途窮無虞內犯迺比年越地失耕糧源日竭此輩輒數十千百爲羣蟻聚於芄葑牧馬保樂間不下萬有餘衆無所得食飢則變生若不早爲之所待其旣潰而後圖之即不難懾以軍威而擾及邊民驚及內地可慮滋多是以微臣夙夜籌思惟有秉承迭次 聖訓隨宜措置通盤籌畫已先會商提臣蘇元春督飭邊營嚴爲之備又復博採衆議酌定資遣招墾章程選派樸誠員紳於龍州廳歸順州等處分別設局先期出示於四月初一日開辦除能自存於越者聽便外凡屬內地願歸之衆無論籍隸何省皆派營分起接遞按程逐節寬爲給資不准執持寸鐵有軍械

則勒繳而酌償所值每過境必點驗而冊報確數及遞出桂境仍
界以到籍之資並知照隣省地方官務使各歸鄉井此現辦資遣
之大概情形也其無家可歸者已於沿邊預勘未墾荒田百數十
處足敷安插千餘戶口皆令委員會同地方官督率鄉保確查以
免侵佔輻輳有來認墾者由局驗明計口授田給資搭蓋茅屋酌
發牛種農具責令耕作而於未經收穫之先仍量予鹽米並按編
保甲法取具連坐互結選任牌長以專其責俾便稽查此現辦招
墾之大概情形也統計兩月以來認墾者尙屬無幾遣歸者已數
逾三千來方未已隨時查察尙無不受約束滋擾情事倘經此次
招遣後尙有擾及邊境者立即痛加剷除使之無所藉口似此統

籌辦理臣亦不敢謂計無遺策但使越地少一游勇即邊境少一
隱憂惟此項約須三數萬金餉項維艱敢不深計然爲弭患是急
惟有核實支銷不敢稍存惜費畏難之見矧前奉 諭旨不爲遙
制又何敢不相機遵辦藉以上慰 宸衷所有資遣招墾游勇緣
由除將籌辦章程咨送軍機處備查外理合會同兩廣總督臣張
之洞由驛馳奏伏乞 皇太后 皇上聖鑒訓示謹 奏 光緒
十二年八月十四日奉 旨覽奏均悉所籌資遣招墾章程尙屬
周妥仍著隨時認真經理綏靖地方欽此

奏暫留蔣宗漢緩赴新任摺 光緒十二年六月十六日

奏爲請留實缺總兵在營暫緩赴任以重邊防恭摺仰乞 聖鑒

事竊頭品頂戴記名提督雲騎尉世職圖桑阿巴圖魯蔣宗漢上年欽奉 諭旨補授貴州安義鎮總兵當經具摺叩謝 天恩籲請 陛見茲於本年五月初四日專差齋回原摺後開軍機大臣奉 旨著毋庸來見欽此仰見 聖明軫念邊防不令遽離戍守誠爲 臣等下懷所願欽感莫可名言伏查蔣宗漢忠勇性成戰功卓著連年出關禦敵厥功尤偉嗣以布置邊防仍統所部廣武軍各營分紮鎮南關以西平而關一帶現在越境未盡相安游匪勢甚滋蔓難保不貽邊患正在設法分別資遣招墾以免滋生事端尤賴二三宿將鎮壓巡防相應籲懇 天恩俯准將該總兵仍留軍營暫緩赴任俾收指臂之助隨後察看情形如邊防稍鬆再當

飭赴本任臣等係爲慎重邊防起見理合會同兩廣總督臣張之洞恭摺由驛馳陳伏乞 皇太后 皇上聖鑒訓示謹 奏 光緒十二年八月十四日奉 旨著照所請兵部知道欽此

奏儲備將材片 光緒十二年六月十六日

再臣秉衡上年欽奉 諭旨勇數暨裁管員自隨之而減如實有久經戰陣之員月給薪糧作爲額外留於該省差委仍酌予限制此亦儲備將材之一策全在各統領激發天良秉公遴選設有藉此肥己或安置私人或浮開公費一經查出立予重懲等因欽此欽遵本年二月初六日臣於續奏裁管節餉未盡事宜摺內先行陳明請俟裁定營勇後與提臣秉公遴選期收實用仍酌定名數

隨後奏陳在案所有邊防營勇陸續裁撤八營其管帶幫帶將弁中不乏久經戰陣之人由臣元春督飭各該統領認真挑選查有留黔補用副將陽肇祥副將銜廣西補用遊擊陳顯道補用游擊張朝貴儘先補用都司文上貴都司銜儘先守備姜新成補用守備李全忠周萬全守備銜拔補千總孔昭昌六品軍功拔補把總黃榮光打仗勇敢熟悉邊情迭著奇功投閒可惜均堪留營差遣以備緩急與臣秉衡酌定薪水區分多寡全視其人得力之等差初不拘官階之大小綜計每月需費以二百兩爲限不敢稍涉虛糜即從三月初一日起支以廣皇仁而收實用此後察看情形設遇邊營需人更替要缺需人署代仍當量才委任如另有得力

員弁亦可續予添留庶幾仰副 聖主嘉惠戎行力求覈實之至

意理合會同兩廣總督臣張之洞附片陳明伏乞 聖鑒謹 奏

光緒十二年八月十四日奉 旨知道了欽此

奏假滿謝恩摺 光緒十二年六月十六日

奏爲 微臣假期已滿病漸就痊謹即銷假治公恭摺仰乞 聖鑒

事竊 臣前在南關感受烟瘴觸發肝暈舊症深懼貽誤要公於本

年正月二十八日瀝情奏懇 天恩俯准開缺回籍調理嗣於四

月二十六日差弁齋回原摺欽奉 批旨著賞假一月毋庸開缺

欽此跪讀之下感悚莫名伏念 臣才智短淺艱鉅謬膺萬不敢稍

耽安逸矧荷 聖慈寬予假期更何容不竭力支撐勉圖報稱前

於界務粗畢回駐龍州適聞邊外游勇糧盡將潰當即設法解散
並商由提臣嚴兵以備又因桂林近省一帶米價昂貴兩陽稍愆
恐倉存米穀暨先時採運於湘省者不敷平糶復電飭梧州動款
赴東趕辦洋米督臣顧念兼圻並即購米二萬石以濟計可次第
運到迭飭分處多設糶局減價便民省外四鄉及附近州縣間有
莠民乘機搶劫情事已嚴飭地方文武及時捕治解散五月下旬
連次得兩人心漸定但冀農田有秋庶可無慮茲屆假期已滿值
此地方多事不敢不及時銷假以期仰答 鴻施所有微臣感激
下忱並銷假治公緣由理合恭摺具陳叩謝 天恩伏乞 皇太
后 皇上聖鑒訓示謹 奏 光緒十二年八月十四日奉 旨

知道了欽此

奏報廣西賑款數目並請將餘款修絳路摺附單

二年九月初三日

奏爲上年籌辦廣西賑務收支數目暨官商捐賑銀數並將賑捐餘款展修平樂昭平絳路以惠商民 奏明

聖鑒事竊照上年五月初間西省霖雨發蛟湘灘黔州時漲溢桂林平樂柳州潯州梧州等府均罹水災其時亦匯於梧江波及東省當經護廣西撫臣李秉衡發款開倉濟梧州屬懷集一縣距東尤近被災尤急臣即飭委候補東森攜帶米餅馳往施賑復經會同護廣西撫臣奏請

應解備荒銀一萬兩由運庫籌墊銀二萬兩東善後局先行設措
銀一萬兩積捐銀一萬兩共銀五萬兩派委廣東候補道蔣武琛
等六員分爲五路携銀前赴西省災區會同地方官紳核實賑撫
在案茲據廣東布政使高崇基兩廣鹽運使王毓藻會同廣東善
後局司道詳稱上年西省賑款經臣暨廣東撫臣倪文蔚倡率各
官共捐集銀二萬五千三百七十兩由前運司瑞璋署運司蔣澤
春勸諭各鹽商捐集銀二萬兩又由東賑官捐撥銀二千九百六
十兩零二錢五分又四川永甯道沈守廉寄來賑捐銀一千零二
十九兩八錢除歸還運庫借墊東善後局暫借兩項共銀三萬兩
外合之備荒一萬兩實共籌捐西賑銀五萬九千七百零五分

已溢於原奏五萬之數查蔣武琛危德連等經辦梧州府屬之蒼梧並平樂府屬之賀縣富川等州縣原帶銀一萬五千兩共用賑卹銀八千五百八十兩四錢八分四釐薛謙經辦桂林府屬之臨桂靈川全州興安義甯等州縣原帶銀一萬五千兩續由蔣武琛處改撥銀五千兩又委試用通判呂以興補解併交薛謙銀五千七百兩共用賑卹銀一萬八千五百零二兩五錢四分黃維清經辦梧州府屬之懷集一縣原帶銀一萬兩計用賑卹銀九千五百五十一兩八錢五分黃寶田經辦潯州府屬之桂平平南貴縣並柳州府屬之來賓等縣原帶銀五千兩共用賑卹銀二千八百三十三兩九錢蔡道衡經辦平樂府屬之平樂昭平並桂林府屬之

陽朔永福等縣原帶銀五千兩共用賑卹銀四千七百九十五兩
五路委員船價川資雜費共銀二千四百六十一兩零五分又另
支委員向東森滬紳嚴作霖賑濟米腳盤費銀一百六十九兩二
錢統共用銀四萬六千八百九十四兩零二分四厘下餘銀一萬
二千八百零六兩零二分六厘均令解交西善後局存儲以備籌
辦善後工賑之用該員等均係親赴被災各鄉詳切體察會同地
方官紳酌分等差核實散放並無浮冒當經分別稟報東西兩省
督撫臣在案仍將收支捐助各數刊刻徵信錄傳布以昭核實又
據署廣西布政使慶愛署廣西按察使沈康保廣西鹽法道周鶴
稟稱興安縣屬之陡河平樂至梧州一帶沿河絳路爲舟楫往來

之道素稱艱險實農田水利商民生計所關前經被水沖翻冲塌亟應乘時興修兼資工賑曾於前摺會陳飭令該司道等議章勘修在案現在陡河堤壩各工已由李秉衡籌款興辦其平樂鐵路自難再緩茲委員會同官紳督匠勘估自昭平下至蒼梧共二十八塘四百餘里自昭平上至平樂共一十四塘二百餘里地之險阻以昭平至平樂爲最分別估計昭平至蒼梧約需銀一萬五千兩昭平至平樂約需銀三萬五千兩統計約需工價銀五萬兩各等情前來臣伏查廣西之視廣東地居上游境接壤錯農瘠商薄伏莽繁多西省不安則東省將承其敝故上年巨災驟作正當東省籌防捍水餉賑交困之時仍不能不獎率官商竭力經營雖屬

兼籌實同自救仰蒙 懿旨渥頒賞給賑銀三萬兩幸護西撫臣
李秉衡實能仰承 德意多方悉索極意撫綏災黎賴以安集東
省派往散賑各員 臣詳加訪察尙能盡心拯濟躬親放給委無草
率冒濫之弊現計東省捐助西賑之款尙餘銀一萬二千八百零
六兩零二分六厘嗣因西省籌辦陡河縫路乃工賑善後之要舉
西省無款可籌又飭東善後局勸諭土絲商人捐助銀一萬兩又
於江蘇協賑紳士嚴作霖等籌濟東西兩省工需項下撥銀五千
兩均解交西省善後局加以嚴作霖前捐存西省專備平樂路工
銀一萬兩共計東省外省捐款存銀三萬七千八百零六兩零二
分六厘以之展修昭平上至平樂一帶路工尙屬有盈無絀已飭

西司道等委員興修以利商旅而廣 皇仁至昭平下至蒼梧一
帶路工應俟另籌有款再行陸續興辦再此次籌辦西賑除 奏
准撥用備荒銀一萬兩外其餘悉由官商湊集捐資核實散放並
未動支正款應請免其造冊報銷至臣職在兼轄分應統籌東省
各官東西同舟義無膜視僉稱仰體 慈惠聊盡微忱衆鹽商等
以引地所在休戚相關誼等鄉鄰情殷郵助均不敢仰邀獎叙察
其情詞俱出至誠其四川永甯道沈守廉一員應如何給獎之處
出自 天恩所有上年籌辦西賑收支數目暨官商捐賑銀數分
繕清單恭呈 御覽謹會同護廣西撫臣李秉衡合詞具陳再廣
東巡撫係臣兼署毋庸會銜合併陳明伏乞 皇太后 皇上聖

鑒謹 奏

謹將廣東委員經辦廣西桂林平樂梧州潯州柳州等府賑務收支餘存各數暨另籌路工銀數開列清單恭呈 御覽

計開

收款

一奏撥備荒經費銀一萬兩 一廣東官捐銀二萬五千三百七十兩 一兩廣通綱鹽商公捐銀二萬兩又溢平銀三百四十兩 一東賑款內撥給銀二千九百六十兩零二錢五分 一四川永甯道沈守廉捐寄廣平銀一千兩又溢平銀二十九兩八錢 統計西省賑款動撥籌捐共收銀五萬九千七百兩零五分

支款

一廣東候補道蔣武琛經賑梧州府屬蒼梧縣東安鄉上堡白鈞
開竹笳開中堡下堡頭甲二甲三甲八寨堡頭甲二甲三甲牛過
水開十寨堡箕竹開木下村潯陽鄉大鷄開石牛開多賢鄉五堡
密埆坊六堡並六堡徭民吉楊鄉頭堡五堡確查災區輕重酌分
極次貧共大小男婦一萬三千八百一十四名口計發賑銀五千
二百三十一兩三錢又賑卹沙壓田畝坍塌瓦草屋舍共銀一千
二百四十五兩九錢三分八厘又賑卹溺斃男婦及鰥寡廢疾銀
一百二十九兩共賑卹銀六千六百零六兩二錢三分八釐 平
樂府屬賀縣官潭團芙蓉團鋪門團確查災區輕重分別極次貧

又次貧共大小男婦一千八百六十七名口計賑銀六百二十三兩三錢又賑卹坍塌瓦草屋舍銀一百五十兩零四錢又賑卹溺斃男婦及鰥寡廢疾銀六十八兩又發官潭鋪門芙蓉三團紳董採買倉穀銀五百兩共賑卹銀一千三百四十一兩七錢 富川縣忠義團敦厚團人和團耀武團被災尙輕惟沖壞民田沙壅甚厚急切難以修復分別極次貧又次貧共大小男婦一千一百二十四名口計賑銀四百零二兩六錢五分又賑卹鰥寡廢疾銀四兩共賑卹銀四百零六兩六錢五分 另支災區治疫藥料工價共銀二百二十五兩八錢九分六釐 以上蔣武琛一路計三縣共用過賑卹銀八千五百八十兩四錢八分四釐 該員領銀一

萬兩除用仍餘銀一千四百一十九兩五錢一分六釐 一支廣
東候補知府薛謙經賑桂林府屬臨桂縣東南鄉王家里等九十
三村東北鄉灘頭等九村西南附郭睦鄰等十二村西鄉渡頭墟
等十二村共受災四千四百八十二戶大小男婦二萬二千四百
八十九名口城廂內外一四五六七各段東南西北文昌等門外
各街對河東洲火神廟等十一街共受災二千四百三十九戶大
小男婦八千六百七十四名口又溺斃男婦共七十九名口計發
賑卹銀一萬零九百九十九兩二錢 靈川縣南里富坵渡等十
二村三都二圖至十一圖上下大江田等九十四村五都一四兩
圖大埠頭等三村共受災三千二百二十三戶大小男婦一萬五

千七百四十一名口又淹斃男婦共一百二十一名口計發賑卹銀五千五百四十一兩二錢又補平銀二兩七錢七分 全州恩建宜三鄉屏山渡等八村以及西延合浦坪西關外等處以建鄉四所金堂兩村爲重共受災一百八十六戶大小男婦一千一百十四名口計發賑卹銀三百五十六兩六錢又補平銀一兩四錢三分 興安縣大溶江上下茅坪菜園等三十三村以千家坪河口村一帶爲重共受災六百四十二戶大小男婦二千四百八十四名口又淹斃男婦三十名口計發賑卹銀九百六十一兩二錢又補平銀三兩一錢四分 義甯縣城內及桐山宅田嶺歐伍家厄口黎村塘頭等里六十八村共受災五百六十七戶大小男婦

一千八百五十七名口又淹斃男婦一十五名口計發賑卹銀六百三十七兩 以上薛謙一路計五州縣共用過賑卹銀一萬八千五百零二兩五錢四分 該員領銀二萬五千兩內二萬兩申公碼平三百四十兩除用尙餘公碼平銀六千八百三十七兩四錢六分 一支廣東即用知縣黃維清經賑梧州府屬懷集縣城內城外上郭下郭河南堡盤村堡階洞堡渡頭堡黃岡堡大利堡石龍堡楊村堡譚舍堡佛燈堡麥烏堡歐塘堡馬舉堡連逕堡鳳岡堡羅岡堡七坑堡汶塘堡章湖堡零洒堡鬱洞堡觀塘堡下沙田堡上秀柏堡嶺樓逕堡梁村堡被災較重酌分極次貧共七千三百七十四戶大小男婦二萬八千零九十五名口 以上黃維

清一路計一縣共發賑銀九千五百五十一兩八錢五分 該員
領銀一萬兩除用尙餘銀四百四十八兩一錢五分 一支廣東
候補同知黃寶田經賑潯州府屬桂平縣共轄二十一里內受災
者姜里趙里甫里永和軍陵吉一吉二宣一宣二上秀上都十一
里八十一村近在南北兩河低處致被水災核計極貧五口以上
者一千二百六十三戶五口以下者三百三十九戶鰥寡三十六
戶倒塌草瓦屋舍一百六十一家共發賑卹銀八百六十兩零五
錢 平南縣共轄二十五里內南河之零二零二零三北河之川
四廂一等五里共一百五十一村受災較重其南河之大烏蒙化
北河之川三川一路三惠政等六里受災較輕核計極貧五口以

上者六百八十一戶五口以下者一千三百一十戶倒塌瓦草屋舍八百二十四家又鰥寡廢疾七十一戶共發賑卹銀一千二百七十八兩五錢又提發貼修黃埔小堰大成三處基圍銀三十兩共用賑卹銀一千三百零八兩五錢 貴縣受災不重惟思籠郭東一二郭南四七等五里共二十六村附河田畝間有被淹人民並無傷損屋舍亦無倒塌核計極貧五口以上者四百零九戶四口以下者一百三十戶共發賑卹銀二百四十三兩五錢 柳州府屬來賓縣共轄八里受災重者南岸以南二南五爲最北岸以北五爲最其餘各里受災較輕惟五十五村沙壓田畝未能挑挖坍塌房屋較多核計沙壓田畝八十九戶坍塌瓦草屋舍七十二

家又鰥寡廢疾四戶共發賑卹銀四百二十一兩四錢 以上黃
寶田一路計四縣共用過賑卹銀二千八百三十三兩九錢 該
員領銀五千兩除用尙餘銀二千一百六十六兩一錢 一支廣
東候補同知蔡道衡經賑平樂府屬昭平縣思茄沖古袍沖馬江
塘古店塘涼風塘等處酌分極次貧共一百三十七戶計發賑銀
三百五十二兩五錢四分又路過覆舟陸川縣被難士子周鎮藩
等十七名並溺斃士子三名酌發卹銀共一百二十四兩共發過
賑卹銀四百七十六兩五錢四分 平樂縣堡地村陳家榨高興
榨季魚塘村印山背馬家莊豬肚洲王家坪大浪村大洞村金沙
村大扒村桐亮村夫結村田埔村大埔村巴江村黃牛村社平村

等處淹壞田穀酌分極次貧共一百零四戶計發賑卹銀一百九十三兩八錢八分又城內承恩坊張家灣及西門外一帶火災被焚屋舍一百零五戶發給撫卹銀三百七十一兩共發過賑卹銀五百六十四兩八錢八分 桂林府屬陽朔縣鎮安團附郭里天順團魚塘洲忠信團興平村呂寨岩興坪街大河背沙灣村韭菜山冷水村馬山村新成村金家村浪名村羊皮村恩和團浪洲村塘源洞官岩村等處淹壞田穀倒塌房舍酌分極次貧共七百五十戶計發賑卹銀二千六百五十八兩五錢二分 永福縣邊山里黃毛村古圳村毛洞里堡里墟九漕山大梨漕漁村大坪子蘇村波塘村喇路村仁里村官田村等處淹壞田穀坍塌屋舍酌分

極次貧爲一二三四五等共四百九十三戶計發賑卹銀一千零八十四兩又掩埋等銀二兩一錢六分 以上蔡道衡一路計四縣共用過賑卹銀四千七百八十六兩一錢短平銀八兩九錢 該員領銀五千兩除用仍餘銀二百零五兩 以上五路通計共用過賑卹銀四萬四千二百六十三兩七錢七分四釐 又五路委員船價川資雜費共銀二千四百六十一兩零五分 又委員向東森往賑懷集縣賑紳嚴作霖前赴梧州運挑船夫盤費共一百六十九兩二錢 統計西省賑款共支銀四萬六千八百九十四兩零二分四釐 除用尙餘銀一萬二千八百零六兩零二分六釐儘數解交西善後局存儲又飭東善後局勸諭土絲商人捐

李忠節公奏請 卷三
四十一
助西省善後工賑銀一萬兩又於江蘇協賑紳士嚴作霖等等濟
東西兩省工需項下撥銀五千兩並該紳捐存西省留備修路銀
一萬兩共實存銀三萬七千八百零六兩零二分六釐均充展修
平樂昭平一帶鐵路之用

謹將廣東省官商捐助西省賑款銜名數目繕具清單恭呈 御
覽

計開

兩廣總督張之洞 廣東巡撫倪文蔚 粵海關監督海緒 署
廣東陸路提督鄭紹忠 升任江西按察使前兩廣鹽運使瑞璋
調署廣東督糧道益齡 試用鹽運司運同金武祥 試用同

知沈宗濟 試用同知謝彭發 試用同知際安 廣州府通判

陳善圻 試用通判松秀 試用通判英鉞 奏留廣東差委廣

西試用知州凌兆熊 候補知縣王其恒 候補直隸州州判王

世芬 署鹽運司經歷候補鹽大使趙爾豐 署廣盈庫大使候

補鹽知事貴成 署批驗所大使候補鹽大使王德昌 電茂場

大使張寶臣 前署博茂場大使試用鹽知事林慶炳 墩白場

大使宋邦彥 前大洲場大使王含光 招收場大使諸鈞 候

補鹽經歷文通 候補鹽大使周志端 試用批驗所大使王爲

楨 試用鹽知事鹿融理 以上二十八員共捐銀二萬五千三

百七十兩 兩廣通綱鹽商共捐銀二萬兩又溢平銀三百四十

兩 以上共捐銀四萬五千七百一十兩又四川永甯道沈守廉捐西賑銀一千零二十九兩八錢均全數撥入西賑又不敷銀二千九百六十兩零二錢五分在東省官捐賑款內廣東水師提督方耀前廣東布政使沈鎔經記名總兵署廣州協副將鄧安邦三員捐項下撥補其銜名已於東省捐款清單開列

奏西省實無閒款解部摺 光緒十二年十月初三日

奏爲欽遵 懿旨籌議覆陳恭摺仰祈 聖鑒事竊臣承准軍機

大臣字寄光緒十二年六月二十二日欽奉 慈禧端佑康頤昭

豫莊誠皇太后懿旨前因海防善後用項浩繁及酌加旗營餉需必須籌款支給先後諭令各該省關將每年出入款目分晰奏報

並將現有勇營切實覈減冗局閒員大加裁汰每省每年可以節省若干專款存儲解部節經各直省將軍督撫監督等陸續奏到其能節省解部者僅止數省餘則非入不敷出即出入相抵在各省用款繁多每謂無可裁減殊不知近來積習相沿每辦一事即創立一局位置冗員開支公費種種濫用弊竇甚多雖經屢次嚴諭迄未大加裁減總由各督撫未能嚴飭藩司實心經理致以國家有用之正供作無益之冗費國用何時可充餉需何時可足耶各該將軍督撫監督等受國厚恩務當共矢公忠破除情面能省一分浮費即多一分正用所有奏明無款可撥各省著再將各項可省之款核實刪減無論正款閒款不拘數目多寡每省每年可

以節省若干存儲解部即行籌議具奏不得以入不敷出
省一奏塞責稍涉推諉當此時事艱難餉需支絀但得每
若干積少成多不無裨益諒各該將軍督撫等必能共體
爲籌措也等因欽此遵 旨寄信前來 臣跪誦之下仰見
軫念時艱期節繁費而顧根本 臣受 恩深重具有天良
體安籌力圖報稱惟各省情形不同粵西素稱瘠苦餉需
加裁節仍無存儲上年迭奉 懿旨飭將每年出入款目
減勇營節費解部即經 臣先將常年收支各款入不敷出
單具奏嗣又將遵擬裁減勇營每年可節餉銀二三十萬
未濫設冗局位置閒員情形據實陳奏聲明廣西軍餉全

協助今擬每年裁節二三十萬兩雖本省仍無存儲可以解部而各省應撥粵西協餉即可從此減解自有餘存以備部撥是裁營節餉雖與他省情形稍殊而其中有裨京餉似無二致等因光緒十二年二月十九日遞回原摺後開軍機大臣奉 旨據奏擬裁各營每年可節省餉銀二三十萬兩籌辦尙屬切實即著照所議行欽此欽遵在案是廣西裁節之餉協撥省分當有餘存備撥西省無可存儲解部已邀 宸鑒茲復欽奉 懿旨著再將可省之款核實刪減無論正款閒款每年可以節省若干存儲解部即行籌議等因復經 臣逐加查核先因餉項常苦不足缺誤時虞凡有可節之費 臣於奉 命暫護疆符之初即已大加裁節嗣奉裁營節

費解部之 懿旨益更裁節殆盡現在實無可節之正款至閒款一層廣西邊徼瘠區鮮有此等款項前因內部飭查各局支款悉經列冊造報此外尙有鄉閭經費不敷出自州縣捐解實覺難支議於裁存梧州府廠柴火銀七千兩撥補以免苦累已於裁禁梧州浮收規費摺內分晰陳明此時別無閒款可以節存解部係屬實在情形 聖明燭照萬里微臣不敢稍存隱飾自干咎戾理合據實覆陳伏乞 皇太后 皇上聖鑒訓示謹 奏 光緒十二年十一月二十九日奉 旨戶部知道欽此

奏報梧州兩廠課稅節年征收撥支銀數摺

光緒十二年十月二十九日

奏爲查明廣西梧州兩廠課稅節年徵收撥支銀數恭摺覆陳仰

祈 聖鑒事竊光緒十二年七月初二日准戶部咨廣西司案呈
本部具奏廣西省梧潯兩廠徵收課稅已未報撥銀數一摺光緒
十二年六月初五日具奏本日奉 旨依議欽此相應抄錄原奏
恭錄 諭旨飛咨欽遵辦理計抄原奏內開梧潯兩廠徵收課稅
以十二個月爲一次每次共應徵正額盈餘等銀一十七萬八千
餘兩向係按次造冊題銷自同治十一年十月以後各年經徵課
稅均未造報姑念前數年間該省辦理邊防於此等積壓之案或
不暇及現在邊務已鬆應即澈底清查該省梧潯兩廠自同治
十一年十月起至光緒十二年五月止連閏計十三次共應徵解
正額盈餘等銀二百三十一萬五千七百餘兩檢核該省報部冊

籍及奏咨各案共提撥養廉軍需等款銀一百一十三萬二千六百餘兩計尚有未提撥銀一百一十八萬三千餘兩既未據造入餉冊報撥亦無咨報開銷案據鉅款攸關相應請 旨飭查若已解存司庫即行報部候撥若係該二廠歷任經徵之員積未報解即令照例勒限追繳將查辦情形限三個月先行覆奏倘逾半年仍不奏報即將前項未提撥銀一百十餘萬兩作爲已解存司庫之款撥充該省軍需的餉以除積弊而濬餉源等因咨行到粵當經臣行司查辦去後茲據署布政使慶愛詳稱遵查廣西梧州潯兩府均設有稅廠徵收貨稅梧州府廠每年額徵正稅銀六萬八千七百四十二兩零盈餘銀三萬兩潯州府廠每年額徵正稅銀四

萬九千三百七十九兩零盈餘銀三萬兩自咸豐年間疊被匪擾市井蕭條商稀課絀正稅缺額盈餘無徵先經前司查明梧潯兩廠自同治四年起至十一年止短徵正盈銀兩經徵各員無力賠繳援案詳請奏咨豁免奉部議准在案近年疊飭經徵之員多方招徠商販設法徵收無如粵西元氣未復民生凋弊貨物滯銷稅課總不能暢旺缺額仍鉅短徵正稅勉強責令賠足而各廠例定盈餘更屬絲毫無徵歷奉戶部指撥梧潯兩廠盈餘協濟黔省兵餉曾經查明兩廠正稅尙形短絀盈餘實無可徵詳請奏明在案而內部仍令催徵課稅撥解又值黔省練兵需餉孔亟疊次委員來粵坐催情形迫切不得已經前司陸續在於應放各款內設法

騰挪先後籌解過銀五萬兩以應急需所挪之項不能無著梧廠徵收固絀該府究有商捐緝捕經費可資辦公短徵盈餘勒令賠繳三四成提還歸款已據歷任之員陸續竭力賠繳其潯廠勒賠正稅已屬力不能支盈餘實難再賠委因地方被擾商販不前致有短絀並非經徵不力均屬無可再追茲查梧潯兩廠自同治十一年十月一百五十二次起連閏扣至光緒十一年五月一百六十四次期滿止共解正額襍稅銀一百四十一萬一千九百八十三兩四錢八分二釐內除提撥歷年文職養廉及軍需兵餉籌款共銀一百三十九萬六千九百九十三兩九錢一分六釐一絲七忽二微尚餘襍稅銀一萬四千九百八十九兩五錢六分五釐九

毫八絲二忽八微又著賠梧廠短徵盈餘銀一十三萬六千七百九十八兩一分二釐九絲八忽六微二共正餘稅銀一十五萬一千七百八十七兩五錢七分八釐八絲一忽四微內除提還挪解黔省兵餉銀五萬兩歸還應放各款支用外尙餘銀一十萬一千七百八十七兩五錢七分八釐八絲一忽四微此項銀兩因本省邊關各營需餉浩繁前戶部咨自光緒十年九月起每月在於廠稅項下撥充關外軍餉銀五千兩以資接濟已陸續儘數提解邊防各營支充軍餉並無存餘理合分晰備造清冊詳請核辦等情前來臣覆加查核梧潯兩廠正稅短絀盈餘無徵迭經前任撫臣奏明有案司詳均屬實在情形所有冊造該兩廠自同治十一年

十月起至光緒十一年五月止徵解著賠銀數及提撥歷年文職
養廉軍需兵餉並撥充關外軍餉各款銀數檢查案據亦屬相符
現在實無解存司庫及經徵積存未解之款如有鉅款可提當此
邊餉奇絀正可催提接濟何肯任聽延欠委實無可追繳至歷年
未經造冊題報誠如戶部原奏因連年邊防孔殷實不暇及惟不
按期專案造報不足以昭核實已飭自光緒十二年起按次造冊
詳請題報以便由部查核其從前未報之案亦陸續補造細冊具
報以清積牘除將現造清冊送部查核外理合會同兩廣總督臣
張之洞恭摺由驛覆 奏伏乞 皇太后 皇上聖鑒謹 奏
光緒十三年正月初二日奉 旨戶部議奏欽此

奏請蠲緩永安等州縣地丁兵米摺

光緒十二年十一月初三日

奏爲永安等州縣民力竭蹶籲懇 天恩俯准將光緒十二年分

應徵地丁兵米分別蠲緩帶徵恭摺仰乞 聖鑒事竊廣西兵燹

疊經地方凋敝光緒十一年以前各屬應徵地丁兵米疊奉 恩

旨准予分別蠲緩 皇仁優渥淪浹同深所有光緒十二年應完

新賦錢糧自應踴躍輸將不容再有延欠本年開徵後經臣迭飭

藩司嚴飭各廳州縣實力催徵務期依限全完源源報解詎入秋

以來桂林平樂梧州潯州南甯鬱林等府州屬雨澤愆期高田多

有被旱幸續經得雨不致成災而收成歉薄頗形艱苦已飭妥籌

撫恤一面勸諭農民於失收之田趕種雜糧藉資補救其應完錢

糧兵米力難照常完納自應按被旱輕重分別酌請蠲緩以蘇民困至未被旱各州縣應即按額輸將無如太平柳州思恩泗城等府或邊境未靖民間集團捍衛耕種不無失時或兵燹之後元氣未復民力仍行拮据臣體察情形光緒十二年錢糧銀米實難如額徵收惟有籲懇 恩施仍予分別蠲緩以副 聖朝視民如傷之至意伏查被旱州縣平樂府屬之永安賀縣梧州府屬之岑溪懷集潯州府屬之桂平鬱林直隸州及所屬之陸川等七州縣情形較重應徵光緒十二年錢糧銀兩應請各蠲免十分之三其餘七分歸入本年啟徵又被旱情形次重之平樂府屬之昭平梧州府屬之藤縣潯州府屬之平南南甯府屬之宣化鬱林州屬之博

白北流興業等七縣應徵光緒十二年錢糧銀兩應請各蠲免十分之二其餘八分歸入本年啟徵又被旱情形稍輕之桂林府屬之臨桂永福潯州府屬之貴縣武宣南甯府屬之橫州永淳新甯等七州縣應徵光緒十二年錢糧銀兩應請以八分歸入本年啟徵其餘二分分限三年帶徵又被擾元氣未復州縣太平府屬之崇善左州養利永康思恩府屬之遷江泗城府屬之凌雲等六州縣情形亦重應徵光緒十二年錢糧銀兩應請各蠲免十分之三其餘七分歸入本年啟徵又桂林府屬之靈川義甯柳州府屬之馬平來賓等四縣應徵光緒十二年錢糧銀兩應請各以八分歸入本年啟徵其餘二分分限三年帶徵查臨桂靈川永福義甯貴

縣馬來來賓等七縣均有緩徵光緒十一年錢糧銀兩俟帶徵光緒十一年錢糧限滿後接續帶徵武宣橫州永淳新甯四州縣並無緩徵光緒十一年錢糧應自光緒十三年起分限三年帶徵又永安岑溪懷集桂平崇善凌雲鬱林等七州縣應徵光緒十二年兵米應請各蠲免十分之三其餘七分歸入本年啟徵昭平平南宣化三縣應徵光緒十二年兵米應請各蠲免十分之二其餘八分歸入本年啟徵臨桂靈川永福義甯貴縣武宣橫州永淳馬平來賓等十州縣應徵光緒十二年兵米應請各以八分歸入本年啟徵其餘二分分限三年帶徵查臨桂靈川永福義甯貴縣馬平來賓等縣均有緩徵光緒十一年兵米限滿後接續帶徵武宣橫

州永淳三州縣並無緩徵光緒十一年兵米應自光緒十三年起
分限三年帶徵以上各州縣光緒十一年錢糧銀米應歸光緒十
三年帶徵者並請展至光緒十三年啟徵遞行推緩一年此內光
緒十二年奏銷如有已經徵收者應即入冊造報仍撥歸各年帶
徵分數扣算以清眉目至蠲緩兵米不敷支放之處容俟另籌撥
補支放再光緒十二年奏銷應於光緒十三年六月內造報現請
分別蠲緩頭緒紛繁並請展限半年核辦以昭詳慎據署藩司慶
愛具詳前來謹會同兩廣總督臣張之洞恭摺具陳伏乞 皇太
后 皇上聖鑒訓示謹 奏 光緒十三年正月初五日奉 旨
另有旨欽此

奏嚴禁州縣隱匿命案及索費摺

光緒十二年十一月十六日

奏爲欽遵 諭旨嚴禁州縣隱匿命案書役需索解費謹將查辦

情形據實覆陳仰祈 聖鑒事竊臣承准軍機大臣傳諭光緒十

二年五月二十一日奉 上諭有人奏廣西州縣隱匿命案有授

意賄和及縱兇不辦等項情弊以致兇犯無所懲儆請飭查參勒

緝等語人命重案地方官自應認真審理豈容延擱不辦任意消

弭著張之洞李秉衡通飭所屬遇有命案立即緝拏正兇照例詳

解辦理並嚴禁書役不准需索招解等費倘有前項情弊即行嚴

參懲辦另片奏桂平等縣有奸商把持桂皮行市及詭稱包稅抑

勒價值串通關書舞弊情事窮民受累釐稅日減等語並著張之

洞等確查禁革以除積弊原摺片均著抄給閱看將此諭知張之洞並傳諭李秉衡知之欽此遵 旨傳諭到 臣當經恭錄行知司局飭令分別確查認真辦理去後嗣據署按察使凌彝銘詳稱民事最重莫如命案緝兇審解均有定限不惟嚴其諱命處分即或詳報遲延亦應議處粵西僻處邊徼民情簡樸訟獄本不甚繁咸豐年間寇亂紛起各州縣日事防勦其時招解案件奉行展限無暇講求刑律迨地方肅清以後各屬辦理招解已復舊章光緒五年前撫張樹聲在任仿照直隸清訟章程以積案監禁管押逸犯四種分別管收除在四柱按月造冊詳報專派委員逐案稽核分記功過凡係命案必令照章稟詳毋許隱匿應緝者分別勒緝應

辦者依限審辦溯查同治年間秋審案件每歲或不滿十起近七八年來已增至二三十起各牧令尙能交相惕勵不敢任意玩延復經臣飭將命案如何稽查酌定章程通行遵辦該署司體察情形悉心酌核請飭各州縣每月將屍親具報命案若干起開列案由逐案註明曾否通詳曾否獲犯招解未獲犯者註明曾否照例開參造冊申送備查以便隨時督催辦理因念各牧令或處邊遠之地瘠苦之區遇有招解案件或苦於解費難籌並擬請嗣後州縣招解一案係藩司詳明列作苦缺有案可稽者准將用過解費若干據實稟報由司核明道里遠近人數多寡移知善後局給領歸款俾免賠累而示體恤至於命案相驗索取供應本干例禁欲

除其弊全在各州縣潔己愛民認真約束家丁書役不准絲毫擾累已由司刊發告示通飭各府廳州派委妥員分赴所屬州縣城鄉徧貼曉諭嚴禁隨從需索並於示內聲明如有索擾情事准屍親赴省控告實懲虛坐該管府廳州耳目切近務令留心訪察若遇屍親指控需索立即提案嚴究一面通稟核辦照例查參至若散勇游匪逞兇滋事並非處處皆有然亦不能保其必無已飭各屬隨時戒備設法捕拿一經獲案訊供即行通報核其情節實係罪無可逭即照土匪章程就地懲辦以昭炯戒前因關外游衆紛紛來歸經臣酌定章程資遣各回原籍沿途輪替押護尙能遵奉約束行走極爲安靜並無滋擾地方若如原奏所稱散勇游匪習

於兇悍睚眦細故動輒行兇一縣之中每年竟多至一二十起當報驗時需索夫馬供應視屍親鄰佑之貧富肆書差皂隸之苛求苦累已不堪言乃未幾受意賄和希圖息事或竟縱兇逃匿任意延擱即隨案弋獲僅予羈禁申詳招解視爲畏途故粵省入於秋審實緩人犯每年新事僅二三十起計辦理不及十分之五等情該署司再四訪查比來尙無似此情弊既經嚴申禁令力除積習責成月報以備查催各州縣果能實力奉行自不致有隱匿需索如其不知振作甚或有授意賄和縱兇不緝之事即行照例揭參斷不稍事姑容致滋叢脞詳請核明具奏等因前來臣查所詳洵屬實在情形臣自前歲到粵以來深念民間命盜案件皆關緊

要每飭所屬認真詳辦力戒因循今秋檄委凌彝銘接署臬司素知該署司任事實心時與講求緝兇捕盜之事凡遇瘠苦州縣於招解購綫等費許由省局籌給免其賠累所以示體恤而杜諉延茲據查明擬辦各節皆屬切當臣已批飭通行遵照仍隨時訪查所屬倘有前項情弊立即嚴參懲辦以期仰副 聖主慎重民命之至意除桂平等縣奸商把持桂皮行市一節先由司局飭屬確查並經督臣在東查明禁革另行會奏外所有遵 旨嚴禁州縣隱匿命案查明擬辦緣由理合會同兩廣總督臣張之洞恭摺由驛具 奏伏乞 皇太后 皇上聖鑒訓示謹 奏 光緒十三年正月二十一日奉 旨知道了欽此

奏查明各省欠解協餉請撥的餉片

光緒十二年十一月十六日

再臣准兵部咨所有本部會議兩廣總督等奏籌議廣西邊隘分營扼紮請撥的餉等因一摺於光緒十二年八月二十六日具奏奉旨依議欽此相應行文知照計抄原奏內開戶部查廣西協餉前由部撥定在該省西稅廠稅各項下每月自籌一萬兩廣東湖南江西於無論何款項下各月籌銀一萬兩又於該省釐稅月解銀二萬三千九百兩共計每月實有餉銀陸萬餘兩今據稱極力節省每月至少亦需六萬兩本省釐金每年可得三十萬兩計每月仍短三萬五千兩請撥的餉四十二萬兩自係就原餉改撥惟原奏並未將某省如數批解某省欠解若干一一聲明碍難辦

理應即請旨飭下兩廣總督廣西巡撫即行分晰聲明奏咨報部再爲指撥的款以昭覈實而免牽混等因咨行到營臣查廣西邊餉奇絀素賴鄰省協濟前經戶部撥定廣東湖南江西三省無論何款項下各月籌銀壹萬兩鮮能如數解到自因未有的款籌畫艱難致多延欠其奉撥本省西稅廠稅各項下每月自籌一萬兩雖係有款可指惟查西稅一項係因廣東運司短徵無著於同治年間改由廣西減釐抵徵以符鹽課舊額每年額徵銀七萬五千五百餘兩釐減則餉絀經前撫臣蘇鳳文奏明所徵西稅除應解鹽法道庫開支各款外餘銀仍悉充軍餉歷年皆係隨徵隨解以濟營用原奏廣西釐稅月解銀二萬三千九百兩所徵西稅即在

其中無可再籌至廠稅一項梧州兩廠因商稀課絀連年徵收缺額縱勒令完足正稅計每年僅共完銀一十一萬八千餘兩除解支左右江道養廉及廠員書巡薪工等銀八千餘兩撥充通省文職養廉銀七萬一千餘兩外存銀三萬餘兩核與部臣指撥每月白籌一萬兩所短亦鉅是以臣前次陳奏每月仍短實銀三萬五千兩懇撥近省有著之款以濟急需及部議奏令將某省如數批解某省欠解若干分晰聲明奏咨再爲指撥的款當經飭行善後總局司道遵照查覆茲據覆稱前奉戶部撥定廣東湖南江西三省無論何款項下各月籌銀一萬兩協濟廣西軍餉均以光緒十年九月爲始計自十年九月起暫截止十二年十月止共二十六

箇月廣東解到銀一萬兩欠解銀二十五萬兩湖南解到銀一十一萬兩欠解銀一十五萬兩江西解到銀一萬兩又奉部文劃撥廣西報存海防捐款銀三萬六千九百六十三兩八錢一分歸廣西收用由江西於應解廣西月餉內照數撥出就近解交北洋大臣兌收劃抵外尚欠解銀二十一萬一千三十六兩一錢九分並據聲明現奉兩廣總督文行已飭廣東藩司迅將本年應解西省協餉銀十二萬兩籌解赴西毋稍稽延等情前來與臣接准督臣咨會相同又臣於十月間接督臣電報先撥協餉銀二萬兩即日起解合將查明各省欠數縷晰上陳籲懇天恩俯准飭部指撥的餉俾得按月解濟無誤要需出自逾格鴻慈凡在戎行同深

仰望謹會同兩廣總督臣張之洞附片陳請伏乞 聖鑒訓示謹

奏 光緒十三年正月二十一日奉 旨戶部議奏欽此

奏查明西省礦產無可開採田州改流甚善摺 光緒十二年

十二月初十日

奏爲遵 旨查明廣西各屬礦產無可開採田州改流甚善無可

變通臚陳實在情形恭摺仰祈 聖鑒事竊臣於上年十月初一

日在龍州營次承准軍機大臣字寄光緒十一年八月二十九日

奉 上諭兵部代遞主事謝光綺條陳試辦開礦安撫土司各節

據稱廣西貴縣天平寨銀苗最著礦徒聚衆私挖易釀事端尤恐

兇徒煽誘貽害擬爲官商合辦之法以緝匪徒而充餉項如臨桂

義甯平樂各府州縣金銀銅鐵等礦請一併開採等語各該處礦苗果旺自可妥爲開採以資利用况聚衆滋事尤當設法嚴禁著張之洞李秉衡逐一詳查奏明辦理至土田州岑氏前因分黨仇殺士民流離轉徙日不聊生經劉長佑奏交部議改土歸流今據聲稱該州土民土日飲恨含悲等情其改流未盡事宜有無辦理不善量爲變通著該督撫體察情形妥籌具奏原奏著抄給閱看將此諭知張之洞並傳諭李秉衡知之等因欽此遵 旨寄信前來當經恭錄行知善後局司道欽遵查照飭屬逐一詳查據實聲覆會同妥議詳辦去後嗣據署布政使慶愛署按察使凌彝銘鹽法道周鶴詳稱查主事謝光綺條陳事宜大致謂廣西礦地多產

五金尤以貴縣平天寨銀礦爲最同治年間派員試辦事乏端倪
遂爾中止仍爲匪徒私挖恐兇盜萃爲逋逃養貽他患此外如臨
桂撈江義甯縣銅礦平樂府馬江金礦賀縣富川縣煤錫礦慶遠
府河池州思恩縣銀錫鐵硃砂等礦橫州博白縣金銀礦百色廳
奉議州硝磺礦菁華久蓄洩露時聞應請一併分投開採再土田
州岑氏自改流以來宗祀竟絕土民土日飲恨含悲擬懇奏請
飭查改流後未盡各事宜如何量爲變通或援泗城改流之例子
以承祀之官總期心安理得等語該司道等詳查檔案貴縣隴頭
鹿班山場先曾開採銀礦承商納課嗣因礦苗不旺恐工丁滋事
咨部封禁光緒元年該處山頂出產銀砂村人入山私採即所指

平天寨地面也因時有爭挖相關之事地方官稟經升任巡撫劉長佑派員會查勘明礦苗已見因議招商承辦派營彈壓隨據紳士劉孟三等呈請集股試辦倘或窒碍仍行封禁於光緒元年十二月附片奏明在案旋因礦苗告竭採獲之砂鍊銀無幾不敷各項薪工該紳等各議退股減少工丁而礦徒易聚難散幾致滋事經調任巡撫涂宗瀛勒限遣散復將各口封禁永不准私挖滋弊此貴縣開採無效飭行封禁之情形也及奉飭查節經分行查覆據貴縣知縣裘彬稟稱此案并奉兩廣總督札委候補同知蔡道衡來縣會查履勘如大坪天小坪天鹿班三汊等處均產礦砂小坪天爲昔年巨逆黃三踞巢今營壘平毀出砂礮口亦俱填塞惟

三汊尙有新開痕跡因前年私挖緝拏查禁加嚴現無私挖情事該印委等傳詢紳耆僉稱開採無效已有明徵且該處毘連之來賓武宣皆非安靖之區難免滋事若議開礦無論官辦商辦均屬利少害多仍請封禁以重地方又據署臨桂縣知縣楊先俊稟稱該縣撈江地方同治三年據民人曾開均具報銀礦發露呈請試辦無效當即封禁此外查無可採賀縣知縣孫法澤稟稱該縣舊有蕉木銀廠硎老山空久已封閉同治八年縣屬與湖南接界之石板沖產有鉛礦勘係兩省犄彊未便開挖已奉封禁現無礦砂可採富川縣知縣丁燾稟稱縣屬並無銅錫等礦惟有煤可採已由廣東委員前來勘辦俟有成效再議抽課河池州知州陳師舜

稟稱州屬向有南丹桂紅二廠出產銅錫硃砂開採商人虧本歇業早已勘明封閉無可開採平樂府具報馬江並無金礦義甯思恩橫州博白等州縣稟俱未出產金銀銅錫礦砂等情該司道等以廣西地方雖稱五金並產大抵土性瘠薄藏蓄不厚一經開採精華易竭是以素乏開礦之利欲如雲南礦務堪資 國用實不可得今貴縣平天寨銀礦既據查無礦徒私挖若議開採仍屬利少害多應請照常封禁臨桂等州縣金銀銅錫礦據報均無可採無憑開辦各屬凡有產鐵之處業經承商納稅富川產煤亦由東省委員查辦前奉行知已於翰林院編修鍾德祥陳請採辦煤鐵案內分晰覆 奏硝磺一項歷年軍火所需派員分投採辦百色

廳奉議州均無出產有案可稽應無庸議至田州改流因土知州岑乃青病故無子岑氏族衆分黨仇殺土民流離轉徙日不聊生經前升任巡撫劉長佑奏請酌議變置以資補救其改流後未盡事宜經前任巡撫楊重雅及時籌辦妥協隨在宣布 朝廷德意俾慰輿情因土族土目家口較繁生計多艱請將該族目田畝編徵本色米二百餘石概行寬免永不徵收以昭矜恤而資奉祀奏蒙 恩准無不感戴 皇仁其土民改流以來得免土例襍派不受追呼同深鼓舞至今一律相安未聞有飲恨含悲之事其改流未盡事宜亦無辦理不善應行變通之處詳請查明具奏前來 臣查礦產五金原屬天地自然之利當此庫款支絀粵西礦如開採

有利敢不竭力圖維設法興辦無如地瘠土薄即偶有礦苗開採輒竭今據貴縣等處查覆均係實在情形且各處伏莽未淨游勇在邊使一開採勢必聞風蟻聚既難安靖於工作旋恐礦竭而工停則數千百之亡命聚不能散其患更何可言夫欲興利先求無害若利未見而害已形何容掉以輕心臣爲慎重地方通籌全局未敢稍涉遷就至田州改流辦理甚善並無應行變通之處所請應毋庸議所有遵 旨查明覆奏緣由理合會同兩廣總督臣張之洞恭摺由驛具陳伏乞 皇太后 皇上聖鑒訓示謹 奏

光緒十三年二月二十日奉 旨知道了欽此

奏報辦賑收支數目摺附單 光緒十二年十二月初十日

奏爲廣西桂平梧州柳五府屬上年被水成災遵 旨籌辦賑濟
謹將收支數目及官紳商民捐賑銀數分繕清單奏明立案恭摺
仰祈 聖鑒事竊照上年五月間桂林平樂梧州潯州柳州等府
屬地方因蛟水爲災淹沒田廬小民蕩析離居亟應拯濟經臣會
同兩廣督臣具摺 奏報先後請提省局存儲梧州歸公經費同
善局當本並閒款等項銀兩行司選員分赴災區確勘賑卹欽奉
諭旨確切查賑並奉 懿旨特發帑金賑撫臣復勸諭紳民捐
助一面設法搜羅以期有濟督臣張之洞亦派員携銀分五路來
西散賑又有上海協賑公所江浙閩粵好義紳民公同集資延江
蘇紳士嚴作霖親帶銀兩自詣西省各處酌濟貧戶計東西兩省

賑款及外省義捐已在二十萬以外民困藉蘇茲據署廣西布政使慶愛會同善後局司道詳稱上年災賑事宜經該司道會同遴委准補柳州府知府熊壽山桂林府同知趙慶蕃補用同知張樂補用通判萬維新傅培芳即用知縣蘇人毅補用知縣霍景熙伍世燾吳廷燕左秉堯柳籛等帶同佐雜書吏人等分往查勘並由該管道府督同各該地方牧令會同將被災村莊戶口田廬切實勘明分別輕重逐一賑卹辦理竣事陸續具報到局該司道查上年賑款欽奉 恩旨賞銀三萬兩經臣飭提撥梧州府解存省局公費銀一萬一千五百六十六兩六錢各閒款銀一萬二千八百二十三兩六錢同善局當本銀一萬兩防火經費項下銀一千兩

復經催提梧州府續解公費並前撫臣張曜奏提先後解到銀一萬六千五百兩又雲貴總督臣岑毓英捐銀一千兩前貴州巡撫臣林肇元捐銀四百兩臣與前廣西藩司張夢元倡率廣西各官捐集銀五千七百九十七兩一錢省城紳士捐銀四百八十六兩各屬商民捐銀一萬二千六百七十七兩五錢共收銀一十萬零二千二百五十兩零八錢支發桂林府屬臨桂等七州縣賑卹銀二萬九千二百七十三兩零九分平樂府屬平樂等五縣賑卹銀五千五百三十七兩四錢八分梧州府屬蒼梧等三縣賑卹銀二萬二千九百九十四兩九錢九分潯州府屬桂平等三縣賑卹銀一萬一千九百二十一兩四錢八分柳州府屬馬平等七州縣賑

卹銀三千四百五十一兩七錢各該委員及地方官均係親身確查實發所有發過銀數皆於各處榜示通衢以昭徵信並無絲毫浮冒又支製發該五府屬極貧災民棉衣工料銀五千二百五十兩零二錢二分委員分赴各州縣查辦賑務薪資雜費及解送賑款夫價等銀一千七百二十二兩三錢五分統共支用銀八萬零一百五十一兩四錢一分尚存銀二萬二千零九十九兩三錢九分撥作前次奏明修理興安縣陡河及省城外橋工之用等情前來伏查上年各屬散賑經臣隨時查察印委各員均能親身會勘督同各該處公正紳士妥爲賑濟按照所報散放銀數逐加查核尙屬無浮此次賑款欽奉 懿旨賞給銀三萬兩外餘皆外捐公

費及官紳商民集資濟用未動正項銀兩請免造冊報銷至官紳商民所捐之銀臣與司道守令等員服官西粵民生休戚相關理應捐資拯濟不敢仰邀議叙其紳商人等或以情切鄉黨或以經商此地亦皆卹助情殷均稱不邀獎叙實屬出於至誠雲貴督臣岑毓英捐銀一千兩據其子到局面稱接父手諭廣西係桑梓之邦分當捐助亦不敢邀請議叙前貴州撫臣林肇元事同一律均毋庸議至臣前次奏稱廣東撫臣倪文蔚捐解銀七百兩請准知會已經東省併入派員來西賑撫項下列收歸於賑餘解作西省修理繹路之用西省賑款自應不再列收以免重複所有東省解來修路之款業已興工修理應俟工竣與西省放賑餘存撥修陸

河橋工等費一併另行具報理合將賑款收支數目及官紳商民捐賑銀數分繕清單恭呈 御覽此次上海協賑公所江浙閩粵紳民捐集鉅款由紳士嚴作霖親帶來粵接濟貧民並助修路之資實屬樂善不倦相應請 旨嘉獎以示表揚謹會同兩廣總督臣張之洞恭摺由驛具陳伏乞 皇太后 皇上聖鑒謹 奏

光緒十三年二月二十日奉 旨該部知道單二件併發嚴作霖遠路助賑樂善不倦著傳旨嘉獎欽此

謹將廣西辦理桂平梧潯柳各府屬賑務收支銀數開列清單恭呈 御覽

計開

收款

一欽奉 懿旨頒賞銀三萬兩 一提梧州府解存省局公費銀
一萬一千五百六十六兩六錢 一提存省局閒款銀一萬二千
八百二十三兩六錢 一提前撫臣勞崇光倡辦同善局內當本
銀一萬兩 一提公捐防火經費項下銀一千兩 一提梧州府
應解公費銀一萬六千五百兩 一雲貴督臣岑毓英捐銀一千
兩 一前貴州撫臣林肇元捐銀四百兩 一廣西官捐銀五千
七百九十七兩一錢 一廣西紳捐銀四百八十六兩 一廣西
商捐銀一萬二千六百七十七兩五錢 統計共收銀一十萬零
二千二百五十兩零八錢

支款

一臨桂縣東南鄉王家里等九十三村東北鄉
附郭睦鄰等十二村西鄉渡頭墟等十二村城
南北等門外各街對河東州等十一街共受災
戶分別極貧次貧大小男婦並溺斃丁口倒塌
沙壓田畝共賑卹銀一萬四千二百八十九兩
川縣南里富邱渡等十二村三都二圖至十一
九十四村五都一四圖大埠頭等三村共受災
戶分別極貧次貧大小男婦並溺斃丁口倒塌
沙壓田畝共賑卹銀一萬零三百七十六兩七

縣大溶江上下茅坪菜園等三十三村共受災六百四十二戶分
別極貧次貧大小男婦並溺斃丁口倒塌瓦草屋舍及水沖沙壓
田畝共賑卹銀一千三百一十一兩一錢四分 一全州恩建宜
等鄉屏山渡等八村西延合浦坪西關外等處共受災一千七百
五十七戶分別極貧次貧大小男婦並水淹沙壓田畝共賑卹銀
一千四百八十九兩八錢二分 一永福縣邊山里黃茅古圳等
村毛洞里堡里墟九漕山大梨漕漁村大坪子蘇村波塘村喇路
村仁里村官田村等處共受災四百九十三戶分別極貧次貧大
小男婦並倒塌瓦草屋舍水淹田畝共賑卹銀四百四十五兩一
錢 一陽朔縣附郭里魚塘洲興平村呂寨岩興平街大河背沙

灣村馬山村新歲洲金家村浪名村羊皮村浪洲村等處共受災
七百五十戶分別極貧次貧大小男婦及倒塌屋舍淹壞田畝共
賑卹銀四百八十五兩七錢 一義甯縣城內及洞山宅田嶺歐
五家厄口黎村塘頭等處共受災五百六十七戶分別極貧次貧
大小男婦倒塌瓦草屋舍及水沖田畝共賑卹銀八百七十四兩
八錢五分 以上桂林府屬七州縣共支賑卹銀二萬九千二百
七十三兩零九分 一平樂縣堡地村陳家榨高興榨季魚塘印
山背馬家莊豬肚洲王家坪大浪村金沙村大扒村銅亮村大結
村田沖村大沖村巴江村黃牛村社平村等處共受災一百零四
戶分別極貧次貧大小男婦並倒塌屋舍壓斃丁口及水沖田畝

共賑卹銀五百三十兩零八錢三分 一昭平縣思茹沖古袍埔
馬江塘古店塘涼風塘等處共受災一百三十七戶分別極貧次
貧大小男婦並溺斃丁口倒塌瓦草屋舍及水沖沙壓田畝共賑
卹銀八百五十四兩一錢七分 一富川縣忠義團敦厚團人和
團耀武團等村莊共受災二百二十七戶分別極貧次貧大小男
婦並倒塌瓦草屋舍及水沖沙壓田畝共賑卹銀八百九十六兩
六錢五分 一賀縣信都鄉官潭團芙蓉團舖門團等處村墟共
受災九百零三戶分別極貧次貧大小男婦並溺斃丁口倒塌瓦
草屋舍及水淹田畝共賑卹銀二千五百七十七兩五錢八分又
發官潭等團紳董買穀銀五百兩 一恭城縣西鄉老墟村北鄉

栗木堡等處共受災五十三戶分別極貧次貧大小男婦並倒塌
屋舍共賑卹銀一百七十八兩二錢五分 以上平樂府屬五縣
共支賑卹銀五千五百三十七兩四錢八分 一蒼梧縣東安多
賢等鄉各堡里村墟共受災三千一百二十戶分別極貧次貧大
小男婦並溺斃丁口倒塌瓦草屋舍及水沖沙壓田畝共賑卹銀
六千五百七十八兩零九分 一懷集縣城內城外上廓坊下廓
坊河南盤村等二十六堡共受災七千三百七十四戶分別極貧
次貧大小男婦並倒塌瓦草屋舍水沖沙壓田畝共賑卹銀一萬
三千四百二十六兩五錢 一藤縣南北二岸一百五十村遭水
四千三百六十九戶田畝被沖受災不重分別極貧次貧大小男

婦共賑卹銀二千九百九十兩零四錢 以上梧州府屬三縣共
支賑卹銀二萬二千九百九十四兩九錢九分 一桂平縣姜里
上都等一十三里村莊受災四千五百六十九戶分別極貧次貧
大小男婦及倒塌瓦草屋舍水沖田畝共賑卹銀四千九百六十
九兩七錢六分 一平南縣南北兩河零一大烏等十一里村莊
被水六千三百四十四戶分別受災輕重極貧次貧大小男婦並
倒塌瓦草屋舍沖壞田畝共賑卹銀六千五百九十八兩一錢八
分 一貴縣思籠郭東一二郭南四七等五里二十六村受災五
百三十九戶分別極貧次貧大小男婦被淹田畝共賑卹銀三百
五十三兩五錢五分 以上潯州府屬三縣共支賑卹銀一萬一

千九百二十一兩四錢八分 一馬平縣西門外沙街及白沙龍潭等十九村受災三百六十二戶分別極貧次貧大小男婦及水沖地畝崩塌土堤共賑卹銀三百六十四兩一錢 一柳城縣烏鸞洲江門等十九村受災一百二十五戶分別極貧次貧大小男婦共賑卹銀一百一十八兩六錢 一融縣撫安浪安明安里安帶安吉安合安泗安等團村莊受災四百七十一戶分別極貧次貧大小男婦並倒塌房屋沙壓田畝共賑卹銀九百五十五兩四錢 一懷遠縣水和團北路等四十五村受災四百九十七戶分別極貧次貧大小男婦共賑卹銀六百零六兩五錢一分 一來賓縣南北里小那等五十五村受災四百四十六戶分別極貧次

貧大小男婦並倒塌房屋水沖沙壓田畝共賑卹銀八百二十一兩八錢 一雒容縣桐木安隆香泉等三十七村受災三百二十九戶分別極貧次貧大小男婦共賑卹銀二百零六兩三錢四分 一象州東安里那沙等十七村受災一百九十戶分別極貧貧大小男婦沖壞田畝共賑卹銀三百七十四兩八錢二分 一上柳州府屬七州縣共支賑卹銀三千四百五十一兩七錢 一製發桂平梧州柳五府屬極貧災民棉衣共工料銀五千二百一十兩零二錢二分 一委知府同知通判知縣等員帶同佐雜吏分赴各州縣查辦賑務薪資雜費解送賑款夫價等銀一千百二十二兩三錢五分

統共支發銀八萬零一百五十一兩四錢一分 餘存銀二萬二千零九十九兩三錢九分撥作修理興安縣陡河又桂林省城橋工等用理合陳明

李忠節公奏議卷二終

李忠節公奏議卷四

奏查明廣西釐稅尙無朦弊中飽及裁大湟江釐卡摺光緒

十三年正月二十四日

奏爲遵旨查明粵西抽收釐稅尙無朦混中飽等弊並酌裁大

湟江卡恭摺覆陳仰祈聖鑒事竊臣於光緒十二年八月十一

日承准軍機大臣字寄光緒十二年七月初七日奉上諭有人

奏浙江省征收釐金積弊甚多其利半歸中飽亟須整頓等語抽

釐助餉爲朝廷不得已之舉豈容不肖局員罔利營私此等弊端

總由該管督撫不能破除情面審擇賢員實力整頓一聽該員等

以多報少朦混侵吞致釐稅日見虧短殊堪痛恨一省如此他省

恐亦不免著各直省督撫懷遵疊次諭旨力矯積習認真稽核如查有委員舞弊情事即行從嚴參辦毋稍姑容將此各諭令知之欽此遵 旨寄信前來仰見 聖朝有弊必除力求覈實至意臣跪誦之下感悚莫名當即欽遵飭行省局司道通飭各卡委員一體懷遵在案伏查粵西釐務按貨抽收久經嚴定章程比較功過遇有劣員舞弊均即隨時撤參臣自欽奉 恩命護理巡撫因腹地未清邊防未撤餉絀用繁多藉鄰省協助廣西就地自籌除釐金一項別無可開之源是以不時嚴查督飭司道認真整頓各卡委員有經理不力者立即撤參不稍遷就查有委辦白馬釐金補用通判王紹祖擅添名目辦理乖謬據釐局司道查明詳參經臣

奏請將王紹祖以縣丞降補在案嗣因上年入夏以後抽收又復減色隨即委員密查緣各屬米價昂貴民食維艱貨物行銷不旺且歷來西省米穀販運東省有釐可收十一年夏間桂平梧潯柳等府屬均被水災收成歉薄轉資鄰省接濟無出境米穀釐銀可抽因而徵收較絀尙無以多報少及朦混中飽等弊惟從前設卡較密雖節經前撫臣遵 旨裁減今細加體察大湟江釐卡設於潯河之中專收本處出產貨釐兼驗往來釐票上有潯州卡下有白馬卡皆相距不遠足資抽查大湟江一卡亦屬可裁據省局司道議覆於上年十二月十五日將大湟江釐卡裁去俾商船少一查驗停滯以示體恤而廣招徠除再督同省局司道認真查察整

頓期裕餉源外謹將查明粵西釐稅各卡尙無朦混中飽等弊及酌裁大湟江一卡緣由謹會同兩廣總督臣張之洞恭摺覆陳伏乞 皇太后 皇上聖鑒訓示謹 奏 光緒十三年三月二十三日奉 硃批知道了欽此

奏懲辦害民蠹役葛明片 光緒十三年四月十二日

再奸胥蠹役爲害閭閻無異盜賊至其假藉官威明目張膽則又過之粵西舊多伏莽使民再受害莫訴恐迫而爲匪其患有不可勝言者臣連年固以捕治盜賊爲急尤於作惡書差懲處加嚴如藩署書吏黎觀光等均經隨時革辦不稍寬貸茲據署思恩縣知縣張棠蔭稟報縣役葛明積惡淫兇士民切齒當批飭解臣行營

委審屬實即行就地正法尙有蠹役歐證一犯發回該管慶遠府
研鞫另辦此外如查有不法書役仍當嚴懲俾知儆懼臣爲安輯
地方起見理合附片陳明伏乞 聖鑒謹 奏 光緒十三年六
月十八日奉 硃批刑部知道欽此

奏請止法人入龍通商以杜後患摺

光緒十三年閏四月初二日

奏爲請止法人入龍通商以杜後患而重邊防據實密陳恭摺仰
祈 聖鑒事竊臣於光緒十二年四月准北洋大臣咨與法會議
滇桂邊界通商第一條內載諒山以北本年擇定通商處所是通
應在何處必須先事預籌查諒山以北係指越北而言自應在
諒山北之驅驢文淵等處又欽奉二月初六日電 旨通商在諒

山以北新約業已訂明法國豈能違約妄索徑議入龍通商等因
欽此尤當欽遵辦理龍州匯越南各水順流邕潯直達廣州實據
兩粵上游全邊堂奧非如江海口岸各國通商羣相牽制莫敢發
難今若通商獨一法國彼既一無顧忌我尤難備未然是關內龍
州所繫至重必應遵 旨據約力持不移誠知總理衙門北洋大
臣必能察微防患仰乘 宸謨雖 臣權護疆符不容不先抒所見
謹於上年九月十二日電請總理衙門代 奏比聞法使欲以東
界之白龍尾與商務抵換意在龍州通商 臣竊謂白龍尾乃欽邊
一隅尙賴總署力持龍州爲兩粵咽喉安危所繫詎敢不爭復於
本年四月初三日電請總理衙門代 奏旋准督 臣電又與 臣會

銜電 奏以入龍通商有碍邊防其害甚鉅會商相同瀝情上懇
凡此區區屢瀆之忱悉邀 聖明洞察現在界務將定自應續議
通商臣仰體 宸衷通籌全局深恐彼族妄索不容不嚴以限制
竊維越南爲我 朝藩服近三百年矣前法族構亂闕諒之役仰
仗 天威各軍血戰連克文淵驅驢諒山長慶等省府州乃始請
和特荷 朝廷寬大許以藩封全越歸其保護即攻克之諒山等
省彼萬國公法所謂以兵攻取不能讓人者亦俱讓而不較誠欲
使深感懷柔息兵劃界無害民生耳乃彼族罔知 恩德逞其無
厭逕欲違約通商於內入我龍州扼我形要旁無牽制得以爲所
欲爲其心叵測其害更何可言今若許之直不啻縱虎入室一旦

有事邊防落後從何箝制每年數十萬餉盡屬虛糜此固情理難容實尤全局得失所繫臣責在守土若遷就於此日必貽患於無窮不惟上無以對君父下無以對粵民即臣心亦難以自問惟有籲懇 聖慈鑒茲愚悃 飭下在事諸臣據約力爭堅持定見通商必在諒山之北驅驢文淵暨我鎮南關外等處嚴定界限以杜後患而重邊防臣不勝激切屏營待 命之至事關邊務軍防謹披瀝密陳由驛六百里馳奏伏乞 皇太后 皇上聖鑒訓示謹 奉 光緒十三年五月二十日奉 硃批另有旨欽此

奏邊軍裁撤四營以符原奏摺 光緒十三年五月十二日

奏爲邊軍現經裁撤四營以節餉需而符原奏恭摺仰祈 聖鑒

事竊上年二月督臣張之洞會同臣等具奏遵旨籌議廣西邊隘分營扼紮請撥的餉摺內聲明越境游勇蔓延全邊未靖又值勘界未定未便示人以弱勢難多議裁減自是年正月起認真汰留裁去八營併爲二十四營俟冬間界務大定再當裁去四營以節餉需等情嗣准兵部咨行會議具奏光緒十二年八月十六日奉旨依議欽此欽遵在案維時越南遊勇蟻聚諒山高平宣光等省轄境比經臣秉衡籌款定章分別辦理資遣招墾陸續來歸者計已有五千數百名之多其餘散處四方尙復不少自冬徂春界務未定該衆出沒靡常輒與法越官民尋仇爭鬪臣元春督飭各軍將領各就防所嚴爲之備勿任近邊因邊防尙未稍鬆餉項

雖萬分支絀猶未便遽議裁營本年四月以後屢接東興電報界
事不久可以由內定約臣等往返函商宜及此時裁撤四營用符
原奏查新授廣東南韶連鎮總兵方友升前經奏准 陛見白應
遵 旨入都貴州安義鎮總兵蔣宗漢奉 旨毋庸來見亦應飭
赴本任該二員原帶四營一併裁撤另調他營分頭填紮平而關
及歸順州鎮安廳屬沿邊各要隘所有該四營薪糧等項一概截
至四月底止照數發清各勇丁大都籍隸四川湖廣雲貴等省出
關打仗久成邊荒甚爲得力遠道遣歸不能不酌給川資以示體
恤而期安靖因量其路之遠近以定資之多寡每名自一兩二錢
起或一兩五六錢或二兩一二錢至二兩七八錢爲止綜計動支

銀四千四百六十兩有奇逐名散給責成各該將弁督飭哨隊安
爲遣散均經回籍歸農此時邊防仍留二十營臣整軍籌餉各有
專責惟當合力圖維悉心措置以期仰副 聖主綏靖邊疆之至
意所有裁營節餉緣由理合會同兩廣總督臣張之洞山驛具
奏伏乞 皇太后 皇上聖鑒訓示謹 奏 光緒十三年七月
初八日奉 硃批該部知道欽此

奏報起程回省摺 光緒十三年六月初四日

奏爲 微臣遵 旨回省恭報起程日期仰祈 聖鑒事竊臣自光
緒十年出省冬間駐紮龍州籌辦大軍後路及邊防一切事宜業
經三載現在界務既竣邊事粗定省中司道各員均非本任所有

通省要件邊防月餉須臣回省切實統籌冀免貽誤因於五月十八日電請總理各國事務衙門代奏請旨遵行二十二日接准電開本日奉旨李秉衡電奏已悉著照所請行欽此欽遵臣維邊軍迭次裁撤實存二十營以爲經久之計沿邊遼闊扼要設防無可再減提臣蘇元春專任防務在邊有年威望素孚足資鎮壓龍州爲邊關後路餉械所萃正在修建城池前委臣營營務處儘先補用道蔡希邠總司其事會督印委各員切實講求尙未據報工竣仍留原防兩營營勇巡防彈壓兼管城工將來開辦通商事更繁重擬委新任按察使張聯桂帶印出省前來辦理並委該道蔡希邠就近幫辦查張聯桂曾任兩粵府道必合機宜蔡希邠

由俸滿龍州同知久辦營務洵升今職熟悉邊情責成合力妥籌
可期有濟臣酌帶員弁並衛隊親兵即於六月初四日自龍州起
程由南甯梧州等府水道趨行臣素有肝暈之症入夏以後感受
時疫炎瘴體益難支惟以界務未完未敢遽行陳瀆今既離營回
省沿途醫藥調理冀就平復合併陳明所有遵 旨回省起程日
期並籌辦一切緣由理合恭摺由驛具奏伏乞 皇太后 皇上
聖鑒訓示謹 奏 光緒十三年七月二十八日奉 硃批知道
了欽此

奏遵旨臚舉將才摺附單 光緒十三年六月初四日

奏爲遵 旨密保武職大員恭摺據實覆陳仰祈 聖鑒事竊臣

於本年閏四月初六日承准軍機大臣字寄光緒十三年四月初八日奉 上諭各省提鎮大員均有專閫之責必須才略素優方足以資整頓邇來軍務敕平尤應安不忘危物色將才用備任使著各直省督撫於軍營著績人員內無論實缺候補各就其人之才具或長於陸路或熟於水師出具切實考語分別保奏其曾經引見發往各省差委之提鎮各員本欲令其練習營伍以備緩急並著隨時留心察看如其才識出衆之員一併奏保聽候簡擢各該督撫身膺疆寄以知人爲最要務當確切考察勿採虛聲勿徇情面用副朝廷訪求人才整飭武備之至意將此各諭令知之欽此遵 旨寄信前來仰見 聖主修武整軍求才若渴欽服莫名

伏念臣自簡授廣西按察使旋即出省勦辦思恩縣五峒土匪事竣又調赴龍州辦理邊防後路於各軍將士頗多熟識嗣奉恩命暫護巡撫時軍務粗定尤須留心材武以備不虞曾將邊功卓著之提督蔣宗漢方友升張春發密疏具陳均先後蒙恩簡放總兵實缺該員等無不感激奮發思更圖效將來臣連年在邊時與諸將因公見面必審察其器識并細核平日戰陣之勇怯軍心之向背水陸攻守何者爲其所長期得實在即曾經引見發往差委之提鎮到省後亦必委以防營或煩重要件以試其才識優劣隨時隨事確加討論其樸勇著績戎事可倚者尙不乏人謹就所知長於陸路之提鎮副將酌保數員繕列清單出具切實考

語恭呈 御覽竊維得將才難得邊將才於今日尤難臣所保數員雖未敢必全勝統帥之任要皆一無軍營習氣歷經惡戰艱險不搖他日苟有緩急率一旅偏師或多營分統足備 國家折衝之選惟 聖明採擇焉所有遵 旨密保武職大員緣由謹據實覆陳伏乞 皇太后 皇上聖鑒訓示謹 奏 光緒十三年七月二十八日奉 硃批知道了李應章等著交軍機處存記欽此 謹將遵保武職大員出具切實考語密繕清單恭呈 御覽

計開

總兵銜廣東題推缺出儘先補用副將強謙巴圖魯李應章廣西人現充鎮南營分統兼統毅新各營誠樸廉勇戰必身先徧體重

傷絕不矜伐在軍多年散財養士一無餘資深得兵心為前安義
 故鎮陳嘉部將第一才堪統領十營寄以專閫必能收效 記名
 簡放提督奏留廣西差遣委用壯勇巴圖魯李極光湖南人現統
 鎮南兩營沈毅持重在邊最久諒山等役以敢戰著稱越地游勇
 素畏其名平日講求營務允勝專閫之選分統四五營力可優為
 記名簡放總兵改留廣西儘先補用副將年長阿巴圖魯楊昌
 魁貴州人現帶毅新前營兼毅新全軍營務處樵樸敢戰立功苗
 疆於諒山等役一往直前不知少卻百戰無重傷僉以為奇堪寄
 專閫勝分統之任 記名總兵題補慶遠協副將奇車伯巴圖魯
 董履高安徽人現統廣東廣勝各營謀勇能兼立功多省在諒山

通南身先陷陣受傷甚重爲淮軍出色之將能勝專閫可統多營
記名簡放總兵奏留廣西花翎儘先補用副將銳勇巴圖魯黃
忠立廣西人現帶熙字兩營兼熙字全軍營務處鎮靜能戰久在
邊營多有功績尤極講求營防有分統之才勝專閫之任 發往
廣西差委總兵馬進祥甘肅人現帶省城防營結實勇敢立功關
陝能共士卒勤苦整頓營規在腹地防營中尤稱得力若畀以專
閫振作可期

奏請開缺回籍調理摺 光緒十三年七月十三日

奏爲 微臣 感受烟瘴暑熱觸發舊疾懇 恩開缺回籍調理恭摺
瀝陳仰祈 聖鑒事竊臣素有肝暈舊疾時一舉發前以臬司辦

理邊軍後路旋蒙 恩命護理巡撫軍事稍定久駐龍州每值瘴
盛舊疾時發兼以 臣賦性素急公務偶有棘手往往五夜焦思上
年水旱類仍糜耗 國帑自維奉職無狀致召災禳內疚之私時
縈寤寐祇以界務未定游勇在邊亟須會籌防禦不得不力疾支
持因之受症愈深曾於恭報由龍州回省起程日期摺內聲明沿
途醫治私冀調理就痊盡心供職乃途中正值伏熱肝疾時發到
省後轉益增劇披閱公牘偶一用心動輒昏暈據醫家云肝陽不
潛外風乘間而入以致日患日重若不亟加靜攝斷難除根惟有
籲懇 天恩簡放巡撫開 臣藩司本缺俾得回籍調理 臣年未六
十自揣精力尙強倘能調治痊愈再當力圖報効萬不敢稍耽安

275-1

逸自外 生成所有微臣舊疾轉劇力難辦公懇請開缺回籍調理緣由理合恭摺瀝陳伏乞 皇太后 皇上聖鑒訓示謹 奏

光緒十三年八月二十六日奉 硃批另有旨欽此

奏寬免革職處分謝恩摺 光緒十三年十月初一日

奏爲叩謝 天恩仰祈 聖鑒事竊臣於本年九月二十六日接

准吏部咨開光緒十三年七月二十八日奉 旨現在勘界事竣

所有吏部前議鄧承修李秉衡革職處分均著加恩寬免欽此 臣

跪誦之下感激莫名伏念臣知識庸愚由臬司調赴邊軍督辦後

路旋蒙 恩命暫護巡撫游擢布政使凡 隆施之稠壘非夢想

所敢期乃以界務辦理失宜致干吏部嚴議渥蒙 聖慈曲宥俯

加寬免 天恩高厚未報涓埃現因臣肝疾未痊陳請開缺接閱
邸抄已荷 恩俞撫茲衰病餘生益切犬馬依戀所有微臣感激
下忱理合恭摺具 奏叩謝 天恩伏乞 皇太后 皇上聖鑒
謹 奏

奏武緣縣土匪藍妙涓滋事勦捕片

光緒十三年十月二十九日

再粵西各土司地方徑僻山深易藏奸宄經臣迭飭隨時防緝茲
據署武緣縣知縣張棠蔭稟稱有昔年漏逸著匪藍妙涓潛糾夥
黨出沒於該縣分轄之古零土司境內張棠蔭督飭該土司捕拏
未獲偵知該匪以古零土屬內村爲巢穴伏處深山之中有險可
據竄逸亦易請派營勇圍捕等情並據署思恩府知府張璧封先

後稟請前來 臣深知該署知縣張棠蔭臚誠素優勇於任事當經批飭就地調派土兵土勇並札該管思恩府飭令管帶該府防營通判梁學智調集分防勇丁會同往捕一面飛檄柳州府防營副將劉錫萬管帶所部馳往合圍詎劉錫萬之勇未到該匪已出至孛馬江漂本林等處滋擾張棠蔭當與梁學智會商分路進攻梁學智率所部勇隊及古零白山各土勇爲一路張棠蔭帶親兵民壯並興隆古零土勇爲一路派安定土司潘承熙帶所部土兵及古零土勇爲一路九月二十七日梁學智勇隊擊賊於本林斃賊數人該匪退去二十八日梁學智進攻江漂孛馬皆克之二十九日黎明賊匪大隊由百陋隘來撲我營梁學智督隊迎擊相持時

許匪衆敗退入隘哨弁趙光宇首先直逼隘口爲槍子中傷倒地
勇丁救護陣亡三名受傷十餘名梁學智揮軍奮擊傷斃該匪多
名乘勢擁入當將賊踞隘寨一律攻破時已昏黑內村之賊傾巢
而至梁學智懸賞勦衆大呼陷陣匪勢不支紛紛敗奔炮斃匪目
一名陣斬悍賊八名追殺十餘名奪獲大旗紅白令旗多面烏槍
刀矛多件我軍亦有受傷乘勝攻入內村賊巢該匪越嶺而遁擒
獲匪首之父藍經猷母章氏及幼子一名梁學智督隊扒崖而上
又進十餘里直搗隴凡峒內巢該匪棄巢狂奔追斬悍黨黃卜金
及土匪藍見佑羅桂生藍卜沅藍卜添及夥匪多名張崇蔭進攻
古勞隘九月二十八日破其第一柵毀其圍牆二十九日辰刻疊

破第二柵第三柵古零土目石德祖督隊銳進忽遇賊伏陣亡土
兵士勇各一名受傷十餘名附生覃裕謙督勇繼至橫衝賊陣殲
賊六名賊始退走十月初一日黎明往攻各峒又連破第四柵第
五柵陣斬匪目藍桂青悍匪藍印瀉洗卜安及夥匪多名並獲旗
幟槍矛土兵土勇亦陣亡三名受傷八名潘承熙進攻隴鄒力奪
二隘陣亡土兵一名受傷土兵土勇十七名十月初一日攻奪第
三隘陣斬悍賊藍卜合藍特朋並匪夥數名乘勝將隴鄒寨攻破
潘承熙即駐守其地張棠蔭進與梁學智會合駐營藍韋村前會
籌搜捕安撫隨在各山巖起出該匪收藏火藥千餘觔鳥槍數十
枝鉛彈鐵鏢數十桶撥充軍用又起出該匪積存米穀雜糧甚多

即以分賞土兵土勇並安撫土民日食該匪首藍妙洎帶傷逃匿
現在嚴行緝拏等情由署思恩府知府張璧封轉報前來當經批
飭懸賞購線嚴密緝捕務將該匪藍妙洎及附從死黨悉獲究辦
以淨根株一面辦理安撫妥籌善後以期永臻靖謐臣查該匪潛
聚土屬深山巢穴險固軍火亦多若不及時撲滅必致糜餉勞師
大煩兵力今張棠蔭等乘機奮攻搗破匪巢尙屬辦理迅速著有
微勞可否俟拏獲首犯之日擇尤保獎以示鼓勵出自逾格鴻
慈所有陣亡人等飭令查明造冊請卹理合會同兩廣總督臣張
之洞附片具奏伏乞聖鑒訓示謹奏

奏邊營長夫早已通減尙難全裁摺

光緒十三年十一月二十七日

奏爲邊關軍營長夫早已通減尙難全裁恭摺具陳仰祈 聖鑒
事竊臣接准戶部咨本部籌議河工賑需一摺清單一件於光緒
十三年九月二十日具奏本日奉 旨覽奏均悉裁撤長夫暨鹽
商捐輸當商匯號交銀三條著照所請行欽此相應抄錄原奏及
裁撤長夫暨鹽商捐輸當商匯號交銀三條恭錄 諭旨飛咨廣
西巡撫並轉行廣西提督一體欽遵辦理可也等因咨行到粵當
經臣恭錄 諭旨轉行欽遵在案伏查廣西並無鹽商其當商匯
號交銀現經藩司督飭各屬地方官辦理一俟收有成數即分晰
列冊報部撥用外至裁撤長夫一條原咨清單內開長夫原爲征
兵而設現在各省皆係防軍並非出征可比近年各省長夫餉銀

開銷一百數十萬兩之多如將此項裁撤移作河工之用亦可成一鉅款公同商酌擬令凡有防營省分除河南等省已經裁撤其餘無論沿邊沿海各營長夫自本年十一月初一日起全行裁撤每月節餉若干限於年內奏報等因臣查廣西餉項異常支絀凡有可省之費迭經臣通籌裁節奏明在案廣西腹地防營已久無長夫邊關各營前於光緒十一年十二月內臣覆奏欽遵 懿旨裁勇節餉摺內陳明白十二年正月起通減長夫現在每營勇丁只留長夫三十八名雖沿邊無戰事與征軍不同惟邊外散勇游匪時相勾結游移無定尙須相機堵截隨時移營巡防此數十名夫役係備隨營搬運糧米軍火以免倉卒貽誤似屬必不可少臣

素性拙直不避嫌怨但涉浮糜無不裁節獨於此項長夫審度再三未敢全裁誠以邊務攸關需項無多不容不切實上陳合無仰懇 天恩俯准將前項邊營長夫暫行留用俟將來邊境胥靖可以裁撤再由新任撫臣隨時察看情形奏明辦理出自 聖裁謹會同兩廣總督臣張之洞廣西提督臣蘇元春恭摺具 奏伏乞

皇太后 皇上聖鑒訓示謹 奏

奏候選教諭吳國彥恃符妄爲請斥革片

光緒十三年十一月二十七日

再廣西苗徭雜處當此伏莽未淨尤應隨時加意緜緝不容奸徒肇衅生端上年冬間平樂府屬永康州轄境之金秀等徭因爭山相鬪遂有奸民往助希圖乘機搶擄即經署永安州知州陳亮采

馳詣彈壓禁止傳集各獠頭目勸諭了結業已相安而該處獠山界連梧州府屬藤縣及潯州府之平南縣道路紛歧乃復有匪徒糾衆潛往播弄擾害經臣札飭該州縣嚴拏隨據拏獲滋事土匪李鑑等審明懲辦供稱藤縣人吳國彥有片子到板獠糾人攻打等語隨查得吳國彥係藤縣太平墟拔貢甚不安分素有凶橫綽號由縣拏獲解送署梧州府知府何耀章審訊據供綽號係平日惡伊者所加並無糾人入獠情事多方究詰堅不承認顯係恃符狡展經該府詳由臬司請革究前來查吳國彥由同治癸酉科拔貢以教諭歸部詮選名列縉紳不知自愛竟有綽號是其平日恃符妄爲已可概見匪犯供其糾人入獠攻打尤應嚴行審辦未便

任聽拔展相應請 旨將拔貢候選教諭吳國彥即行斥革以便
嚴審究辦理合附片具 奏伏乞 聖鑒訓示謹 奏

奏請爲已故撫臣劉長佑建立專祠摺

光緒十三年十二月十五日

奏爲已故前任撫臣戰功卓著遺愛在民請建立專祠以順輿情
恭摺籲懇 恩施仰祈 聖鑒事竊據廣西紳士在籍二品頂戴
浙江補用道靳邦慶翰林院編修曹馴庶吉士周璜廣東試用道
王錫誥三品銜湖南補用知府易鳳儀等以前任廣西撫臣陞任
雲貴督臣劉長佑功德在粵臚列政績呈請奏建專祠等情前來
臣查該督臣劉長佑以湖南拔貢生投筆從戎立功數省士民謳
思不輟而粵民之愛戴尤深溯自咸豐九年七月髮匪僞翼王石

達開由湖南敗竄廣西境內擁衆十餘萬劉長佑以記名按察使奉命率所部楚勇越境援剿是時僞國宗石鎮吉先以別股撲圍省城石達開自率大股分踞義甯永福爲之犄角城內所恃惟前任布政使蔣益澧所部一軍賊燄旣張人人惴恐劉長佑率八營馳抵靈川審機應敵急搗義甯之賊攻其必救賊遂不戰而退城圍立解先是咸豐二年髮逆圍困省城劉長佑由籍募勇來援已解城圍一次至是實爲桂林二次解圍粵西自金田構逆以來賊匪蠭起其大股盤踞城池者柳州則有馮常陳戊養潯州則有陳開黃鼎鳳容縣則有范亞晉賀縣則有陳金剛修仁則有張高友蔓衍勾結不可爬梭各屬州縣城池十陷八九此外著名首匪

尙以數十計荆榛徧地民無一日安枕加以兵單餉絀艱苦萬狀
劉長佑統算兼籌力持危局桂林解圍之後遂督所部進規柳郡
是年九月奉 旨補授廣西按察使旋陞布政使仍留營調度諸
軍先後克復雒容柳城等縣並復柳州府城於是各處團練皆得
隨營自效是時匪首陳戊養結黨屯於柳城縣屬修築土城勢甚
猖獗象州潯州艇匪數百艘乘風上竄與該匪聯爲一氣悉衆圍
困郡城劉長佑派各營分路掩擊連破堅巢並焚賊艘郡城圍解
象州城池亦督團克復十年四月在營次拜陞授廣西巡撫之
命回省接篆維時石達開大股竄踞慶遠府城四出分擾遂檄慶
遠知府榮林督所屬漢土文武團練分道圍擊斃匪數千進薄城

下克之石逆遣衆往攻思恩南甯等府及百色廳城擾及泗城府
皆檄飭地方文武督團擊退旣而石逆後旗部衆糾合土匪竄擾
羅城融縣及永甯州屬三陞等處派員弁督勇擊走之賊左旗大
股隨後踵至復派軍駐防義甯永福各要隘賊乃分股橫竄靈川
縣屬潭下墟距省城五十里當率在城官紳嚴密守禦賊不敢犯
七月二十五日賊目張志公等數十人皆獻僞印詣營乞降安撫
其衆派令隨同勦賊由是左旗後旗兩股皆敗竄湖南而桂林全
境肅清匪首陳金剛久踞賀縣分擾平樂昭平等縣賊巢林立蔣
益澧統率湘軍迭破堅巢清平樂昭平境地劉長佑復奏派統
領湖南防軍駐紮江華之候選道劉嶽昭越境協勦與蔣益澧分

道夾擊收復賀縣城是時梧州土匪羅華觀等踞該府下邳等處
窺伺府城乃合蔣益澧移師進擊會合東省水師勦撫兼施肅清
沿河一帶而柳城縣屬之悍匪勾結石達開散匪益以潯江艇匪
大小十餘股水陸蔓延劉長佑分遣諸將以次撫勦於是柳州全
境亦就肅清既而石達開散股賊目彭大甚等自懷遠翻山闌入
湖南綏甯城步等縣分擾武岡新甯楚省移書告急劉長佑遂於
咸豐十年十月親自督師出省至龍勝廳規畫形勢飭派副將李
士恩等率勁旅赴援新甯城自由龍勝沿邊出全州部署完備而
回當是時石逆散股各起東奔西竄我軍節節兜勦賊勢窮蹙降
者甚衆惟石逆尙踞伏賓州派員會商署思恩府徐引調集勇練

分頭進攻將賓城克復乘勝追勦石逆身受重創率其餘孽仍竄楚境從此右江一面乃獲粗安既又飭派湘楚各軍會同東省水師激勵團練先後克復潯州府及貴縣橫州各城殲除巨逆陳開招撫逆首郭礪溪等潯梧兩屬漸臻安定左江匪首吳凌雲久踞南甯土忠州咸豐十年八月分黨襲陷太平府城繼陷養利州城土屬地方盜藪充斥劉長佑遙授機宜派左江練勇攻克各土屬四百餘村遂將太郡養利兩城收復其荔浦縣屬蓮塘逆首張高友竄踞修仁陽朔兩城遣布政使張凱嵩候選道易元泰率副將陳友勝等分兵進擊皆復之同治元年春間匪首黃三勾串匪目梁贊等及各處潰匪衆約數萬圍犯潯州府城急派都司蔡其昌

率扒船駛赴堵勦又派署右江道蔣澤春統新募南勇六營繼進
元年四月親率五營出省赴潯督師迭克堅巢招撫賊目多名被
脅數十村同時就撫黃逆之勢遂孤時已奉 命擢兩廣總督仍
暫留潯調度既屢奉 廷寄催赴新任乃派員總理營務由潯東
下自去粵後各匪雖以次蕩平而地方伏莽猶多或結黨攻剽或
尋仇慘殺悉著名兇悍同治十年劉長佑再來撫粵先後派撥營
勇及地方文武兵團以次勘定又有李青龍以渠魁投誠保至遊
擊猶懷二志設計誘至省垣訊而誅之是時提督馮子材駐師龍
州勦辦竄擾越南股匪函商審機定策將越匪次第勦滅留營分
駐以固邊圉其戰功卓著靖寇安民者如此至於整飭吏治激勵

國防安戢土司懲創奸宄勸課蠶桑舉凡興利除弊之事不可殫述又嘗籌款修建桂山書院舉行孝廉月課改建鎮安府考棚以便士子赴試大有造於粵西伏查軍興以後凡有戰功卓著遺愛在民者奏請於立功地方建祠無不仰蒙 俞允今劉長佑先後撫粵多年靖寇安民輿情愛戴經該紳等呈請建祠報享理合臚奏陳請合無仰懇 天恩俯准於廣西省城建立已故前任廣西撫臣陞任雲貴督臣劉長佑專祠以順輿情出自 鴻施謹會同兩廣總督臣張之洞恭摺具 奏伏乞 皇太后 皇上聖鑒訓示謹 奏

奏請爲已故總兵陳嘉建立專祠摺

光緒十三年十二月十五日

奏爲統軍大員力悍強敵保障邊關功在地方歿後與情愛戴聯
名呈請奏建專祠據情籲懇 恩施恭摺仰祈 聖鑒事竊原任
貴州安義鎮總兵 賞穿黃馬褂頭品頂戴記名提督雲騎尉世
職訥恩登額巴圖魯陳嘉於光緒十一年七月初四日在龍州營
次傷發病故經臣會同兩廣總督臣張之洞督辦邊防廣西提督
臣蘇元春恭摺具奏欽奉 上諭陳嘉督軍鏖戰忠勇奮發屢奏
奇功徧體重傷而竭誠報國之忱始終弗替茲因傷發病故覽奏
軫惜殊深著照提督陣亡例賜卹生平戰績宣付史館立傳並加
恩予諡以彰忠蓋等因欽此旋准部咨蒙 恩予諡勇烈議給騎
都尉兼一雲騎尉世襲查取生平事實戰功造送史館立傳節經

欽遵查照轉行遵照辦理在案茲據署太平歸順道蔡希邠詳據龍州同知任玉森詳據龍州明江甯明崇善憑祥下凍安平太平等屬漢土各廳州縣紳耆在籍兵部學習主事張焯奎分省補用知縣趙榮正吳懋勳前慶遠府訓導黎申產前上思州學正梁克邦拔貢生趙毓瑛關家準農喜霖歲貢生甘澤和何慶辰陸寶樹黃煥中等五十餘人聯名呈稱已故總兵陳嘉仰沐 聖慈卹死褒忠至優極渥凡有血氣莫不觀感奮興惟該紳等生長斯邦漢土沿邊皆與越南緊接當光緒十年秋至次年春法越交兵之際風聲鶴唳時有戒心全賴陳嘉累捷於陸岸等處裹創力戰奮勇爭先其後他軍失利猶復艱苦不渝竭數晝夜之力惟知前進受

傷昏倒左右掖之去既覺復揮刀叱退誓死直前卒能轉敗爲勝而有關前隘之捷旋克文淵諒山等省府邊事因而大定既而回辦邊防人皆恃爲長城之倚不料其積勞受瘴傷發不起該紳等痛定思痛幸得安居樂業而陳嘉饗祀缺然能無太息近閱邸鈔雲貴總督奏報原任廣東高州鎮總兵楊玉科在關外力戰陣亡奉 旨准於鎮南關建立專祠山地方官春秋致祭伏念陳嘉歿由勞瘴傷發均屬以死勤事爲 國忘身與楊玉科事同一律用敢援以上陳擬請核明轉詳請奏准在龍州地方建立專祠春秋官爲致祭以崇報祀而順輿情詳請核辦前來 臣維陳嘉生前苦戰立功卒以傷發病故均在 聖明洞鑒之中今沿邊漢土各屬

紳耆聯名援案請建專祠尙屬出於愛戴之公合無仰懇 天恩
俯准將已故記名提督貴州安義鎮總兵陳嘉在龍州地方建立
專祠列入祀典春秋官爲致祭以順輿情出自 逾格鴻施臣謹
會同兩廣總督臣張之洞督辦邊防廣西提督臣蘇元春恭摺具
奏伏乞 皇太后 皇上聖鑒訓示謹 奏

奏請爲已故撫臣張凱嵩建立專祠並將事蹟宣付史館摺

光緒十三年十二月十八日

奏爲據呈前任撫臣功德在粵民情愛戴懇 恩予建專祠並將
事蹟宣付史館恭摺具陳仰祈 聖鑒事竊據廣西紳士在籍二
品頂戴浙江補用道靳邦慶翰林院編修曹馴庶吉士周璜廣東

試用道王錫誥三品銜湖南補用知府易鳳儀等呈稱前閱邸抄
光緒十二年十一月初十日奉 上諭雲南巡撫張凱嵩由知縣
洊擢封圻自簡任雲南以來於吏治軍餉諸務均能實心籌辦克
稱厥職茲聞溘逝悼惜殊深張凱嵩著照巡撫例賜卹任內一切
處分悉予開復應得卹典該衙門察例具奏欽此恭誦之下仰見
朝廷篤念蓋臣褒卹有典而追思該撫臣功德在粵愛戴難忘
謹將其政績一一具呈伏冀奏懇 恩施該故撫臣張凱嵩係湖
北人由進士以知縣分發廣西道光己巳年來粵正值地方不靖
郡邑盜賊縱橫該撫臣胆畧過人經濟夙裕歷任興業馬平懷集
蒼梧臨桂等縣首以綏戢爲務屢殲土匪強寇所蒞之地民獲安

居其有關教養保衛之善政不可勝紀猶記該撫臣令臨桂時當
洪逆猝逼省垣大軍遠在永安根本之地守衛旣單糧米復缺勢
甚岌岌遂便宜行事調團協助購米儲糧徧歷各城布置防守援
軍乃躡賊踪而至驅狂寇以保危城民慶再生是戴該撫臣之德
于無形也及其擢守慶遠正頑團肆虐於內強寇迫擾於外設法
整頓而捕治之交卸郡篆後猶激勵土團會合湘勇以定禍亂慶
郡復安升任撫臣勞崇光舉其才堪任重迭荷 恩命秉臬陳藩
晉膺疆寄其任臬司也以近省地面賊踪飄忽宜防未然省標額
兵不敷分布精選民壯得二千人令習刀矛槍炮按三六九日期
聚而操演酌給飯食暇日仍各謀生計有事乃登埤助守節繁費

而收實裨聲勢既壯有恃無恐其任藩司也庫款空虛度支竭蹶籌餉贍軍所夕不遑猶念鄉試屢停無以培士氣而安民心特請具奏開科以光文治又以政教爲致治之本軍興日久教職半多懸缺司鐸乏人詳請銓選如額南甯太平泗城鎮安思恩潯州等府屬皆兵燹凋弊之區守令以下各員補署赴任視爲畏途即有賢能之吏亦苦於辦事無資空拳難奮乃籌給赴任川資辦公經費畏難趨避者劾之勤幹盡職者獎之講求治理以圖補救當同治初元賊氛尙熾羣盜如毛雖經升任撫臣劉長佑勦滅甚衆而逆匪張高友尙盤踞平樂府屬蓮塘擾及桂林府境爲省門肘腋之患太平府屬則有逆匪吳凌雲據隴羅爲巢潯州府屬則有逆

匪黃三即黃鼎瀾伏於平天寨南甯府屬則有逆匪梁安邦孫仁廣分踞那檀山澤皆不時出擾爲十餘年稽誅之巨寇勢頗鸚張其餘乘間竊發竄擾城邑村寨者亦繁有徒若不勦除何以言治維時劉長佑在潯州治軍拜總督兩廣之命由潯東下正當勦捕喫緊人情不無疑慮張凱嵩補授廣西巡撫接篆任事即將逆匪張高友殲除民心乃定遂調派各軍分道進勦親赴南甯督師又將吳凌雲黃鼎瀾梁安邦孫仁廣一律蕩平此外有賊之區體察情形審酌輕重或責諸守令或調派官軍實力攻勦先後將梧州府屬蒼梧縣股匪潘庸容縣股匪范亞音藤縣股匪霍十八柳州府屬馬平縣股匪梁扶英來賓縣股匪張玉潰劉亞結思恩府

屬賓州股匪宋扶桿
風皮周安邦鎮安府
挑新滄劉三九武宣
凌雲縣股匪譚三黃
太平府屬左州股匪
屯久爲民害者也其
荔波縣苗匪時擾粵
漸臻靖謐該撫臣於
聖諭察民隱謀生計
各守令遵辦責以治

有功於地方者皆得呈請建祠以祀該撫臣之功德昭昭在粵與情共戴理合臚列事實呈請奏建專祠並將事蹟宣付史館俾得報享而彰政績不勝翹禱之至等情據此臣伏查前任撫臣張凱嵩由縣令於咸豐同治年間迭蒙 恩命洊擢巡撫其勦辦各股賊匪又奉 旨賞加頭品頂戴戰功治績皆有可考今因輿情愛戴呈乞 恩施相應據情上請合無仰懇 天恩准於廣西省城建立已故前任廣西巡撫雲南巡撫臣張凱嵩專祠并 敕將事蹟宣付史館出自 鴻慈謹會同兩廣總督臣張之洞恭摺具奏伏乞 皇太后 皇上聖鑒訓示謹 奏

奏陳已革千總甘沛棠審明定擬摺

光緒十三年十二月十八日

奏爲在籍千總糾衆謀毆並恃強屢次行兇擾害審明定擬恭摺
具 奏仰祈 聖鑒事竊 臣於光緒十三年四月二十八日片奏
容縣在籍花翎守備銜拔補千總甘沛棠素不安分因控爭田塘
帶人尋鬧致傷謝子安身死解省委審特符狡展請 旨即行革
職以便審辦奉到 硃批甘沛棠著即革職嚴訊按律究辦欽此
當經轉行臬司欽遵辦理茲據提齊應訊人証發桂林府審明糾
衆謀毆致斃實情並究出甘沛棠屢次行兇擾害各情照例議擬
解經按察使張聯桂覆審詳辦前來 臣提案覆鞫緣甘沛棠籍隸
容縣咸豐年間粵西盜賊蠭起甘沛棠投入髮匪陳金剛夥黨在
縣滋事因被官軍進剿窮蹙甘沛棠歸誠入營投効同治年間隨

同勦賊出力迭保以千總補用加守備銜並換花翎隨即由營銷差回籍並未收標與已死謝子安鄰村居住素識無嫌甘沛棠早年置有土名牛車坪禾田五畝田旁魚塘一口批與謝子安耕種養魚議定每年共交租錢二十千文按年清款不得拖欠立有字據光緒十一年十月內謝子安陸續交過是年租錢十千文餘欠一半約俟年底交清屆期甘沛棠屢向催索謝子安仍係推緩十二年二月初十日甘沛棠至謝子安家令退還田塘另行招佃謝子安言語支吾遷延不退甘沛棠隨以霸業吞租赴縣具控該縣票差龍有姚梅傳訊謝子安因病未能到案經該差役稟明在案甘沛棠因謝子安欠租既不清還田塘又不速退心懷氣忿起意

尋毆捉拏送究向僱工張十四陳一告知令即邀人幫助張十四
隨邀得潘二潘十四二人陳一邀得李五羅亞有二人甘沛棠又
邀允素識之梁七一人約定三月十七日黎明時候在甘沛棠家
會齊至期梁七攜帶自己家內防夜竹銃張十四等各拏木棍甘
沛棠徒手一共八人走到土名古城地方陳一心懷畏懼託故不
行甘沛棠聽聞氣忿喝令速走如敢中途退縮定不甘休陳一無
奈仍復同去走到謝子安門首甘沛棠與張十四等擁進大門喊
稱捉拏謝子安毆打梁七站在門外謝子安與其堂弟謝曰安窺
見即由屋內旁門走出逃避梁七上前追赶謝曰安先走謝子安
落後轉身低頭拾石梁七點放竹銃致傷謝子安頂心等處倒地

時有陳成志路過看見喝阻不及甘沛
由屋內趕出見謝子安已經受傷倒地
梁七上前硬將謝子安拖起行走稱要
經氣絕梁七鬆手與甘沛棠等分路去
差拏該差帶同屍子謝元進赴案報驗
不到案屍子謝元進即以前情自赴韻
委員赴縣協拏提解詎甘沛棠帶同伊
東省隨以謝子安係因差拏拒捕格斃
督臣衙門呈訴當經臣咨請解回西省
秦煥督同局員提訊供詞狡展稟由臬

批斥革嚴訊究辦據該府稟司行提人證差役解省質究茲據容
縣將見證陳成志及差役龍有姚梅等解司發府審明糾毆致斃
實情並究出該犯甘沛棠先於光緒九年內因外姻親戚梁士倫
有自置田畝坐落縣屬土名澁草塘地方於咸豐年間賣與楊冠
卉管業憑中立契田價交清光緒九年十二月梁士倫往向楊冠
卉議贖此田楊冠卉不允即以恃強勒贖赴縣呈控經該縣文星
照斷令楊冠卉管業甘沛棠因梁士倫係自己親戚竟被楊冠卉
控告心懷忿恨即於九月十四日帶同素識之胡俄袁吉二人邀
同梁士倫各携鐮刀前往澁草塘割去楊冠卉田禾約有兩担維
時禾未成熟割斷即丟棄田內是年十一月二十七日甘沛棠與

素識之秦庸因事外出與楊冠卉族人楊八路遇甘沛棠即向楊八斥罵爾之族人楊冠卉不應將梁士倫控告楊八用言分辯甘沛棠即喝令秦庸將楊八挈住帶回家內用繩網縛用拳毆傷楊八左臂膊脊背兩處楊八再三哀求始行釋放又廣東客民陳瀏謝等向在縣屬開設油店甘沛棠於光緒十年二月內不記日期向陳瀏謝等定買生油十二萬斤不問時價多寡每百斤僅許價錢八千文並要四月將油交足運赴廣東發賣陳瀏謝等素知甘沛棠強橫祇可答應不敢計較甘沛棠後聞陳瀏謝等店內缺油即於三月初五日往向陳瀏謝等取油陳瀏謝答以尙未到期央求寬緩甘沛棠不依用言斥罵將其桌椅打毀並說如不交油即

糾人將店拆毀陳瀏謝等畏事情願出錢認罰甘沛棠索得錢一百二十千文方纔息事所得錢文早經花用楊冠卉楊八陳瀏謝等均未敢告究由府稟司行據容縣查覆均係實有其事當日因畏甘沛棠兇惡俱未敢控告其毀傷楊冠卉田禾現估計值銀九錢二分嚇索陳瀏謝等錢文估值銀一百二十兩現楊冠卉楊八俱已遠出貿易陳瀏謝等籍隸廣東恐甘沛棠再向索擾早已歇業回籍請免傳訊以省拖累並稱曾據紳士封掄英等聯名赴縣具呈甘沛棠動輒逞兇滋事賊心未改受害之家畏其兇饒多不敢控告該縣採訪輿論衆口一詞等情現到案之見證陳成志供亦相符照例議擬將該犯解司覆審詳辦臣提犯覆鞫供認前情

不諱詰係一時起意糾衆謀毆並非約期械鬪亦無另有在場幫毆之人前控謝子安被差役格斃實係希圖卸罪並無別故此此外亦無另犯不法別案矢口不移似無遁飾查律載同謀共毆人致死原謀杖一百流三千里又棄毀人稼穡計贓准竊盜論又威力制縛人於私家拷打杖八十又恐嚇取財計贓准竊盜論加一等竊盜贓一兩以下杖六十一百二十兩杖一百流三千里又凡稱加者止杖一百流三千里又例載兇惡棍徒屢次生事行兇無故擾害良人發極邊足四千里安置各等語此案已革千總甘沛棠因謝子安拖欠田塘租錢不清延不退佃起意糾衆謀毆致糾往之梁七銃傷謝子安身死又恃強割毀楊冠卉田禾憑空將楊八

細毆並向陳瀏謝等嚇索得贓實屬屢次生事行兇無故擾害查該犯糾衆謀毆致梁七將謝子安傷斃應按原謀問擬及乘毀楊冠卉田禾細毆楊八並向陳瀏謝等嚇索得贓均罪止杖流應以屢次生事擾害從重問擬甘沛棠合依兇惡棍徒屢次生事行兇無故擾害良人發極邊足四千里安置例擬發極邊足四千里安置事犯在光緒十一年正月初四日欽奉 恩旨以前到官在後毋庸查辦自應發配安置惟查甘沛棠自投誠後游保武職其子復登賢書應如何安分守法乃仍不知自愛平日武斷鄉曲肆意強橫歷犯多案今復糾毆釀命藐法已極若照例徑行解配既恐別有滋事更難保不潛逃回籍擾害地方緣其平日結黨橫行無

惡不作身邊常有數十人往來相伴氣凌官長形同匪類閤縣紳民盡皆切齒痛恨實爲土豪地棍之尤設令逃回必致尋仇報復釀成禍患該縣紳士封掄英等聯名具呈指稱甘沛棠恃符作惡所有受害之家畏其兇燄不敢控告者不知凡幾總之甘沛棠以髮逆夥黨窮蹙來歸尙復匪心未改怙惡不悛實非平民犯罪可比未便稍涉輕縱據司詳聲請監禁前來擬請將該犯甘沛棠留省嚴行監禁以消其桀驁之氣俟十餘年後果知悔悟再行解配安置如已過十年遇有恩旨查辦減等仍察看情形分別辦理所毀楊冠卉田禾估值銀九錢二分及嚇索得陳瀏謝等錢一百二十千文均照數著追查傳楊冠卉陳瀏謝等給領至該犯之子

舉人甘恒隨於該犯釀命之日尚在會試未回並不知情惟查其平日亦不甚安分應請飭縣隨時查察如有不法情事立即詳請革究勿稍姑容差役龍有姚梅奉票傳喚謝子安不到已稟明該縣在案謝子安被傷身死訊與該役無涉應與救阻不及之陳成志均毋庸議兇犯梁七未獲照例補參與張十四等一併飭緝獲日另結所有失察竹銃應議職名查明補送謝子安批租田塘由縣追給甘沛棠家屬管業所欠租錢身死勿徵屍棺飭屬領埋無干省釋除全案供招咨部外合將審明議擬緣由恭摺具 奏伏乞 皇太后 皇上聖鑒敕部核覆施行謹 奏

奏請監禁甘沛棠片 光緒十三年十二月十八日

再該犯甘沛棠本係髮逆夥黨狼心未改武斷橫行紳民同爲切齒因其常有惡黨相隨慮其報復莫敢控告臣前在邊關即有所聞曾飭容縣密行查辦該犯兇燄甚張該縣恐激而生變未敢操之太急諭令團紳妥爲告戒一面設法辦理詎甘沛棠毫無忌憚尙敢糾衆尋毆銃傷謝子安身死其藐官玩法概可想見迨該縣派差往捕臬司委員協拏皆因兇狡異常竟難就獲前署梧州府知府劉恩濬有甘沛棠勢將糾黨抗拒之稟幾煩兵力幸該犯忽而赴東遞呈當經督臣扣留解回西省審辦地方得以無事該犯到案後容縣紳士封拱麟等百餘人紛紛赴臣行營遞呈以其無惡不作請從嚴究辦以除鄉閭之害乃經委員迭次嚴訊異常狡

展現據供認擾害數事係因見證陳成志質實無可推卸此外堅不供吐轉稱閩縣紳民有意陷害忿恨情見平詞現在罪止擬軍一經發配逃回尋仇生事實在意中更恐狼子野心其爲害不止於報復仇殺已也但此等人犯就案科斷罪不至死又慮其脫身貽害非加以監禁不足消其桀驁之氣而弭地方之禍此臣正摺內未經陳及者臣爲地方起見合再縷晰上陳請 旨准予監禁以杜後患謹附片具 奏伏乞 聖鑒訓示謹 奏

奏勦辦西隆州苗匪情形片

光緒十三年十二月十八日

再臣前因西隆州屬苗匪攻撲猴場墟戕害多命調派邕防營勇迅赴泗城責成該管知府鄧輔綿親督往辦嗣據鄧輔綿稟稱此

次衅因猴場鄉團擅採苗人包粟致昔年漏網苗匪乘機煽誘糾衆滋擾必須設法擒捕方易爲力臣亦迭飭以分別良莠妥爲安撫懲辦以免固結抗拒然必兵威足以鎮懾乃可操縱自如復添調田陽防營前往並以准補梧州府知府陳善均曾任泗城府熟悉情形委令馳往會同妥爲籌辦經臣於本年六月九月兩次附片奏明在案茲節據稟報陳善均於九月十九日馳抵西隆州查得該州屬苗人共有七種內惟白苗花苗曾有爲匪之人其餘近尙安分前經鄧輔綿派隨營試用從九品宋紹昌等齎示赴安分各寨曉諭良苗協拏匪犯已多有來營自投願導官軍進攻旋因鄉團急於洩忿探聞擾猴場之匪多潛聚於桃子樹大隆堡龍

沙井等寨突往攻燬多寨共斃一百數十人匪黨亦多被殲首要各匪遂即逃散陳善均會同鄧輔綿籌商飭令摘頂留營差委之試用知縣吳大椿並派往隨營辦事之候補知州萬方達等傳諭各寨良苗各安生業協拏匪犯隨據該苗頭龍格等帶同苗民來營遞呈願助官軍擒捕維時所調田陽防勇已到即派隊分捕千總彭文瀾探得積匪伍楊橋等潛匿肯巴塞會同把總黃仰等率帶勇丁於九月二十四夜圍拏格斃匪夥數名當將伍楊橋生擒解營九月二十六日吳大椿會營在後沖地方拏獲要犯王汪馬一二楊二等三名格斃著匪楊和及夥匪數名又據線工緝獲匪犯熊四一名並據鄉團獲送韋阿潰韋老五韋毛价楊阿富四名由

陳善均鄧輔綿提訊或係攻擾猴場匪犯或係昔年漏網積匪先後錄供稟經臣批飭正法查前據西隆州紳民指控各匪內有首要李亞咬丁三王石堡陶保四名未獲迭飭勒限嚴拏陳善均鄧輔綿會懸賞格購緝並勒各苗頭捕送旋據苗頭楊起鵬等密報首匪李亞咬丁三同伏隆厚寨該處山徑奇險黨羽尙夥擒捕不易籌議伏兵堵截設法誘致十月二十六日據哨弁彭德才等將該匪丁三並其侄丁么誘獲解營而李亞咬狡悍異常據寨不出陳善均等立即帶同都司霍應瑞千總曹紹美等馳往於二十九日圍寨該匪開礮相拒我軍亦槍礮齊施奮力攻入擊斃匪黨羅米二羅沙照等多名該匪之子李大兇悍素著亦被殲斃李亞咬

捷若猿獠卽出寨後越山逸去當經生獲夥匪楊亞應一名卽將該寨焚燬復派弁勇徧行窮搜十一月初二日始將該犯李亞咬擒獲惟王石堡陶保二名查無踪跡傳到苗頭責令細加查報隨據帶同各寨目具結實無藏匿情事一面仍嚴密查緝現在民苗相安地方靖謐叙錄該首匪李亞咬丁三及丁么楊亞應等供情具稟前來當經批飭將李亞咬等就地正法以昭炯戒臣查此次苗匪撲攻猴場係因鄉練擅探包粟起衅以致匪徒乘機煽惑攻劫擾害本非無端滋事亦無大股賊匪因事關苗疆檄行加意妥辦今已先後殲擒夥匪多名苗寨俱已具結地方安靖祇該匪王石堡陶保未獲應卽責成地方官緝拏所調田防營勇撤回原防

陳善均萬方達吳大椿均准銷差仍酌留邕防守備韋正光營勇
暫駐州境彈壓由該府鄧輔綿督同署西隆州知州康達爵隨時
嚴緝玉石堡陶保及漏逸餘匪務獲究辦一面妥辦善後以期永
臻乂安試用知縣吳大椿前因委署西隆州篆值捕務緊要到任
遲延經臣奏參摘頂留於西隆差遣今搜捕匪犯尙能奮勉出力
仰懇 天恩准予開復頂戴又試用從九品宋紹昌隨營差委於
六七月間派赴苗寨各處招撫查緝感受暑瘴於八月二十七日
在營次病故應懇 恩施俯准飭部議卹在事文武節次獲犯亦
著有微勞可否准擇尤酌保數員出自 逾格鴻慈謹會同兩廣
總督臣張之洞附片具 奏伏乞 聖鑒訓示謹 奏

奏副將李應章瘴故請卹摺 光緒十三年十二月二十四日

奏爲分統廣西邊軍副將因染瘴積傷病發在營身故臚陳生平
戰績籲懇 天恩俯准優卹恭摺仰祈 聖鑒事竊分統鎮南毅
新各營總兵銜 賞戴花翎廣東儘先補用副將強謙巴圖魯李
應章因瘴病傷發於本年十二月十九日在營身故經臣元春妥
爲照料後事一面電商臣之洞秉衡遴員接統所部各營以重邊
防查該故副將李應章係廣西貴縣人同治年間投効貴州雲南
軍營隨剿貴州都勻雲南瀘兮騰越等股匪大小數十戰先後肅
清迭保守備用加都司銜戴藍翎凱撤回籍光緒元年投入廣西
邊防軍營出關剿捕越匪克復河陽撲滅叛將李揚才全股搗平

太原通甯巖連克賊壘二十餘座擒首逆陸之平光緒十年關外之役李應章管帶鎮南營歸前貴州安義鎮總兵陳嘉統轄爲其部將第一性成忠勇戰必身先陳嘉之捷於船頭等處實爲選鋒十一年二月關前之捷轉敗爲功旋克復諒山省府多城壘李應章奮不顧身所向披靡重傷徧體經臣等節次奏報蒙 恩賞戴花翎以副將留於廣東無論題推缺出儘先補用加總兵銜并賞換強謙巴圖魯名號嗣陳嘉病故派令分統鎮南等營駐鎮南關當衝要本年六月因新太協副將員缺緊要復委令就近署理藉資整頓仍駐鎮南關防次近邊游匪率多畏懷相戒退散洵爲臣元春之臂助詎積受瘡癘咯血苦嗽而歷次打仗右腿殘傷右

臂損折下頷爲礮子擊
自言病而病因增劇傷
故副將之血誠廉勇有
無殊賤卒深得軍心身
保其堪勝專閫臣之洞
差委俾資得力臣元春
留在西同冀多爲國
邊防少一賢將合無仰

鴻慈謹合詞恭摺具

奏

李忠節公奏議卷四終

李忠節公奏議卷五

奏謝授安徽巡撫摺

光緒二十年五月二十二日

奏爲恭謝 天恩仰祈 聖鑒事竊 臣恭閱邸鈔光緒二十年四月二十一日內閣奉 上諭安徽巡撫著李秉衡補授等因欽此當即恭設香案望 闕叩頭謝 恩伏念臣以凡庸之質蒙 特達之知由牧令洊升廣西藩司護理巡撫因病籲請開缺頻年調理尙未復元每念 恩知未能報稱瞻 九宸於咫尺常五夜以徬徨豈期衰疾之餘生猶荷 聖明之垂注 擢從田里超領封圻自顧何人忝膺非分即糜頂踵詎答涓埃感極涕零匪言可喻竊維皖省地居衝要撫 臣任總軍民深虞多病之軀莫挽積頽之

俗惟既仰蒙 驅策但使勉能支拄何敢稍耽安逸自外 生成
惟有誓殫血誠力圖整頓以冀仰答 高厚慈施於萬一所有微
臣感激下忱謹繕摺叩謝 天恩伏乞 皇上聖鑒再臣現寄寓
直隸保定府屬之滿城縣此摺就近借用直隸藩司印信拜發合
併聲明謹 奏 光緒二十年五月 日奉 硃批知道了欽
此

奏請假一個月片 光緒二十年五月二十二日

再臣現蒙 特恩補授安徽巡撫應即趨叩 闕廷跪聆 訓誨
緣前在護理廣西巡撫任內歷年駐兵鎮南關感受瘴溼致骸足
痠軟不良於行向有吐血舊疾觸發增劇不得已疏請開缺仰荷

恩允從前久官直隸醫藥近便北歸後即寄寓滿城醫治多方
漸見痊可前年冬間復患血疾今春始愈而氣血因之虧損足力
尙覺不支合無籲懇 天恩賞假一個月俾得從速調攝練習筋
力一俟假滿步履稍健即當趨程赴京不敢少涉遲延謹附片陳
請伏乞 聖鑒訓示謹 奏 光緒二十年五月 日奉 硃
批著賞假一個月假滿後即行來京陛見欽此

奏報到任日期摺 光緒二十年八月十五日

奏爲恭報微臣到東接印任事日期叩謝 天恩仰祈 聖鑒事
竊臣前蒙 恩命簡放安徽巡撫入都 陛見旋於光緒二十年
七月十六日奉 上諭李秉衡著調補山東巡撫安徽巡撫著福

潤調補欽此當即趨詣 宮門先後仰蒙 召對三次 聖訓周詳莫名欽感 陛辭後束裝起程道出天津晤北洋大臣大學士直隸總督臣李鴻章會商海防事宜旋即趨程赴東於八月十二日行抵山東省城十三日准調任撫臣福潤將山東巡撫關防臨清關監督關防鹽政印信各一顆並 王命旗牌文卷書籍等件委員齎送前來 臣當即恭設香案望 闕叩頭謝 恩祇領任事伏念 臣衰病餘生渥承 寵眷受 恩愈重報稱愈難查山東地接畿疆巡撫職司表率官常宜肅激濁乃以揚清民氣宜舒安良必先除暴他如慎修守以弭河患籌兵餉以重海防以及關權鹽漕事事悉關緊要材輕任重懼弗克勝惟有破除情面殫竭愚忱

以期仰答 高厚鴻慈於萬一除循例恭疏 題報外所有微臣
接印任事日期並感激下忱謹繕摺叩謝 天恩伏乞 皇上聖
鑒謹 奏 光緒二十年九月 日奉 硃批知道了即著將
應辦一切事宜認真整頓刻下海口防務及曹州一帶盜匪尤應
妥籌辦理毋稍大意欽此

奏請將曹州府知府毓賢暫緩引見摺

光緒二十年八月二十七日

奏爲山東省西盜匪充斥請將曹州府知府毓賢暫緩引 見責
成專辦兗沂曹三府盜賊添勇練團以清內患而裨防務恭摺仰
祈 聖鑒事竊維現在倭氛不靖海防是急然備外患必先清內
訖查山東曹兗沂數郡民氣素強近年萑苻嘯聚動輒結隊成股

劫掠焚殺儼同巨寇民不聊生若不趕緊捕治深恐貽患燎原於海疆防務大有關係臣七月間在都 陛見時曾將所聞東省盜賊情形及曹州府知府毓賢長於捕務據實面奏仰荷 聖明鑒察比臣到東任事後復又悉心咨訪證諸省城司道及本管兗沂曹濟道先後來稟咸稱現任曹州府知府毓賢疾惡愛民認真緝捕盜賊畏之無如兵力無多即一府而論尙不免此拏彼竄臣與司道等再三熟籌必須添勇練團將兗沂曹三府盜賊統歸該府專辦方能有效該管道姚協贊來稟亦以爲請現擬飭令自行添募勇隊五百名即歸該府統帶並將附近防營准其調遣責成既專該府必能盡力搜捕以靖地方一面分飭各屬舉辦團防村大

者三數村爲一團村小者十數村合爲一團安定章程實力舉行俾兵民聯絡爲一務使遺患不留庶內地可清而海防亦得一意經營不至有牽掣之慮惟查該府毓賢前經調任撫臣福潤奏保奉旨送部引見合無仰懇天恩俯念東省盜風太熾緝捕需人准令毓賢暫緩交卸專辦兗沂曹三府盜賊實於捕務防務大有裨益至東省吏治亟應講求如官不久任局設太多冗員耗費河工濫保種種錮習積之有漸惟有督同司道不避嫌疑次第切實整頓藉資補救現將應辦事宜趕緊部署即當馳赴煙臺威海一帶海口察巡防務隨時奏陳所有擬添勇練團懇將曹州府知府暫緩送部引見責成督捕盜賊緣由理合恭摺具奏伏

乞 皇上聖鑒訓示謹 奏 光緒二十年九月十五日奉 硃
批著照所請吏部知道欽此

奏裁併各局片 光緒二十年八月二十九日

再東省籌辦海防款無所出惟以裁併局員節省糜費爲目前第一要義臣甫經到任又須出省布置防務先擇局費太繁委員太冗者與司道等悉心參酌分別裁併除工程局停撤外如釐金土藥軍械併入善後爲一局賑撫賑捐併爲一局書局通志併爲一局均委藩司湯聘珍總辦保甲機器兩局均委臬司松林總辦南北兩運併爲一局派委運司李希蓮總辦洋務河管及河防局均委濟東泰武臨道張上達總辦概無薪水其會辦提調收支文案

必不可少者即於候補道府同通州縣中每局遴委數員分司其事酌給薪水餘俱裁撤核計每月經費節省頗鉅此外如有應因應革事宜容臣查明次第舉行謹先附片陳明伏乞 聖鑒謹奏

奏分別籌款免借商本摺 光緒二十年九月初一日

奏爲遵 旨分別籌款請免利借商本以濟餉需而尊國體恭摺覆陳仰祈 聖鑒事竊查接管卷內光緒二十年七月十八日承准軍機大臣字寄七月十四日奉 上諭現在倭氛不靖沿海籌防募勇練兵以籌餉爲最要各該督撫均有理財之責即著各就地方近日情形通盤籌畫何費可減何利可興何項可先行提存

何款可暫時挪借務須分籌的餉湊支海上用兵之需等因欽此
遵 旨寄信前來適前撫臣福潤調任卸事未及覆 奏移交到
臣正在籌議間又於八月十四日兵部遞到承准軍機大臣字寄
八月初九日奉 上諭現在倭氛不靖購船募勇需餉浩繁息借
商款京城業經創辦即著各直省督撫徧諭官紳商民人等如有
湊集資本情願借給官用者准赴藩司關道衙門呈明即照戶部
辦法議定行息填給印票其票鈐用藩司關道印信填明歸還本
利限期准於地丁關稅項下照數按期歸還如集款至一萬兩以
上准將籌集之人先行請獎虛銜封典以示鼓勵等因欽此伏查
倭夷渝盟擾我藩屬徵兵防勦需款浩繁凡在臣民莫不同仇敵

295-1

愼力圖報稱以抒其忠愛之忱惟款項固貴寬籌時勢尤宜熟審
總期餉需 國體兩無窒礙 臣會集司道詳加商議咸謂連年水
患工賑頻仍用度日增征收日減錢漕則較多獨緩鹽務則逐漸
滯銷銀礦煤窰商本時形虧累釐金土藥進款亦甚纖微而京協
固本邊防各餉鐵路內務府直隸東明河工及本省兵餉勇糧賑
撫機器各局黃運兩河工程等項經費支解紛繁已形竭蹶且海
防同一戒嚴召募勇營添辦軍火在在均關緊要又須籌備大宗
無非設法騰挪此則利無可興費無可減通盤籌畫深費躊躇至
若息借商本藉補餉絀在部 臣百計經營爲此權宜之舉苦心孤
詣薄海同知 臣仰荷 殊恩忝膺疆寄正值海氛未靖時事多艱

應如何殫竭愚誠實力勸辦上紓 聖主宵旰之憂無如東省地瘠民貧本鮮巨富溯自黃流穿運以來南北帆檣久難暢行因而大賈巨商遠莫能致其在本省貿易者以鹽當票號爲最大鹽商已令專款報効當商另奉 諭旨派捐票號一項又准戶部咨行業經在京出借鉅款若外省再行勸借商力實有未逮此外小本營生十居八九旣非厚貲坐擁稱貸實難必其樂從縱勸導多方終恐小數零星無裨正用即如近來賑捐勢成弩末商民窮乏是其明徵夫假以名器尙多裹足不前矧此利借之銀出入俱經官手懷疑生畏更不待言微特無補餉需更恐有關 國體此利借商本之格礙良多也願時雖處於至難款當先其所急不得已與

司道等再四熟籌於無可設措之中爲勉力羅掘之計糧道關道
運司各庫額解之外均無閒款可提鹽釐兩次加捐商力已疲礙
難再令預繳祇可於藩庫內逐款搜括積銖累寸湊集銀十萬兩
作爲的款候撥復經運司敦勸鹽商激其義憤僉云渥沐 恩膏
極思圖報情願攤捐一次銀十萬兩自光緒二十一年起分作四
年隨同引票繳足在該商急公奉上雖據聲稱不敢仰邀議敘究
未便沒其微忱容由臣另行請獎以示鼓勵第捐項年限較遠一
時不克繳齊先由司道各庫局如數籌墊按年撥還猶恐集款未
鉅不足以資接濟復於各庫局中無論是何款項亦不計能否動
用暫行湊挪銀十萬兩移緩就急隨時彌補連前鹽捐合銀二十

萬兩作爲另款候撥以上的款另款共計銀三十萬兩臣到任甫及半月尙未熟悉情形幸賴藩司湯聘珍運司李希蓮濟東秦武臨道張上達共矢公忠羣策羣力得以籌此鉅款實爲臣初念所不及然已搜羅殆盡不遺餘力矣抑臣更有請者此次變通辦理無所謂借即無所謂還無所謂本更無所謂利東省財力本絀當智盡能索之餘不得不爲此竭澤而漁之舉在各疆臣目擊時艱當均能勉力籌謀共圖補救如此則地丁關稅仍歸 朝廷正供不特餉需可濟又可一泯還借之迹 國體亦愈尊矣所有遵旨分別籌款請免利借商本緣由理合恭摺覆陳是否有當伏乞

皇上聖鑒訓示謹 奏

奏查明御史所奏匪徒一節據實覆陳摺

光緒二十年九月二十一日

奏爲遵 旨據實覆陳仰祈 聖鑒事竊臣於九月初二日出省

籌辦海防前經 奏報在案初五日在臨淄縣途次承准軍機大

臣字寄光緒二十年八月二十七日奉 上諭御史齊蘭奏近聞

山東煙臺等處匪徒猖獗日甚係李洪一黨等因欽此遵即飛飭

登萊青道嚴密確查去後臣道出青州萊州登州各府復沿途查

訪茲於十八日行抵煙臺據登萊青道劉含芳稟稱煙臺一帶並

無匪徒蹤迹地方居民亦不知有李洪名目查光緒十七年江南

拏獲會匪訊供係李洪爲首其時上海申報謠傳該犯逃赴煙臺

天津一帶嗣經南洋大臣劉坤一仍在江南境內拏獲正法以後

南北各省未聞有餘黨滋事之說證以沿途官民所述大畧相同委無乘隙滋擾情事原奏自係傳聞之訛惟煙臺五方雜處稽察頗慮難周臣已檄飭該道轉飭各州縣舉辦團防無論城市鄉鎮編立牌保互相稽查並於煙臺輪派練軍弁勇認真梭巡俾奸宄無所託足仰副 聖主綏靖海疆至意至東省防務惟登州無險可扼較費經營前撫臣福潤已派候補道李正榮管帶嵩武四營又新募福字兩營駐紮該處臣留住兩日嚴爲布置始詣煙臺煙臺在登州東南一百六十里陝西漢中鎮總兵孫金彪所帶嵩武四營駐焉該處爲各國通商口岸最爲緊要孫金彪謀勇兼優與登萊青道劉含芳會商布置極爲周妥臣履勘礮臺均得地勢礮

位亦俱齊整連日與之籌商一切俟部署就緒即赴威海等處周歷巡視查威海係北洋駐軍之所孫金彪所帶四營亦係歸北洋統轄臣當隨時會商北洋大臣大學士直隸總督臣李鴻章妥籌辦理一俟巡視完竣再將各防情形詳晰奏陳所有微臣行抵煙臺謹將遵旨查明據實覆陳緣由恭摺具奏伏乞皇上聖鑒訓示謹奏光緒二十年十月十一日奉 硃批知道了欽此

奏藩司無庸赴京祝嘏摺 光緒二十年九月二十二日

奏爲據情代奏恭摺仰祈 聖鑒事竊臣具奏擬赴登州經畫海防藩司湯聘珍亦當及時起程赴京祝嘏省城地方諸事

需人請 旨辦理一摺八月二十四日奉 上諭即著改派松林
來京慶祝湯聘珍著無庸前來該撫即傳知該藩司將省城一切
應辦事宜認真經理等因欽此欽遵傳知去後茲據布政使湯聘
珍詳稱藩司於光緒二十年正月奉 旨派令赴京祝 嘏正應
及時起程復奉傳 諭無庸北上仰 九天之景運升恆遙祝夫
璇宮際 萬壽之昌期依戀倍殷於 廷闕惟有欽遵 諭旨
將省城一切應辦事宜認真經理不敢稍涉疏懈時深兢惕儼如
殿陛之趨踰益矢慎勤冀答 聖慈之高厚所有欽遵辦理緣
由懇請據情代 奏前來理合恭摺據情代 奏伏乞 皇上聖
鑒謹 奏 光緒二十年十月初八日奉 硃批知道了欽此

奏查明道員被參各款據實覆陳摺

光緒二十年九月二十三日

奏爲遵 旨查明道員被參各款據實覆陳仰祈 聖鑒事竊臣於九月十三日在黃縣行次承准軍機大臣字寄光緒二十年九月初六日奉 上諭有人奏山東登萊兩府米麪出口者甚多經濰縣知縣查出扣留白麪數萬斤其人逃匿未獲皆由登萊道利其出口稅用故使倭人得資接濟該道劉含芳兩目失明貪懦不堪甫聞警報即送眷口至黃縣居住以致沿海居民驚擾海防局總辦李正榮昏庸乖謬與爲表裏請飭查辦等語著李秉衡按照所參各節確切查明據實具奏將此由四百里諭令知之欽此當經密飭濰縣將如何扣留白麪情形迅速稟覆臣道出青萊各郡

沿途接見官紳明查暗訪比至登煙與李正榮劉含芳先後接晤
謹將所得實在情形敬爲我 皇上陳之山東登萊各府產糧素
少向賴奉天等省販賣接濟米麪出口本屬無多近因海疆戒嚴
禁止米麪出口而該處民情儉嗇因奉省所產雜糧價值較賤間
有將本地米麪携往換購以精易粗冀覓微利以故未能禁絕委
員因有出口之禁往往查出示罰聞有攜白麪二十斤出口罰錢
至數千文者劉含芳查知禁阻不准任意苛罰係爲體恤民艱且
係鄉民零星白運實無販賣出口至數萬斤之事接據濰縣知縣
楊耀林稟覆八月初間有赴登州駐防之嵩武軍委員在濰縣收
買白麪數萬斤運營備用並無扣留白麪疎脫私販情事伏思倭

人沿海肆擾守禦之方首在斷其接濟劉含芳身任關道海防責無可貸如謂貪出口之稅以資敵糧非至愚極陋萬不出此原奏自係傳聞之訛原參又謂該道兩目失明貪懦不堪各節查該道自上年十月到任於交涉事件一切措置裕如地方應辦事宜皆能潔己奉公力圖振作委無貪懦情事該道一目失明歷年已久此次臣駐煙臺因籌商防務一日接見數次授以公牘當面檢閱有面稟未盡事件復接該道親筆信函其非兩目失明此不待辨而自明者也又所參甫聞警報即送眷口至黃縣一節臣在黃縣接奉 寄諭即派員密查縣城並無該道眷口寄住比至煙臺詢之官僚僉謂初聞警報居民不免惶懼該道持以鎮靜與鎮臣孫

金彪會商防務布置周妥民情用是帖然如有送眷口出境之事豈能掩衆人耳目惟適有東海關司事洪姓家眷前往黃縣外間傳說或即因此而訛此查明登萊道劉含芳並無所參各項劣迹之實在情形也至候補道李正榮由前撫臣福潤委令統帶嵩武四營駐紮登州山東海防未另設局並無總辦名目臣查李正榮人甚安詳辦事亦尙穩練此次駐營登州登爲劉含芳轄境現值海防時有互商公事原參所謂昏庸乖謬與爲表裏自由形似言之而非能指其實有確據也惟臣到登郡體查該道雖由軍務起家而統率多營未能辦理裕如竊維用人須取其所長去其所短該道兵事旣非所長擬由臣撤去統領飭令回省供差以策後效

臣賦性迂直不避嫌疑如屬吏中有貪劣不職之員斷不敢瞻徇
緘默而是非所在衆論昭然亦未容過事苛求仰副 朝廷因才
器使至意所有查明道員被參各款據實覆陳緣由理合恭摺具
奏伏乞 皇上聖鑒訓示謹 奏 光緒二十年十月十一日
奉 硃批知道了欽此

奏總兵王連三遵旨北上摺 光緒二十年十月初五日

奏爲總兵王連三遵 旨帶隊北上酌撥馬隊糧餉軍火並委員
署理鎮協各篆恭摺仰祈 聖鑒事竊臣於光緒二十年八月二
十一日接總理各國事務衙門電傳本日奉 旨前據曹州鎮總
兵王連三奏請帶兵進援朝鮮當令候旨添調現在北路軍情緊

要著李秉衡即飭王連三統帶所部馬步練軍北上並由李秉衡抽調陸路勁旅數營撥定糧餉配齊軍火一併交該總兵迅速起程前赴津通一帶聽候調遣勿稍延緩欽此等因欽遵經臣恭錄咨會該總兵王連三迅速料理起程惟查東省自嵩武四軍新募福字八營調赴膠澳烟臺登州擇要扼紮內地已形空虛雖陸路尚有數營或修守黃河堤防或分巡曹濟地面並關緊要委難抽調因於無可分撥之中札飭濟字後營副將陳大勝隊勇與單縣營參將岳金堂練軍各馬隊抽撥一百名並王連三所部營隊即日北上一面撥行善後局籌出三個月軍餉並秋季底餉公費津貼三共銀九千二百七十三兩八錢三分三釐酌配軍火等項由

藩司委員候補知縣張盡性解交該總兵點收應用現准該總兵咨報拔隊起程所遺曹州鎮總兵員缺應即委員署理以重職守查有記名總兵沂州協副將曹正榜久歷戎行膽勇素優曾經前撫臣張曜奏署兗州鎮總兵篆務措置裕如堪以署理遞遺沂州協副將查有署濮州營遊擊臣標左營儘先補用副將何成忠樸實勇敢練習營務堪以接署其濮州營遊擊查有臣標花翎副將銜留東補用參將李榮慶熟習行伍勤於操防堪以署理除咨部查照並分別飭委外理合恭摺具 奏伏乞 皇上聖鑒謹 奏

光緒二十年十月二十一日奉 硃批該部知道欽此

奏報黃河普慶安瀾摺 光緒二十年十月初六日

奏爲節屆霜降黃河普慶安瀾恭摺仰慰 聖懷事竊查接管卷內節交白露通工大致平穩緣山經前撫臣福潤 奏報在案臣抵任後清釐接收事件即赴海防河工未能親駐時距霜清尙遠當飭上下游各總辦慎重籌防毋得稍涉大意嗣據在工各員弁稟報各工迎溜頂衝之處埽壩多有墊陷屢見危險緣稽料入水既久漸次朽敗况淘底搜根溜力較伏况更勁故河水雖見消落而險工逐處環生均經各總辦督飭工員搶護平穩近據中下游總辦署鹽運使濟東道張上達稟報九月十九日至二十五日河水長至六尺餘寸各工復紛紛報險幸二十六日以後水勢漸見消落各處均修防穩固現已節逾霜降通工普慶安瀾仰賴

聖主洪福 河神效靈 微臣實深慶幸 相應請

由臣祇領虔詣 大王廟祀謝以答 神庥在

胼胝經營履危蹈險其勤勞亦未可泯除將本年
咨部立案外所有各總辦會辦道員似應先行給
無仰懇 天恩俯准將署鹽運使濟東泰武臨

濟道姚協贊候補道丁達意候選道馬開玉均

署濟東泰武臨道候補道吉燦升 交部議敘

由臣分別勞績優次併上年咨部各員核實刪減
敢稍涉冒濫所有節交霜降黃河普慶安瀾緣由
奏伏乞 皇上聖鑒訓示謹 奏 光緒二十年

硃批另有旨欽此

奏沿河一帶請照義賑辦法撫恤摺

光緒
日

奏爲東省沿河一帶貧民過多擬請於例賑外
賑辦法擇尤撫恤以資補救恭摺仰祈 聖鑒
各州縣歷年災祲民困已深本年雖幸三汛安
多各處山泉同時匯注低窪處所積潦難消或
望或房屋沖塌修復無資受患與黃水略同但
廣迭據各該州縣稟報被水輕重情形當經飭
方官確切勘驗清查戶口開摺稟辦就其查到
南府屬之齊東武定府屬之青城蒲臺利津被

屬之章邱泰安府屬之東平東阿武定府屬之濱州及臨清州等處次之如再有續報前來當再隨時委勘除勘明成災村莊循例給賑照案報銷毋庸更議外惟查有沿河一帶被水村莊本年雖屬勘不成災而居民昏墊餘生毫無生計習俗又復獷悍歷年春冬之間本專恃食賑爲活若因本年被水勘不成災即拘例章不予以濟老弱旣無以聊生少壯尤恐迫而爲匪且利津等處半多近海曾遵奉 電旨於利津海口紮營嚴防是值此際更應變通撫綏以免患生意外有不能不預爲籌慮者也臣與賑撫局司道再四熟商擬請酌量變通在於賑撫賑捐所存項下并司庫臨倉耗羨項下各提撥銀二二三萬兩遴派樸誠道府大員親履各處仿

照近年義賑辦法不論災情之輕重祇擇戶口之赤貧量爲撫恤以資補救而靖地方一俟放竣即將收支細數實用實報另造一冊隨同例賑冊籍一併送部存案備查所提司庫臨倉耗羨銀兩如將來賑捐稍旺仍令如數歸還臣當督率司道及派出之道府大員嚴令放賑印委各員核實查放不准假手胥吏地約莊長并不准絲毫冒濫務使貧民實惠能霑以廣皇仁而弭隱患據賑撫局司道具詳請奏前來所有擬請於例賑外籌撥銀兩仿照義賑辦法酌量撫恤緣由是否有當理合恭摺陳明伏乞皇上聖鑒訓示謹奏光緒二十年十月二十日奉硃批著照所請戶部知道欽此

奏調朱采等來東片 光緒二十年十月初六日

再臣維吏事軍事首重得人山東吏治惰窳積習相沿已非一日近值海防捕務內外交訌非多得樸勤結實廉正有爲之員不足以資振厲且倭氛方熾沿海防營仍嫌單薄臣擬增練數營勁旅以備緩急策應尤須謀勇兼優之將領庶可爲微臣臂助少盡犬馬之勞查有前廣東雷瓊道朱采剛正廉明才兼文武能勝艱鉅之任現已告病回浙江原籍又山西候補知府錫良廉明幹練勇於任事歷任郡守州縣卓著循聲又廣西候補副將楊昌魁樸誠廉勇膽畧素優臣在粵時諒山之捷該員每戰必先深得衆心現在龍州邊防軍營以上各員合無仰懇 天恩飭下浙江山西廣

西各巡撫督辦邊防廣西提督分飭朱采錫良楊昌魁等迅速來東俾臣得稍展布遇事克效馳驅兼令楊昌魁招募黔勇兩營管帶來東並請 旨飭令廣西巡撫撥給軍械籌發兩個月行糧俟到東後再由臣籌備餉項於東省吏治軍政大有裨益臣爲時事需才起見是否有當謹附片具 奏伏乞 聖鑒訓示謹 奏

光緒二十年十月二十日奉 硃批另有旨欽此

奏報馳抵煙臺一帶籌辦海防摺 光緒十二年十月十二日 奏爲 微臣馳抵煙臺一帶籌辦海防謹將布置情形恭摺具陳仰 祈 聖鑒事竊臣於九月初二日出省馳赴海防前經 奏報在案臣到任未久於地方情形尙未深悉沿途接見屬僚諮訪利弊

故行程未能過速十三日抵登州十八日至煙臺二十七日赴威海十月初一日由威海折回煙臺每到一處審度形勢與各防營將領妥商布置謹將各處情形敬爲 皇上陳之查山東海防以威海登州爲最喫重煙臺次之膠澳又次之威海爲北洋門戶近十年中經北洋大臣極力經營已成重鎮直隸道員戴宗騫統帶綏鞏十三營駐焉礮臺據要害得形勢對面有劉公島距岸八里爲海軍存儲重地所築礮臺轟擊可以相應又由臣派副將馮義德統帶福字兩營駐紮威海後路大致尙屬完固登州郡城與旅順對海其北水城上即蓬萊閣閣下即大洋並無礮臺巨礮設守甚難臣周歷審視城西沿海有天恒山城東海岸有沙岡十里許

尚可安設礮位即飭防營沿沙岡趕挖長溝間段覆以板泥爲列
 隊避礮立足之地復訪詢各處有廣礮五六百斤及千斤者悉以
 排列岡上西則天恆山頂趕築土礮臺圍以後牆又於煙臺覓出
 五六千斤礮位數尊設法運往天恆山安置派提督夏辛酉率嵩
 武各營並登榮練軍一營扼要駐紮期於毫無把握中力求守禦
 之法煙臺隸福山縣登州在其西北威海在其東南爲各口岸適
 中之地臣即駐該處居中調度以期兼顧其地爲各國互市之所
 駐有北洋所派漢中鎮總兵孫金彪統帶嵩武四營及登萊道劉
 含芳練軍一營礮臺兩座均得形勢修築亦甚完固可資扼守膠
 州偏在沿海西南一面距煙臺六百餘里先有登州鎮總兵章高

元統帶廣武嵩武四營駐紮青島 臣本擬初六日赴該處查看因
迭奉 電旨飭令撥營往援旅順體察各處情勢惟膠澳防務稍
鬆因酌調章高元統帶所部四營並撥原駐登州四營東渡援旅
臣仍暫駐煙臺相機督辦此布置威海登州煙臺三處防務之情
形也 臣查登萊兩郡三面環海島嶼紛歧已屬防不勝防而武定
府屬之利津霑化海豐等縣亦處處瀕海前奉 電旨諭令嚴防
利津海口遵即調撥河防兩營前往駐紮又霑化縣屬之陳家廟
海口亦可容巨艦自應一體嚴防復挑撥河防一營移紮該處合
觀全勢非另有大枝游擊之師不足以資策應 臣再另摺 奏陳
所有微 臣暫駐煙臺籌辦海防情形理合恭摺由驛馳 奏伏乞

皇上聖鑒訓示謹 奏 光緒二十年十月二十二日奉 硃

批知道了欽此

奏各省電報及所奉電旨按月彙報片

光緒二十年十月十二日

再各省設立電綫原期往來文報消息靈通無誤機要現值海疆有事軍書旁午自應益加慎密所有欽奉 電旨及隨時電奏必須有所稽考方不至別滋弊端否則軍情喫緊之際難保無從中增減及遺漏捏造等弊此事關係甚大擬請 旨飭下各省將軍督撫統兵大臣嗣後各處電奏及所奉 電旨務令將原報按月逐件鈔錄開單彙報軍機處以憑查核又聞近日各口岸有倭酋奸細扮作商人以暗號發報潛通消息不可不防可否 飭下北

洋大臣通飭各省電報局除官報外凡沿海有軍務處所暫停商報一月以昭慎重俟軍務稍定再行復舊臣爲預防流弊起見是
否有當謹附片馳陳伏乞 聖鑒訓示謹 奏 光緒二十年十月二十二日留中

奏保青州副都統訥欽可勝總統之任片

光緒二十年十月十二日

再臣維兵之強弱視將爲轉移而將之勇怯又視統將之善於董勸非智深勇沈威信足以服衆者弗克勝任臣查青州副都統訥欽樸勇忠廉識量闊遠克勝艱鉅之任聞其初到任時即抽練旗營馬步千人激以忠義於無事時備有事之用青州旗民軍吏翕然稱之臣此次出省值訥欽入都遇諸旅館與之議論時事忠勇

奮發至誠動人若使之總統各營必能訓勵將領輯睦軍心無負
朝廷委任臣知之既真用敢據實上陳仰備 聖明採擇謹附
片馳 奏伏乞 聖鑒訓示謹 奏 光緒二十年十月二十二
日留中

奏海防重要請添募勁旅摺 光緒二十年十月十二日

奏爲海防緊要山東防營太少擬請增練勁旅以備緩急恭摺仰
祈 聖鑒事竊查山東省城以東各郡縣大半濱海原有防營甚
少前奉 旨籌辦海防經調任撫臣福潤添募福字八營仍屬不
敷分布近復遵奉 電旨抽撥登州膠澳等處八營往援旅順登
州尤見空虛臣已飭提督夏辛酉先募數營以實登防惟合計兵

力尙單必須另有一大枝遊擊之師以資策應且時方多事非豫練得力勁旅無以備緩急徵調之用臣請續行招募以二十營爲率先趕募十餘營擬五營設一統領十營設一總統擇樸勤廉勇者任之所募勇營規制以習勞戒奢懲辦虛額爲先務其隊伍足額不剋扣嚴約束者立獎之反是者立予參處紮營則遠城市以免鬪爭傍高山以練骸足軍裝以槍械爲主旗幟多則槍械少且易爲敵礮所注每營不得過三十面總期紀律嚴明操練純熟一軍可作一軍之用庶有事得所藉手至增募營餉購買軍械需用款項擬取給於海防捐輸並飭藩司盡力挪措非萬不得已不敢遽請部帑所有 微 臣擬增練勁旅並酌辦情形謹繕摺由驛馳陳

伏乞 皇上聖鑒訓示謹 奏 光緒二十年十月二十二日奉
硃批該部知道欽此

奏緩赴膠澳片 光緒二十年十月十二日

再臣前將煙臺等處布置粗定正繕摺奏報擬拜發後即赴膠澳
適初五日奉 電旨挑撥勁旅入衛遵即抽撥八營遴派登州鎮
臣章高元統帶北上復連日疊奉 電旨以旅順防務喫緊飭派
夏辛酉帶嵩武四營東渡並入衛之營一併撥旅臣以登防緊要
請將夏辛酉所部嵩武軍撥歸章高元共成八營統帶撥旅令夏
辛酉添募勇營以填登防於初九日電請總理衙門代奏初十日
准北洋來電奉 旨允准在案查旅順爲海軍水陸各營屯駐之

所陸路約二十營兵力似亦不可謂不厚如再不能守即添東省
八營臣不敢謂遂有把握旅順與登州對岸旅順設有疏虞登州
必同時告警登州無險可扼防營礮械不如旅順之多設守之難
岌岌可慮萬一有失西路伏莽必乘機而起山東全省更難收拾
畿疆亦不免震動有關大局匪淺臣惟有緩赴膠澳就近督同
夏辛酉募練防營慎密固守勉盡心力以冀克保無虞再章高元
駐紮青島臣已飛咨拔隊星夜來登業接該鎮電報啟程即日可
到趕緊東渡合併陳明謹附片馳 奏伏乞 聖鑒謹 奏 光
緒二十年十月二十二日奉 硃批知道了欽此

奏查明被參知縣請革職摺 光緒二十年十月十八日

奏爲查明知縣被參各款請 旨革職永不敘用以儆官邪恭摺
仰祈 聖鑒事竊臣於十月初一日在煙臺行次承准軍機大臣
字寄光緒二十年九月十九日奉 上諭有人奏山東知縣陳洵
於本年二月到棲霞署任後專以科歛爲能設法嚴逼稅契委任
倉書戴奎林春生等按社科派每張契紙加銀至四錢復從地價
每兩索銀四分日事追呼該縣民人赴府控訴經該府委福山縣
知縣康鴻達會辦受賄含混稟覆請 旨飭查等語所奏如果屬
實深爲地方之害著李秉衡確切查明據實覆奏毋稍徇隱原片
著鈔給閱看將此諭令知之欽此當經飛飭登州府知府端謹將
委查原案迅速稟覆嗣據稟稱前七月間據棲霞縣廩生王昶等

呈控倉書戴奎林春生等違例加稅當經札委福山縣知縣康鴻
遠前往會訊旋據康鴻遠會同該署縣陳洵提訊倉書戴奎等供
稱各社置田投稅係照舊章每價銀一兩收銀三分外有火耗解
費爲數無幾係屬舊規契尾亦係循照舊章等語康鴻遠以該倉
書等如無違例加征何致各社聯名上告斷令嗣後仍照定例投
稅如書吏等違例勒索許民間隨時控究並將戴奎林春生責革
稟報在案臣復細加查訪該令陳洵官聲甚劣臣此次由威海回
煙復據棲霞縣廩生王昶等以前情攔輿具控又據耆民徐鏡等
以蠹書串官藉辦團練發給諭帖勒派民間出錢等情聞之不勝
駭異臣前因海疆有事飭各屬舉辦團防頒發章程令民間自爲

保衛地方官不得歛費不啻三令五申該令竟敢明發諭帖按戶苛派實屬膽大妄爲倉書戴奎等已經康鴻達責革乃近日該縣紳民復以戴奎違例加稅按畝倍罰等情先後赴臣行次呈控是其以蠹書爲爪牙藉端苛歛罔恤民艱已可概見並據該管道府稟揭前來若不嚴行懲處何以儆貪墨而肅官常除批飭登州府札提該革書戴奎等嚴訊究辦一面將陳洵撤任飭接任知縣將所控加增稅銀苛歛團費各情澈底查明另稟核辦外相應請旨將署棲霞縣知縣陳洵即行革職永不敘用以爲玩視民瘼者戒福山縣知縣康鴻達前奉委會同審訊已將倉書戴奎等責革尙無受賄含混情事應請無庸置議所有遵 旨查明知縣被參

各款請予懲處緣由理合恭摺具 奏伏乞 皇上聖鑒訓示謹

奏 光緒二十年十一月初十日奉 硃批另有旨欽此

奏參副將馮義德摺 光緒二十年十一月初二日

奏爲特參貪鄙不職之副將請 旨革職查辦以肅戎行恭摺仰

祈 聖鑒事竊維倭夷犯順海疆戒嚴當庫款奇絀之時 朝廷

不惜帑金 飭各省招募營勇原冀練成勁旅用收同仇敵愾之

功爲將領者宜如何激發天良與士卒同甘苦以固軍心而伸

天討茲查有統領福字中前後三營之膠州協副將馮義德自七

月間經調任撫臣福潤派委招募福字三營臣抵任後檄令駐紮

文登縣屬之柳溝村以防威海後路臣近駐煙台聞該營有虛短

額數尅扣勇糧等情將該副將撤去統領其所統福字三營遴委
記名總兵李楹接帶復派員分別訪查茲查該副將於各營軍
衣糧米皆其親屬自行採辦在各勇營糧內任意攤扣其隊伍亦
未能精壯足額現當軍情喫緊各路添募勇營若復相率效尤所
關實非淺鮮相應請 旨將 記名提督膠州協副將馮義德即
行革職仍勒令將應交軍裝糧餉等項由接帶李楹逐一核明接
收具報如查有侵蝕虛冒情弊即當按律懲辦以儆貪黷而肅戎
行謹繕摺具陳伏乞 皇上聖鑒訓示謹 奏 光緒二十年十
一月二十三日奉 硃批著照所請該部知道欽此

奏甄別不職各員摺 光緒二十年十一月初二日

奏爲特參庸劣不職各員請 旨分別降革以肅官常恭摺仰祈
聖鑒事竊維天下之治亂視乎百姓之安危百姓之安危視乎
守令之賢否監司又守令之所效法均不容有貪墨便辟者濫廁
其間山東吏治之壞積習相沿已非一日爲牧令者知有上司不
知有百姓但以趨奉迎合爲能而輿情之休戚向背概置不問爲
上司者亦喜其趨承應奉而樂爲引援是非不明則賞罰失當處
積重難返之勢非痛加懲創將有江河日下莫可挽回之憂臣抵
任以來留心訪察其廉正自守者固不乏人而昏謬乖方聲名甚
劣者不得不嚴爲澄汰查有候補道黃瓊攬權納賄聲名狼藉候
補道葉潤含行爲苟且難勝監司候補知府嚴福保得勢妄爲閑

檢閱顧前候補直隸州知州范一雙藉勢通賄任意妄行單縣知
縣署長清縣知縣松年捕務廢弛門丁用事淄川縣知縣黃華誣
良爲盜險很居心若不亟爲糾劾何以辨清濁而正人心相應請
旨將候補道黃瓊即行革職候補道葉潤含以同知降補候補
知府嚴福保前候補直隸州知州范一雙淄川縣知縣黃華均即
行革職單縣知縣松年以縣丞降補此外如有庸劣之員臣當
隨時糾參不敢稍事姑息期仰副 皇上澄敘官方至意所遺單
縣淄川縣缺東省現有應補人員應請扣留外補合併陳明所有
甄別庸劣不職各員緣由謹繕摺具 奏伏乞 皇上聖鑒訓示
謹 奏 光緒二十年十一月二十三日奉 硃批另有旨欽此

奏旅順失守如何懲辦將士請訓示片

光緒二十年十一月初二日

再臣於十月二十八日欽奉 電旨旅順既失恐倭將併力以圖威海等因欽此遵將派兵駐紮沿海以防威海後路情形電請總理衙門代奏在案竊查旅順爲北洋海軍駐紮重地經營十餘年糜帑逾千萬軍械火藥存儲極多水陸各軍星羅碁布使能盡力固守勝負尙不可知乃以臣所聞則海軍主將率兵艦望風先逃以回顧威海爲名去之惟恐不速陸路僅數營迎戰失利餘營統領營官皆未交綏多即全行退散主將如此懼怯無怪各營相率效尤以致譁潰之卒莫敢誰何失律之將不聞參劾損 國威而長寇讎臣實恥之臣維刑賞者 朝廷所以馭天下之權玩法者

不加懲則忠勇者無所勸非立誅一二退縮主將統領使人知不
死於敵必死於法不足以懾將弁畏蕙之心作士卒敢死之氣此
次旅順失守尙未明奉 諭旨應如何懲創之處 皇上自有權
衡非臣下所敢妄擬惟軍務非旦夕所能竟事臣實見 朝廷賞
罰爲軍事利鈍所關謹附片密陳伏乞 聖鑒訓示謹 奏

奏東綱民困商疲懇免二文加價摺

光緒二十年十一月初四日

奏爲東綱民困商疲懇免二文加價以示體恤恭摺具陳仰祈

聖鑒事竊查接管卷內前准戶部咨議覆翰林院編修張百熙奏
請籌餉各條聲明有鹽務各省每斤加制錢二文體察情形報部
核辦等因於光緒二十年七月二十六日具奏奉 旨依議欽此

當經前撫臣福潤轉行欽遵籌辦
票綱商等稟稱課賦爲鹽商報本
省於道光年間初因高堰河工繼
商之舉而商反因之受累且東鄉
旱偏災戶鮮蓋藏民多蕩析方廡
兩次加增名雖出自民資實則一
般每斤議加制錢二文之多小民
從地出無恆產者不與焉若鹽商
將困於食貴樂於趨私必致私販
大局前以 慶典經費業已報結

攤捐銀十萬兩商等筋疲力竭實不堪再貽斯累懇免加價等情
轉詳前來臣維東綱商散引碎疲累已深本與兩淮川廣等處鹽
務商情迥不相侔若再鹽斤加價勢必銷數日絀成本日虧非特
病民病商兼以病課卒於餉需無裨體察該商等所稟情形尙無
虛飾合無仰懇 天恩俯念東綱民困商疲准免二文加價以示
體恤之處出自 逾格鴻慈爲此恭摺具陳伏乞 皇上聖鑒訓
示謹 奏 光緒二十年十一月二十三日奉 硃批著照所請
戶部知道欽此

奏本年豆收歉薄請改徵粟米摺

光緒二十年十一月初十日

奏爲本年豆收歉薄各屬應徵漕豆請援案改徵粟米恭摺仰祈

聖鑒事竊山東省漕糧項下例有應徵黑豆如遇歉收之年向准改徵粟米查民間種豆遲於種穀本年各州縣或因被水被沙或因被蟲被旱收成減色顆粒細小不堪兌運除被災較重之處另請蠲緩外所有應徵漕豆之齊河濟陽禹城臨邑長清陵縣德州德平原泰安萊蕪肥城東平東阿平陰惠民青城陽信樂陵商河甯陽汶上陽穀荷澤鄆城單縣觀城朝城聊城堂邑博平茌平濟平莘縣冠縣館陶高唐恩縣濟甯金鄉臨清邱縣夏津武城等四十四州縣先後稟報豆收歉薄請將應徵黑豆及抵額一五耗豆改徵粟米俾小民易於輸將等情由藩司督糧道會詳請奏前來臣覆查無異相應仰懇 天恩俯准將齊河等四十四州

縣應徵本年黑豆及抵額一五耗豆改徵粟米兌運出自 鴻慈
逾格除咨部查照外謹恭摺具陳伏乞 皇上聖鑒訓示謹 奏

光緒二十年十一月二十九日奉 硃批著照所請戶部知道

欽此

奏本年麥收歉薄請改徵粟米摺

光緒二十年十一月初十日

奏為本年麥收歉薄請將各戶應徵漕麥改徵粟米兌收恭摺仰
祈 聖鑒事竊山東省額徵漕糧例應徵麥十分之一如遇歉收
向准改徵粟米本年各州縣春夏之交雨澤愆期麥收減色顆粒
未能飽綻不堪兌運若令照常輸將必須另買好麥完納於民情
殊多未便除被災較重之處另請蠲緩外所有應徵漕麥之歷城

章邱齊河濟陽禹城長清陵縣德州平原泰安萊蕪肥城東平東
阿平陰惠民青城陽信樂陵商河濱州蒲臺滋陽曲阜甯陽鄒縣
泗水滕縣嶧縣汶上陽穀菏澤曹縣定陶鉅野鄆城單縣城武觀
城朝城聊城堂邑博平在平清平莘縣冠縣高唐濟甯金鄉嘉祥
魚臺臨清邱縣夏津等五十五州縣先後據報麥收均止五分及
五分餘不等核與改徵粟米成案相符由藩司督糧道會詳請
奏前來臣覆查無異相應仰懇 天恩俯准將歷城等五十五州
縣應徵本年漕麥改徵粟米兌運俾小民易於輸將出自 鴻慈
逾格除咨部查照外謹恭摺具陳伏乞 皇上聖鑒訓示謹 奏

光緒二十年十一月二十九日奉 硃批著照所請戶部知道

欽此

奏預籌防河經費摺 光緒二十年十一月十四日

奏爲豫籌光緒二十一年黃河防汎經費懇 恩俯准照數撥用以資修防恭摺仰祈 聖鑒事竊東省黃河兩岸工段綿長千有餘里並無專管廳汎向係分派員弁僱募勇夫駐防用人旣多需款因之亦鉅且河身淺窄水行地上全恃堤埝收束埽壩護持工大費繁倍形喫重溯查光緒十五十六兩年前撫臣張曜用款至八十八萬及九十七萬兩不等遞年節減至十八年爲始每年額撥經費銀六十萬兩內司道各庫籌撥銀五十萬兩藩運兩庫截留籌備餉需銀十萬兩嗣因大汎搶廂險工購辦稽料額定經費

不敷復經前撫臣福潤 奏明續撥藩庫銀五萬兩統共撥銀六十五萬兩固非徒事虛糜實以工程浩大勢在則然也臣蒞任之初正臨秋汎黃流刷底淘空埽段多被墊陷迨節屆霜降水勢仍有長無消奇險環生幸得在工各員搶護平穩所儲料物早已告罄無存來歲春廂事宜必須提前籌辦採運稽料磚石添修埽壩皆爲防汎所必需乘此冬令料價稍平及早分段購備庶免臨時束手臣昔官在隸於河務亦曾留心講求東省河工更巨負荷愈重仰蒙 聖恩畀以疆寄責任宣防無日不惴惴恐懼值此海疆多事庫款奇絀異常自應格外撙節然經費固當從省而要工尤宜保全設有疏虞則工賑兼施需費動逾倍徙又何敢輕於一試

致妨全局現在督同河防局司道通盤籌畫來年防汛經費擬請
照案籌撥銀六十萬兩除司道各庫撥銀五十萬兩外仍將藩運
兩庫應解籌備餉需銀十萬兩存留動支臣請撥一分正款期盡
一分實心必當破除情面督飭在工各員核實支銷如有餘剩留
作下年撥用之項斷不敢任其稍有糜費合無仰懇 天恩俯准
照數撥用以資修防出自 鴻慈所有豫籌光緒二十一年黃河
防汛經費緣由理合恭摺具陳伏乞 皇上聖鑒訓示謹 奏
光緒二十年十一月二十九日奉 硃批著照所請戶部知道欽
此

奏查明補卹陣亡各員摺

附單

光緒二十年十一月十四日

奏爲查明山東舊案補行請卹陣亡各員履歷謹繕清單請 旨
勅部議覆恭摺仰祈 聖鑒事竊臣接管卷內光緒十九年七月
初三日准吏部咨各省請卹之案未經聲敘出身履歷各員自同
治十三年以後光緒十七年以前作爲舊案行令各督撫查明予
限二年報部再行分別准其承襲承廢其有不在此次題准之列
該督撫查明舊案補行申請者歷年已久案牘繁浩易滋牽混應
令查核明確詳敘請卹原案辦理等因奏奉 諭旨知道了欽此
欽遵咨行到東當經調任撫臣福潤行司轉飭遵辦去後茲據布
政使湯聘珍轉據蓬萊膠州莒州等州縣詳稱前准吏部咨舉人
賈公策等在山東各屬或殺賊捐軀或見危授命據籍隸山東掌

福建道監察御史游百川奏請議卹於同治十年十一月十六日奉 上諭着該部查明除業經得有卹典外餘着照例分別旌卹等因欽此內有從九品陳攸敘等四十一員未據分晰何人陣亡何人殉難礙難核辦並楊際平亦未聲明是否文銜抑係武職於何年月日保奏應令一併查明報部辦理於同治十年十二月二十七日具奏本日奉 旨依議欽此等因轉行各該州縣按名差查而時值兵燹之後戶籍散失流亡均未據赴案具報茲催據該家屬等先後呈明文生陳維垣奎文閣典籍徐澤齋奏廳王貞吉從九品職銜周廷梅王炳文陳盛斯刁秉禮高邦慶雷緒時周瑞五彭萬奎殷遇衡黃光嶧李懷浚劉殿瑗王佩文未入流銜張繼

鴻廩生宋相運增生張申吉文生周重元崔清琪王培源王俊民
王峯雲軍功八品頂戴楊際平文生陳啟喆二十六員或臨陣傷
亡或遇賊殉難取具履歷事實冊結由司核明詳請具奏並聲
明從九品蕭士榦劉立政二員前已由部題准議卹陳維垣原名
陳攸敘係縣學文生撥入府學改名維垣並非從九品黃光燁本
名光燁並非黃光峯劉殿瑗係從九品職銜並非議敘九品王佩
文本名佩文並非王佩玖係從九品職銜亦非九品壽民張繼鴻
係未入流銜並非候選未入流張申吉本係張姓並非王申吉楊
際平係軍功外獎八品頂戴並非文銜均應更正其海陽等州縣
從九品李不訓等十三員俟該州縣等查覆到日另文詳辦等情

到前任撫臣福潤未及核辦調任卸事移交前來臣覆核無異除咨部查照外謹將陣亡殉難各員履歷繕具清單恭摺具奏伏乞 皇上聖鑒 勅部議覆施行謹 奏 光緒二十年十一月二十九日奉 硃批該部議奏單併發欽此

謹將查明山東省舊案補行請卹陣亡各員出身履歷繕具清單恭呈 御覽

陳維垣蓬萊縣人道光二十年考取文生成豐十一年九月初二日在籍剿賊力竭陣亡查陳維垣原名陳攸敘係縣學文生撥入府學改名維垣並非從九品應行更正 徐澤膠州人咸豐二年經衍聖公揀補 至聖廟奎文閣典籍十一年八月二十七日在

籍罵賊不屈被戕 王貞吉膠州人咸豐元年經衍聖公揀補

至聖廟齋奏廳十一年八月二十六日在籍剿賊力竭陣亡 周

廷梅膠州人咸豐六年由東省捐賑案內報捐從九品職銜十一

年八月二十七日在籍剿賊力竭陣亡 王炳文膠州人咸豐六

年由東省捐賑案內報捐從九品職銜十一年八月二十日在籍

剿賊力竭陣亡 陳盛斯膠州人咸豐八年由部報捐從九品職

銜十一年八月初十日在籍剿賊力竭陣亡 刁秉禮膠州人咸

豐六年由東省捐賑案內報捐從九品職銜十一年八月十二日

在籍剿賊力竭陣亡 高邦慶膠州人道光二十年由部報捐從

九品職銜咸豐十一年八月初十日在籍剿賊力竭陣亡 雷緒

時膠州人嘉慶二十二年由部報捐九品職銜咸豐十一年八月
二十七日在籍剿賊力竭陣亡 周瑞五膠州人道光二十一年
由部報捐從九品職銜咸豐十一年八月十二日在籍剿賊力竭
陣亡 彭萬奎膠州人咸豐六年由東省捐賑案內報捐從九品
職銜十一年八月初十日在籍罵賊不屈被戕 殷遇衡膠州人
咸豐六年由東省捐賑案內報捐從九品職銜十一年八月初十
日在籍剿賊力竭陣亡 黃光嶧膠州人道光十三年由部報捐
從九品職銜咸豐十一年八月十一日在籍剿賊力竭陣亡查黃
光嶧本名光嶧並非黃光峯應行更正 李懷浚膠州人道光十
九年由部報捐從九品職銜咸豐十一年八月初十日在籍剿賊

力竭陣亡 劉殿瑗膠州人道光二十八年山部報捐從九品職
銜咸豐十一年八月初十日在籍剿賊力竭陣亡查劉殿瑗係從
九品職銜並非議敘從九品應行更正 王佩文膠州人咸豐八
年由福建省報捐從九品職銜十一年八月二十七日在籍剿賊
力竭陣亡查王佩文本名佩文非王佩玖係從九品職銜亦非九
品壽民應行更正 張繼鴻膠州人咸豐五年山部報捐未入流
銜十一年八月十二日在籍罵賊被害查張繼鴻係未入流銜並
非候選未入流應行更正 宋相運膠州人道光二十五年考取
文生二十六年補廩咸豐十一年八月初十日在籍剿賊力竭陣
亡 張申吉膠州人於嘉慶十九年考取文生補增咸豐十一年

九月二十二日在籍勦賊陣亡查張申吉本係張姓並非王申吉
應行更正 周重元膠州人嘉慶二十四年考取文生成豐十一
年八月十二日在籍勦賊力竭陣亡 崔清琪膠州人道光十四
年考取文生成豐十一年八月初九日在籍罵賊不屈被戕 王
培源膠州人咸豐十年考取文生十一年八月初十日在籍勦賊
力竭陣亡 王俊民膠州人道光二十九年考取文生成豐十一
年九月十九日在籍罵賊被戕 王峯雲膠州人同治五年考取
文生於六年六月初六日在籍勦賊力竭陣亡 楊際平膠州人
道光二十二年隨膠州營効力咸豐六年外獎八品頂戴十一年
八月十一日在籍勦賊力竭陣亡查楊際平係軍功八品頂戴並

非文銜應行更正 陳啟喆莒州人咸豐六年考取文生十一年二月二十八日在籍勦賊力竭陣亡以上共計陣亡殉難二十六名

奏請將貽誤軍機之將領明正典刑摺

光緒二十年十一月十六日

奏爲軍情緊要請將臨敵逃竄貽誤軍機之將領明正典刑以伸

國法而勵軍心恭摺具陳仰祈 聖鑒事竊臣前因旅順失守

請誅一二退縮將領以維軍政於十一月初二日附片具陳自應

恭候 批旨何敢再瀆然臣追維旅順失事之由實見文武諸臣

如丁汝昌龔照璵衛汝成等皆喪心誤 國罪不容誅謹撮其罪

狀再爲我 皇上陳之提督丁汝昌爲海軍統帥牙山之敗以致

遠船衝鋒獨進不爲救援督率無方已難辭咎 朝廷不加譴責
冀其自知愧奮以贖前愆乃丁汝昌驕玩性成不知倣懼聞皮子
窩大連灣一帶爲敵鋒所指將兵艦帶至威海以爲藏身之固倭
船四出游弋不聞以一輪相追逐嗣李鴻章令其仍赴旅順始勉
強以往至事急又復率兵艦逃回威海倉皇夜遁致將鎮遠船觸
礁沈壞以經營十餘年糜帑數千萬之海軍處旅順形勝之地乃
竟望風先遁將臺礮船塢拱手以與敵人丁汝昌之罪尙可道乎
直隸候補道龔照璵爲旅順船塢總辦兼水陸營務處督帶水雷
等軍平時剋扣軍餉苛算工匠兵民無不切齒倭犯大連灣距旅
順百餘里居民恃有防營尙安堵如故龔照璵一聞警信即攜眷

乘輪船潛赴煙臺經臣訪聞正往詰問又復逃至天津迫於衆論旋折回旅順不數日仍自潛逃以致兵民驚惶軍無鬪志聞龔照璵逃後其親兵營勇肆行搶掠因之工匠居民遷徙一空論者謂旅順之失以龔照璵爲禍首提督衛汝成爲衛汝貴之弟統帶五營李鴻章令其赴援旅順沿途縱勇殃民與賊無異迨旅順事緊急徐邦道姜桂題等軍力戰失利衛汝成聞風先逃不往援應其失律之罪與衛汝貴平壤之敗等方今遼瀋戒嚴威海山海關各路亦處處喫緊利鈍之機轉移之用決自朝廷若使畏死者得以倖生人誰肯以血肉之軀甘冒鋒鏑恐相率退避軍事難望轉機現在衛汝貴已逮解刑部治罪伏乞皇上立賜睿斷降旨將

丁汝昌龔照與衛汝貴衛汝成各照貽誤軍機律明正典刑使人
知法令之可畏自當踴躍奮迅不敢臨陣退縮以犯 王章戰事
必較有把握 臣爲挽回大局起見冒昧瀆陳不勝惶悚待 命之
至謹專摺具 奏是否有當伏乞 皇上聖鑒訓示謹 奏

奏海防緊要請安設腰撥以資馳遞摺

光緒二十年十一月二十日

奏爲海防文報緊要省東各屬擬請酌給馬匹安設腰撥以資馳
遞恭摺仰祈 聖鑒事竊 臣現駐煙臺距省千有餘里往來軍報
絡繹於途驛遞倍關緊要東路各屬均非通驛大道額設馬匹無
幾實屬不敷輪用據各州縣援案請設腰撥紛紛具稟到 臣伏查
光緒十年間前撫 臣陳士杰辦理海防駐紮登州曾因驛馬不敷

周轉 奏請添設腰撥旋准部臣議覆令於差務較簡各州縣夫馬內協濟等因嗣值軍事平定議亦遂止第前次海氛不靖東省籌防究非喫緊以今較昔輕重緩急迥不相同且差務素簡之處例設馬匹本屬無多近來協濟南軍過境兵差亦復日不暇給臣既嚴飭各州縣接遞限行文報不准片刻逾延而驛馬實不敷用又何能責其不脛而馳再四圖維委無通融良策惟有仍援案添設腰撥以期有裨戎機歷城縣地當省會往來文報尤多擬酌添馬十六匹章邱長山益都昌樂濰縣昌邑平度掖縣黃縣蓬萊福山等十一州縣每處添馬十二匹均按兩馬一夫自十一月初一日爲始一律安設以資馳遞而免貽誤由署臬司李希蓮詳請

奏咨立案前來臣覆查無異合無仰懇 天恩俯賜准予歷城等十二州縣各添馬匹安設腰撥應支夫馬工料銀兩作正開銷統歸海防軍需案內覈實造報出自 逾格鴻慈除咨部查照並俟防務稍鬆即將馬撥裁撤以節經費外所有東省海防文報關緊緊要擬請酌給馬匹安設腰撥緣由理合恭摺具 奏伏乞 皇上聖鑒 勅部立案施行謹 奏 光緒二十年十二月初九日奉 硃批著照所請該部知道欽此

奏謝恩賞壽字大緞帽緯摺 光緒二十年十二月初一日

奏爲恭謝 天恩仰祈 聖鑒事竊臣於光緒二十年十一月二十八日在煙臺營次奉到 皇太后萬壽恩賞大壽字一方大緞

二正帽緯一端謹即恭設香案望闕叩頭祇領欽惟 皇上承

歡蘭殿養志璇宮欣逢壽寓延洪渥荷慈恩布闈仰

璿暉於翰墨箕疇錫五福之先沛湛露於冠裳華袞拜九天

之寵鴻施逾分鼇戴難名臣未與賡颺忝治軍旅士皆環胄請

纓必拔其材志勵同袍挾纊倍生其感誓清海徼少答涓埃載筆

以隨續九譯雲從之傳垂衣而治揚四方風動之庥所有微臣

感激榮幸下忱理合恭摺叩謝 皇太后 皇上天恩伏祈 聖

鑒謹 奏

奏機器局購硝籌撥銀兩片 光緒二十年十二月初三日

再東省機器局製各項軍火所需經費銀兩向由藩庫籌撥按年

造冊報銷凡有添購物料應先照章 奏咨立案茲據總理機器局務司道詳稱製造火藥以燄硝爲大宗每藥百磅即需硝七十五磅現在籌辦海防添營募勇需用軍火既多且急因之各廠加增匠役晝夜不停工作而費用亦倍曩時月領經費不敷支發實無餘款購硝已由藩庫籌撥硝價銀四千兩派員分投採辦毛硝十餘萬斤趕緊飭匠製造以濟軍火要需免致缺誤此款歸入光緒二十年動用經費案內報銷以清款目等情請先照章 奏咨立案前來除分咨查照外謹附片陳明伏乞 聖鑒謹 奏 光緒二十年十二月十九日奉 硃批該部知道欽此

奏懇恩施表貞女夏陸氏片 光緒二十年十二月十三日

再據正任臨朐縣署理歷城縣知縣吳觀敬署理范縣知縣華景
熙署理嶧縣知縣吳金甫候補知縣吳延祚試用知縣曹倜聯名
稟稱貞女夏陸氏現年三十八歲係原籍江蘇江蔭縣已故監生
陸式之女同邑候選巡檢夏詒植之聘妻光緒八年夏詒植自直
隸玉田縣游幕回籍完姻未及迎娶病故時女年二十六歲聞訃
泣告其母矢志過門守貞其母無奈許之即歸夫家截髮毀妝撫
棺號慟誓不欲生其姑夏曹氏曉以大義始收淚勉襄大事代夫
養母并白躬操嗣夏曹氏病故持喪克盡其禮洵屬貞孝兼全該
員華景熙等誼切桑梓見聞真確不忍聽其湮沒造具事實清冊
出具印甘各結並聲明前有湖北江夏縣現存貞女劉蕭氏守貞

未及年例曾經湖北撫臣譚繼洵奏蒙 恩准旌表援案由司詳請具 奏前來臣查禮部奏定章程貞女請 旌聲明不拘年限援案奏請者係出自 聖裁非臣下所敢擬議等因迭經中外臣工奏奉 特旨旌表有案今江陰縣貞女夏陸氏事同一律合無仰懇 天恩俯准 旌表以維風化出自 鴻慈除冊結送部外理合會同山東學政臣華金壽附片具陳伏乞 聖鑒訓示謹奏 光緒二十年十二月二十八日奉 硃批著照所請禮部知道欽此

奏調山西候補知府錫良來東片

光緒二十年十二月十六日

再山西候補知府錫良經臣

奏調來東欽奉

諭旨允准在案

茲該府錫良由晉來東已於十一月二十六日行抵煙臺營次經
臣檄委總理行營營務處查該員任事實心勤廉幹濟必能調和
將領輯睦軍心於防務實有裨益謹附片具陳伏乞 聖鑒謹
奏 光緒二十一年正月初三日奉 硃批知道了欽此

奏派候補道李希杰等督辦河工片

光緒二十年十二月十六日

再山東黃河袤延千里上自河南考城縣交界起至壽張縣屬十
里鋪止爲上游十里鋪以下至利津海口爲下游嗣因下游地段
太長又分十里鋪以下至章邱縣屬之傅薪莊止爲中游傅薪莊
以下至利津韓家垣海口爲下游上游以兗沂道姚協贊爲總辦
候選道馬開玉爲會辦中下游向歸濟東道張上達總辦以候補

道二員分爲中下兩游會辦今臣歸併局差派濟東道張上達總辦河防局務以候補道李希杰丁達意爲會辦查濟東道兼辦總局事務殷繁勢難再令長年駐工臣擬派候補道李希杰督辦中游河工候補道丁達意督辦下游河工均飭令常川駐工以專責成除檄飭遵照外謹附片具陳伏乞 聖鑒謹 奏 光緒二十一年正月初三日奉 硃批知道了欽此

奏謝御賜福字摺

光緒二十年十二月十九日

奏爲恭謝 天恩仰祈 聖鑒事竊臣於光緒二十年十二月十四日齋摺差弁回煙臺營次奉到 御賜福字一方當即恭設香案望 闕叩頭祇領欽惟 皇上乾符建極 泰運調元 展丹

綽以揮毫際青陽而 賜額自 天申福 恩膏與東海同深大
地皆春寰宇惟 北辰是拱 臣渥叨 雨露時惕冰淵撫姬公尙
父之遺封勉膺鎖鑰溯衛國鄴侯之先澤仰愧箕裘喜拜 龍章
竊恐濫叨夫 百祿情殷鼇戴恒思進祝以 三多所有 微臣感
激下忱理合恭摺叩謝 天恩伏乞 皇上聖鑒謹 奏 光緒
二十一年正月初六日奉 硃批知道了欽此

奏代藩司恭謝恩賞摺 光緒二十年十二月二十日

奏爲代 奏恭謝 天恩仰祈 聖鑒事竊據布政使湯聘珍詳
稱本年恭逢 皇太后萬壽慶典奉到 恩賞壽字一方小卷緞
一二疋帽緯一匣謹即恭設香案望 闕叩頭祇領伏念忝任岱藩

愧無涓報未獲班隨鶴駕 璇宮晉 萬壽之鳩仰蒙 恩逮鯁

籩 文綺拜 上方之賜嵩呼華祝遙效衢歌 露湛天題 頌

來墨寶彩織則章身有耀朱纓則賁首增華凡茲 錫羨之光榮

實感 聖恩之優渥惟有益矢慎勤冀答 高厚鴻慈於萬一等

情懇請代 奏前來理合恭摺代 奏叩謝 皇太后 皇上天

恩伏乞 聖鑒謹 奏 光緒二十一年正月初六日奉 硃批

知道了欽此

奏劾知縣郭秉鈞等六員摺 光緒二十年十二月二十二日

奏為甄別庸劣不職各員請 旨分別降革以儆官邪恭摺仰祈

聖鑒事竊維州縣為親民之官必守正行端常存愛民之心者

方克勝任雖當軍務空憊而吏治之舉廢人品之清濁臣無不隨時考察茲查有候補知縣郭秉鈞賄通書吏舞弊營私候補知縣朱鏞嗜利誑人心術狡詐候補知縣鄭桐性耽遊戲甘爲人愚代理觀城縣知縣即用知縣李子春好事紛更輿情不治又試用巡檢柴宗樾藉差招搖不知檢束前署新城縣典史分缺先補用典史范棣蓀抑勒事主被人告發以上各員均未便稍事姑容據藩臬兩司詳請 奏參前來相應請 旨將候補知縣郭秉鈞朱鏞均即行革職候補知縣鄭桐以縣丞降補即用知縣李子春係進士出身文理尙優請改以教職歸部銓選試用巡檢柴宗樾分缺先補用典史范棣蓀均請即行革職以肅官方理合恭摺具 奏

伏乞 皇上聖鑒訓示謹 奏 光緒二十一年正月十一日奉

硃批另有旨欽此

奏學政年終密考片 光緒二十年十二月二十二日

再各省學政考試有無劣蹟每屆年終例由督撫密奏查山東學政臣華金壽考試各處關防嚴密衡校公平所歷各州縣均能約束幕友家丁弊絕風清士林極爲翕服謹附片密 奏伏乞 聖

鑒謹 奏

奏查明榮成縣失守情形摺 光緒二十年十二月二十八日

奏爲查明榮成縣失守情形恭摺具陳仰祈 聖鑒事竊臣於二十六日將倭人登岸佔踞榮成縣大略情形並自請議處緣由電

請總理衙門代 奏二十八日欽奉 電旨東省兵力較單致有
疎失李秉衡自請議處著加恩寬免丁槐一軍准其留於山東調
遣等因欽此跪讀之下欽感莫名臣調度無方本難辭咎仰荷
天恩高厚山子優容倍增愧悚查榮成縣距威海百里島嶼紛歧
可登岸之處太多處處設防無此兵力惟倭島裡島龍鬚島三處
爲最要臣調赴榮成五營派副將閻得勝秦靖一營都司葉雲升
精健一營往防倭島以副將戴守禮一營往防裡島派巡檢徐撫
辰濟右一營參將趙得發河成一營在榮成附近地方駐紮以備
策應其龍鬚島防隊係由威海守將戴宗騫派往二十五日聞倭
人在龍鬚島近岸即電調開赴倭裡島三營折回塔禦一面電飭

酒館駐紮之提督孫萬林兩營前往合剿均未趕到倭人已由落
鳳港登岸猛撲縣城城中本無營駐紮其原紮附近之徐撫長趙
得發兩營開隊向前迎敵奮力抵禦勢太不敵傷亡頗多闕得勝
葉雲升兩營先後趕到未及整隊已被倭破轟擊抵敵不住倭遂
蜂擁入城已飛飭孫萬林會同闕得勝等四營扼要堵截威海南
路其戴守禮一營亦由裡島拔出會合一路並飛調總兵李楹拔
上莊所駐三營前往助剿惟賊勢太衆自威海至煙臺一百八十
里皆威海後路其煙臺甯海上莊等處兵力本單若全調赴威恐
倭人乘隙又從西路登岸則威煙並危臣惟有相機調度恪遵
諭旨激勵將士能奮勇破敵者立予重賞如有懼怯退縮者即嚴

行參辦以期力支危局丁槐一軍蒙 恩允截留查現到東境者
祇有一營新募之營刻尙未到需用槍械已電商北洋大臣臣李
鴻章遵 旨辦理其榮成縣知縣楊承澤辦事素稱勇往暨城內
文武各官俟探明下落再行具 奏所有查明榮成縣失守詳細
情形並現籌堵剿緣由理合恭摺由驛馳 奏伏乞 皇上聖鑒
訓示謹 奏 光緒二十一年正月初九日奉 硃批著查明文
武各官下落再行具奏欽此

奏調董福祥軍來東片 光緒二十年十二月二十八日

再山東沿海地面北自武定府屬之海豐南至沂州府屬之日照
周匝幾二千里登萊青三府直插海中論海防大勢以登煙威海

爲最要而萊蕪黃縣一帶爲登煙後路卽爲省城門戶武定各屬
緊接津沽現在一路所駐各營分布尙單且多半新募武定府屬
僅駐四營萊蕪黃縣一帶虛無一營近倭寇已踞榮成則威煙一
帶兵力應須加厚腹地處處空虛省城門戶洞開毫無屏蔽東省
爲南北通衢海防陸路與直隸處處昆連海運不通運道尤關緊
要設有梗阻大局何堪設想臣通盤合計非添三十營勁旅不可
前 奏調廣西副將楊昌魁副將王寶華又檄調湖南提督李定
明各募數營急切未能趕到定購外洋槍械須俟來年二月後方
能到齊再四思維實屬無從措手昨已電懇於丁槐一軍外再請
調烏魯木齊提督董福祥一軍尙未奉到 諭旨合無仰懇 天

恩俯念東省爲京畿門戶待援孔亟 敕令董福祥統帶所部各
營開拔星夜來東抑或 賞撥他軍俾臣得協力攻剿庶不至蔓
延爲患出自 鴻慈謹附片馳 奏伏乞 聖鑒訓示謹 奏
光緒二十一年正月初九日奉 硃批已有旨欽此

李忠節公奏議卷五終

李忠節公奏議卷六

奏倭船如到煙臺應開礮轟擊摺

光緒二十一年正月初三日

奏爲奏明請 旨事竊維倭人渝盟肇釁犯我海疆 皇上命將
出師聲罪致討數天率士無不思同仇敵愾殲厥兇頑即泰西各
國亦共知釁自倭開不得不以兵戈從事 臣頃接東海關道劉含
芳面稟據英國領事聲稱倭人約至煙臺彼此均不開礮屬我軍
亦不開礮等語聞之不勝詫異現在兩國構兵斷無不開礮而讓
其進踞之理英係和好之國我軍自不相侵犯惟倭如至煙必須
交鋒決戰倭礮如有毀傷彼國人口房屋之事亦與中國無涉應
請 旨飭下總理衙門迅即照會英使如倭人船至煙臺 臣當督

飭將領開礮轟擊倘英國執意攔阻是令我不戰而以要地與人無此辦法斷斷不能曲從除已於初三日未刻電請總理衙門代奏外理合繕摺由驛五百里馳奏因事關重大並將原電鈔呈御覽伏乞皇上聖鑒訓示立賜睿斷施行謹奏光緒二十一年正月十三日奉 硃批已有旨欽此

奏請將閩得勝等五員革職片 光緒二十一年正月初三日

再榮成縣失守情形 臣於光緒二十年十二月二十八日專摺馳奏在案 臣查榮成所駐五營內閩得勝葉雲升兩營派防倭島戴守禮一營派防裡島僅徐撫辰趙得發兩營紮榮成縣城西二十五日倭人由落鳳港登岸直撲縣城徐撫辰等兩營向東迎戰

倭衆我寡勢太不敵迨閩得勝等兩營趕到被倭開礮猛擊倭人
遂蜂擁入城戴守禮一營隨後始由裡島拔出均屬救援不及惟
城既失陷該將弁等究屬未能得力未便姑寬相應請 旨將候
補副將閩得勝戴守禮候補參將趙得發候補都司葉雲升試用
巡檢徐撫辰五員一併暫行革職均令戴罪圖功以觀後效除榮
成縣文武官員查確另行具奏外謹附片馳 奏伏乞 聖鑒訓
示謹 奏 光緒二十一年正月十三日奉 硃批另有旨欽此

奏請飭海軍轟擊倭船片 光緒二十一年正月初三日

再臣於光緒二十年十二月二十七日欽奉 電旨聞敵人載兵
皆係商船而以兵船護之若將定遠等船齊出衝擊必可毀其多

船等因又於二十八日欽奉 電旨我軍戰艦雖少而鐵甲堅利則爲彼所無與其坐守待敵莫若乘間出擊斷賊歸路等因欽此仰見我 皇上聖謨廣運明燭萬里欽服莫名伏查倭人旣經登岸其船上必無重兵我若以兵船奮力攻擊毀其運兵及接濟糧械之船則水路受創陸路亦易得手如謂保護鐵船恐其戰敗毀傷萬一威海有失則海軍根本已撥鐵艦從何處保全此理甚明而易見丁汝昌沐 朝廷寬大之恩宜如何奮力贖罪相應請 旨密飭北洋大臣李鴻章懷遵疊次 電旨嚴飭丁汝昌激勵各船員弁奮勇圖功出奇制勝如再逡巡退縮即以違誤軍機論於保全威海必有裨益謹附片馳 奏伏乞 聖鑒訓示謹 奏

光緒二十一年正月十三日奉 硃批另有旨欽此

奏設車局接遞各軍摺附單 光緒二十一年正月初六日

奏爲東省設立車局接遞南來各軍過境兵差酌擬章程敬繕清單恭摺仰祈 聖鑒事竊臣於光緒二十年十月二十二日接總理各國事務衙門電開本日奉 旨現在軍情喫緊亟需大兵齊集迅赴戎機聞南來各軍車船均係自辦以致僱覓艱難行程遲滯即著直隸兩江江蘇安徽山東河南湖北各督撫迅即沿途設局派員代僱車船酌量數站一換勿庸逐站更換致稽時日並須寬爲給價准其作正開支以利軍行而免擾累倘沿途地方漫不經心致滋貽誤定將該管各官查明按照軍律嚴辦不貸欽此欽

遵臣駐紮煙臺當經恭錄電行司局轉飭遵辦並因東省接遞南來兵差自沂州府屬入境應以蘭山蒙陰泰安齊河德州五州縣爲一路濟甯州入境以濟甯東平在平平原四州縣爲一路統由德州轉運出境責成各牧令設立車局認真經理毋庸另派委員以節糜費一面檄飭善後局妥擬章程去後茲據該局司道等詳稱蘭山等九州縣業已分飭一律設局惟查東省州縣本無額設車輛其騾馬大車亦素無行棧向來應付一切差徭悉由官辦非若直隸山陝等省歸於民間經理是以咸豐同治年間各路大兵過境暨此次湘淮各軍自江皖而來皆由沿途州縣僱覓莊戶車輛揆站更替今旣設局餽養長車接遞兵差數站一換以一州一

縣之地各軍接踵而至勢難遽集多車非責成鄰封州縣協濟不可其協濟車輛應由設局州縣移會鄰封先期僱備撥送餽養銀兩在途則歸協濟之州縣支給到局則歸局中核發並令隨時稟報立案以備行查後作正開銷或設局州縣力能自辦無待鄰封協車即從其便倘有藉詞諉卸致誤軍行定即遵 旨從嚴參辦以儆玩忽每局長車均不得過六十輛該牧令等既可隨時添僱復准鄰封協濟不能漫無限制也其支銷脚價銀兩東省雖有同治年間軍需章程每車一輛每百里除例銷正價銀一兩先期到站一日回空一日各給料草銀五錢共正銷銀二兩加六成幫費銀一兩二錢由外攤廉捐補經前撫臣閻敬銘奏准核銷在案現

在欽奉 特旨遵辦所有沿途設局代僱車船寬爲給價准其作
正開支自應核實報銷不必拘牽舊案再有攤廉歸補名目免致
州縣轉得支虧正襟徒以攤廉作捐終累庫款該司道等公同參
酌情形稍事變通擬請每車一輛每行百里給腳價銀一兩回空
之日亦按百里給餽養銀八錢坐住日給餽養銀八錢係屬長車
並無先期到站名目如此項正價各營自行開發即扣除車價銀
一兩如各營未經發價即照數支銷回空坐日仍由設局州縣照
章應付其鄰封協濟每車百里回空坐日亦各給銀八錢一體作
正開支凡在未經設局之先各州縣挨站更換應付車輛爲數已
屬不少自當截清界限各歸各辦應以欽奉 電旨恭錄飭辦後

統於十月二十八一律設局之日起作爲新章分別造報仍飭將
每次用過車數取具各營印文收據爲憑隨時稟報倘移查不符
照數刪除當時未報者概不准銷仍將造報不實之州縣立予參
處以杜浮冒而重庫帑擬議章程四條詳請 奏咨前來臣逐加
覆核或援引舊例或變通成案款不虛糜事歸覈實均屬有條不
紊除咨部外理合敬繕清單恭摺具 奏伏乞 皇上聖鑒訓示
謹 奏 光緒二十一年正月二十日奉 硃批著照所請該部
知道單併發欽此

謹將山東省設立車局接遞南來各軍過境兵差酌擬章程敬繕
清單恭呈 御覽

一擇地設局也查東省接遞南來各軍兵差前准江蘇省咨會清江浦車輛由陸路逕至蘭山縣交替則東省應在蘭山縣設立車局送至蒙陰縣蒙陰設局送至泰安縣泰安設局送至齊河縣齊河設局送至德州轉運出境其由皖豫等省北上及由清江浦乘船而來各軍車輛應在濟甯州設局轉送東平州東平設局轉送茌平縣茌平設局轉送平原縣平原設局亦送至德州出境德州應設船局現在河道凍阻應俟春融察看情形再行核議 一協濟車輛也查東省州縣本無額設車輛其騾馬大車亦素無行棧現在應付兵差皆由各牧令設法赴鄉僱備莊戶車輛第恐前軍甫行後軍踵至接送不逮以一州一縣之地勢難遽集多車則非

鄰封州縣協濟不可其協濟之車應由設局州縣移會鄰封先期僱備撥送餼養銀兩在途則歸協濟州縣支給到局即歸局中核發並飭隨時稟報立案以備行查後作正開銷擬令蘭山車局責成鄆城縣協濟蒙陰車局責成沂水新泰二縣協濟泰安車局責成長清縣協濟齊河車局責成禹城縣協濟德州車局責成恩縣協濟濟甯車局責成滋陽汶上二縣協濟東平車局責成東阿縣協濟茌平車局責成聊城博平二縣協濟平原車局責成高唐州協濟其餘毘連鄰近各州縣雖非地處衝途亦當一體協撥或該局方能自備無待鄰封協車應聽其便 一長車定額也查東省沿途州縣應付兵差車輛歷係按站接替咸豐同治年間大兵過

往暨此次湘淮諸軍自江皖而來各州縣按站遞送亦極妥速今既設局僱備長車數站一換毋庸逐站更替以期迅赴戎機事屬創始固不敢稍涉拘泥亦不可漫無限制蓋局車少僱或倉猝而有大批之差咄嗟難集多僱或旬日而無一軍之至糜費不貲擬令每局所養長車概不得過六十輛倘遇兵差接踵而來責成上站隨時查探需車數目飛移下站趕爲預備一面知會鄰封照章協車以資周轉而利軍行 一脚價核實也查定例沿途州縣應付兵差僱用車輛每百里給腳價銀一兩咸豐同治年間東省軍需案內加給六成幫費每輛每百里銀六錢先期到站二日回空一日各給減半料草銀五錢幫價銀三錢每車一輛共支銀四兩

嗣經部臣駁減每車每百里給腳價銀一兩入正造報六成幫價銀六錢由外攤廉彌補所有到站回空概行刪賠每車一輛核准正銷銀一兩外銷攤補銀六錢刪賠銀二兩四錢其時應付州縣業已列入交代既經刪賠不得不分年追繳以致輾轉不清同治五年間前撫臣閻敬銘奏准每車一輛給腳價銀一兩到站一日回空一日各給料草銀五錢共正銷銀二兩統加六成幫費銀一兩二錢由外籌補等因此東省昔年軍需成案情形現在欽奉特旨遵辦則沿途設局代僱車船寬爲給價准其作正開支自應核實報銷不必拘牽舊案再有攤廉歸補名目俾免州縣轉得支虧正襟而以攤廉歸入交案作捐終累庫款擬請稍事變通每

車一輛每行百里給腳價銀一兩回空之日亦按百里給餽養銀八錢坐住日並給餽養銀八錢係屬長車並無先期到站名目此項正價如係各營自行開發即扣除車價銀一兩如未經發價即照數支銷其坐日回空山設局各州縣按照新章應付其鄰封協濟每車百里回空坐日亦各給銀八錢一體作正開支倘遇兵差不由設局之處係從旁道而來近如嶧縣滕縣金鄉恩縣等處皆有過境軍械等項其應付車輛及回空坐日亦各按章給銀至未經設局之先各州縣挨站更換應付車輛為數已屬不少自當截清界限各歸各辦應以欽奉 電旨恭錄飭辦後統於十月二十八一律設局之日起作為新章分別造報凡僱覓車輛均係三套

騾馬大車若雙套轎車則按騾馬攤算支給脚價餵養以昭畫一仍飭令設局各州縣每次用過車數取具各營印文收執爲憑隨時稟報方准核銷倘移查不符照數刪除當時未報者概不准銷以杜浮冒而重庫帑

奏威海失事自請嚴議摺 光緒二十一年正月初九日

奏爲報明威海失事情形請 旨將臣及各將領嚴加議處恭摺
馳陳仰祈 聖鑒事竊威海地居險要無論爲山東疆土臣責無可辭且係海軍歸宿重地臣自籌防以來即派營分駐西路之酒館上莊南路之榮成倭裡島等處以防威海後路迨榮成失守復添派孫萬林等軍與戴宗騫所部綏軍會合堵剿嗣查分統副將

閩得勝有臨敵退縮情事懷遵 諭旨於正月初四日飭孫萬林將閩得勝軍前正法一面飛飭各軍星夜進剿於初五日電 奏在案初五日倭分道由嶺入南幫鞏軍不守南路礮臺長橋俱失倭既得南幫大股直趨北臺相持兩日綏鞏各軍先後潰散威海營壘盡爲賊踞戴宗騫僅率兩營守北臺孫萬林等軍初五日進逼苑家口羊亭一帶扼其外犯北臺之衝初六日倭猛撲我軍經孫萬林等奮力抵禦倭未得逞初七日倭以大股在羊亭東與孫萬林等接仗而潛師由南幫內沿海小道趨襲北山礮臺水師船因海口倭船環進不暇回顧戴宗騫兵潰力竭爲隊下擁上定遠船是日巳刻北岸全臺俱失聞該軍恐以資敵南幫礮臺於初

五日自行轟毀初六日北岸三臺又自行轟毀孫萬林等軍尙在羊亭東力戰傷亡甚多至酉刻始退回酒館並據戴宗騫差弁吳姓傅姓面稟前來 臣籌布無方愧憤萬狀應請 旨將 臣交部嚴加議處此次北臺失陷係由沿海內路襲攻北臺失後孫萬林等尙在北臺山外苦戰一日因賊勢太衆萬不能支始行退紮實與臨陣退縮者不同惟救援不能得力咎有應得應請 旨將提督孫萬林總兵李楹交部嚴加議處令其補足傷亡隊伍扼紮甯海州一帶以防西竄並飛探文登縣情形趕撥營隊星夜馳救至綏鞏各營兵勇自初五六等日紛紛潰散逃至烟臺者已不下千餘人臣斬其造言惑衆者二人其餘飭令分別收械資遣其有情願

歸伍者另編營隊擬俟丁槐軍到撥令統帶除劉公島如何情形
續行查明具奏及綏鞏軍各將領應由北洋大臣李鴻章查奏外
所有威海失守臣及東軍各將領請加嚴議緣由理合繕摺由驛
五百里馳 奏伏乞 皇上聖鑒訓示謹 奏 光緒二十一年
正月二十日奉 硃批已有旨欽此

奏請旨撥營片

光緒二十一年正月初九日

再臣昨將威海失守恐倭人乘銳西犯擬扼守萊州一帶並懇
飭派大枝勁旅星夜來東聲明一面由驛馳奏等情電請總理衙
門代 奏在案正繕摺間准李鴻章電轉奉 電旨李秉衡所請
大枝援兵非目前所能驟集惟應就現有兵力及江南已到未到

各軍迅速催調竭力分防一面飭令湯聘珍趕緊招募等因欽此
仰見 朝廷統籌全局 訓示周詳莫名欽感伏查山東爲京畿
門戶南北咽喉一省關天下全局環海之地千數百里自登州而
外如青萊兩郡口岸紛歧武定轄境昆連津沽處處胥關緊要平
時徧布營伍無此餉力亦無此辦法惟刻下威海已失倭人於我
國地勢曲折要害無不周知腹地到處空虛難保不乘銳內犯蒙
皇上飭派丁槐五營江南馬步二十營又 諭飭藩司湯聘珍
招募勇隊自應欽遵舉辦何敢再事瀆求第所調丁李各軍尙未
趕到招募勇隊旣非咄嗟可以立辦且勇丁未經訓練驅市人而
使之戰無異糜爛其民方今寇氛日熾非厚集兵力斷難挫厥兇

鋒合無仰懇 天恩俯念山東關繫緊要於近畿各軍中抽撥一
二十營 飭令迅速開拔來東臣當殫竭血忱與諸軍戮力同心
誓殲狂寇仰釋 宵旰憂勞至意俟山東招募有成如客軍應回
駐北路屆時請 旨遵辦再臣電奏以煙臺僻處一隅請移扼萊
州以顧全局如蒙 俞允應將甯海文登一帶防務布置妥協再
行起程合併陳明謹附片馳 奏伏乞 聖鑒訓示謹 奏 光
緒二十一年正月二十日奉 硃批已有旨欽此

奏添撥機器局經費片

光緒二十一年正月十九日

再山東機器局向章月領經費銀三千兩遇有不敷隨時 奏明
添撥現值海氛不靖軍火萬分喫緊自上年秋間各廠工匠即加

至一倍工食因而倍之從前月造槍子五萬粒今則月造十萬餘粒鉛丸銅帽白藥等項皆數倍於平日硝磺煤炭以及一切雜料亦加倍於平時兼之修理各營大宗槍炮動輒添募數十人尙不在各廠加工之內力求撙節通盤核計每月實需經費銀五千兩除月領銀三千兩外自本年正月爲始再山藩庫按月添撥銀二千兩方足以濟要需而宏製造一俟軍務平定即行裁減據總理機器局務司道詳請 奏咨立案前來除分咨查照外謹附片陳明伏乞 聖鑒謹 奏 光緒二十一年二月初三日奉 硃批該部知道欽此

奏報起支弁兵餉銀日期摺 光緒二十一年正月十九日

奏爲挑選臨清營暨撫濟三營步兵仿照練軍章程起支弁兵餉銀日期恭摺具 奏仰祈 聖鑒事竊東省每值冬令凡山湖兩路大道與夫邊境要隘向派勇營扼要分紮巡緝地方賴以救安現在倭氛不靖勇營多已調赴海防實屬不敷分布惟臨清州爲河路通衢毘連直境馬賊鹽梟素多出沒捕務倍關緊要臣今飭署臨清營副將曹佩蘭在於該營挑選精壯兵丁一百二十名遴委哨官哨長各一員管帶發給軍械逐日認真操演隨地巡防又省城關廂東西南三面同治年間軍興時繚以石圩計長十五里有奇安設七門築立礮臺十座向派撫濟三營弁兵駐守嗣後陸續裁撤經調任撫臣福潤飭撥撫標兩營練軍步兵一百名就近

兼防現因曹州鎮總兵王連三督帶練軍步兵全隊北上而關廂重地人煙稠密圍門礮臺尤當加意防護未便稍涉空虛臣復飭令撫標中軍參將劉雲會右營遊擊孟琴堂濟南城守營參將萬清傳即在該三營內挑選步兵五十名分認段落晝則稽查夜則宿守仍遴委管帶哨官哨長各一員以專責成而期周密以上新挑步兵應支口糧暨各哨弁薪水仿照步隊練軍章程每兵一名除底餉外月給銀二兩一錢什長每名月給銀二兩七錢哨官每員月給銀十兩哨長每弁月給銀六兩俸資津貼均自二十年十月初一日爲始統在裁兵節餉項下動支歸於步隊練軍案內造銷一俟防務稍鬆即行裁撤據營務處司道彙案詳請 奏咨前

來臣覆核無異除分咨戶兵二部查照外理合恭摺具陳伏乞

皇上聖鑒訓示謹 奏 光緒二十一年二月初三日奉 硃批

該部知道欽此

奏文登甯海失守請議處地方官摺

光緒二十一年正月二十二日

奏爲賊勢猖獗文登縣甯海州先後失守請將地方官參處並現籌堵禦情形恭摺馳陳仰祈 聖鑒事竊查登州府屬之文登縣

與榮成接壤其西即甯海州由榮成而西趨海陽必道出文登由威海而西趨煙臺必道出甯海均爲賊所必爭自榮成失後賊鋒漸近文登無重兵可以分駐迨威海旣失臣於正月初十日飭孫萬林由酒館馳赴文登縣防守十二日孫萬林營隊至距城三十

里之固道集倭人已於是日清晨攻陷文登縣城至甯海州城臨
海岸先派總兵李檀副將曹正榜兩軍分駐福山口孟良口等處
十三日倭船至煙臺迤西之通伸岡岡嶺地方開礮擊燬民房勢
甚兇猛臣慮其由西路登岸無營堵禦遂調李檀等移紮福山縣
之西以防內竄十五日倭騎隊由酒館上莊一帶乘虛西犯遂入
甯海州城倭兵水陸相輔其兵輪風馳電掣甚爲迅疾而我之陸
軍未能倏東倏西首尾不克相顧致地方相繼失陷臣調度乖方
愧憤無已應請 旨將臣交部嚴加議處至地方州縣各官因防
營不敷分駐僅率民團守城民夫素未經戰陣勢萬不敵城陷之
後該牧令等投至臣營尙非聞警先逃惟既有守土之責咎無可

辭應請將署文登縣知縣本任荷澤縣知縣倪觀瀾甯海州知州
陳壽清暨文登城汎千總王殿選甯海營都司李雲慶千總趙安
邦一併即行革職仍懇 天恩准其留營効力贖罪自甯海失後
賊大股駐上莊甯海一帶以騎隊分犯距福山三十里之五台山
及距煙臺十三里之竹林寺煙臺爲必攻之地臣已飭駐紮福山
之李楹曹正榜各營與孫金彪一軍犄角互援懷遠 諭旨設法
扼剿其海陽一路飭孫萬林扼要駐紮以圖進規文登臣於十五
日過黃縣適貴州古州鎮總兵丁槐到黃已將綏鞏軍所收勇隊
二千二百餘人交令統帶惟甯經收集未能進攻其所部五營內
三營已到諸城二營甯甫由濟南進發至李占椿等軍頃接松椿來

電李占椿萬本華兩軍於十二日過桃源境張國林一軍於二十
二日始由清江開行計到東尙需時日臣十八日行抵萊州已分
別飛電迎催俟援軍到日臣當殫竭心力與諸將和衷商榷節節
進規以期力挫兇鋒仰副 聖主宵旰憂勤至意至陳鳳樓馬隊
五營臣接奉 電旨後即電飭遵照茲接陳鳳樓電稱已由濰縣
折回北上合併陳明所有文登甯海兩州縣失守並現籌堵禦情
形除電奏外理合由驛五百里馳 奏伏乞 皇上聖鑒訓示謹
奏 光緒二十一年二月初二日奉 硃批另有旨欽此

奏設馬撥以遞文報摺 光緒二十一年二月初四日

奏爲東省海防文報經行州縣遵 旨酌設馬撥以資馳遞恭摺

仰祈 聖鑒事竊臣於光緒二十年十一月二十一日准兵部咨
光緒二十年十一月十一日軍機處交出本日軍機大臣面奉

諭旨近年各省驛站遞送文件往往遲延實屬廢弛着兵部通行
各該督撫等認真整頓所有人夫馬匹務當一律精壯遇有一切
緊要文報迅速馳送不准稍逾時刻其有軍報經行處所並着酌
添馬撥以速郵遞欽此欽遵行司通飭認真整頓以肅郵政並經
臣先因省東州縣均非通驛大路海防軍報絡繹請於歷城章邱
長山益都昌樂濰縣昌邑平度掖縣黃縣蓬萊福山十二州縣酌
添馬匹設立腰撥奏奉 硃批著照所請該部知道欽此恭錄轉
行各在案伏查歷城等處自設立馬撥於接收文報均能依限馳

遞並無片刻逾延即有驛州縣經臣委員逐站查驗人夫馬匹俱係精壯足額接遞軍報亦無遲誤尙知振作奮勉惟登州武定一帶駐紮防營皆在濱海偏隅往來文報緊要該州縣僅止額設里甲馬數匹實屬不敷輪用自應遵旨擇要添設馬撥以期聲息靈通如有警急俾得及時策應擬請於登州招遠縣磁口地方爲掖黃二縣適中之區添馬十二匹福山縣係烟台後路前已添馬十二匹委實不敷周轉再請添設六匹其武定府屬現在軍報究較東路爲簡應由該府附郭之惠民並商河濟陽濱州蒲臺博興壽光七州縣各添馬六匹仍按兩馬一夫自二十一年正月初一日爲始一律安設所有應支夫馬工料銀兩作正開銷統歸海防

李思賢奏請
卷一
軍需案內覈實造報一面嚴飭該州縣遇有軍報加緊馳遞按月造冊詳送稽核倘有遲延行司分別記過撤參仍俟防務稍鬆立即裁撤以節糜費至登萊所屬州縣應否續設馬撥容臣隨時酌度情形札飭辦理據臬司松林詳請 奏咨前來除咨部查照外理合恭摺具陳伏乞 皇上聖鑒訓示謹 奏 光緒二十一年二月二十日奉 硃批該部知道欽此

奏報收復甯海文登摺 光緒二十一年二月初七日

奏爲官軍收復甯海文登兩城並探聞近日賊情恭摺馳陳仰祈 聖鑒事竊甯海州城於二月初一日收復經 臣於初二日電請總理衙門代 奏在案初三日欽奉初二日 電旨前聞甯海賊

已退去茲復探有大隊將到賊情叵測刻下江南各軍將次到齊著李秉衡酌度情形督飭各營分路進剿毋任蔓延等因欽此查甯海自正月二十八日以後並無大隊續到城賊忽多忽少往來不絕二月初一日李檀曹正榜兩軍會同孫金彪所派隊伍由五臺山開拔前進於是日午刻收復甯海州城甯海距文登一百二十里中間廬山一帶尙多踞賊上莊酒館等處仍來去無定其威海迤西之麓島口初村一帶賊徧挖地濠孫萬林一軍於三十日由海陽進拔初二日至距文登二十里之夏村地方城內已無步賊惟騎隊數十人至晚間遁去孫萬林於初三日巳刻進城甯海至文登路已可通探聞劉公島及威海城內尙踞賊數千麓島口

等處復多掘濠塹似爲固守之謀夷情叵測總須設法扼剿查榮成縣賊亦時去時來惟縣城在威海東南東軍力本甚單若遽深入分攻又恐不敷防守且慮後路抄截現丁槐一軍俱抵黃縣臣前已面商添募十餘營本令隊到即行進攻據丁槐函稱各軍遠來疲敝應蓄銳養息新募之營尙須訓練倘倉猝赴敵難期決勝自是老成持重之謀俟該軍稍爲休息整頓當飭令協力進攻以圖規復至李占椿萬本華兩軍已於初四五等日先後行抵萊州張國林一軍已派員沿途迎催昨據李占椿而稱接督師大臣劉坤一電開聞倭寇將於二月中旬以大隊在大沽迤南登岸即山東直隸交界之埕子口等處飭該軍整齊部伍預備馳剿等語臣

已飭李占椿等各軍勿再東行或暫紮萊灘之間視賊鋒所向候
調馳往或先行拔赴埕子口俟與劉坤一電商再行 奏聞所有
官軍收復甯海州文登縣城及探聞近日賊勢並南來各軍到防
情形理合繕摺由驛五百里馳 奏伏乞 皇上聖鑒訓示謹

奏 光緒二十一年二月十六日奉 硃批知道了欽此

奏報收復榮成情形摺 光緒二十一年二月十五日

奏爲恭報官軍收復榮成進逼威海並瀝陳東省防務情形恭摺
馳陳仰祈 聖鑒事竊臣於二月初十日欽奉 電旨王文韶李
秉衡電奏均悉榮成威海之賊均已盡退勢將北犯津沽等因欽
此遵即轉飭李占椿等軍於十三日拔隊馳赴埕子口由臣電請

總理衙門代 奏在案查榮成威海陸路賊已盡退而成山島口時有倭船來往劉公島仍駐有倭船二十餘隻登岸取水哨探孫萬林收復文登後即令該營駐守並撥隊往收榮成一面飭營務處候選道馬開玉收復威海孫萬林旋派戴守禮等兩營於二月初九日收復榮成縣城即飭該兩營在榮成駐紮馬開玉帶趙得發等兩營進逼威海初十日巳刻該道等甫進威海城而賊船復登岸趨威海迤西之楊亭姜家集意圖截我後路馬開玉撥隊折追賊復上船駛去威海密邇島澳我無水師不能飛渡攻賊而賊船憑踞島澳臺礮船礮均可轟擊我師威海城雖收復刻尙未能據守現惟飭各軍於甯海文登榮成一帶擇要分駐互爲聲援此

登州東路近日軍事之情形也由登州而西至黃縣六十里其龍口一處極爲緊要又如萊州之太平灣虎頭崖廟島及青州之羊角溝等處冰泮後處處可以登岸現均無營分駐至武定府屬埕子口在大沽迤南與直隸接壤前調章高元一軍近已到防又奉旨飭李占椿等十五營馳往兵力可期漸厚由埕子口而南如秦口陳家廟韓家垣等處亦均可登岸韓家垣至埕子口二百四十里僅候補道丁達意七營分駐其間兵力太薄該處地勢平衍處處與畿輔毘連倭人最工於蹈瑕設一處疏失即可長驅直入丁槐一軍現駐黃縣連日與欽差大臣劉坤一幫辦北洋大臣王文韶往返電商擬調丁槐移紮武定一帶相機策應惟該軍現

在黃縣開挖地營其由南省調來營官刻尙未到槍礮亦未配齊應俟布置稍定方能拔隊此青萊武定各路軍事之情形也東省沿海地方北自海豐南迄日照周匝一千數百里口岸林立防不勝防如萊州迤南之膠澳一口爲輪船停泊碼頭因近日情形該處尙非衝要未能撥營分駐前奉諭旨飭藩司湯聘珍招募三十營據湯聘珍以舊時部將一時不能招致未敢輕忽從事臣以將才難得各處搜求先後奏調廣西副將楊昌魁王寶華又函商湖南已革提督李定明飭令各招數營近陸續將入東境又飭候選道馬開玉招募數營並爲丁槐加募數營共計將及三十營之數現雖東路防務稍鬆而島澳已爲賊踞登州倍關緊要且津

沽兵力漸厚則武定各處空隙可虞臣惟有殫竭愚忱俟各營到齊與諸將領以忠義相勸勉總期同心戮力迅掃兇鋒仰副 聖主宵旰憂勞至意所有官軍收復榮成進逼威海及通省防務情形謹繕摺由驛馳 奏伏乞 皇上聖鑒訓示謹 奏 光緒二十一年二月二十六日奉 硃批知道了欽此

奏調總兵張紹模等來東片 光緒二十一年二月十五日

再練兵必先選將將領得人則軍事自有起色故儲備將才尤爲今日急務臣查有現署雲南開化鎮總兵記名總兵張紹模雲南元新營參將馬柱廣西記名總兵楊華貴該三員均樸勇善戰滇越之役該員等皆身先士卒所向有功又分發廣西總兵借補義

甯協副將馬進祥謀勇兼優克勝將領之任又直隸北運河同知姚豸守正行端勤能卓著該員籍隸山東鉅野縣鄉望素孚若使之練集鄉兵必能以忠義倡率衆情響應以上各員臣知之最深東省軍務方殷需才孔亟合無仰懇 天恩敕下直隸雲貴各總督雲南廣西各巡撫分飭張紹樸馬柱楊華貴馬進祥姚豸等五員迅即來東俾臣得收指臂之助出自 鴻慈謹附片馳 奏伏乞 聖鑒訓示謹 奏 光緒二十一年二月二十六日奉 硃批另有旨欽此

奏查明昌膠等處團練並無藉端滋擾摺

光緒二十一年二月十八日

奏爲查明昌邑膠州等州縣團練並無藉端滋擾情事遵 旨覆

陳仰祈 聖鑒事竊臣於光緒二十年十一月二十日在烟臺營次承准軍機大臣字寄十一月十六日奉 上諭有人奏山東辦理團防州縣奉行不善請飭查辦一摺據稱山東昌邑膠州等州縣因舉辦團練所在紛擾民不聊生益都樂安蘭山三縣尤甚抽丁斂餉按戶勒派簽票四出朴責交加良懦者驚惶竄避桀黠者乘機煽惑勢將與官爲難等語練兵所以安民地方官豈容藉端滋擾貽害閭閻著李秉衡確切查明據實具奏總期於保衛之中仍寓撫綏之意毋任不肖官吏擾累民生是爲至要原摺著鈔給閱看將此諭令知之欽此仰見 皇上軫念民艱痾瘵在抱下懷欽悚莫可名言遵即行司及該管道府嚴密確查臣復遴委委員

周歷各州縣鄉村細加訪察互相印證查各州縣舉辦團練惟膠州因城近海口召募團丁二百人其餘昌邑等七州縣均係城關分設數團或一戶出一丁或數戶共出一丁每日輪流操演四鄉則或數村共爲一團或一村自爲一團以村莊之大小定團丁之多寡由團長按戶派定當舉辦之始民間即傳言有抽丁出兵之謠以保甲清冊即爲挨戶出丁而設團長下鄉勸辦各懷疑懼蘭山縣東南鄉至有聚衆毆打團長之事經蘭山縣知縣朱鍾琪出示曉諭親至鄉間傳集各村耆民反復開導諭以團練係各衛身家決不徵調出境羣疑漸釋其餘各州縣亦經地方官出有並不抽丁徵調告示衆情已俱帖然至斂餉勒派一節查各州縣城關

團丁工食及城鄉各處刀矛火藥燈油等項或由富紳捐辦或由居民鋪戶湊集均係各團長自行勸辦不經官吏之手間有修築圩堡之處各團照地畝出錢亦係由團長辦理其地方官下鄉看操隨時酌賞及清查戶口所需牌冊紙張等費爲數無多悉由地方官捐辦並無擾累勒派情弊是抽丁斂餉兩條委係均無其事既不抽丁又不斂餉亦無所用其簽票四出朴責交加原參各節自係傳聞之訛據各委員稟覆及藩臬兩司會稟前來臣查團練之舉無論城鎮鄉村均係不出本境民間憚於徵調故有抽丁之謠經各州縣再三勸諭已漸信從並非辦理不善至所需經費由各國紳董量力勸捐不准官吏經手臣前已剴切示諭並檄行各

州縣一體遵照上年因署棲霞縣知縣陳洵有藉端苛斂情事經
臣專摺奏參昌邑膠州等州縣臣博訪周諮其無擾累勒派等情
尙屬可信臣仍當隨時留心訪察不令稍有擾累貽害閭閻仰副
朝廷惠恤黎元至意所有遵 旨查明昌邑膠州等州縣團練
並無藉端滋擾緣由理合恭摺覆陳伏乞 皇上聖鑒訓示謹

奏 光緒二十一年三月初九日奉 硃批知道了欽此

奏報黃河凌汎期內防護情形摺

光緒二十一年二月十八日

奏爲恭報黃河凌汎期內防護情形並濟陽縣高家紙坊漫溢現
在正籌搶堵恭摺仰祈 聖鑒事竊查黃河伏秋大汎而外凌汎
最關緊要當冬令嚴寒冰塊凝結迨春融冰泮上下游南北氣候

不齊下游海風凜冽解凍較遲而上游已渙然先釋斷冰雜流乘寒復結層累加高河身窄處最易出險本年冬春之際天氣過寒自濟陽以下至海口全行凍合至節交雨水上游凍已盡解凌塊滿河囓岸摧隄奇險迭出據上游總辦堯沂道姚協贊稟報上游南岸之賈莊孫樓靳莊等處埽壩均有墊陷靳莊第四埽全行入水經防營竭力廂修幸未疏失又據下游總辦候補道丁達意稟報下游濟陽城南一帶冰凌壅積刷斷凌椿均經搶護平穩惟距城四十五里之北岸高家紙坊北有漫灘一片隄係坐灣正月二十三日上游冰塊蔽空而下坐灣處堆積如山下游 尙未解水行冰上漫灘而過高出堤頂頃刻之間將堤身刷塌三丈有餘該

處防營游擊朱康仁全隊調赴埕子口僅撥有河成前營幫帶都司楊長清率勇夫二哨在工照料連日設法搶堵而口門以下結水不下行又值南風大作將漫口刷寬八十餘丈水由濟陽縣北經惠民縣流入徒駭河丁達意因督辦海防時駐埕子口營次聞信馳往查勘據報水流尚緩未奪大溜現在下游解掣溜下行其情形尚不難堵合該道因海防緊要不能常川駐工飭委下游提調候補知府倉爾頰督飭文武員弁購料興工剋日堵合需款不過萬餘金即在本年防汛經費內撥用據河防局總辦濟東道張上達稟同前由到臣查近年河工因節省經費霜清以後即無防汛委員總辦丁達意經臣於上年十一月委辦武定府屬

防務正在營次承防營官遊擊朱康仁亦經臣調紮埕子口濟陽
工段長七十里僅都司楊長清兩哨兼防又值城關正在搶險實
屬照顧不及合無仰懇 天恩免其參處臣以海防喫重將工員
調往惟期軍防得力以致失事河工應請 旨將臣交部議處仍
飛飭倉爾頰趕緊堵合俾民間無誤春耕其被淹處所已飭賑撫
局司道委員查勘量予撫恤並飭丁達意布置略定即回營次以
重防務所有凌汎期內防護情形及高家紙坊漫溢現籌堵合緣
由謹繕摺具 奏伏乞 皇上聖鑒訓示謹 奏 光緒二十一
年三月初九日奉 硃批前據電奏漫口業已堵合李秉衡自請
議處著加恩寬免餘依議欽此

奏爲叩謝天恩摺光緒二十一年二月二十一日

奏爲叩謝 天恩恭摺仰祈 聖鑒事竊 臣接准吏部咨粘單內
開吏部等議奏軍機處交出光緒二十一年正月初十日軍機大
臣面奉 諭旨李秉衡電奏威海失守請將帶兵各員嚴議並自
請嚴議等語提督孫萬林總兵李楹救援不力均着交部嚴加議
處李秉衡調度失宜究因兵單所致着加恩改爲交部議處欽此
交出到部經吏部議請將 臣照例降二級留任雖係公罪惟事關
軍務所得處分例不准其抵銷兵部議請將孫萬林等均照例革
職等因於光緒二十一年正月二十日具奏奉 上諭吏部兵部
會奏遵議處分一摺山東巡撫李秉衡着照部議降二級留任不

准抵銷提督孫萬林總兵李楹均着照部議即行革職准其留營
効力以觀後效欽此等因欽遵咨照到臣跪誦之下感激涕零伏
念臣受任勦賊統馭無方前因文登榮成相繼失守先後奏請嚴
議疊蒙 聖慈貸臣處分臣既不能即時收復縣城慎密防堵以
致威海復被佔踞待罪行間請加嚴議渥沐 恩旨曲賜優容謹
予薄譴臣自顧何人屢邀 寬宥之典銘肌刻骨慚感交榮現在
調援各軍陸續到防臣惟有激勵將領共濟時艱守前車之戒策
後勁之師敵愾同仇掃除狂寇以期仰副 高厚鴻慈於萬一所
有慚感下忱理合恭摺叩謝 皇上天恩伏乞 聖鑒謹 奏

奏歷城等縣設立車局日期片

光緒二十一年二月二十一日

再東省山湖兩路設立車局業經臣酌擬章程奏奉 硃批着照所請該部知道單併發欽此欽遵轉行在案現值登州府屬軍情緊急奉 旨飭撥總兵丁槐陳鳳樓李占椿二十五營留東進剿陸續抵防運送軍裝車輛絡繹於道自省城以迄煙臺計程一千餘里路途既極綿長地方亦較偏僻若責成沿途州縣站按備車接替設有貽誤關係匪淺 臣與司道一再電商擬於歷城濰縣掖縣黃縣各設車局一處每局照省西章程各養長車六十輛省城車局飭委候補知府吳煜會同濟南府知府魯琪光署歷城縣知縣吳觀敬妥爲經理濰縣車局飭委即用知縣李務滋會同署濰縣知縣王天培掖縣車局飭委萊州府知府彭念宸萊州府同知

蘇龍瑞督同署掖縣知縣楊德成黃縣車局飭委候補知州蕭騰
驥會同黃縣知縣蕭啟祥分別經理一面由臣刊發告示嚴禁尅
扣廣爲招徠惟省東民間蓄車無多向不出攬買賣僱覓甚難南
來各軍又不知愛惜馬力每裝一車率重千數百觔三套者多難
負此重運鞭撻橫加牲畜動多倒斃各局累不得已乃多改用四
套五套之車以供其用第牲畜數旣加增草料價復昂貴若不從
優給值恐啟抑勒苛派之漸臣參酌時宜稽考成案擬請僱養大
車統以四套爲率每輛每百里給腳價銀一兩五錢回空每百里
給餽養銀八錢坐住日亦給餽養銀八錢轎車一輛每百里給腳
價銀九錢回空每百里給餽養銀五錢坐住日亦給餽養銀五錢

另委妥員逐站督運攜帶銀兩親自發給不假胥役之手如遇車輛不敷應用先期由省電知各局飛飭附近州縣添僱協濟其協濟車價照局章核發守候回空一體給價以恤民力至局中各員薪水及司事書役工食仍按官階及向章分別支給自二十一年正月初八日起一律設局所有支發各項銀兩統歸海防軍需案內作正開銷據善後局司道詳請 奏咨前來 臣覆核無異除檄飭印委各員遵照辦理並咨部查照外理合附片陳明伏乞 聖鑒訓示謹 奏 光緒二十一年三月初九日奉 硃批該部知道欽此

奏派員採購軍糧設局轉運扣餉歸還片

光緒二十一年二月二十一日

再臣維欲求強兵必先足食山東濱海之地素鮮蓋藏全賴海艘
販運奉天糧食源源接濟上年夏秋以來倭氛不靖海道阻絕糧
販不通沿海登萊青武各府屬民食已甚不敷復因防營雲集糧
價日增現當青黃不接之時更虞缺乏且東省營制月領餉數絀
於湘淮章程若坐視軍士羣相食貴殊非體恤之道臣與司道再
四籌商業已派員由兗沂各府及江蘇河南邊境分投採購設局
轉運以資軍食其糧價仍由支食各兵勇應領餉內扣收歸還所
需運脚局用等項隨同轉運軍餉軍裝軍火脚價案內另冊造報
庶士馬收飽騰之效而報銷亦易於稽核矣據總理善後局務司
道詳請具 奏立案前來除咨部查照外謹附片陳明伏乞 聖

鑒謹 奏 光緒二十一年三月初九日奉 硃批該部知道欽此

奏請援案截留京協各餉摺 光緒二十一年二月二十一日
奏爲山東海防緊要兵多餉絀懇請援案截留京協各餉以濟急需而免貽誤恭摺仰祈 聖鑒事竊自上年倭人敗盟海疆告警東省沿海千數百里即陸續添營增兵嗣因榮成威海等處失陷寇燄益張海防益急統計前後添募各營及截留各軍幾及八十營之多所需官弁勇夫薪餉並製造轉運軍火器械等項月需餉銀二十餘萬兩即以十個月計之亦需銀二百餘萬兩通省正賦除蠲緩民欠外正耗並計歲僅入銀二百四五十萬兩而黃運河

工經費滿綠各營俸餉以及京協各餉皆取給於此在中稔之年
出入尙難相抵若遇災祲蠲緩靡不倍形竭蹶歷年清釐交代嚴
催舊欠庫款僅堪敷衍乃自辦理海防以來既於各庫撥解戶部
的款另款又供億主客各軍薪餉器械與夫沿途車馬等費早已
羅掘一空本年一切例支尙不知從何措給山東爲南北樞紐關
繫全局安危仰蒙 聖主厯念東防屢撥援軍以如此重地駐如
此重兵脫或餉匱兵譁軍事何堪設想臣與司道再四籌商非請
撥部款不足濟此急需然餉爲軍士養命之源不可一日缺乏且
恐部撥之款皆由各省提撥輾轉需時不若援案截留本省應解
京協各餉較爲便捷因查從前修培大堤需款部議以工程緊要

指撥各省深恐緩不濟急酌擬截留山東光緒十一年應解京餉銀二十六萬兩糧道庫動撥銀四萬兩又十一年欽奉 懿旨恩

賞災民冬賑銀五萬兩部議令將是年未解京餉銀四萬兩就近提留再於未解鹽課京餉內劃留銀一萬兩迭奉 諭旨依議欽

遵在案現在海防用兵喫緊軍餉之需似較工賑爲尤要除上年添撥內務府經費藩庫應解銀二萬兩運庫應解銀一萬兩係供

內廷應用仍當照常撥解外所有東省每歲藩庫應解京餉銀四十萬兩邊防經費銀十二萬兩固本兵餉銀六萬兩直隸東明河工銀二萬兩北洋鐵路經費銀三萬兩東三省俸餉的解六成實銀十三萬八千餘兩貴州協餉的解三個月實銀二萬餘兩運

庫應解京餉鹽課銀十四萬兩加價銀七萬兩臨清關應解奉天
省俸餉銀二萬兩吉林省俸餉銀一萬兩糧道庫應解邊防經費
銀五萬兩北洋鐵路經費銀二萬兩共應解銀一百一十萬兩有
奇尙有土藥稅釐儘征儘解並無定額均擬請援案截留停解暫
供半年軍餉免致束手貽誤方東省初辦海防時增營無多猶能
於各庫設法撥解的款另款以濟部用今則增兵數倍需餉孔鉅
時艱勢迫實屬無可如何不得不亟思變通以救眉急事處萬分
爲難當爲部臣疆臣所共諒據布政使湯聘珍鹽運使李希蓮督
糧道恩燾濟東秦武臨道張上達並善後局司道會詳請 奏前
來合無仰懇 天恩俯念東省海防緊要兵多餉絀准予援案截

留京協各餉以濟急需而免貽誤出自 逾格鴻慈除咨部查照
外理合恭摺具陳伏乞 皇上聖鑒訓示謹 奏 光緒二十一
年三月初九日奉 硃批戶部議奏欽此

李忠節公奏議卷六終

李忠節公奏議卷七

奏議覆漕運鐵路摺 光緒二十一年三月初一日

奏爲遵 旨籌議漕運鐵路恭摺覆陳仰祈 聖鑒事竊臣於光

緒二十年十二月初二日承准軍機大臣字寄十一月二十九日

奉 上諭戶部議奏御史管廷獻奏請規復河運一摺著按照該

御史原奏四利十便及戶部所籌各節悉心會商妥議具奏等因

欽此伏查該御史原奏四利十便部議辯論周詳動中肯綮早邀

聖明洞鑒遵經分別咨商轉飭籌議去後茲據布政使湯聘珍

按察使松林鹽運使李希蓮濟東泰武臨道張上達會詳稱南路

運河向歸河 臣經理北路運河向由東省承辦自陶城埠以北臨

清以南二百餘里之枯渠節節病淤借黃未可深恃專引積潦尤無把握如果改絃更張飛芻輓粟誠不敢執拘墟之見以鐵路爲必不可行惟細繹該御史原奏其所謂利與便未必盡利盡便所慮亦間有過慮即如所稱直隸湖北製造鐵軌等語究竟丈尺若干能否敷此二百餘里之用其長途轉運度地安置約須幾時平墊道路及路脚排椿俾足載重又須幾時縱可移緩就急而爲時已迫恐不及濟本年運務此其便未可深恃者一也又如所稱舟車剝卸需夫無業游民得資餬口等語竊恐此二百餘里之船變有業爲無業沿河挑淤抬淺剝重諸役素倚此以食力者不知凡幾生機頓失皆將變爲游民此其利未可深恃者一也又如所稱

百貨稅釐歲增巨款行旅便宜不涉重洋等語此二百餘里之間原爲北運河地面即使鐵路告成無慮阻滯而上游之南運河以至黃河南岸之十里鋪尙須開壩渡黃此壩啟閉有常每年自四月起至十一月止各湖開閘放水濟運餘月皆閉閘蓄水閉閘之時百貨來源已斷開放之際糧艘擁塞已多商情鑼銖必較鐵路之便便止二百里海舶之便便輒千萬里恐未必舍彼趨此此其利未可深恃者又一也至所稱八可慮大要慮海道之阻耳糧運之少耳而未經慮及者猶有說焉造路全憑鐵軌直隸並未停廢湖北亦須自造鐵軌無從分撥必得籌款購鐵另行度地造軌運河兩岸堤埝曲窄不平礙難遷就又須購地安設稽諸成法其雙

軌之路佔地寬七丈連取土共佔地二十丈每一里路須佔地六畝工料地價併計造成鐵路一里約需萬金以北運河二百餘里計之共需銀二百餘萬兩如以十里鋪爲建路之始中隔黃河則必添建鐵橋方能利濟長約五六里測估工需又不下數十萬兩且黃流中洪湍激沙土鬆浮橋脚難以屹立即不惜工本恐非人力所能爲倘竟輟橋工則天險不能飛越仍須候汎渡黃難避風濤之險總之工鉅費繁目前艱於集事值此海防喫緊庫款羅掘一空竭蹶萬分慮難兼顧等情詳請覆 奏前來 臣博採周諮核與該司道等所議相符除其餘應議各節另由各省督撫臣會商議 奏外所有遵 旨籌議漕運鐵路緣由理合恭摺覆陳伏乞

皇上聖鑒謹 奏 光緒二十一年三月十九日奉 硃批知道
了欽此

奏推廣河運事宜三條片 光緒二十一年三月初一日

再臣維鐵路急切難行漕運關係匪淺與其紛更而鮮濟莫如籌畫以從長茲於墨守之中寓以變通之道謹將推廣河運事宜分條臚列爲我 皇上敬陳之一江浙漕糧宜酌量增加也查每糧船一隻照章附剝船二划船一共祇應載糧米二百石實可共載一千石船戶利其能夾帶貨物偷漏稅釐船價不必昂而爭先受僱今請多加船頂嚴定夾帶貨物之禁每船責令實裝糧米六百石船力仍寬綽有餘共船九百餘隻每年計可運糧六十萬石河

道不必改船數不必增而運糧可增兩倍且糧船不夾帶貨物稅
釐必益加多以各路徵收之稅釐抵糧船之加價亦可有贏無絀
一河南糧石宜改運本色也查河南糧艘沿衛河而北可由道口
徑至通州順水行舟最易爲力應令每年起運四十萬石或以折
色改徵或將折色購運若該省額徵漕糧不敷此數即以他省折
色之銀解往道口等處買補雖豫省梗粃無多而小米爲用亦廣
時勢若此即豫省折色已久亦應變計共濟艱難一轉移間較江
蘇河運漕糧又可歲加兩倍矣一山東運河宜加意講求也查陶
城埠舊攔黃壩原寬八丈嗣以大汎掣溜縮成五丈旣而竟塞此
壩於下游相去八九十丈別築新壩以避洪流之險上年又塞新

壩仍復舊

極小不敷

導引積潦

同擬請先

八丈新壩

行無阻以

以濟海運

有當伏乞

硃批戶部

奏順

欽此

再前准戶部咨御史管廷獻以近畿糧價騰湧兵民艱食奏奉

諭旨遣員招商購糧運至天津山海關一帶平糶豁免稅釐自應

欽遵辦理惟查山東常年產糧不敷內地食用沿海各屬向賴奉

天糧食接濟自倭人開釁以來海艘不通糧販不至各路防營雲

集糧價日昂民食兵糈在在均虞缺乏臣已 奏明派員由兗沂

各府及江蘇河南邊境分投購糧設局轉運以資軍食現在增兵

之多需餉之繁幾與奉天情形相埒若再籌款遣員採買遠道轉

輸實屬力難兼顧然奉省爲根本重地大局攸關亦當廣爲設法

期於商販流通上年十二月至本年二月迭准順天府府尹臣咨

會招商赴河南道口等處採買米麥雜糧發過十四起護照六百

一十八張共計購糧一百二十八萬五千石俱由衛河運至通州入京辦理平糶法至善數至鉅也似此源源濟運正與該御史所奏辦法相同顧法可因人以立而人每緣法爲奸蓋糧商包攬影射是其慣技亦有因糧數過多本商挾貨不贍難免將護照出售與人輾轉增費則糧價仍未必果抑且經過關卡有無夾帶私貨例應查驗或以石數不符或以限期未註又不免因此阻滯則糧運亦未必果暢值此河凍正開青黃不接之際雖稅釐關係餉源而畿疆需糧孔急關係尤重不得不因時變通招徠廣運擬自本年二月爲始至前五月底止凡遇糧船經過東省各關卡查驗護照載明石數不論有無限期一律加戳免征釐稅放行並嚴禁胥

役需索留難仍應核計免征稅釐之多寡歸於 奏銷案內抵算分數之盈絀以符定章如此經權互用則商販不招而自至糧船無阻而暢行糧聚則價必自平民食兵食皆有賴矣據布政使湯聘珍並善後釐稅局司道會詳請 奏前來除咨部查照外理合附片具陳伏乞 聖鑒謹 奏 光緒二十一年三月十九日奉 硃批戶部知道欽此

奏糧船護照逾限照常完稅片 光緒二十一年三月初一日再山東稅釐向以糧食爲大宗歲解固本兵餉專賴各卡釐金協撥奉天吉林俸餉專賴臨清關稅一自各路購糧平糶稅釐並免餉源因而短絀非稽征之不力也惟當此兵民艱食急求平價不

得不酌量變通自本年二月起至前五月底止四個月以內護照之有無限期姑置弗論迨四個月以外仍須察看情形認真稽查其稽查之法全在護照載有限期自何日給照至何日繳銷赴何處採購歸何處平糶均應於照內註明以憑驗放如驗無限期及逾限未繳者照常完納稅釐庶糧商不致弊混而餉源可免枯竭矣抑臣更有慮者前奉諭旨飭禁內地米糧一概不准出洋仰見聖謨廣運防範綦嚴現查衛河一帶糧船紛紛北行駛過臨關直抵天津四通八達萬一奸商盜運出洋適足以濟寇糧亟應從嚴稽察以塞漏卮除咨直隸督臣查禁外謹附片陳明伏乞

聖鑒謹奏
光緒二十一年三月十九日奉
硃批戶部知道

欽此

奏謝天恩摺光緒二十一年三月初二日

奏爲恭謝 天恩仰祈 聖鑒事竊臣於光緒二十年十二月二

十八日欽奉 電旨李鴻章李秉衡各電奏倭兵登岸榮成失守

覽奏殊深憤懣東省兵力較單致有疏失李秉衡自請議處著加

恩寬免等因欽此又准吏部咨光緒二十一年正月初十日軍機

大臣面奉 諭旨李秉衡電奏威海失守請將帶兵各員嚴議並

自請嚴議等語李秉衡調度失宜究因兵單所致著加恩改爲交

部議處等因欽此又准吏部咨光緒二十一年正月二十七日軍

機大臣面奉 諭旨李秉衡奏文登縣甯海州先後失陷請將地

方文武各官革職留營効力並自請嚴議一摺李秉衡著加恩改
爲交部議處等因欽此疊將感悚下忱於電奏內附陳在案嗣經
吏部按照本例兩案各議以降二級留任不准抵銷先後奉 旨
允准於二月初七二十八等日准吏部咨行到臣欽誦之下慚悚
交榮伏念臣未習韜鈴謬膺軍旅愧無克敵擒渠之略時切力小
任重之虞乃蒙 聖德如天 溫綸逮下不責臣之竭蹶而有殫
竭心力之 褒復鑒臣之迂疏而有益矢公忠之 訓雖失律屢
煩 睿慮而 加恩迭荷 優容凡茲非分之邀益切返躬之疚
臣惟有拊循將士激勵戎行共矢臥薪嘗膽之忱以作敵愾同仇
之氣冀得布昭 聖武綏靖海疆仰答 高厚生成於萬一所有

微臣感激下忱謹繕摺叩謝 天恩伏乞 皇上聖鑒謹 奏

光緒二十一年三月十九日奉 硃批知道了欽此

奏藩司湯聘珍請赴前敵代奏摺

光緒二十一年三月初三日

奏爲據情代 奏仰祈 聖鑒事竊據布政使湯聘珍稟稱本年

正月初六日奉電開准總署電正月初四日奉 旨本日據李秉

衡奏稱東省海防陸路非添募三十營不可現在東省陸防需兵

甚急著照所請趕緊陸續招募藩司湯聘珍曉暢營務法越之役

頗著戰績現在募勇事宜即令就近經理俟募有成數或即飭令

湯聘珍統帶及屆時如何分防再由李秉衡奏明辦理欽此希即

欽遵舉辦並欽遵統領等因其時適古州鎮丁槐奉 旨授東聘

珍舊與同親矢石深知其謀勇兼優乃商請添募數營並札飭副將陳大勝添募三營均經隨時電稟並欽遵照料在案聘珍以一布衣位至藩司當海疆多事之秋正提劍酬 恩之日矧此番跪聆 電旨尤令悚惶感泣不敢一刻自安特彼時東路正緊榮文甯威不守後路空虛人心惶動省城根本萬分喫重聘珍深籌積慮不敢虛擁統領之號而仍自深居省城尤不敢博奮赴前敵之名而輕離根本重地是以祇能在省欽遵照料今者榮文甯威次第收復東路鬆西北緊矣方東路之緊也慮寇直趨省城以梗南北之氣則不敢一日離省城及西北之緊也又慮寇由武定北犯以增畿輔之憂則不敢一日忘前敵再四思維惟有仰懇察核或

將藩司篆務另行委署俾聘珍得以躬赴前敵專意兵事稍圖報稱實爲此生之幸儻以後路軍餉軍械轉運等事均關重要必責聘珍綜理不令躬赴前敵則聘珍亦當祇遵惟此不敢憚險不敢憚勞之下忱應請據情奏明以紓 聖主採及葑菲委任之至意等情稟請代 奏前來理合據情代 奏應否 敕令湯聘珍躬赴前敵抑或仍留後路綜理餉械轉運之處恭候 聖裁謹繕摺具 奏伏乞 皇上聖鑒訓示謹 奏 光緒二十一年三月二十日奉 硃批另有旨欽此

奏遵旨詳查丁汝昌等死事情形摺

光緒二十一年三月初三日

奏爲遵

旨詳查丁汝昌等死事情形恭摺覆陳仰祈

聖鑒事

竊臣於光緒二十一年二月十五日在萊州營次承准軍機大臣
字寄二月初十日奉 上諭有人奏聞劉公島失後倭人將丁汝
昌等五匱並兵民四千餘人送至煙臺鐵甲魚雷各艦均爲倭擄
情節支離未敢深信請旨飭查等語丁汝昌等死事情形李秉衡
相距較近見聞必確即著詳細查明據實具奏原片著鈔給閱看
將此由四百里諭令知之欽此仰見 朝廷鑒死事之忱復寓核
實之意欽服莫名查威海失後鎮遠等鐵甲及魚雷各艇均爲倭
擄正月二十四日倭遣先經擄去之康濟船並一民船運送丁汝
昌戴宗騫劉步蟾張文宣楊用霖等五匱此外尙有沈壽昌黃祖
蓮二匱至煙臺迤東之魏岱山並先後遣放兵勇四千餘人至煙

據東海關道劉含芳及北洋營務處候選道牛昶昞馬復恒稟稱
正月初五日威海南臺失後倭以龍廟背之礮擊我艦艇廣丙大
副守備黃祖蓮中礮陣亡初七日北岸全臺俱失戴宗騫吞金死
自初八日以後倭將我南岸三臺之礮修好復於北三臺山頂添
設快礮與口外倭艦水陸夾攻島艦迭被擊沈十六日總兵劉步
蟾將已沈之定遠船用魚雷轟散於是夜仰藥死十七日倭雷艇
又從兩口分進並南岸臺礮三面環攻丁汝昌欲率各艦衝出奈
口外倭艦雷艇布滿兼以各艦行鈍無法衝出而居民及水陸兵
勇萬人又哀求活命丁汝昌乃與馬格祿面商告倭水師提督伊
東云本意至船盡人沒而後止因不忍貽害軍民萬人之性命屬

倭軍入島後中外官兵民人等不得傷害均應放回鄉里等語派
廣丙管駕程璧光送往倭提督船程璧光開船之時丁汝昌與張
文宣先後仰藥至晚而死等情據此臣查道員戴宗騫素敦氣節
當倭勢披猖該員見綏鞏等軍將弁人各一心即慮無以制敵慨
然有以死勤事之志正月初七日南臺失後戴宗騫率兩營守北
臺迨兵潰力竭即以身殉忠義之忱傲然共見業經北洋大臣李
鴻章具奏仰荷 天恩賜卹可慰忠魂總兵劉步蟾爲定遠管駕
十二日定遠被倭擊沈劉步蟾恐爲敵所撈獲十六日用水雷將
船身轟散即於是夜仰藥死船亡與亡志節凜然無愧舍生取義
總兵張文宣爲護軍統領正月初七日臣在煙臺接文宣來電謂

劉公島孤懸海中文宣誓同隊勇先用力後用命等語是其致死之心蓄之有素卒能舍命不渝亦屬忠烈可嘉護總兵楊用霖爲鎮遠副管駕該道等原稟未述其死事時日聞大東溝之戰鎮遠管駕林泰曾潛匿不出楊用霖力任戰事骸足彈傷猶堅立不退其見危授命當亦可信此外如濟遠大副沈壽昌係在牙山陣亡已經奏請 恩卹守備黃祖蓮於初五日在島澳中礮更爲人所共知惟丁汝昌以旅順失事奉 旨革職拏交刑部其歷次罪案已在 聖明洞鑒之中戰敗死綏僅足相抵倘日後有以請卹之說進者 朝廷必力斥其非無俟臣下總總過慮至降倭之說臣愚以爲事即不虛而敵方搆兵旣難責以歸還即無從加之以罪

若果死事屬實祇可寬其既往之愆此外固亦無庸深論是否有當伏候 聖明採擇所有遵 旨詳查丁汝昌等死事緣由理合恭摺具奏伏乞 皇上聖鑒訓示謹 奏 光緒二十一年三月二十日奉 硃批另有旨欽此

奏覆漕督松椿署漕督鄧華熙被參各款摺

光緒二十一年三月初三日

奏爲遵 旨確切查明據實覆陳仰祈 聖鑒事竊臣於光緒二十年十二月二十二日在煙臺營次承准軍機大臣字寄十二月十七日奉 上諭有人奏漕運總督松椿毫無振作專好逢迎甚至公事畫行付之眷屬地方利弊悉聽門丁署漕督鄧華熙素稱巧宦署任之際囊橐是營不能整頓請飭查辦等語著李秉衡按

照所參各節確切查明據實具奏毋稍徇隱原片著鈔給閱看將此諭令知之欽此遵即遵委候補道吉燦升馳往清江照原參各節逐一確查去後茲據該道查明稟覆前來如原奏所稱松椿毫無振作營伍聽其缺額各節查松椿自莅任以來漕河諸務均係循照舊章辦理並飭令各防營緝捕土匪酌增考功過定賞罰章程未聞有聽其缺額情事惟查有營官歐陽成松平日頗有聲氣先經松椿委令管帶淮海水師左右二營上年秋間鄧華熙到任復委添募礮勇一百名閒散武員半多怨望遂僉謂該營官移步換形有以水勇抵充礮勇之謠但係傳言未爲實據又原奏內稱屬員專好逢迎一節上交不諂本非盡人所能惟逢迎者何人所

逢迎者何事原參既未指實事無左驗不敢臆斷又原奏謂其公
事盡行付之妻女一節底稿自存檔案此事非外間所能知聞松
椿素勤於判牘所核各稿時有親筆刪改之處畫行之件似不至
假手他人恐係傳聞失實原參又謂其地方利弊悉聽門丁一節
訪查漕署門丁有張蘭軒郭來賓二人司閹有年地方熟悉商民
時有來往查該門丁等尙無作弊實跡惟既爲人指摘其素非謹
慎可知至原奏內稱署漕督鄧華熙素稱巧宦署任之際囊橐是
營不能整頓一節查鄧華熙在署任三月有餘正值海防喫緊募
兵籌餉公事煩雜之際爲期未久即交卸回江蘇藩司本任尙未
聞有營私廢公情事以上松椿鄧華熙被參各節或傳聞失實或

查無確據應均請免其置議惟管官歐陽成松疊奉管差未孚衆
論門丁張蘭軒郭來賓久在漕署致啟羣疑均非事出無因可否
敕下漕運總督松椿歐陽成松撤去管帶不准在漕標當差並
將門丁張蘭軒郭來賓即行驅逐以重軍實而息浮言之處伏候
聖裁所有遵 旨查明據實覆奏緣由謹繕摺具陳伏乞 皇
上聖鑒訓示謹 奏 光緒二十一年三月二十日奉 硃批另
有旨欽此

奏劾漕運總督松椿等片 光緒二十一年三月初三日

再密陳者漕運總督駐清江浦該處爲運道所經南北咽喉最關
緊要近日奉直各軍所購外洋槍械悉萃於此商賈輻輳爲東南

一大都會未必不爲倭人所垂涎臣前電奏倭船駛至安東衛探詢海州青口路程難保無窺伺清江之意該處須有大兵駐紮尤賴有知兵大員控馭得宜方爲緩急可恃漕運總督松椿人尙方正辦事亦頗謹慎惟以目下清江事勢而論似難必其勝任大局所繫敬謹直陳應否酌予更調以期人地相宜之處出自 聖裁至江蘇布政使鄧華熙由雲南知府游升今職其人素係巧滑一路臣亦早有所聞竊以今日之藩司即異日之督撫爲大吏者必須廉正忠誠整躬率屬方足以維持全局若以巧滑者久居高位使之平章庶政進退百僚恐浮僞日滋於吏治大有關係臣與鄧華熙素未謀面此次署理漕運總督亦查無實在劣蹟惟原參謂

其素稱巧宦不爲無因臣受 恩深重既有所知不敢緘默不言
謹附片密陳伏乞 聖鑒謹奏 光緒二十一年三月二十日留
中

奏挑濬北運河估需經費數目摺

光緒二十一年三月十七日

奏爲遵 旨挑濬北運河以利漕行估需經費數目恭摺仰祈

聖鑒事竊照本年辦理河運江北起運漕米一十二萬七千八百
餘石江蘇起運漕米一十萬石業經兩江督臣奏奉 諭旨飭將
漕船經行河道認真挑濬務期一律深通以利漕行等因欽此除
南路運河向歸河 臣經理外所有陶城埠迤北河道經 臣檄委東
昌府知府洪用舟勘估去後茲據該府稟稱陶城埠進口緊枕黃

295-1

流歷年借黃濟運河身淤墊日高自口門以至草橋爲黃水入運河咽喉積淤尤厚而口門之外又淤起沙灘一片每當乘汎開壩往往船入未半水落掛淤非候盛漲不能繼進若不早爲變計必致貽誤堪虞查勘口門迤東里許尙有臨黃舊口門廢棄多年現擬一併修復以備西口停淤則開東挑西東口停淤則開西挑東口門東西並立均須建壩廂埽庶可更番進船不爲淤阻設遇水大溜急即於兩口中酌量啟壩免致掣溜爲患惟口門斜接正河之支河一道久已淤塞應與口門外之淤灘同時挑濬通暢並於兩岸及東西支河相距處分築堤埝以束水勢埽壩經歷三汎料物朽腐亦應修整自陶城埠起至臨清州衛河止綿長二百餘里

地勢南高北低連堤節節殘缺亟應分別挑築工程實爲浩大但當此籌辦海防庫款支絀不得力求撙節統計挑修各工共需土方工料銀四萬九千八百一十五兩五錢六分二釐減平在內造具估冊呈請核辦前來臣查該府所擬辦法並估計經費銀數均尙覈實應照歷辦成案飭由藩司籌款給領責成該府督率印委各員趕緊興工認真辦理勒限於漕船未到以前一律完竣不准草率偷減仍俟工竣將用款造冊報銷除咨部查照外所有估挑北運河緣由理合恭摺具 奏伏乞 皇上聖鑒謹 奏 光緒二十一年四月初一日奉 硃批該部知道欽此

奏王連三新募各營請撥餉項摺

光緒二十一年三月十七日

奏爲東省餉項支絀曹州鎮總兵王連三新招各營擬請 敕部
籌撥餉銀恭摺仰祈 聖鑒事竊臣准 欽差大臣劉坤一咨曹
州鎮總兵王連三帶兵駐紮榆關九門口兵力單薄 奏令另招
三營並將原帶之八百人添招二百名湊足兩營共合五營所需
薪糧等項仍歸山東支發等因奉 旨允准欽遵咨會到臣伏查
該總兵原帶練軍步隊八百人馬隊二哨現又添募勇丁共成五
營駐紮衝要之地所需糧餉東省力苟能籌自應兼顧何敢稍分
畛域惟山東海防緊要濱海口岸周匝千有餘里前以防營不敷
分布奏奉 諭旨添招三十營近已次第成軍新舊合計將及八
十營之多自本年二月以後餉銀每月約需二十餘萬兩供億浩

繁日不暇給而庫款奇絀幾同無米爲
協各餉以濟眉急王連三新添各營所
可以再籌據善後局司道具詳請 奏
念東省竭蹶情形 敕部另行籌撥王
貽誤軍食出自 鴻慈謹繕摺具 奏

奏 光緒二十一年四月初一日奉

奏請將殉節道員戴宗騫事蹟宣
奏爲殉節道員功蹟卓著懇懇 天恩

聖鑒事竊已故統領綏鞏軍三品銜

騫於光緒二十一年正月初八日在威

洋大臣李鴻章奏奉 恩旨從優議卹 聖慈高厚感戴同深惟
念該故道見危授命志潔行芳其平生事蹟尙有亟待表彰者謹
再爲我 皇上陳之伏查該故道安徽壽州人同治初年值捻匪
苗沛霖之亂全境被陷該故道由廩生辦理團練屢挫賊鋒六年
詣李鴻章行營條陳平捻十餘策李鴻章器之招致戎幕襄贊軍
事擒匪肅清隨赴湖北轉援陝西調駐直隸派充盛軍總理營務
處兼理屯田賑撫事宜光緒元年盛軍興辦京東水利該故道辦
理新城一帶疏河營田諸務馳驅河干履勘水道酌宣洩之宜居
民藉免昏墊營田鉅細章程皆其手定至今稻田彌望歲收糧數
十萬石軍民咸食其利六年經會辦吉林邊務今湖南巡撫臣吳

大激調赴吉林統領綏字馬步全軍進駐三姓吉林馬賊肆擾深
爲民害該故道督隊入山搜勦積年巨匪竭數月之力追逐八百
餘里生擒賊目十餘名陣斬百餘名松花江岸肅清八年創築江
岸礮臺開通甯古塔山道三百餘里九年調回天津新城十年移
防昌樂撫甯等縣洋河蒲河各海口督築長牆礮壘安設水雷電
綫疏濬河道修治橋梁內練士卒外輯商民勞動最著洵保直隸
州知州以知府升用吳大澂稱其忠信閎通體用兼備李鴻章稱
其志趣正大謀慮精詳有古儒將之風薦剡所陳皆仰邀 聖鑒
十三年李鴻章檄調所部綏字四營並飭兼統鞏字四營移防威
海數年中修築海牆開通山道創建南北各礮臺續建水雷營火

藥庫經營締造倍極勤劬十九年李鴻章復以該故道志趣廉正
經濟宏通文武兼資深堪倚任保奏引見奉 特旨以道員記名
簡放二十年九月 臣至威海與論守禦事宜以後函電往還語皆
忠義奮發時奉省軍務失利每聞諸將逃潰輒擊案涕泣謂其負
國厚恩 臣固知其志節噉然不至喪其所守十二月倭寇陷榮
成威海後路沿海數百里備多力分戰輒失利該故道屢次來電
誓與所守臺共存亡本年正月初五日倭悉銳攻威海由山坡越
嶺而進南臺失陷該故道以孤軍腹背受敵猶奮身力戰堅持三
日迨至勢窮力竭卒以身殉厥後劉公島之失劉步蟾張文宣諸
員相繼殉節皆該故道之忠義有以倡之也自海上用兵以來迭

失名城要隘文臣之死事者應該故道一人其生平志行卓犖政績昭垂在人耳目臨難復從容引決舍命不渝揆諸古人之取義成仁殆無愧色合無仰懇 天恩俯准將該故道戴宗騫事蹟宣付史館立傳以彰忠節至可否 予諡建祠之處出自 逾格恩施非臣下所敢擅請謹繕摺具 奏伏乞 皇上聖鑒訓示謹奏

奏請將傅鳳翔等附祀優卹片光緒二十一年三月十七日再據署昌邑縣知縣汪望庚詳稱據沿海偵探委員河南候補知府傅鳳颺遣抱呈稱鳳颺胞弟一品蔭生四品銜花翎候選直隸州知州傅鳳翔於光緒十七年投效奉天將軍裕祿軍營派充營

務處兼辦火藥局事務二十年八月經已故總兵左寶貴調赴前敵管帶馬隊八月十三四等日隨同左寶貴在平壤與倭接仗手刃數人迨左寶貴陣亡傅鳳翔搶護遺骸出平壤西門里許又遇倭人搏戰以衆寡不敵身受重傷力竭殞命屍骸無存同時陣亡尙有傅鳳翔之姪武生傅朋壽把總用補用外委傅介福二人懇一併 奏請優卹並附祀前湖北提督傅振邦專祠等情前來 臣查傅鳳翔係原任湖北提督子諡剛勇傅振邦之子世篤忠貞捐軀報 國死事極爲慘烈其姪傅朋壽傅介福同時殞命亦屬義烈可矜合無仰懇 天恩俯准將四品銜候選直隸州知州傅鳳翔及武生傅朋壽把總用補用外委傅介福均 敕部從優議卹

並附祀傅振邦專祠出自 鴻慈逾格謹附片具 奏伏乞 聖

鑒訓示謹 奏

奏報濟陽高家紙坊漫口堵築合龍摺

光緒二十一年三月十九日

奏爲濟陽縣高家紙坊漫口堵築合龍恭摺具陳仰祈 聖鑒事

竊濟陽縣高家紙坊凌汎漫溢成口經臣於二月十八日專摺具

奏維時下游總辦候補道丁達意統帶防營駐紮武定由防次

回工督同提調候補知府倉爾頰先飭弁勇盤築裏頭一面派員

購辦料物並調撥附近河防營分投趕辦連日進占二月十六至

十八日大雪三晝夜該員弁等督率勇夫併力工作於十八日業

經堵合臣在萊州營次據報於二十五日電 奏在案是時天氣

奇冷河冰解而復結又雪深數尺無處可取乾土該員弁等因急求竣工於風雪中漏夜搶築土料俱帶冰凌冀於斷流後加築後戩以資抵禦至二十二二十一兩日南風大作天氣驟暖門占內冰凌融化東壩突見蟄陷勇夫趕緊壓土又值河水陡長二尺許冰塊滿河將東壩撞塌十餘丈水仍由舊門口衝入西壩亦被洶蟄刷深一丈餘及兩丈不等臣接據該總辦續報焦灼萬分即飛飭河防局添撥款項檄行總辦丁達意遴派妥員加購稽料椿繩嚴督在工員弁剋日搶辦限桃汎前堵築合龍丁達意辦事向能認真飭令先管西壩之參將杜榮福兼管東西兩壩以一事權其掌壩監工及買土運料事宜分派文武員弁各專責成布置既定東

西兩壩同時進占丁達意率同倉爾類親駐壩頭督工至三月十一日將金門占追壓到底一面填築後戩於十二日亥刻閉氣壩外之水亦即登時斷流共用過現銀二萬九千餘兩據總辦丁達意稟請具 奏前來臣查此次漫口當二月初間據丁達意所勘形勢本不甚難故估款僅及萬金冀可計日戩事因二月十六七等日風雪嚴寒河冰復結門占因有冰凌追壓未能堅實迨冰塊一化立見塌陷又遇大風逼溜掣動壩根遂致已合復開久稽時日丁達意因杜榮福熟悉工程派令總管兩壩在工文武員弁亦均能齊心努力艱險不辭於桃汛將臨之日堵築合龍堪以上慰宸厪在事各員弁從事河干衝風冒雪亦屬著有微勞臣已批

飭暫行存記擬請俟霜清後彙入防汛搶險案內擇尤請獎其所
用款項係於下游防汛款內動撥惟額定防汛經費本無餘款今
動用至二萬九千餘兩其善後工程尙不在內如將來防汛實在
不敷再行 奏明辦理並飭丁達意將善後事宜趕爲布置仍令
提調倉爾頰督同文武委員妥辦該道即回武定營次以重防務
所有濟陽高家紙坊漫口現已堵合穩固緣由理合恭摺具 奏
伏乞 皇上聖鑒訓示謹 奏 光緒二十一年四月十三日奉
硃批該部知道欽此

奏章高元車驛等銀請由月餉扣還片

光緒二十一年三月十九日

再刻值軍務方殷購械練兵需款甚鉅東省舊募及奉 旨新招

各軍共計將近八十營月需餉銀二十餘萬籌措倍極艱難苟有
可以節省之處自不應稍涉糜費查東省 奏定海防營制每勇
三名用長夫一名每營共長夫一百六十六名此外不得再行添
設茲據善後局司道詳稱准直隸東征糧臺咨據統領嵩武等營
山東登州鎮總兵章高元在前敵營務處領去大車三十四輛價
銀三千四百兩驢駝銀六百兩大車人工餵養銀二千四十兩由
該臺共墊銀六千四十兩請即籌還等因 臣查上年十二月二十
一日據正任直隸津海關道盛宣懷詳稱章高元請置買驢駝車
輛價銀七千七百餘兩又每月人工餵養銀二千兩請在煙臺海
防捐款項下撥給經 臣以該總兵所部八營每營長夫一百六十

六名共有長夫一千三百餘名月需口糧已鉅當籌餉萬分艱細之際礙難再添鉅款批駁在案查各營額設長夫原以備行營搬運子藥鍋帳之用即從前湘軍營制亦不聞於長夫外更添車騾名目該總兵所請添買車騾各項自難照准茲既由東征糧臺墊銀六千四十兩固未便令其懸宕無著亦不能另行籌款致涉虛糜臣已批飭善後局即在章高元八營一哨月餉內分期扣還以清款目謹附片具 奏伏乞 聖鑒謹 奏 光緒二十一年四月十三日奉 硃批該部知道欽此

奏東省文武各官養廉核扣三成數目摺

光緒二十一年三月二十二日

奏爲山東省文武各官養廉核扣部提軍需三成數目恭摺仰祈

聖鑒事竊照前准戶部咨於光緒二十年七月十四日條奏籌餉緊要案內聲明請將明年一年外省文武大小官員養廉按實支之數核扣三成銀兩歸入軍需動用先行報部屆時扣有成數酌量指撥等因奉 旨允准通行欽遵在案伏查山東通省文武官員養廉雖有定額而分扣彙總頭緒紛歧由司移咨催查有需時日當此海疆多事需餉浩繁凡屬大小臣工同有急公報効之忱原無區別惟文職首領佐雜各微員武職千把外委各末弁例領養廉本微除扣二成減平所領更屬無幾倘再添扣三成不特辦公無資且恐尙須找解款項零星無裨軍用擬請概免提扣以示體恤其餘文武各官均登除扣款按實支之數提扣三成仍扣

減平支發而扣款成數名目不一東省養廉定章有應扣由外彌補軍需之款如一二品者扣一成三四品者扣二成五品以下至七品之正印官扣三成皆與部庫無涉又有應扣停給之款如一二品者扣三成三四品者扣二成五品以下至七品之正印官扣一成復有不論品級統扣核減二成並六分減平除知府核減二成奏准自同治四年免扣州縣核減二成亦於是年奏准扣歸由外彌補軍需外餘俱有關部庫之項加以本年部提軍需三成通盤遞扣核算則各官實支廉銀僅有一二三成不等竊思養廉之設原所以激勵廉隅若減扣過多未免辦公不敷轉啟虧挪之漸臣與司道再四籌商凡有關部庫之停給核減各成銀兩仍應照

奏請
光緒二十一年四月十三日奉 硃批戶部知道欽此

舊核扣再扣部提軍需三成遞扣減平其無關部庫之由外彌補軍需一成二成三成銀兩均請暫行停扣以資辦公統計光緒二十一年核明通省應扣部提軍需三成共銀六萬三千九百一十四兩二錢一分內文職扣銀五萬八千八百五十五兩六錢八分武職扣銀五千五十八兩五錢三分其中如有署事代理人員及因事故扣缺者照章半支半扣不支不扣以致扣不足數者推展年限扣清爲止容俟按季扣有成數報部撥用據藩司湯聘珍造冊詳請 奏咨前來除清冊咨部查照外所有文武各官養廉提扣軍需三成數目緣由謹恭摺具陳伏乞 皇上聖鑒謹 奏

奏壽張等縣援案僱勇作正開支口糧片

光緒二十一年三月二十二日

再兗州曹州兩府屬民俗強悍盜風日熾地方官勤於緝捕捐廉雇勇購線固不乏人其或因缺分瘠苦賠墊爲難遂至因循廢弛臣於上年八月間到任後察看東省吏治莫急於整頓捕務欲求補救之方宜籌體恤之道值倭氛不靖臣即出省籌防並將各營調赴海口明知腹地空虛不得不先其所急現在曹濟一帶與江豫交界等處不逞之徒結黨成羣意在乘虛滋事臣已飭曹州府知府毓賢帶馬步各營督同統帶濟字等營副將陳大勝等所部弁勇會同地方文武上緊緝拿首要務絕根株並准兩江河南督撫臣咨會該省亦有土匪勾結逃勇肆出劫掠自當毋分畛域合

力捕治以消隱憂而固民志惟地面廣袤兵力單薄如處處添營招勇不特內外兼籌無此餉需亦屬無此辦法查咸豐三年間捻幅爲患經前撫臣李德飭令蘭山郟城費縣各募壯勇三百名

奏准作正開銷至今猶收其效臣因仿照辦法檄飭藩臬兩司酌量各州縣情形妥爲籌議茲據布政使湯聘珍按察使松林會同商榷擬於兗曹兩屬地稱難治缺分最苦之壽張縣觀城縣各雇壯勇五十名城武縣鉅野縣范縣各雇壯勇六十名以上五縣共計雇勇二百八十名即歸各該縣自行管帶認真訓練隨時巡防每勇每日按名支給口糧銀一錢作正開銷統俟奏明欽奉諭旨後再行飭令各縣如數雇勇起支銀兩彙入蘭郟費三縣勇糧

報銷案內專案造報較之添招防營所省經費實多即各該縣呼
應既靈捕賊亦易得手倘雇勇之後境內仍有盜劫重案以及短
額剋扣情事定即從嚴參辦以儆玩泄等情詳請具 奏前來臣
覆查無異合無仰懇 天恩俯念壽張觀城城武鉅野范縣捕務
緊要地方瘠苦准如該司等所議援案各雇壯勇作正開銷庶於
吏治民生大有裨益一俟盜風稍熄即行裁撤以節經費出自
逾格鴻慈除咨部查照外理合附片具 奏伏乞 聖鑒訓示謹
奏 光緒二十一年四月十三日奉 硃批著照所請該部知
道欽此

奏力阻和議摺 光緒二十一年三月二十五日

奏爲與倭人議和條約尙須斟酌謹瀝愚忱恭摺馳陳仰祈 聖鑒事竊自倭夷犯順以來我水陸各軍節節挫敗以致陪都告警京師震驚 皇上不忍生靈之塗炭 特命北洋大臣李鴻章往東洋議款本息兵民之心非得已也爲臣子者不能殺敵致果紓 廟堂宵旰之憂苟和議於 國體無傷而猶斷斷置辯是以朝廷爲孤注徒快其議論之私臣雖至愚不敢出此惟以臣所聞和議條款有倭所得地方盡歸倭有暨遼河以東及臺灣均割歸倭並賠銀一百兆兩之說臣以爲訛言不足深信即令倭以是要挾 皇上決不能允而旣聞此說不覺憂憤填膺有不得不披瀝上達於 君父之前者敢敬陳之倭立國島上僅中華一二

行省地耳聞近來洋債日增困窮已甚非有長駕遠馭之略也其
來中華者勞師襲遠死亡相繼人數有日減無日增觀於榮成威
海等處得而不守前以精銳萃於牛莊營口則海城以東久無動
靜二月下旬往攻澎湖則旅順一帶倭船絕少其太枝勁旅止有
此數已可概見特以輪船飄忽海上往來甚捷故覺其勢尙張而
中國先無堅忍敢戰之將望風披靡彼愈得肆其猖獗耳然自去
秋至今所失不過奉天數州縣之地至遼河以東東三省版輿之
大彼即以力征經營得不得正未可定奈何以數省之地敵所力
爭而未必能得者遽拱手以讓諸人有是理乎東三省爲我朝
發祥之地根本所關與京師相維繫且 陵寢所在 列祖 列

宗之靈爽實式憑焉一旦付之犬羊之族在天之靈必有愀然不安者我皇上至仁大孝其肯聽此狂悖不經之議以墮我萬年不拔之基也哉臺灣北連吳會南接粵嶠幅輳南北三千里東西六百里乃江浙閩粵之要害野沃土膏物產蕃庶爲東西一大藩障自巡撫改駐臺灣經營締造又越數年劉永福素驍果善戰敵即往攻未必能克倘割以畀之東南數省無安枕日矣乃者泰西各國環布中土皆大於倭數倍通商者據我要津傳教者愚我黔首其蓄志均甚深倭一得志諸夷謂吾華土地之可利也必猖獗然環向而起肘腋之患有已時哉且中國之與外夷議和者屢矣或償其兵費或准其通商固未嘗以疆土與人也今既賂以鉅

款又許以割地瘠中華而奉島夷直納款耳無所謂和也中國息借洋款已數千萬此次賠款又須借貸合之數將萬萬若用此鉅款以養戰士以二十萬人計之每月只一百餘萬歲計亦不過一千數百萬如能戰勝則賠款可以不給而中國可以自強孰得孰失固較然易明也或者謂倭兵精礮利我不能戰勝則土地終不可保此又不揣其本之論也中國自髮捻平後久不見兵革各處營勇皆積疲不振淮軍更將驕卒惰畏賊如虎故寇讎愈熾莫之敢撻自海上告警以來召將徵兵已徧天下籌餉購械糜帑數逾千萬近已布置稍定兵機可期漸利即謂海軍覆沒彼水師不能制而曩者法越之役全以陸師克復關諒法夷震懾乞款是陸師

得力而彼之水師亦不得逞也關內外宿將自宋慶依克唐阿唐
仁廉而外如聶士成程文炳董福祥熊鐵生余虎恩各員均素稱
敢戰以劉坤一老成碩望爲之主持而指揮之戰事必大有轉機
於此而以和議曲徇其欲則所用經費盡成虛擲日後有事再倉
猝召募又蹈此時覆轍而海內疲敝勢必不支其禍有不可勝言
者矣同治之初髮捻蹂躪徧天下東南數省郡縣半陷於賊賴曾
國藩等持以堅忍之力卒底於平今所失之地視彼時祇什百之
一二耳但使各將帥有臥薪嘗膽之誠恢復固非難事安得謂彼
所得者遂盡爲其有哉臣伏願 皇上乾綱獨斷如彼族要挾過
甚則絕其和議勿爲虛聲所恫喝勿爲浮議所搖惑畿輔以東責

成督師大臣慎簡將帥若者爲前敵若者爲接應其不力者汰黜之如有不遵以軍法從事各省海疆戰事責成各督撫有喪師失地者重治其罪 上奮安民之怒斯下勵敵愾之忱臣雖老億願提一旅之師以伸 天討即捐糜頂踵亦所不惜迨彼族勢窮力屈就我羈勒然後從容議和則不至損威納侮亦可稍戢各國覬覦之心大局幸甚臣迂直之性罔識避忌披瀝上陳不勝悚惕待

命之至謹繕摺由驛馳 奏伏乞 皇上聖鑒訓示謹 奏

奏副將張福興病故請卹摺 光緒二十一年三月二十九日

奏爲調辦海防副將積勞病故籲懇 天恩從優 賜卹恭摺仰

祈 聖鑒事竊臣於光緒二十年十月檄調總兵用補用副將臺

莊營參將張福興統帶濟右河成河定等營駐紮甯海州屬之五
臺該營弁勇向習河工不諳操防該副將親督訓練昕夕無閒又
值警報迭至督飭各營嚴防險要夜間親自巡視恐有疏虞往往
徹夜不寐十二月初一日該副將舊恙已發猶力疾點名督操至
初二日遽爾身故據該營管官等稟報前來臣比飭將身後事宜
妥爲照料並將所帶各營另行派員接帶臣查張福興湖北江夏
縣人由武童於咸豐五年投効楚軍水師營克復武昌省城手刃
黃衣賊日並克復大冶興國各城七年克復江西湖口縣城攻拔
安仁貴溪等處九年調赴皖軍克復鳳陽府縣城池同治二年調
赴山東東治營克復淄川縣城並勦辦東昌白蓮池沂州等處捻

逆五年十月圍勦肥城黃崖寨左肩受刃傷浴血殛升奮死攻拔
歷年大小百餘戰身受重傷數十處所向無前經 欽差大臣袁
甲三升任山東撫臣閻敬銘先後敘功保至游擊管帶振宇營六
年五月敗賊於鄒平即墨平度等處七年三月在在平縣之廣平
集與賊接仗匹馬陷陣手挾賊目張標而出賊衆愕眙官軍乘勝
斬首三百餘級四月捻酋張總愚大隊麇集在平縣西南張福興
領兵潛襲之斬馘無算洵保以副將留東儘先補用並 賞給勳
勇巴圖魯名號 賞給三代二品封典光緒元年辦理侯家林大
工合龍經升任山東撫臣丁寶楨奏保候補副將後以總兵留東
補用並加總兵銜歷任曹州鎮標中營遊擊撫標右營遊擊臺莊

營參將皆能舉其職該副將束髮從戎在軍日久其驍果善戰夙
著名稱故臣特調來防藉資臂助不料防務未竣遽一病不起實
堪憫惜可否仰懇 天恩念該副將張福興昔年屢著戰功此次
復以積勞歿於營次 俯准敕部從優議卹之處出自 逾格鴻
施謹專摺具 奏伏乞 皇上聖鑒訓示謹 奏 光緒二十一
年四月十八日奉 硃批著照所請該部知道欽此

奏緝勦土匪先將現辦情形覆陳摺

光緒二十一年三月二十九日

奏爲遵 旨緝勦曹州府屬土匪先將現辦情形恭摺覆陳仰祈

聖鑒事竊臣於三月初八日在萊州營次承准軍機大臣字寄
光緒二十一年三月初四日奉 上諭御史管廷獻奏山東曹屬

土匪肆擾懇發兵緝勦一摺據稱曹州桿匪頭日有段瞎子等糾集黨類甚多四出搶劫地方深受其害又有金鐘罩一教一名鐵布衫會徒黨日衆如有蠢動較桿匪尤爲可慮請飭拏辦等語現在倭氛不靖內地匪徒尤宜加意防範著李秉衡飭屬查明桿匪段瞎子等按名嚴拏務獲究辦等因欽此又於三月十七日承准軍機大臣字寄三月十三日奉 上諭劉樹棠奏東匪闖入豫境搶掠一摺據稱本年二月間突有曹州府屬匪徒約馬步八九百人闖入豫境由考城褚麻店一帶南竄又在睢州北境搶掠仍即竄回東境趕捕不及並聞山東另有大股亦將約期起事等語曹屬匪徒膽敢聚集多人越境搶掠若不合力勦辦恐此擊彼散貽

李思曾公奏議 卷十一 二十九
害無窮著李秉衡飭令曹州知府毓賢督率防軍迅將境內匪徒
悉數撲滅如再竄入豫境即派隊跟蹤追捕無分畛域等因欽此
又於三月二十二准總理各國事務衙門電開本日奉 旨王文
韶電奏已悉豫東邊境與直隸東明長垣壤地毘連即著王文韶
飭令李大霆督帶所部六營扼要防堵毋任賊蹤闖入直境並著
劉樹棠李秉衡懷遵前旨督飭派出員弁不分畛域實力剿賊等
因欽此仰見 朝廷禁暴詰奸綏靖地方至意欽悚莫名查曹屬
風氣强悍近值海疆多事奸民乘機竊發盜賊繁多 臣雖躬駐海
防而該處捕務未敢稍涉疏懈上年秋間已 奏派曹州府知府
毓賢募佐字勇營辦理兗沂曹三府緝捕事務本年春間聞各處

匪徒嘯聚恐毓賢兵力太單復飭由藩司轉飭副將陳大勝添募
三營又派參將岳金堂由萊州帶馬隊一營馳往會剿統歸毓賢
調遣以一事權於三月初四日電 奏在案迭據毓賢電稟督帶
營勇親歷荷澤曹縣城武定陶等處先後搜捕共拏獲盜匪三十
餘名並未見有大股匪黨嗣先後欽奉 諭旨復飛飭毓賢按照
御史管廷獻所奏各匪姓名按名嚴拏如竄入直豫各境即派兵
跟蹤追捕會合鄰省防營併力兜剿毋得徒顧本境致令他處蔓
延爲患竊維曹屬地方廣袤盜賊所在皆有如徒恃官兵勦捕兵
來則散兵去復聚當其散也地方官佯其無事苟且偷旦夕之安
而賊未經懲創根株仍不可拔臣已檄飭毓賢責成各州縣平時

聯絡鄉團認真緝捕倘實有大股匪犯請兵勦辦必該地方官協同捕拏如兵至賊散務須密購眼線追蹤躡緝無論賊竄至何處必窮究其巢穴不得謂賊已遠颺遂可謝責復嚴明賞罰如州縣中有諱飾因循及防營緝捕不力者據實稟請撤參其州縣捕務振作及營弁之破獲巨盜者隨時報明由臣奏請破格優獎以示懲勸並飭訪查金鐘罩會匪設法解散以靖地方俟毓賢辦有端緒隨時奏陳以紓宸廑所有奉旨緝勦土匪現飭遵辦緣由謹繕摺具奏伏乞皇上聖鑒訓示謹奏光緒二十一年四月十八日奉硃批知道了仍著飭令毓賢責成各州縣認真緝捕如有大股匪徒立即派兵勦辦餘依議欽此

156

李忠節公奏議卷七終

李忠節公奏議卷八

奏再瀝愚忱力阻和議摺 光緒二十一年四月初一日

奏爲和議要挾過甚萬難曲從再瀝愚忱恭摺仰祈 聖鑒事竊

臣前以和議將成條約尙須斟酌於三月二十三二十五等日先

後電摺 奏陳在案近聞李鴻章已回天津和款展於四月十四

日換約條款內有割臺澎及奉天遼河以南地並賠兵費二萬萬

兩南北兩京蘇州杭州重慶沙市等處通商暨倭駐兵威海每年

付餉五十萬各條此事尙未明奉 諭旨以臣所聞亦前後小有

歧異軍國大計 朝廷自有權衡臣何敢曉曉上瀆惟彼族要挾

過甚事事曲從即無以爲國外間微聞此議食毛踐土之倫無不

切齒憤恨臣受 恩深重若徒隱忍緘默實覺辜 恩負職清夜
難安謹干冒斧鑕敬再爲我 皇上陳之遼河以南自牛莊沿海
至蓋平復州金州旅順轉而東至鳳凰城鴨綠江皆海防形勝之
地爲京師左輔臥榻之側豈容他人鼾睡倭夷貪狠成性引而納
之肘腋之地而欲虎之無噬蛇之無螫也得乎臺灣爲東南藩蔽
無論要害一失沿邊各省不能安枕且其地入版圖者數百年物
產豐饒戶口蕃息士農工商各安其所一旦使之棄祖宗富饒之
舊業責令遷徙必至流離失所怨譟繁興誰非 朝廷之赤子而
忍令罹此荼毒乎况安土重遷人之恒情設有憑恃形勢鋌而走
險以與倭相抗者將遏其義憤強令臣服於倭乎抑責其負固不

服而加之罪乎不然倭又將與我爲難也我朝深仁厚澤無論如何爲難斷不加賦賠款二萬萬非借洋債不可照臺灣成案以八釐取息計之歲需息銀一千六百萬兩息無所出又將借本銀以還息銀從前以海關抵償故取攜甚便設海關不敷坐扣則借款未必可得將取盈於丁賦舉中國有限之脂膏盡以供其盤剝即此一端國勢已不可支况款議若此則害切剝膚各處防營仍不能撤兵餉又從何出國家歲入有常安得有無窮之財力以塞此漏卮哉金陵蘇州杭州重慶沙市向未准各國立通商口岸京師重地更非外省可比若倭人一開此端則各國條約向有一律照辦之語將接踵而至利權盡爲所攬况禁近之地彼族包藏

禍心設有倉猝不備之虞其患何堪設想夫中國之亟亟求和欲苟圖旦夕之安耳聞倭自興兵以來借國債至一萬五千萬元財力困窮人民愁苦不過強力債興外實內虛於此時而自謂戰不能勝償之以巨款賂之以土地割遼河而北洋爲所據割臺灣而南洋爲所據復駐兵威海以扼中權之要是倒持太阿之柄以授人而使之厚其力以圖我即欲求旦夕之安不可得矣方今泰西各國眈眈環向俄人虎視於西北英法狼顧於西南皆視我與倭之事以爲進退如此次曲徇其欲數年之內俄必索我天山南北及吉林黑龍江兩省英必索我前後藏地英與俄必爭索我烏梁海法必索我雲南廣西邊地禍變之興殆不旋踵歷觀往代割地

和親卑禮厚幣偷安未久覆亡隨之史冊所垂可爲殷鑒伏望我
皇上赫然震怒立絕和議布告天下臣民並各和好與國聲其
欺侮要挾之罪爲萬國所不容神人所共憤以償兵費之款養戰
士 嚴敕各將帥督撫效死一戰半年之內倭必不支即令戰而
不勝亦斷不能於從前失地外再失數千里疆土況 天威震疊
薄海同仇果能萬衆一心未有戰而不勝之理必待彼勢絀求和
然後定約則我 國家威棱遐暢自不敢肆其憑陵矣 臣憂憤迫
切謹披肝瀝膽昧死瀆陳不勝悚懼屏營之至謹專摺由驛五百
里馳 奏伏乞 皇上聖鑒訓示立賜 睿斷施行謹 奏

奏報桃汎安瀾摺

光緒二十一年四月初八日

奏爲黃河桃汎期內防護平穩恭摺具陳仰祈 聖鑒事竊查濟陽高家紙坊漫口合龍經 臣於三月十九日 奏報在案維時已屆桃汎 臣駐萊州行營未能親赴河工已分飭上中下三游各總辦加意嚴防並將應用稽料及時購備免致伏秋大汎屆期臨時失措茲據各總辦稟報三月十四五等日河水連漲二尺七寸十七日接漲一尺六寸上游南岸賈莊因北風大作逼溜南射浪淘溜滾將已廂之合字三十三埽搜蟄入水餘埽亦多坍塌斬莊孫樓各壩段段出險中游齊河北岸之五里堡王家窰歷城南岸潼溝等處埽壩均被搜淘下陷下游南岸之張王莊台子李家蝎子灣等處於十八日狂風陡作隄前淤灘全行刷去埽壩亦閒有蟄

陷均經各總辦督飭各員弁
口水消數寸及尺餘不等現
固堪以仰慰 宸廑除仍飭
事豫防以備夏令汎漲外所
合恭摺具 奏伏乞 皇上聖

奏招募鄉兵請飭部籌餉

再翰林院侍讀臣王懿榮由
弱諸軍又不得力王懿榮練
京當差等因欽此仰荷 聖
城臨大海爲東防最要之地

有七營外又添募三營以兩營分駐黃縣兵力本不甚厚如得王懿榮再練鄉兵十營分布可期周密惟東省餉項本極支絀前

奏請截留京協各餉經部議不能全截就現有各營籌計已屬萬分爲難若再添備十營之餉更屬無從羅掘前准戶部電撥王懿榮十營一月之餉仍係由山東藩運兩庫籌撥現在鄉兵尙未招募故此款亦未動支應否 敕部另籌的餉以便王懿榮招募成軍之處出自 鴻慈謹附片具 奏伏乞 聖鑒訓示謹 奏

奏山長孫葆田請獎片

光緒二十一年四月初八日

再臣維國家之治亂繫乎人心而風俗之轉移關乎教化士大夫不知崇禮義重廉恥則習尙波靡馴至無禮無學而禍亂以興其

有本身作則卓然爲方正有道之望者宜崇獎之以勵薄俗茲查有三品封職前刑部學習主事安徽宿松縣知縣孫葆田山東榮成縣進士由主事改就知縣歷任合肥縣知縣抑強扶弱有兩漢循吏風規光緒十五年乞假修墓開缺回籍前撫臣張曜延聘主講尙志書院已越六年躬行仁義不求聞達其教士以立身爲本不規規詞章之末出其門者率多尊聞行知有所表見於世以之振浮式靡師表人倫洵無愧色相應籲懇 恩施以示優異查有五品銜前直隸棗強縣知縣方宗誠經安徽學政臣貴恒保奏奉旨賞加五品卿銜又安徽敬敷書院山長庶吉士崔澄由安徽巡撫臣沈秉成保奏奉 旨賞加五品卿銜在案今孫葆田已得

有三品封職應如何 優加獎敘以資觀感之處出自 逾格鴻
慈非 臣下所敢擅請謹附片具 奏伏乞 聖鑒訓示謹 奏

奏東省添募勇營分別起支薪糧津貼摺

光緒二十一年四月初十日

奏爲東省第三次添募抽調改併勇營並挑兵巡防成軍各日期
分別起支薪糧津貼恭摺仰祈 聖鑒事竊臣於光緒二十一年
正月初四日承准總理各國事務衙門支電奉 旨本日據李秉
衡奏稱東省海防陸路非添募三十營不可現在東省陸防需兵
甚急着照請趕緊陸續招募藩司湯聘珍曉暢營務法越之役頗
著戰績現在募勇事宜即令就近經理俟募有成數或即飭令湯
聘珍統帶及屆時如何分防再由李秉衡奏明辦理欽此伏查東

省海防招募各營截至光緒二十年十二月爲止經臣彙案奏

聞在案惟是海防陸路地面綿長兵力單薄誠有防不勝防之勢

仰蒙 聖明洞鑒情形下懷曷勝欽感遵即恭錄行知藩司湯聘

珍並分行奏調各員招募勇營以期扼要布置茲據湯聘珍會同

善後局司道將海防添募抽調改併各營並內地陸續招勇挑兵

成軍彙案詳稱候補道丁達意所統河防河成右內地秦靖右兩

營勇額一律募足步勇每營五百名改爲海防營制調赴武定府

屬於二十一年正月初一日成軍都司喻文祿招募濟康後營步

勇五百名於正月二十九日成軍守備史鎮廷招募濟康前營步

勇五百名於二月初三日成軍喻文祿史鎮廷二營並紮武定一

帶防守副將杜榮秀管帶內地濟字前營步勇募足五百名與正任東昌營參將岳金堂管帶練軍左營馬隊一營均已抽調海防於二月初一日起支薪糧又撫標新募親軍衛隊一百名亦於二月初一日成軍提督夏辛酉添募東字中軍中前後步勇三營其中營一營於二月初一日成軍前後二營於二月十六日成軍萊州府知府彭念宸招募端字左右步勇二營於二月二十日成軍該二營現由沂州協副將曹正榜接統調赴日照縣海口防堵已革提督李定明招募定字中左右前後步勇五營其中左右三營於二月二十六日成軍後營一營於三月初二日成軍又將內地巡防之精健右營募足五百名改爲定字前營於二月初一日起

支海防薪糧已革提督孫萬林所統河成左營河定右營泰靖左營精健前營襄字前營福字礮隊左右二營共計七營留強汰弱併爲東字正軍中左右前後五營分守榮成文登兩縣要隘之處廣西補用副將王寶華接統副將曹正榜所帶東字中前後三營及已革總兵李楹所帶福字中軍中前後三營共六營亦併爲東字副軍中左右前後五營扼守甯海州等處查該營未併以前原係十三營均經奏報在案今汰去三營併爲十營所有薪糧俱於三月初一日分別住支起支候選道馬開玉招募開字中左右前四營其左右二營均於二月二十八日成軍中前二營暨另招馬隊一哨步隊一哨均於三月初六日成軍又將前已奏報成軍撥

歸孫萬林接統之濟字右營一營改爲開字後營共成五營併歸馬開玉統帶又廣西補用副將楊昌魁招募新魁中左右前後副前副中步勇七營業已督隊到東於三月初一日點驗成軍已革總兵李楹挑練膠州協步兵三百名添募壯勇一百名並將副將楊春發所募駐守青島礮臺業經奏報成軍之勇一百名共五百名編爲東字練軍一營於三月初二日分別練兵防勇起支糧餉津貼內地防營副將陳大勝招募濟康中營步勇一營副將官得祿招募濟康副中營步勇一營該二營均於二月十五日成軍德州營參將趙得華補募精健副右營步勇一營於二月十八日成軍曹州府知府毓賢招募佐字馬隊一營於三月初九日成軍亮

州鎮總兵田恩來添募濟字副中營步勇三百名連上年所招已報成軍之勇二百名合爲一營於三月初十日成軍又沿海之署招遠縣知縣許源清招勇四十名榮成縣知縣韓文朗招勇二百名文登縣知縣裘祖諤招勇二百名各於二月初一日起支海防口糧署甯海州知州陳毓崧亦招勇二百名於二月十六日起支海防口糧以上各營兵勇口分薪糧凡係海防營制即照奏定新章以成軍之日起支其內地防營各循東省舊章支給嗣後如有募補裁併隨時另詳辦理合併聲明等情彙案詳請 奏咨前來 臣覆查無異除咨部查照並呈報督辦軍務處外所有東省第三次添募抽調改併勇營並挑兵僱勇巡防成軍各日期分別起支

薪糧津貼緣由理合彙案恭摺具陳伏乞 皇上聖鑒訓示謹

奏 光緒二十一年四月二十六日奉 硃批該部知道欽此

奏送盧昌詒引見摺 光緒二十一年四月二十日

奏爲特保 賞還原銜之司員才堪任用恭摺仰祈 聖鑒事竊

維圖治以得人爲本人才因磨鍊而成方今時事艱難需才愈亟

臣受 恩深重日拳拳於以人事君之義雖一命之吏遷謫之員

莫不留心訪察其有才品可信者亟思拔滯振淹以備 國家之

用茲查有前吏部文選司主事盧昌詒在山東河工數年臣稔知

其才力可用光緒二十年十月赴京隨班祝 嘏奉 旨賞還原

銜經臣於十二月二十二日 奏請留營差委奉 旨允准欽遵

在案該員學粹品端通達治體留營以來昕夕籌防深資臂助值
危險艱難之際能持以定識定力洵爲緩急可恃之才臣賦性迂
拘深惡夫見好市恩之習嘗慨流品日雜幾於隨地皆材及歷試
以事高明者半涉浮夸愿樸者率少幹濟求如該員之精明沈毅
嚴操持以貞素志通今古以濟時艱實屬不可多得臣旣眞知灼
見未忍聽其置散投閒合無仰懇 天恩俯准由臣給咨送部引
見應如何 破格錄用之處出自 鴻慈臣爲愛惜人才有裨
時務起見謹專摺具 奏伏乞 皇上聖鑒訓示謹 奏 光緒
二十一年五月十五日奉 硃批盧昌詒著交吏部帶領引見欽
此

奏請免加東軍柴草銀兩片 光緒二十一年四月二十日

再前准 欽差大臣劉坤一咨開現在關內外柴草極貴查照湖南撫臣吳大澂津貼章程每營每月另給柴草銀二百兩咨行查照等因自係爲體恤兵勇起見查東省海防各營上年經臣 奏定章程照從前海防成案每勇月支口糧銀三兩六錢本年二月准劉坤一咨 奏加津貼米價四成已通飭海防各營遵照現在司道各庫款項奇絀每月應發軍餉籌措萬分爲難若再加柴草銀兩餉力實有未逮據善後局司道會詳前來 臣查東省餉項支絀本係實在情形前加米價銀兩各營將士已莫不感戴 皇仁所有東軍柴草銀兩礙難一律照加以示樽節除咨部外謹附片

陳明伏乞 聖鑒謹 奏

奏查覆武弁李承卿被參各節摺

光緒二十一年四月二十日

奏爲武弁被參各節查無實據謹將酌擬懲辦情形據實覆陳恭摺仰祈 聖鑒事竊臣於光緒二十一年二月二十六日在萊州營次承准軍機大臣字寄二月二十一日奉 上諭有人奏山東掖縣補用都司武生李承卿勾引匪徒王作仁等數百人聚集海濱號以網魚爲業強奪地畝淫掠婦女附近鄉莊受其荼毒請飭究辦等語現值海氛不靖匪徒乘機滋事亟應密速捕拏消患未萌著李秉衡飭屬將李承卿等首從各犯嚴拏務獲懲辦以靖地方原片著鈔給閱看將此諭令知之欽此遵即檄飭萊州府掖縣

知縣楊德成並留營差委之前甯海州知州陳壽清將李承卿等按名查拏到案一面密查附近鄉民有無受其規害情事茲據楊德成等稟稱遵照原參將李承卿王作仁拏獲到案分別審訊並派人各處訪察查李承卿掖縣西絲疇人由武生投効甘肅嵩武軍累保花翎都司加遊擊銜王作仁係單山疇人張貞順係平里店人與李承卿素相認識均無潛結匪徒聚衆橫行之事如原奏所稱強奪吳姓鍋場地段一節案查光緒十八年二月縣民吳連英以祖業煎鹽鍋場被王作仁等開墾耕種控經西絲場大使龔心泉傳訊未結吳連英復以王作仁勾結勢豪李承卿霸種場地等情控府經萊州府知府彭念宸批縣訊斷前代理掖縣知縣謝

端訊明王作仁等所種該處地畝業已二百餘年有歷年完糧串據並以吳連英既稱鍋場必有鍋牌當向追驗吳連英稱鍋牌已於道光年間被水漂沒無存謝端因其毫無證據斷令王作仁仍照舊耕種吳連英如能將鍋牌查獲呈驗仍准控追取結完案吳連英復以李承卿架訟控府該府以案經訊結未究此強奪鍋場之並無實據者也原奏又稱擄去潘俊十四歲女及劉克全劉縫工妻女亦被淫掠一節案查光緒十一年五月據縣民潘俊呈控伊欠李承卿錢六十千遂赴關東貿易遺有子女二人住房四間李承卿將伊子女逐出家具房屋全行霸佔經前署縣郭道清訊據李承卿供稱潘俊借伊京錢二百千以房四間作抵立有當契

郭道清斷令潘俊還錢二百千贖房完案十二年潘俊復以霸房逼命等情京控經都察院咨交前撫臣張曜發交臬司批府提案訊明李承卿並無霸房逼命情事惟潘俊欠伊京錢二百千未還李承卿情願讓錢一百四十千當令李承卿先還房屋再由潘俊還錢六十千詳銷完案現在潘俊已赴關東查潘俊原呈並無擄去幼女字樣其劉克全劉縫工均查無其人亦未聞有劉姓妻女被人淫掠之事此淫掠婦女之並無證據者也其王作仁張貞順二名訊明均無不法情事任茂盛向係出外貿易無從查傳至海中捕魚向用大網每網須用百餘人沿海各處皆然實無別項聚衆滋事等情稟請核辦前來臣查李承卿向以網魚爲業既無聚

衆不法案情自難目以規盜其被控與吳姓架訟及霸佔潘俊房屋兩案迭經府縣訊明亦非地方官不爲辦治原奏自係傳聞之訛惟李承卿旣身係職官宜如何安分守法乃於吳連英與王作仁控爭鍋場一案輒敢干預詞訟潘俊外出未歸逼令其子女立時出屋其平日之武斷鄉曲恃符妄爲已可概見人言藉藉實非無因未便因無爲匪實據遂予寬縱應請將花翎遊擊銜補用都司李承卿即行革職交地方官嚴加管束毋任滋生事端其王作仁張貞順任茂盛三名旣無劣跡應請無庸置議任茂盛早經外出亦請免追所有遵 旨查明都司李承卿並無聚衆滋事實據及酌擬懲辦緣由理合恭摺具 奏伏乞 皇上聖鑒訓示謹

奏

奏因病籲請開缺摺 光緒二十一年四月二十二日

奏爲病軀難膺疆寄籲懇 天恩俯准開缺調理恭摺瀝陳仰祈

聖鑒事竊臣自光緒十年在護理廣西巡撫任內久駐龍州積

受瘴淫兩骸重墜兼患咯血之疾仰荷 聖慈准臣開缺調理數

年以來多方調治迄未就痊上年四月蒙 恩擢授安徽巡撫深

維時事艱難不敢自安暇逸力疾入都 陛見七月復奉 命調

撫山東時軍務方興受事未久即籌防至海上舉凡選將練兵籌

餉購械諸務叢集臣知慮短淺竭蹶不遑因之舊疾增劇咯血愈

多夜不成寐精神疲茶步履維艱衰病情形爲東省官民所共見

祇以海氛戒嚴

令起家蒙 皇

福薄菑生養病

茲 寵眷即捐

敢遽萌退志無

巡撫事繁責重

稍鬆兼以黃河

誤事機再四思

山東巡撫俾臣

報 天恩於萬

慈鑒所有微臣因病願請開缺緣由謹專摺具 奏伏乞 皇
上聖鑒訓示謹 奏 光緒二十一年五月十五日奉 硃批著
賞假一個月毋庸開缺欽此

奏保前臺灣布政使于蔭霖片

光緒二十一年四月二十二日

再查有前臺灣布政使于蔭霖清勤直諒爲守兼優其任事一本
血誠絕無粉飾瞻徇之習上年奉 旨發交依克唐阿軍營差遣
是其才堪任使已在 聖明洞鑒之中臣與該員誼屬葭莩兼同
里閭深信其德性堅定剛正不阿而忠 君愛 國之忱未嘗以
窮達異致倘荷 恩施錄用必能有裨時務不至碌碌無所短長
臣知之既真敢援內舉不避之義冒昧上陳伏乞 聖鑒謹附片

具奏 光緒二十一年五月十二日奉 硃批于蔭霖著交吏部帶領引見欽此

奏登州鄉團出力擬請獎卹摺

光緒二十一年四月二十七日

奏爲登州鄉團出力擬請分別獎卹以資鼓勵仰祈 聖鑒事竊自去歲倭寇犯順海疆戒嚴 臣秉衡於到任之後即札飭登萊各屬舉辦團練 臣懿榮於今年正月奉 旨回籍辦理登州團練二月到籍倭氛未靖周歷十屬查勘情形今先後查得文登一縣團長揀選知縣于霖逢廩生林基達平日倡辦團練最屬認真聯絡城鄉合爲一氣揣知夷情叵測預爲堅壁清野之謀凡有大兵過境先時置備糧草平價公賣使兵無缺使民無擾復於本年正月

於該城失陷之際衝鋒不避力持危局團局積存火藥倉猝難以
蓋藏乃於各廂中暗置機捻倭賊果然搬移觸發立時轟斃十餘
人因之不敢逗留林基達素有孝行兼饒勇畧此次昏夜大雪之
中暗探內外消息來往奔告營伍糾合鄉衆相機誘勦單人獨騎
爲賊所遇死事甚烈以上二員爲登州十屬辦團之冠黃縣一縣
團長前任廣東封川縣候選知縣山民四品銜候選員外郎丁世
常候選訓導王常益四項統選教職丁庭聞等於該城危急之時
勸捐銀至七萬七千餘兩之多募備鄉勇一營并招鄉兵兩營稟
請臣秉衡派員管帶晝夜堵禦挖造地營衣不解帶備極辛勞臣
等查勘得實合無仰懇 天恩俯賜獎卹俾生者有所振興死者

不至泯沒庶幾衆志成城不畏險難以深觀感以資鼓勵擬請將
揀選知縣于霖逢保歸勞績知縣班不論雙單月遇缺選用並
賞加同知銜廩生林基達擬請 飭照縣丞陣亡例議卹前任廣
東封川縣候選知縣山民擬請 賞加同知銜四品銜候選員外
郎丁世常擬請 賞換道銜訓導王常益教職丁廷聞二員擬請
賞加光祿寺署正銜臣等爲振作士氣鼓勵人材起見是否有
當謹合詞繕摺具陳伏乞 皇上聖鑒再此摺係臣懿榮主稿會
同臣秉衡辦理合併陳明謹 奏 光緒二十一年五月十九日
奉 硃批該部議奏欽此

奏提督夏辛酉登防不可輕離片

光緒二十一年五月十八日

再查登州地居險要爲海防形勢所必爭郡城瀕臨大海毫無屏蔽防守頗屬不易提督夏辛酉樸誠廉正謀勇兼優上年十二月二十三及本年正月初一等日倭船迭攻登州礮彈環施城內人民廬舍多被傷燬勢已岌岌不可終日該提督持以鎮靜嚴督所部各營晝夜守禦危城賴以保全其治軍恩威互用與士卒同甘苦而紀律嚴明信賞必罰遠近翕然稱之上年十一月丁承重憂經臣奏請留營奉 旨允准欽遵在案近又請回籍終制臣復再三挽留現在雖已停戰而登州防務揆之局勢實無已時該提督膽識過人臨變不亂兵民無不信服求之諸將中實屬不可多得登州地方緊要該提督之去留於一郡安危大有關係臣爲慎

重地方起見謹附片具陳伏乞 聖鑒謹 奏 光緒二十一年

月 日奉 硃批夏辛酉著仍留登州辦理防務欽此

奏明保山西候補知府錫良片光緒二十一年五月十八日

再地方多事講求吏治固在得賢牧令尤須得賢道府道府果賢則所屬州縣必皆爭自濯磨即品類不齊亦可因以轉移有關治理洵非淺鮮查補用道山西候補知府錫良廉正樸誠實事求是愛民勤政屢膺薦章光緒十八九年山右七廳千餘里大災該員總理賑務奔走救死經營勞瘁多人所不能堪因得全活無算鄰省咸爭道弗衰去年冬經 臣奏調來東委以營務處差使實心任事罔恤險危現在戰事雖停仍應俟大局稍定再飭令回晉值此

時艱孔亟各省地方營務察吏懲奸無一不急待整頓非習氣全無賢能卓著之道府爲之表率振作難期有濟臣曾與錫良同官晉省現復倚以軍事知之甚深當此需才孔亟應如何 恩施存記破格錄用之處出自 高厚鴻慈謹附片具陳伏乞 聖鑒謹奏

奏陳曹州府屬勦辦土匪情形摺

光緒二十一年五月十八日

奏爲續陳曹州府屬勦辦土匪情形恭摺仰祈 聖鑒事竊臣於光緒二十一年三月二十九日將遵 旨緝勦曹州府屬土匪情形專摺具 奏並聲明俟毓賢辦有端緒隨時奏陳四月十八日奉到 硃批知道了仍著飭令毓賢責成各州縣認真緝捕如有

295-1

大股匪徒立即派兵勦辦餘依議欽此伏查曹州府屬匪徒肆擾
爲害閭閻臣懷遵疊奉 諭旨嚴飭曹州府知府毓賢會督副將
陳大勝等各營合力搜捕並嚴明賞罰諄飭各州縣認真緝捕不
准稍事諱飾迭據毓賢稟報自二月至四月先後捕獲匪犯一百
餘名其聚衆抗拒者當場格斃數十名御史管廷獻所奏桿匪岳
二米業經格斃其河南睢州王橋地方被劫案內之盜犯謝五瞎
子等十名經毓賢押帶至河南舊考城地方會同睢州知州王枚
將該犯等就地正法其餘分交各地方官研訊明確分別按例懲
辦彙案奏報復由毓賢督同單縣參將岳金堂守備史鎮廷各帶
營勇會同河南提督武朝聘總兵郭廣泰參將李如海帶領豫捷

等營於四月初十日齊至豫東交界地方會商緝捕分道巡哨以後無論豫境東境如有賊匪肆劫均即督派隊伍跟蹤追拏越境勦捕毋得稍存畛域經此次痛懲之後各桿匪或改名匿迹或逃赴外省遠避現在各營勇星羅棋布地方漸就安謐惟轉瞬高粱芄茂土人名爲青紗幃匪徒最易藏身仍當隨時設法搜拏不得以已經捕拏解散稍事因循致貽後患至鐵布衫會匪據毓賢稟稱本年正月間有外來匪徒傳習練氣邪術自謂刀砍不能傷名曰鐵布衫又曰同心曾經該府出示嚴禁並查拏傳教之人又聞曹單一帶有多鐘罩大刀會名目復加懸重賞嚴密查拏總期不致另滋事端除仍飭毓賢督同各營員州縣認真緝捕如有大股

295-1

匪徒立即派勇剿辦毋許稍涉疏懈並將出力弁勇分別記獎給賞以資鼓勵仍慎選牧令教養勸懲務以培本清源爲急外所有曹州府屬續辦搜剿土匪緣由理合恭摺具奏伏乞皇上聖鑒訓示謹奏

光緒二十一年 月 日奉 硃批另有旨 欽此

奏請弛禁沿海糧食照常販運出入片

光緒二十一年五月二十日

再查山東沿海一帶居民度日大率疏食自甘食麥之家十不獲一所產麥豆粟米全行出口易換粗糧自上年秋間海氛不靖遵旨嚴禁內地米糧出洋濱海窮民未能以細易粗食用因之不給現在業已停戰二麥將次登場若非糧販流通不足以蘇民困

據東海關監督稟請具 奏弛禁前來臣覆查無異合無仰懇

天恩俯念民艱將東省沿海麥豆雜糧准其照常販運出入以利

民生出自 鴻慈謹附片具陳伏乞 聖鑒訓示謹 奏 光緒

二十一年閏五月初九日奉 硃批著照所請該部知道欽此

奏協濟直隸賑銀五萬兩片 光緒二十一年閏五月初十日

再接准署直隸督臣王文韶電稱連年 畿輔水災積困今春大

雪種耕失時復經海嘯蕩爲澤國百萬嗷鴻呼號望賑飢民游勇

雜處尤應撫綏囑即勸捐接濟等因臣維勸官勸商徒滋紛擾且

恐曠日持久難成鉅款東省雖當海防工賑兼籌財力匱乏而現

在幸尙粗安義應恤鄰濟困矧以 邦畿之重情形之迫不得不

移緩就急勉籌協濟當經商同司道在於局存義賑項下提撥銀五萬兩委員解赴直隸總督衙門交納以濟賑需除咨部查照外謹附片陳明伏乞 聖鑒謹 奏 光緒二十一年閏五月二十六日奉 硃批戶部知道欽此

奏陳已革道員李耀南才堪任用摺

光緒二十一年閏五月十九日

奏爲遵 旨察看已革道員才堪任用恭摺覆陳仰祈 聖鑒事

竊臣於光緒二十一年正月二十六日承准軍機大臣字寄正月二十一日奉 上諭有人奏已革道員李耀南前在軍營屢著戰功請破格錄用等語李耀南前經左宗棠奏參革職永不敘用獲咎較重現因軍務需材屢次有人保奏著發往李秉衡軍營由該

撫認真察看是否可備差委如果不堪任用即著驅逐回籍毋稍遷就將此諭令知之欽此仰見 朝廷愛惜人材於節取之中復寓慎重之意欽服莫名旋據革員李耀南到 臣萊州行營 臣詳加察看該革員議論頗有見地辦事亦甚穩練洵屬有用之才溯查該革員自咸豐年間隨同故大學士 臣曾國藩左宗棠轉戰數省敘功累保二品頂戴浙江補用道經左宗棠奏調出關改留陝西統帶恪靖輔軍節制各營疊著勞績同治九年左宗棠以該員不遵調度任性妄爲奏參革職永不敘用嗣經前四川總督 臣丁寶楨保奏未奉 俞旨左宗棠旋亦深惜其才留哈密聽候差委後左宗棠奉 旨入京經新疆巡撫 臣劉錦棠保奏復經部駁光緒

二十年十月赴京隨班祝嘏奉 旨降二等賞給職銜經人保
奏欽奉 諭旨交臣察看臣維李耀南自獲咎後二十餘年深自
斂抑光緒十三年詣前撫臣張曜條陳治河情形上年到京又條
陳勦寇固藩事宜經都察院具奏其留心時務頗有可取當其壯
年氣盛容有不自檢束之處一經挫折怨艾旋生今已年逾六十
矣其跡弛之氣漸就範圍數月以來臣聽言觀行已悉得其梗概
方今宿將凋零文臣中知兵之員尤不多覩該革員於軍事頗有
閱歷若使之躬列行陣當能運籌決策有裨戎機似未便任其廢
棄茲既欽奉 諭旨交臣察看其才力實堪任用理合據實上陳
可否 恩施錄用之處出自 鴻慈謹繕摺具 奏伏乞 皇上

聖鑒訓示謹 奏

奏懇續假摺 光緒二十一年閏五月十九日

奏爲 微臣假期屆滿病體未痊現當事故紛乘仍應力疾經理懇

恩續假一箇月恭摺仰祈 聖鑒事竊臣前以病軀難膺疆寄

奏請開缺五月十五日在萊州營次奉到 硃批著賞假一箇

月毋庸開缺欽此跪誦之下感激涕零伏念臣衰病侵尋已非朝

夕自去秋履任後籌辦海防軍務倥傯未能靜攝比荷 聖恩賞

假調理多方醫治仍未見效深恐久尸高位貽誤疆圻擬再瀝下

忱籲懇 聖慈准臣開缺適聞榆關內外遣撤各營不日道出東

境曹濟素多匪類慮或勾結爲患省中司道又多更動已電請總

理衙門代 奏力疾回省經理正在料理啟行又聞威海暫駐日
本軍隊倭員多所要挾民心惶惶懼釀他變應暫留萊州部署一
俟事有端緒再行回省 天恩高厚時局艱難雖久困膏肓但使
暫可支撐猶當竭力圖報所有病體未痊懇請續假一箇月緣由
謹繕摺具 奏伏乞 皇上聖鑒訓示謹 奏 光緒二十一年
月 日奉 硃批著再賞假一箇月欽此

奏委署司道各缺摺 光緒二十一年六月初二日

奏爲司道各缺分別遴員署理飭赴新任以專責成恭摺仰祈
聖鑒事竊准吏部咨疊奉 上諭奉天府府尹著松林補授山東
按察使著松壽補授陝西督糧道著姚協贊調補毓賢著補授山

東兗沂曹濟道各等因欽此欽遵知照分行在案臣查新授按察使松壽到東尙需時日自應遴員接署臬篆以便松林交卸北上查有候補道沈廷杞遇事講求能任勞怨堪以署理新授兗沂曹濟道毓賢應即飭令赴任供職以便姚協贊交卸前赴調任除分檄飭遵並咨部查照外謹恭摺具奏伏乞皇上聖鑒謹奏

光緒二十一年 月 日奉 硃批吏部知道欽此

奏錫良暫緩赴沂州府知府任片

光緒二十一年六月初二日

再山西候補知府錫良蒙 恩簡放山東沂州府知府即應飭赴新任惟該員自 奏調來東即委辦臣軍營務多所匡襄現雖防務稍鬆仍未就緒沿海千數百里未敢弛備應暫留該員綜理一

切以資熟手一俟局勢粗定再行飭令赴任謹附片陳明伏乞

聖鑒訓示謹 奏 光緒二十一年 月 日奉 硃批吏部知道欽此

奏順天運米平糶限滿照常納稅片

光緒二十一年六月初四日

再臣維稅釐裕餉平糶濟民二者緩急相權亦須明定限制良以商販借名平糶往往灑賣漁利卒至鮮裨民食轉匱餉源是以臣前次 奏明自本年二月起至前五月底止四個月限內稅釐免徵核計順直招商購糧過境不下二百餘萬石限滿之後本應照常辦理惟又經順天府府尹 臣招商運米平糶 奏准寬免稅釐予限兩個月停止自應欽遵即以本年五月二十二日奉 旨之

日起限連閏扣至六月二十三日兩個月限滿凡有販運米麥雜糧無論護照限期遠近經過東省沿海內地關卡均應照常完納釐稅以副造報除咨部查照外謹附片陳明伏乞 聖鑒謹 奏
光緒二十一年六月二十日奉 硃批戶部知道欽此

奏規復河防營舊制摺 光緒二十一年六月十五日

奏爲規復河防營舊制分別支餉日期以清界限恭摺仰祈 聖鑒事竊查東省原設河防八營分爲河定前左右後四營河成前左右後四營光緒十四年河定後營改爲河定中營與各土夫營分段防汎均由河防局支餉嗣因隄長人單不敷分布添調精健營精健前營濟字前營右營秦靖中營右營協同防守均由善後

局支餉歷經分別造報在案上年倭氛不靖海疆戒嚴精健等營及河定右營河成左營右營先後調赴海防並另募秦靖一營裁撤原調河定中營悉照海防營制每營募足勇五百名經臣彙案奏明各於成軍之日起支薪糧雇用長夫統由善後局支發至河定河成等三營河防底餉已由河防局發至年底止分別截清造報現在海防已鬆河防喫緊自河防各營調赴海防後改爲東字正軍者二營裁撤者一營連現駐韓家垣海口之河成右營僅剩河防五營伏汛正臨水勢有長無消亟應規復八營舊制以資修防所有裁撤之河定中營即以調回遊擊趙得發所帶東字正軍左營改補爲河定後營自本年五月十六日到工又以副將彭

全福原帶齊河土夫營改補爲河定右營參將楊振興原帶濱州土夫營改補爲河成左營俱自本年六月初一日到工以上改補三營復還原設河防八營之數該三營所需月餉各以到工之日起均由河防局支發統照河防營制餉章以三百人爲一營多餘人數暫作土夫俟霜清後再行裁撤其調回東字正軍後營本爲精健前營所改與調回濟字前營從前同在河工協防今仍其舊自本年五月初一日起統照內地營制餉章由善後局支餉以清界限據河防局善後局司道會同詳請 奏咨立案前來 臣覆查無異除咨部查照外所有規復河防營舊制分別支餉日期緣由理合恭摺具陳伏乞 皇上聖鑒謹 奏 光緒二十一年七月

初二日奉 硃批該部知道欽此

奏伏汎盛漲通工搶護情形摺

光緒二十一年六月二十二日

奏爲伏汎期內黃河水勢盛漲謹將通工搶護情形並利津縣尾閘之呂家窪地方漫溢成口恭摺具陳仰祈 聖鑒事竊查山東黃河岸窄河淤每當大汎屆臨處處險要臣因籌辦海防駐萊州營次迭飭上中下三游總辦道員轉飭營委各員寬備料物認真防護夏至以後閏五月初八九等日黃水漸長迨節交庚伏大雨連綿水勢暴漲通工紛紛報險據上游總辦兗沂道姚協贊稟報北岸壽張縣屬之影塘廖家橋小劉莊南岸之賈莊雙合嶺藍路口等處埽壩均有沖失陽穀之劉新石莊水漲出槽漫過順河小

埽倒漾南趨壽張黑虎廟堡逼近隄根復將十里堡子埽漫開入河大隄幸未傷損其沖失之埽壩已一律廂修完固又據中游總辦署濟東道李希杰稟報北岸東阿之陶城埠長清之枯河黃陡崖譙莊齊河之曹家營南壇王家窑歷城之史家塢南岸長清之北店子楊莊歷城之小魯莊霍家溜濰溝章邱之胡家岸等處埽壩均淘刷墊陷胡家岸爲舊合龍處形勢挺入河心大溜頂沖兜底翻花更稱奇險均經督飭營委分投搶廂拋石捍禦幸保無虞又據下游總辦候補道丁達意稟報北岸濟陽之葛家店張辛莊濱州之清河鎮隄上李家邵家王平口打魚崔家北鎮賈家趙家寺陽溝朱家宋家集利津之東關宮家棊家夾河王莊鹽窩孟莊

南岸之王旺莊楊家河等處或埽壩平墊或隄身坍塌均經搶廂
平穩惟南岸蝎子灣地方因對岸生灘河流南徙大溜緊射隄根
閏五月十四五等日下段各埽被急溜沖捲入水隨廂隨走迤上
六十餘丈銜接各埽三四日間沖失殆盡新做之埽因溜勢洶湧
追壓不穩隄身刷塌二十餘丈丁達意飛調河成前後右等營幫
同承防之秦靖中營漏夜搶廂並於迤上各工段撥濟稽料椿繩
兼令民夫沿隄伐取柳枝蒲葦以濟稽料之不足時值大雨連宵
達旦無處取土隄身坍塌僅存一綫丁達意露立危隄督同營委
各員暨濱州知州張承燮嚴飭弁勇民夫搶築後戩晝夜不息雖
老隄塌盡而新戩漸次廂寬可以下椿廂埽計此一處用過稽料

四百餘萬觔自閏五月中旬至六月十二日竭二十餘日夜之力幸獲保全實爲始念所不及料六月十七日又據丁達意稟報利津鐵門關迤上之八里莊呂家窪地方向本無工舊有淤灘爲竈商春運之廠此次盛漲溜忽北滾將淤灘淘刷淨盡浸及隄根因該處向來無工故未購備稽料該營委伐柳枝挂護並商各竈戶買土加築後戩初九初十等日風雨交加溜力愈猛柳則隨挂隨走隄則愈塌愈寬幫隄民夫因雨大風狂跼立不住營勇搶護不及遂於十二日漫溢成口刷寬五六丈深處三丈及一二丈不等水由正北入海橫流倒漾寬約十餘里幸距海不遠大小村莊只十二處再下六里即無大隄七八里以外即係海灘無人烟之

處正東二十里係曬鹽灘池該處向有攔黃大壩倒漾之水僅淹小灘池十餘座其餘有護池埝者均未進水現飭於東西兩壩盤築裏頭以免續塌此次漫口丁達意因在蝎子灣督率搶險未暇兼顧且該處係出海尾閘與棄守之地無異合無仰懇 天恩免其參處管帶秦靖中營遊擊朱康仁承防候補知縣乙沛恩分防候補巡檢陳式毅均因鹽窩王莊兩處同時出險該處係無工地方以致搶護不及惟疏忽之咎究屬難辭應請 旨交部議處臣未能駐工督率致有疏失應請一併 交部議處現在甫屆立秋汎漲之日方長謹當嚴飭各總辦加意防護力保完善之區期仰副 朝廷慎重河防至意所有伏汎盛漲通工搶護情形並利津

尾闕之呂家窪漫口緣由理合恭摺具奏伏乞 皇上聖鑒訓示
謹 奏 光緒二十一年 月 日奉 硃批另有旨欽此

奏揀員請補省會道缺摺 光緒二十一年六月二十二日

奏爲揀員請補省會道缺以裨地方恭摺仰祈 聖鑒事竊照濟

東泰武臨道張上達經臣 奏准開缺回籍修墓所遺員缺係繁

難外題要缺例應揀員請補該道統轄濟南等四府一直隸州幅

員遼闊政務殷繁黃河白東阿縣以下多係該道轄境必須明幹

有爲熟習情形之員方能勝任臣督同藩臬兩司詳加遴選非人

地不宜即資格較淺惟查有二品頂戴署理鹽運使司候補道吉

燦升現年五十八歲係陝西同州府韓城縣人由優廩生考取咸

豐辛酉科拔貢 朝考以知縣用籤掣山東同治三年二月到省
因勦賊防河出力經前撫臣閣敬銘保奏五年十月奉 上諭著
俟補缺後以知州儘先補用先換頂戴並 賞戴花翎欽此七年
因勦梟防河出力保准免補知縣以知州補用又東省肅清案內
奏保補缺後以知府用先換頂戴九年題補平度州知州十年正
月到任光緒六年舉行大計保薦卓異七年捐助晉賑奏加三品
銜八年經前撫臣任道鎔以經徵錢糧五萬兩以上於奏銷前九
載全完奏保俟補知府後以道員用十年六月丁本生母降服憂
開缺回籍守制十一年十二月起復回東以知府候補因堵築姚
家口壩工合龍出力奏保俟歸道員班離知府任後加二品頂戴

十五年經前撫臣張曜以堵築張村大寨西紙坊等處漫口合龍出力奏保免補本班以道員補用十六年八月奉 旨依議欽此九月委派會辦河防事宜給咨赴部引 見奉 旨著照例用欽此十七年九月以道員到省一年期滿經前撫臣福潤甄別咨部堪以本班補用十二月委派總辦河防局事宜二十年八月委派會辦賑撫賑捐總局事宜九月委署濟東泰武臨道篆務十一月卸事二十一年五月委署鹽運使司篆務該道先後署理道篆運篆均能措置裕如河工亦素稱諳練在東二十餘年深資得力查該員勤廉慎審實力實心以之請補濟東泰武臨道員缺實堪勝任與例亦屬相符合無仰懇 天恩俯准以二品頂戴現署鹽運

使司候補道吉燦升補授濟東泰武臨道期於吏治河工兩有裨益臣爲要缺擇人起見如蒙 俞允該員保歸道員後業經引

見今請補斯缺毋庸再行送部亦毋庸聲敘參罰合併陳明謹會同河東河道總督臣許振禕合詞恭摺具陳伏乞 皇上聖鑒訓示謹 奏 光緒二十一年 月 日奉 硃批吏部議奏欽此

奏查明知縣被參各款摺 光緒二十一年六月二十二日

奏爲遵 旨查明知縣被參各款據實覆陳恭摺仰祈 聖鑒事
竊臣於五月三十日在萊州營次承准軍機大臣字寄光緒二十一年五月二十五日奉 上諭有人奏酷吏殃民請飭查辦一摺

據稱山東平原縣知縣王之幹殘酷貪暴於軍情緊急之時奉飭辦團延不舉辦任川劣幕丁書需索各項陋規又因案勒贖匿災不辦聽信惡役誣良爲盜浮收漕米侵吞入己以致民怨沸騰等語著李秉衡按照所參各節確切查明據實具奏毋稍徇隱原摺著鈔給閱看將此諭令知之欽此遵即遴委妥員改裝易服至平原縣城鄉各處嚴密訪查謹將所得實情敬爲 皇上陳之如原參奉飭辦團匪而不辦一節臣去秋通行各屬辦團查王之幹奉札後即傳各莊首事議辦今春又請各紳董催辦各莊以籌集團費聚議未定該員係署事官以交卸在即未能認真嚴催以致迄未辦成又原參任用劣幕喻秉彝門丁孫順書吏閻世信祁省三

上下其手地畝稅契勒至十分稅川上馬折價名目各節查幕友
喻秉彝訪無實在劣跡門丁孫順該員在任時即已斥去書吏閻
世信祁省三充該縣戶南房稅契係其專管該吏承王之幹之意
催稅稍急則有之仍係循照舊章並無勒至十分之說亦未聞有
上馬折價名目又原參審理劉西元耿泮藻任于翰之案勒賊千
餘串及數百串不等各節查該縣張王莊鄉民劉西元因家事涉
訟王之幹罰令出京錢一千串充地方公用文生任于翰住縣屬
紙坊莊因有人在莊賭博誣害被押丁差等向索京錢六百餘串
始准取保釋放任于翰曾赴臬司呈控由司行府委員會訊完案
是原參勒賊之案實非無因至耿泮藻係該縣承發房因原管里

分被佔涉訟王之幹斷與他人耿津藻里分已失其不至再行用
賄尙屬可信又原參該縣去秋被災甚重既不辦理蠲免反將上
控災戶概加毒刑聽信惡役陳德和下鄉放槍轟打良民以田水
清等多名誣良爲盜一節查王之幹上年八月下鄉勘災至飲馬
店以報災過重將該莊首事宋煥趙西海兩人責打又至小李家
寨因報災未准該莊鄉民言語頂撞該員將莊長李在圃等帶縣
責押鄉民赴府控訴發交該縣訊辦後經各莊首事保出尙無上
控災戶概加毒刑之事其勘准報災各莊已詳報辦理蠲緩在案
快班陳德和兼充捕頭隨同下鄉當莊民聚衆環求該役持槍恐
喝實有其事田莊民人田水清等被押因傳聞通同夏津盜首王

三騙子後查明並無其事經首事取保釋放原摺所稱誣良爲盜殆由於此又原參加倍浮收漕米應完一斗者要二斗六升又外添有斛尖揚盤名目浮收者盡侵吞入己一節查該縣徵收漕米與歷前任徵收數目相等並非該員加增亦未另添斛尖揚盤名目至原摺所稱上年被災村莊其已完之米雖未起運開兌緩在今歲應查明被災村莊該米若干飭糧道將原米運回令花戶具領一節查該縣勘災係在八月收漕係十一月其報災未准各莊照舊完漕已運德州交兌無可運回自無從變通辦理以上所查各節雖不免有傳聞失實之處而該員於民間詞訟違例科罰又信任丁差以致在外訛詐毫無顧忌民間報災希圖捐緩即所報

未能盡實亦應好言撫慰乃竟任意責押致民間嘖有煩言實屬
玩視民瘼茲既訪查得實未便姑容相應請 旨將前署平原縣
知縣候補知縣王之幹即行革職家丁孫順已經該員斥逐書吏
閻世信等飭接任知縣查明有無劣蹟另行稟明核辦所有覆查
知縣被參各款請 旨懲處緣由理合恭摺具奏伏乞 皇上聖
鑒訓示謹 奏 光緒二十一年 月 日奉 硃批另有旨
欽此

奏道員李清和委辦上游河工片

光緒二十一年六月二十
二日

再兗沂曹濟道姚協贊調補陝西糧道曹州府知府毓賢新授兗
沂曹濟道分別飭赴新任業經 奏明在案所有上游河防向由

該道督辦惟道屬管轄遼闊素稱盜藪毓賢緝捕勤能聲威久著
應專責督辦三府一州盜賊以靖地方若再令綜理工防勢必顧
此失彼自應另派接管茲查候補道李清和精審幹練任事實心
曾在河工當差多年情形極爲熟悉堪以督辦上游河工除檄飭
遵照並咨部外理合附片具陳伏乞 聖鑒謹 奏 光緒二十
一年 月 日奉 硃批知道了欽此

李忠節公奏議卷八終

李忠節公奏議卷九

奏臺莊營參將員缺緊要揀員擬補摺

光緒二十一年七月初三日

奏爲陸路參將員缺緊要揀員擬補額懇 特旨允准以裨地方

恭摺仰祈 聖鑒事竊照臺莊營參將張福興因積勞歿於防次

經臣奏請從優議卹奉 旨著照所請該部知道欽此仍又循例

恭疏 題報開缺聲明遺缺容臣揀員請補在案伏查此缺係陸

路題補第三輪第一缺輪用儘先人員該參將駐紮嶧縣臺莊轄

境遼闊水陸交衝且與江南徐海處處毘連盜賊鹽梟出沒靡常

本年春間因海防戒嚴該處土匪即思乘隙蠢動雖經東豫江南

三省會合搜捕首惡多已殲除而伏莽總未盡絕目前操防巡緝

迥異平時必須精明幹練熟悉情形之員方足以資控馭臣於儘先候補參將內逐加遴選惟查有副將銜儘先補用參將沙明亮現年四十六歲山東荷澤縣人由世襲雲騎尉歸標學習期滿因緝捕防河出力歷保至遊擊儘先補用復因堵築歷城縣西紙坊河堤合龍出力經原任撫臣張曜奏保免補遊擊以參將留於山東儘先補用並加副將銜經兵部議准覆奏於光緒十六年二月二十日奉旨依議欽此該員勤幹勇敢盡力河防緝捕迭次派委要差均能相機應變措置裕如而於省南邊隘情形尤爲熟悉實候補將領中最爲出色之員以之請補斯缺必能振作有爲雖儘先名次稍後而名次在前之呂奎嚴永興曲廷貴劉魁尤富

麟李榮慶李聯功張文彩俱於此缺人地不甚相宜例得據實聲明惟籍隸本省與例稍有未符然當此時事多艱需才孔亟臣爲缺擇人起見未敢拘泥常格致滋貽誤相應籲懇 天恩俯念員缺緊要准以副將銜儘先參將沙明亮補授臺莊營參將洵於地方營伍有裨並求 特旨俯准一俟軍務大定內地盜匪斂跡閭閻敕安容臣隨時奏明再與鄰省揀員對調以符定制如蒙 俞允仍先送部引 見恭候 欽定謹會同兗州鎮臣田恩來合詞恭摺具 奏伏乞 皇上聖鑒訓示謹 奏 光緒二十一年七月二十日奉 硃批著照所請兵部知道欽此

奏東省新海防捐輸銀兩請暫免提解摺

光緒二十一年七月初三日

奏爲山東省新海防捐輸銀兩仍請留用暫免提解以濟餉需而
維大局恭摺仰祈 聖鑒事竊查前准戶部咨山東本省新海防
捐輸自六十一次起烟臺新海防捐輸自第四十七次起所收捐
項均應全數改解部庫不准留用等因分行知照在案茲據總辦
新海防捐輸局務署布政使李希蓮詳稱東省新海防捐輸銀兩
曾經前撫臣張曜分別 奏咨截清卯數凡光緒十六年十一月
初二日以前收款業已掃數解清其自十六年十一月初二日以
後收款儘數留作修建沿海礮臺之用按次造冊咨報核准照辦
惟因上年倭人敗盟軍務喫緊始將臺工停止即行籌辦海防屢
次募勇增營購炮置械並添大枝勁旅遠調各省客軍自去秋以

迄於今未經請撥部款並非東省庫力尙充半由捐輸有以濟之
現在雖已停戰而沿海千數百里仍未敢一日弛備海防各營需
餉甚鉅本年京協各餉僅准截留一半統籌兼顧約計不敷尙多
庫款搜括無遺全賴前項捐輸稍資挹注若責令全數改解部庫
何異扼其吭而絕其食必致無米爲炊大局所關非細矧山東爲
京畿門戶唇齒之顧不容稍疏部臣亦知東省爲難情形議准
截留京協各餉案內聲明司庫正賦出入相抵不敷供億且附近
北洋已有戰事與東南沿海各省僅籌防堵者不同所有山東本
省新海防捐輸第六十一次起烟臺新海防捐輸第四十七次起
以後所收捐項均請仍准留用暫免提解藉供海防軍需他省不

得援以爲例等情詳請 奏咨前來合無仰懇 天恩俯念東省
庫款奇絀萬分爲難准將所收新海防捐輸銀兩仍舊留用暫免
提解以濟餉需而維大局出自 逾格鴻慈除咨部查照外理合
恭摺具陳伏乞 皇上聖鑒訓示謹 奏 光緒二十一年七月
二十日奉 硃批戶部議奏欽此

奏報黃河秋汛情形摺 光緒二十一年七月初五日

奏爲黃河秋汛盛漲險工迭出上游南岸壽張縣屬之高家大廟
大隄坍塌過水下游南岸齊東縣屬之北趙家大隄漫溢成口謹
據實恭摺馳陳仰祈 聖鑒事竊查利津縣呂家窪黃河伏汛漫
溢經 臣於六月二十二日 奏報在案入秋以後水勢日見增漲

迭淮河臣許振禕來電萬錦灘於六月十八十九等日長水六尺二十四日又長水四尺據上中下三游總辦稟報連日伏汎未消加以霖雨兼旬黃河挾山河併注之水奔騰澎湃怵目駭心各工段奇險迭生爲近數年所罕見如上游北岸之萬家橋一帶水溢出槽順臨黃隄西趨至馬家窪漫過民埝直衝影塘其由廖家橋至馬劉莊五十餘里民埝全行冲塌水抵隄根深五六尺及丈餘不等南岸黃花寺張樓柏莊等處水浸大隄該處距河身十七八里隄外附近沮河因向無險工歷年並未存儲料物該防營斫伐柳枝懸挂廂護奈隄身兩面皆水均已浸透於二十二日由高家大廟坍塌數丈漫水直注 河復東南至梁山安山一帶仍入黃

河中游北岸之董家寺豆付窩五里鋪李家岸北灤口倪家莊南岸之韓家道口楊莊大寨等處埽壩迭報蟄陷各營委晝夜搶廂尙未疎失至下游河身愈窄兼以海潮頂託出海尾間不暢故險工較上中兩游更多自濟陽灰壩而下如葛家店直河桑家渡清河鎮大馬家大田家宋家集東劉家北鎮打魚崔家均埽走隄塌岌岌可危十六日利津南岸南嶺迤下民修民守之子埝坍塌過水刷成口門五十餘丈該處地勢較高尙未奪溜北岸利津迤下之趙家菜園因南風過大逼溜北趨一夜將隄頂塌盡勇夫極力搶護而隄身本屬沙土一經抽掣立見蟄陷新挖之土半多泥漿旋搶旋塌現已飛調鐵門關海防各營赴工併力搶築能否搶固

尙無把握二十日齊東縣境之北趙家因齊東舊城被水沖塌溜
由齊東南門奔騰直注又值風雨交加勇夫搶護不及致隄身刷
塌數十丈水由青城南趨其餘各處險工尙在極力搶護據該總
辦等先後稟報前來臣查本年水勢較之十八年盛漲之時猶高
至二尺以外自閏五月下旬至六月一月內幾於無日不雨平地
水深數尺各工段所有著名舊險不計外又連出新險數十處當
疾風暴雨之際僅恃此一綫危隄以捍驚流急湍之水誠屬勢處
萬難上游總辦亮沂道姚協贊已奉旨調補陝西糧道接辦上
游河工候補道李清和甫經到工應請免其參處下游總辦候補
道丁達意自去冬籌辦海防勤勞倍至本年接辦河工正值萬分

棘手衝風冒雨奔馳於泥淖之中實屬不遺餘力惟既身任總辦責無可辭應請 旨交部議處上游南岸防營候補參將劉福寶

下游南岸防營候補遊擊李金書承防之候補知縣湯宗幹分防

候補典史潘名彥雖係地廣人單究屬疏於防範應請一併交部

議處臣未能駐工督率前於呂家窪漫口摺內 奏請交部議處

在案此次失事仍應請 旨將臣交部議處除飭確查高家大廟

漫水果否未向南趨並將北趙家漫口盤築裹頭免致續塌一面

查明被淹災民妥籌賑撫外所有秋汛險工迭出上游高家大廟

大隄坍塌過水下游北趙家大堤漫溢成口緣由謹繕摺由驛馳

奏伏乞 皇上聖鑒訓示再臣前奉 諭旨回省於六月二十

五日由萊州啟程沿途爲兩水所阻其水深無舟楫之處文報亦不能通茲於七月初四日始抵濰縣此摺係在濰縣拜發合併陳明謹 奏 光緒二十一年七月十五日奉 硃批另有旨欽此

奏請將買料不實人員革職片 光緒二十一年七月初五日

再河工修防全重稽料東省舊章以一萬斤爲一垛必須購買之員斤重足數方足以收實用查山東河工積習率以買料爲調劑之差架井空虛任意短少甚至有不肯委員於大汛之際通同防營捏稱隨買隨用實并未買一束料價全飽私囊糜帑誤工殊堪痛恨臣習聞此弊嚴飭各總辦於買料委員諄諄告誡不啻三令五申乃訪聞下游委員候補同知邵守正中游委員候補巡檢崇

李思賢公考論 卷九
賫買料均未能覈實復派員過秤查驗皆不足數臣維稽料一項無論堵口搶險均屬要需若一垛不足一垛之用必致臨時失措貽誤事機此種惡習實爲河工之蠹若不從嚴參辦不足以挽頹風應請將候補同知邵守正候補巡檢崇貴一併革職以儆效尤以後如查有營委通同舞弊情事即請 旨嚴正其罪以昭炯戒謹附片馳 奏伏乞 聖鑒訓示謹 奏 光緒二十一年七月十五日奉 硃批另有旨欽此

奏審明越獄盜犯摺 光緒二十一年七月初八日

奏爲審明越獄盜犯同刑禁人等按律分別定擬恭摺具陳仰祈 聖鑒事竊查前據平陰縣知縣李敬修稟報斬犯邵立秋越獄

脫逃等情當經前撫臣福潤批司將該
奉 旨這所參疎防監犯越獄之管獄
用巡檢張開先着即革職拿問交福潤
鬆刑賄縱情弊按例懲辦有獄官平陰
著准其免議仍勒限緝拿逸犯邵立秋
理該部知道欽此福潤欽遵行司緝拿
發委濟南府審辦旋據肥城縣知縣王
兵並禁卒人等家屬暨張開先派出家
經福潤批飭提省歸案審辦該典史張
濟南府知府魯琪光審明擬議由司覆

防出省飭委署藩司李希蓮代審無異經臣覆加查核緣邵立秋即邵晚秋邵立楹均籍隸平陰縣邵立楹與邵立秋同姓不宗俱先未爲匪犯案光緒十八年八月初三日邵立秋邵立楹與素識在逃之鄭衍坪石三即盧漑清遇道貧難邵立秋起意行竊邵立楹與鄭衍坪等允從是夜同夥四人邵立秋與鄭衍坪等分攜洋槍邵立楹攜帶白臙杆借抵事主王天名家門首邵立楹在外接賊邵立秋等越牆進院撥門入室行竊王天名與母王孫氏驚覺起身喊捕邵立楹聞喊先逃邵立秋起意行強鄭衍坪石三允從邵立秋開放洋槍轟拒致傷王天名右脚踝並將王孫氏推搡致傷額顛一同劫得衣物開啟大門逃走鄰佑王長夏黃秉公追捕

邵立秋與鄭衍坪開放洋槍連轟傷王長夏腦後右肱腋黃秉公
額顛至何人轟傷何處邵位邵立秋記憶不清追及邵立楹告知
強劫拒捕情由將賊分別存留賣與不識姓名人得錢分用各散
王天名報經該縣李敬修會營勘訊獲犯邵立楹訊詳審擬解經
秦安府知府康枚訊因犯供游移飭取原拿捕役供詞未到將犯
飭發回縣研訊續獲邵立秋收入縣監訊供通詳十九年十一月
二十八日李敬修赴省而稟地方事宜公出十二月初四日傍晚
該典史張開先帶領刑書孫長源進監收封驗明邵立秋刑具完
固收入南監木籠交禁卒蕭汝西李茂華看守並派孫長源與營
兵徐榮海在監值宿縣役馮克城賈瀾春更夫張學汕任瀾安在

更道支更巡邏飭令小心防範封鎖獄門回署是夜四更時分風雪交作張學汕等進屋避雪孫長源與徐榮海等均因困倦睡熟詎邵立秋乘間扭斷鑰銜揭開籠板鑽出木籠用破門作梯越出監牆由城牆缺口爬出城外逃逸蕭汝西等驚覺報經張開先馳往督拿無獲申經李敬修回署會營勘訊稟經該管道府轉由藩臬兩司詳經福潤將該典史張開先撤任 奏參革職拿問行司將刑禁人等提省發委濟南府知府魯琪光審辦邵立秋逃後在不識姓名剃頭担上薙去頭髮逃往各處躲避二十年二月二十三日經肥城縣知縣王聯庚訪聞邵立秋逃入境內會督營典兵役馳往查拿適李敬修與營汎派出兵役暨張開先派出家丁並

禁卒家屬踵至即於二十三日協同將邵立秋拿獲稟經福潤批
司將邵立秋提省歸案審辦該典史張開先照例免其拿問該府
魯琪光因查卷宗不齊飭縣檢齊申司發府魯琪光審擬解經該
司松林因恐案情未確駁飭魯琪光審照原擬由司招解委審供
認前情不諱詰無結捻結輻窩夥竊刦別案及另犯爲匪不法並
逃後知情容留之人賊有起獲正盜無疑刑禁人等委係一時疎
忽亦無鬆刑賄縱情弊案無遁飾查律載強盜已行而但得財者
不分首從皆斬又例載知強盜後而分所盜之贓數在一百兩以
下者照共謀爲盜臨時畏懼不行事後分贓例減一等杖一百徒
三年又監犯越獄如獄卒果係依法看守一時疎忽偶致脫逃並

無賄縱情弊審有確據者仍給限一百日限內能自捕得准其依律免罪又羈禁罪應斬決重犯越獄脫逃將管獄官革職拿問四個月限內拿獲即行革職免其拿問各等語此案邵立秋糾夥執持洋槍行竊臨時強劫事主王天名家得賊轟拒致傷王天名等平復囚禁在獄不思安分守法輒敢越獄脫逃殊屬不法查該犯係執持洋槍行竊臨時強劫得賊按照嚴定章程罪應斬梟惟恭逢光緒二十年八月十六日 恩詔事在二十年正月初一日以前照章免加梟示 並免其越獄脫逃之罪自應仍按本律問擬邵立秋即邵晚秋合依強盜已行而但得財者不分首從皆斬律擬斬立決先於左面刺兇盜二字該犯尙有夥竊王兆明等家牛

隻馬匹各案罪止軍戍滿徒應歸此案從重擬結邵立楹聽從械竊計贓九兩零當邵立秋等行強拒捕時該犯聞喊先逃不知強劫拒捕情由惟事後分贓亦應按例問擬邵立楹除械竊爲從輕罪不議外合依知強盜後而分所盜之贓數在一百兩以下者照共謀爲盜臨時畏懼不行事後分贓例減一等杖一百徒三年例擬杖一百徒三年事犯亦在 恩詔以前係械竊擬徒應准援免並免刺字後再有犯加一等治罪據供親老丁單罪已援免毋庸查辦留養禁卒蕭汝西李茂華刑書孫長源營兵徐榮海縣役馮克城賈瀾春更夫張學油任瀾安於邵立秋越獄脫逃訊係依法看守並無鬆刑賄縱情弊業於百日限內經該家屬將該犯邵立

秋拿獲應准依律免罪仍飭縣分別革役革伍管獄官已革署平
陰縣典史張開先於疎脫斬梟監犯訊非禁卒人等受賄故縱業
於四個月限內經該家丁將犯拿獲業已革職應毋庸議有獄官
平陰縣知縣李敬修先期公出例得免議失察該犯等爲匪之牌
甲與不能禁子爲匪之犯父邵煥列犯兄邵立珂事在 赦前均
免傳責不識姓名剃頭担與買贓之不識姓名人應免緝究王天
名等傷均平復亦毋庸議獲贓給領未獲追賠逸刃鄭衍坪等飭
緝獲日另結洋槍隨案起獲失察職名並免開送再事主王天名
家被劫一案同夥四人已於三參限內獲犯及半兼獲盜首三參
職名應免開送前參疎防暨二參各職名並應註銷首先拿獲鄰

境斬梟盜犯一名之肥城縣知縣王聯庚協獲之肥城縣典史王
岷源暨肥城汛千總趙良玉咨部照例分別議敘除將全案供招
送部外理合恭摺具 奏伏乞 皇上聖鑒 勅部議覆施行謹
奏 光緒二十一年八月初一日奉 硃批刑部速議具奏欽
此

奏報河工委員積勞病故懇卹摺

光緒二十一年七月初八日

奏爲辦理小清河工委員積勞病故懇 恩勅部議卹恭摺仰祈

聖鑒事竊據督辦山東小清河工程前登萊青道調任直隸津
海關道盛宣懷稟稱安徽桐城縣人直隸候補知縣何景賢歷辦
河工賑務素稱得力光緒十五年隨同查勘壽光縣屬之羊角溝

樂安縣屬之滴漏溝各海口測量審度於冰天雪地之中往返奔馳始得要領創議先由母猪溝入手因小清河身淤墊半爲廬墓所佔又在舊小清支脈溝之間就其窪下另闢一河名曰新清河該員識力過人勇於任事派爲全工提調責成一手辦理經營胼胝艱苦備嘗綜覈收支絲毫不苟開通上下游河身四百餘里爲十餘州縣水利民田所關海口舟楫流通尤爲商民所利賴而其心力交瘁實由於此歷五年如一日南紳嚴作霖盛稱其廉能卒以久處河干外感寒濕內耗心血積勞成疾猶復勉力從公未及請假就醫甫報工竣即行一病不起身後 條無以爲殮其操守尤足以風世追念前勞情殊可憫實不忍任其湮沒等情懇請

奏卹前來臣查近年辦理河工委員積勞病故者如候補知府倉爾英大挑知縣熊瑞昌等均經前撫臣張曜福潤先後奏蒙 賜卹在案茲直隸候補知縣何景賢因辦理東省小清河工積勞病故情事相同合無仰懇 天恩俯准 敕部議卹出自 鴻慈除飭取履歷送部查照外理合恭摺具陳伏乞 皇上聖鑒訓示謹奏 光緒二十一年七月二十六日奉 硃批著照所請該部知道欽此

奏東省捐建故撫專祠落成懇入祀典摺

光緒二十一年七月初八日

奏爲東省捐建故撫臣閻敬銘專祠落成懇 恩敕部列入祀典恭摺仰祈 聖鑒事竊照原任大學士前山東巡撫臣閻敬銘拯

災勘亂遺愛在民前據東省在籍紳士前翰林院修撰曹鴻勳等
聯名呈由歷城縣詳經調任撫臣福潤於光緒十八年十二月十
三日 奏請在於省垣捐建專祠十二月二十八日奉 硃批着
照所請禮部知道欽此欽遵轉行在案旋經東省官紳士庶暨關
中會館公同捐集經費在於省城北門內大明湖迤南購置隙地
鳩工庀材建立該故撫 臣專祠一所計大小房屋七十四間於十
九年七月初一日興工至二十年六月十五日落成委員驗收實
係工料堅實規模整齊由署布政使李希蓮詳請具 奏前來臣
維故大學士 臣閻敬銘於山東巡撫任內摧搗捻幅鹽梟各匪廓
清全境然後撫輯傷痍整飭吏治定漕價以蘇民困嚴交代以杜

官虧積弊一空百廢具舉洵屬功
城捐建專祠業經告竣合無仰懇
由地方官春秋致祭俾彰盡績而
籌捐並未動用公款請免造冊報

奏伏乞 皇上聖鑒訓示謹

六日奉 硃批著照所請該部知

奏續撥黃河防汛經費銀五

再山東黃河額撥防汛經費銀六

求覈實不使稍有虛糜無如工段

廂修防護用料浩繁險要各處並

足又須添僱民夫幫同搶險以
十五六兩年需銀至八十八萬
撥銀五萬兩凡可節省之處實
兩岸險工疊出料物人夫因之
坊漫口用款銀二萬九千餘兩
開支動用雖經逐處撙節終覺
稟報經費已將告罄秋汎為日
擬請在於藩庫照案續撥銀五
工需仍當督飭核實動支不准
鑒訓示謹 奏 光緒二十一

知道欽此

奏報黃河防汛經費銀數摺 光緒二十一年七月初八日

奏爲報銷光緒二十年黃河防汛經費銀兩數目恭摺仰祈 聖
鑒事竊查山東黃河上中下三游自曹州府荷澤縣起至利津縣
韓家垣新海口止袤延千有餘里汎漲搶險極關緊要所用防汛
經費銀兩截至光緒十九年止均經歷任撫臣按年具 奏請銷
准部核覆在案茲據河防局司道詳稱二十年防汛經費額撥銀
六十萬兩嗣因兩岸工段綿長埽壩林立伏秋大汎期內添夫添
料並購碎石搶護險工需費甚鉅額撥經費告罄復經前撫臣福
潤 奏准在於藩庫續撥銀五萬兩以資接濟該司道等督同承

辦各員詳細勾稽二十年上中下三游各處搶險廂埽拋護碎石
修蓋堡房需用一切工料並雇用民夫津貼及各防營弁勇口分
總分各局委員鹽糧等項應歸戶部核銷銀一十三萬四百六十
三兩七錢一分八釐二毫工部核銷銀四十九萬三千六百九十
六兩一錢二釐五毫二共請銷支款銀六十二萬四千一百五十
九兩八錢二分七毫均係實支實用並無扣存減平查是年收款
運庫短欠銀二萬五千兩實收到司道各庫及臨清關共銀六十
二萬五千兩除撥還十九年防汛案內報明籌墊不敷銀三萬六
千七百七十七兩七錢九分二釐四毫下餘銀兩儘數動支尙不
敷銀三萬五千九百三十七兩六錢一分三釐一毫已另設法籌

知道欽此

奏報黃河防汛經費銀數摺 光緒二十一年七月初八日

奏爲報銷光緒二十年黃河防汛經費銀兩數目恭摺仰祈 聖
鑒事竊查山東黃河上中下三游自曹州府荷澤縣起至利津縣
韓家垣新海口止袤延千有餘里汎漲搶險極關緊要所用防汛
經費銀兩截至光緒十九年止均經歷任撫臣按年具 奏請銷
准部核覆在案茲據河防局司道詳稱二十年防汛經費額撥銀
六十萬兩嗣因兩岸工段綿長埽壩林立伏秋大汎期內添夫添
料並購碎石搶護險工需費甚鉅額撥經費告罄復經前撫臣福
潤 奏准在於藩庫續撥銀五萬兩以資接濟該司道等督同承

辦各員詳細勾稽二十年上中下三游各處搶險廂埽拋護碎石
修蓋堡房需用一切工料並雇用民夫津貼及各防營弁勇口分
總分各局委員鹽糧等項應歸戶部核銷銀一十三萬四百六十
三兩七錢一分八釐二毫工部核銷銀四十九萬三千六百九十
六兩一錢二釐五毫二共請銷支款銀六十二萬四千一百五十
九兩八錢二分七毫均係實支實用並無扣存減平查是年收款
運庫短欠銀二萬五千兩實收到司道各庫及臨清關共銀六十
二萬五千兩除撥還十九年防汛案內報明籌墊不敷銀三萬六
千七百七十七兩七錢九分二釐四毫下餘銀兩儘數動支尙不
敷銀三萬五千九百三十七兩六錢一分三釐一毫已另設法籌

墊俟准部覆歸於下屆防汛案內造報仍催運庫補解分別撥還等情造具收支總細各冊出具印結呈請 奏咨前來 臣維水性無常經費有限上年蒞任伊始正值秋汛屆期嚴飭在工承辦各員力戒虛糜一洗從前積習故較往年畧爲節省覆核冊開收支各款尙無浮冒情弊除冊結分送戶工二部外所有報銷光緒二十年防汛經費銀數緣由謹恭摺具陳伏乞 皇上聖鑒 敕部核銷施行謹 奏 光緒二十一年七月二十六日奉 硃批該部議奏欽此

奏東海關洋藥釐金暫供海防軍餉摺

光緒二十一年七月十四日

奏爲東海關洋藥釐金按結支賸銀兩懇請移緩就急暫供海防

軍餉恭摺仰祈 聖鑒事竊查東海關洋藥釐金一款從前專供
泰安輪船薪餉自該船裁撤後於光緒二十年四月 奏明仍留
此款歸還泰安輪船挪用洋稅欠項還清前欠留作煙臺膠澳兩
水雷營暨海口下雷輪船月餉之用如其不敷再行設法籌撥約
計每年收數除去緝私公用各費不過餘銀二萬兩左右計自光
緒十九年十一月二十五日第一百三十四結起至二十年十二
月初五日第一百三十七結止共收洋藥釐金除支銷緝私各項
公用及還清上屆墊支泰安輪船欠項外實應存贍銀一萬一千
六百六十五兩二分四釐五毫二絲八忽正擬添籌經費購器設
造煙膠兩防水雷營船旋值倭人構釁海上用兵各工未及舉辦

前項存贖銀兩業已按結造報惟東省自籌辦海防以來節次募勇增營購礮置械並添大枝勁旅遠調各省客軍月需餉銀二十餘萬兩自去秋以迄於今並未請撥部款司道各庫搜括無遺不得已 奏請截留本年京協各餉部議僅准一半尙不足供支三月之用統籌兼顧不敷尙鉅現在雖已停戰而沿海千數百里仍未敢一日弛備餉項來源枯竭防營未能盡裁竭蹶支持大有無米爲炊之勢所有第一百三十四結至一百三十七結及一百三十八結以後抽收洋藥釐金按結支贖銀兩應請移緩就急暫供海防軍餉不無小補一俟沿海防營裁撤仍留作煙臺膠州兩水雷營及海口下雷輪船月支薪餉之用以符原案據東海關監督

詳請 奏明立案前來 臣維治兵之道籌餉爲先且餉爲軍士養命之源較水雷管船爲尤重合無仰懇 天恩俯念東省庫款奇絀准將東海關洋藥釐金按結支贖銀兩移緩就急暫供海防軍餉出自 鴻慈逾格除咨部查照外理合恭摺具陳伏乞 皇上聖鑒訓示謹 奏 光緒二十一年八月初三日奉 硃批戶部議奏欽此

奏報銷假摺 光緒二十一年七月十四日

奏爲 微臣假期屆滿力疾銷假恭摺仰祈 聖鑒事竊臣前因病陳請續假六月初七日在萊州營次奉到 硃批著再賞假一箇月欽此伏念臣蒲柳之姿本不克膺艱鉅上年秋籌防海上即係

扶疾而行比以軍務倥傯未遑靜攝夏閒因病久未愈願請開缺
仰荷 天恩先後 賞假調理 鴻施稠疊感激莫名遵即趕緊
醫調近來咯血之證已漸見輕減惟兩髀重墜艱於步履兼以脾
虛肝燥宵無善寐遇事健忘此由氣血漸衰非旦夕所能奏效方
今時事值艱難之會強鄰壓境戒備旣不可稍疏加之河決成災
嗷鴻徧野北路遣撤營勇半歸曹濟又恐麇聚爲患舉凡籌辦工
賑撫輯流亡慎固封圻搜除伏莽在在均形棘手臣渥承 恩遇
若復懷退避之意不獨無以對 朝廷亦覺負慚衾影茲已假期
屆滿謹即力疾銷假督同司道各員逐一認真經理但能上裨
國計下益民生不惜身爲怨府以期仰答 高厚生成於萬一所

有微臣力疾銷假緣由謹繕摺具 奏伏乞 皇上聖鑒訓示再
臣於六月二十五日由萊州起程回省因沿途阻水至七月十二
日始抵省署合併陳明謹 奏 光緒二十一年八月初三日奉
硃批知道了欽此

奏調江蘇候補道李光久片 光緒二十一年七月十四日

再練兵之道首在擇將將得其人則化弱爲強軍事乃大有可恃
山東爲南北要衝刻下威海駐有倭兵東路防營斷不能撤西路
則曹濟各屬向稱盜藪兼以關內外所撤營勇半多曹濟無賴之
徒難保不麇集爲患必須重兵鎮攝以遏亂萌尤賴有廉正大員
統領諸軍方足以資控馭查有江蘇候補道李光久爲前湘軍統

領追贈總督 賜諡忠武李續賓之子廉明剛勇綽有古名將風
此次奉調出關每戰必身先士卒雖當挫衄之際猶能嚴整隊伍
民間秋毫無犯 臣籍隸關東鄉人之自關外來者親覩其戰事無
不津津道之現在關外各軍先後遣撤合無仰懇 天恩俯念山
東防務緊要將江蘇候補道李光久發來山東俾臣得資臂助於
軍事必有裨益謹附片具 奏伏乞 聖鑒訓示謹 奏 光緒
二十一年八月初三日奉 硃批李光久現在帶兵著毋庸發往
欽此

奏黃河水勢漸落籌款堵築上下游漫口情形摺 光緒二十

一年七月二十七日

奏爲節逾白露黃河水勢漸落謹將籌款堵築上下游漫口情形
恭摺具陳仰祈 聖鑒事竊臣前因伏秋汎水盛漲險工迭出下
游利津尾閘北岸之呂家窪齊東南岸之北趙家上游壽張南岸
之高家大廟等處隄埝先後漫溢請將在工員弁並臣一併交部
議處於六月二十二七月初五等日專摺 奏報七月初九日承
准軍機大臣字寄光緒二十一年七月初四日奉 上諭該撫務
當督飭員弁趕築裹頭以免續塌現在秋汎已屆爲日方長著通
飭在工各員加意防護等因欽此又恭閱邸抄七月十一日奉
上諭該撫務當督飭在工各員加意防護仍確查高家大廟漫水
是否未向南趨並將北趙家漫口盤築裹頭免致續塌等因欽此

仰見 聖主慎重要工之至意跪聆之下感悚莫名查黃河水勢自七月初以後雨止天晴始行停漲二十日節交白露逐漸消落上下游完善各段險工均經搶護平穩各處漫口亦經上游總辦道員李清和下游總辦道員丁達意等各將裏頭盤築堅實連日督同勘估籌辦冀漫口早堵一日民生即早安一日該員等深知工關緊要力圖補救原報利津北岸迤下之趙家菜園奇險異常旋搶旋塌水已漫過隄頂卒能厚集勇夫竭力搶堵完固南岸南嶺迤下民修民守之子塏被水沖塌成口該處地勢較高水勢亦緩仍令照舊堵修量予津貼以恤民力其高家大廟大隄口門刷寬八十餘丈水深七八尺及丈餘不等漫水由柏莊黑虎廟直趨

沮河復繞東南至梁山安山一帶仍入黃河不至再向南趨工段坐落上游應歸李清和堵辦又北趙家大隄口門刷寬八十餘丈水深丈餘及二丈不等口門以外兩旁俱已掛淤正流逕趨東南直灌小清河入海工段坐落下游應歸丁達意堵辦至呂家窪地勢最低逼近海濱口門刷寬一百餘丈水深一二丈及三丈不等倒漾之水波及鹽灘續淹八十餘畝大溜由正北入海寬約十餘里已成海口形勢應否堵合抑或留爲入海尾閘容俟確切覆勘察看情形另行 奏明辦理現將應堵高家大廟及北趙家兩口需用椿繩楛料等物分飭購備興工所需經費當此庫款支絀海防未撤何敢遽請部帑上煩 宸厯惟有移緩就急變通工作茲

擬在於藩庫各款項下籌撥銀十萬兩糧道庫漕倉項下籌撥銀三萬兩臨清關稅項下籌撥銀二萬兩藉資應用工次需用人夫即招集災民以工代賑並另籌款妥爲賑撫俾免流離失所苟可力求節省不敢稍涉虛糜萬一稍有不敷再當據實奏請續撥現在白露已過河水漸消不至再行出險且臣甫經回省應辦一切事宜尙須與司道等籌商清釐一時未克赴工仍俟堵口興辦應否親往督率屆時當再奏聞所有節逾白露水勢漸落籌款堵築漫口緣由謹恭摺具陳伏乞皇上聖鑒訓示謹奏光緒二十一年八月十二日奉 硃批知道了欽此

奏請獎卹勦匪出力員弁摺光緒二十一年八月十四日

奏爲曹濟等屬連年勦捕要匪出力文武員弁可否籲懇 天恩
俯准擇尤酌獎以示鼓勵並捕盜傷亡弁勇請 旨勅部議卹恭
摺具陳仰祈 聖鑒事竊維山東曹濟各屬界連直豫江南匪徒
素多出沒焚劫搶掠警不畏死誠如 聖諭若不及早撲滅恐致
釀成巨患升任曹州府知府毓賢膽識兼優勇於任事上年經臣
奏辦兗沂曹三府緝捕事宜本年三月復 奏准曹濟各屬防營
統歸調遣並責成各州縣聯絡鄉團認真緝捕用能同心協力將
要匪次第剷除該員近蒙 恩簡放兗沂曹濟道當能愈加奮勉
綏靖地方無負 聖明委任副將陳大勝管帶濟後及靖字等營
駐曹最久獲匪亦最多緝捕素稱得力春間又飭守備史鎮廷等

添募勇營該副將部下並調參將岳金堂馬隊一營協同防勦
時值海防緊要南來軍火沿途俱須防護又 奏派兗州鎮總兵

田恩來添募勇營保護運道兼辦緝捕事宜據統賢稟報在荷澤

等縣獲匪三十餘名又續獲一百餘名當場格斃數十名經臣先

後 奏報在案又查據陳大勝等稟報綜計自上年六月至今該

副將所部各營及省西各州縣並田恩來勇營所獲匪犯共計五

百餘名其殺人放火兇暴最著之犯俱錄供稟經 臣批飭照章就

地正法按季彙報其情輕及脅從各犯仍飭照例審辦此曹濟各

屬迭獲匪犯之實在情形也惟該匪等騎馬持械聚衆橫行抗拒

官兵儼同對敵故雖迭被擒獲而弁勇亦多傷亡如上年六月匪

首王石朋焚劫鉅野縣龍烟集一案軍功張振、等五名勇目尹福琳等十三名均被洋槍轟斃又都司翟運修巡緝遇匪轟傷身死並轟斃丁壯王興一名又佐字營哨弁郝銳帶領勇目郝慶海等於上年十二月在荷澤縣境督團擊匪郝慶海被匪槍傷身死並轟斃團丁李揚名一名又本年四月靖字營軍功葛守平在荷澤捕賊亦被槍傷身死其被傷平復者尙數十名而各員弁等仍能躬督勇役奮往圖功卒將著名首要各匪暨河南睢州王橋案內之謝五瞎子等並御史管廷獻陳奏欽奉 諭旨緝拏之匪犯岳二米段二瞎子等先後就擒洵屬不遺餘力臣維曹濟等處風俗本極獷悍當軍務喫緊之際奸人乘機蠢動愈肆鴟張動言某

日劫莊某日攻縣民情惶惑各有戒心各文武員弁齊心戮力殲除巨憝解散脅從閭閻漸得安堵不無微勞足錄臣春間迭奉

寄諭以曹屬土匪肆擾 敕令實力勦辦即陳明如有捕務振作

破獲巨盜者由臣奏請破格優獎仰蒙 聖鑒在案合無籲懇

天恩俯念曹濟各屬勦捕要匪與尋常獲匪難易迥殊爲時又最久獲犯又最多准將出力文武員弁由臣擇尤請獎以示鼓勵其捕匪傷亡之撫標候補都司翟運修六品軍功張振標陳金海趙長勝鮑福魁葛守平五名勇目尹福琳鮑貴生鮑克明田樹本馮金湘陳金容杜金忠張瑞本張義合劉長發楚柱王三田質彬郝慶海十四名團丁李揚名王興二名均以死勤事情殊可憫並請

敕部從優議卹出自 逾格鴻慈謹專摺具 奏伏乞 皇上
聖鑒訓示遵行謹 奏 光緒二十一年八月二十九日奉 硃
批著准其酌保數員毋許冒濫翟運修等均著交部從優議卹欽
此

奏總兵夏辛酉緩赴新任仍留登防片

光緒二十一年八月十四日

再夏辛酉蒙 恩簡放右江鎮總兵仰見 皇上愛惜將才知人

善任欽感莫名查該總兵自上年十月經 臣 奏委統領登州防

營深資得力嗣因丁承重憂呈請回籍復經附片陳請留營奉

旨允准欽遵在案刻下雖無戰事而登郡地居險要懲前毖後防
務仍未可稍疏夏辛酉膽識兼優治軍嚴整登州士庶皆倚若長

城實難遽行更易合無仰懇 天恩俯念登州防務緊要准令夏
辛酉緩赴新任仍留登防以資鎮攝出自 鴻慈再該總兵上年
丁承重憂其未屆服闋以前右江鎮總兵應否改爲署任恭候
聖裁謹附片具 奏伏乞 聖鑒訓示謹 奏 光緒二十一年
八月二十九日奉 硃批夏辛酉著改爲署任准其仍留山東以
資得力兵部知道欽此

奏勦撫回匪全在得人密陳管見摺

光緒二十一年八月十
四日

奏爲甘肅回氛所關甚重勦撫全賴得人謹就管見所及恭摺密
陳仰祈 聖鑒事竊臣恭閱邸鈔光緒二十一年七月十六日內
閣奉 上諭甘肅逆回滋事日益蔓延自海城收復循化解圍後

河狄西甯又復聚衆猖獗總兵湯彥和奉調赴援遷延日久迫行抵河州又不偵探虛實冒昧進攻以致全軍潰退貽誤戎機湯彥和著革職留營帶罪圖功以觀後效楊昌濬在甘有年於回衆情形豈未深悉乃忽勦忽撫迄無定見以致湟中河狄徧地皆賊實屬措置乖方雷正綰受回愚弄發給槍械轉借寇兵亦屬庸贖不職楊昌濬雷正綰均著交部議處以後務當振刷精神破除壅蔽董福祥等軍到後合力同心將回氛迅速掃蕩庶可稍贖前愆凜之欽此仰見 皇上軫念西陲 天威震疊欽服莫名竊維軍旅之事殺敵擒渠必資將略而發縱指示尤在疆臣甘肅自同治初年回匪肇亂前大學士臣左宗棠督師關隴所部皆一時名將七

年之久始克蕩平蓋逆回狡悍性成知畏威而不知懷德非得統
兵大員深明韜畧擒縱得宜鮮能安其反側也固原提督臣雷正
綰受回愚弄轉借寇兵甘州提督臣李培榮前在關內統兵未能
得力始奉 旨飭回本任臣聞雷正綰久膺專閫近來暮氣太甚
李培榮習染更重士卒離心緩急均未可恃陝甘總督臣楊昌濬
宣力邊疆歷有年所乃此次忽勦忽撫以致寇燄愈熾洵如 聖
諭措置未免乖方古人有言琴瑟不調則改絃而更張之臣竊見
閩浙總督臣邊寶泉志慮忠純盡瘁爲 國曾任陝西巡撫西路
情形本所素悉而自視欲然遇事能廣益集思以折衷於至當又
新授雲南巡撫臣魏光燾久任新疆爲前撫臣劉錦棠所倚重春

開統兵關外其治軍嚴整威信素孚爲湘軍之冠臣與魏光燾向未謀面而聞其識畧文臣中知兵之員殆無以過之又烏魯木齊提督臣董福祥忠誠廉正膽識俱優廣東高州鎮總兵余虎恩治軍廉明樸勇善戰董福祥近已奉旨率師西進是該提督之勇敢可恃久在聖明洞鑒之中西陲既有兵事如數臣者似均可爲股肱干城之寄應否酌予更調以資得力而奠危疆之處出自聖裁明知軍旅大政朝廷自有權衡非疏逖外臣所當妄議而微臣受恩深重管窺所及不敢不直陳於君父之前是否有當謹恭摺密奏伏乞皇上聖鑒訓示謹奏

奏沂州協副將員缺請以陳大勝補授摺

光緒二十一年八月二十二日

奏爲揀員請補副將員缺以重地方恭摺具 奏仰祈 聖鑒事
竊沂州協副將曹正榜前因遇事因循不知振作營務亦多未妥
經臣 奏請開缺留省察看並聲明遺缺東省現有應補人員容

另行遴員請補於光緒二十一年七月初四日奉 硃批着照所

請兵部知道欽此欽遵恭錄轉行並已接准部咨在案臣查沂州
營副將雖係部推之缺惟沂屬民俗强悍界連淮徐素爲盜匪出
沒之區巡緝操防倍關緊要當此整頓營伍之際尤非勤奮素著
熟習地方情形之員不足以資控馭臣於儘先副將內逐加遴選
查有花翎儘先副將陳大勝年五十二歲係湖北漢陽府沔陽州
人於同治二年投効霆軍迭在江西廣東直隸山東陝西等省勦

匪出力歷保以守備儘先補用並戴花翎同治九年因剿平西捻出力經前湖廣總督臣李鴻章彙案 奏保奉 上諭着以都司儘先補用欽此同治十一年奪取新路坡要隘並踏平祁家集逆巢案內出力經甯夏將軍臣穆圖善 奏保奉 上諭着免補都司以遊擊儘先補用並賞加參將銜欽此光緒四年新疆南北兩路肅清案內出力經 欽差大臣督辦新疆軍務陝甘督臣左宗棠 奏保奉 上諭着以參將儘先補用並賞給二品封典欽此嗣因邊防出力經 欽差大臣督辦新疆軍務臣劉錦棠 奏保奉 上諭着免補參將以副將儘先補用欽此十二年隨前撫臣張曜來東旋因委帶濟字後營馬隊連年在曹濟各屬擒獲著名

盜匪出力十九年二月經前撫臣福潤奏請留東補用是年二月二十九日奉 硃批着照所請兵部知道欽此該員緝盜練兵奮勇著績現在管帶濟後及靖字等營駐紮曹屬疊獲著名巨匪緝捕最爲得力以之請補斯缺實堪勝任雖有名次在前之陳光祿宋國元何成忠朱廷芳王來魁劉耀遠均於此缺不甚相宜未便遷就請補例得據實聲明合無籲懇 天恩俯念員缺緊要准以儘先副將陳大勝請補沂州營副將洵於地方營伍有裨如蒙 俞允俟接准部覆再行給咨送部引 見以符定制理合會同兗州鎮總兵臣田恩來合詞恭摺具 奏伏乞 皇上聖鑒 敕部議覆施行謹 奏 光緒二十一年九月十二日奉 硃批兵

部議奏欽此

奏查海豐縣賊匪拏辦情形摺

光緒二十一年八月二十二日

奏爲遵查海豐縣賊匪現飭拏辦情形恭摺覆陳仰祈 聖鑒事

竊臣於六月十四日在萊州營次承准軍機大臣字寄光緒二十

一年六月初八日奉 上諭有人奏山東賊匪擾及直境請飭會

勦一摺據稱山東海豐五營小山地方向爲盜藪匪徒五六十人

各有快馬洋槍白晝馳騁毫無顧忌捕役劉紹庭即係巨窩知縣

廉存從而庇護該匪擾及直隸之鹽山槍傷事主身死該縣調營

往捕竟敢聚衆抗拒僅獲三犯餘皆逃逸等語著王文韶李秉衡

遴派幹員馳赴該處嚴密訪查如果有前項情事即行調集營勇

迅速兜拏母任漏網並著李秉衡查明庇匪之知縣從嚴參辦等因欽此當經臣檄委候補知縣陸安清前往密查據稟稱海豐縣與直隸慶雲鹽山滄州接壤海豐所屬之五營小山地方回民雜處素爲盜匪出沒之區劉紹庭充當海豐縣捕役是否巨窩查無實據並據海豐縣知縣廉存稟稱本年五月初八日縣民李步雲被賊犯馮十常竊去騾馬廉存飭令劉紹庭跟蹤掩捕馮十常開槍拒捕劉紹庭放槍抵格當將馮十常轟傷身死並拏獲夥犯高三一名尙無窩匪不法情事臣以捕役通賊是其慣技非將劉紹庭提省嚴訊不能得實復據直隸總督咨稱鹽山縣崔福廷家被劫一案拏獲匪犯劉三禿子劉青劉根三名餘皆逃逸與原奏大

畧相同續經鹽山縣會營拿獲劉珩劉四邊三陳立八四犯提訊劉根陳立八供認聽從在逃之首犯從大慶等同夥八人行竊崔福廷家牛隻從大慶用洋槍拒殺事主不諱並稱該犯等多係海豐縣捕頭劉紹庭散役又供出逸犯從大慶等二十三名開單請飭拏辦奏奉 諭旨咨行到 臣旋據廉存將捕役劉紹庭收押 臣委員前往將該役押解到省發交濟南府審辦一面將海豐縣知縣廉存撤任飭司遴委候補知縣李子方前往接署並飭派管帶驍武左營馬隊遊擊陳得勝督隊駐紮五營附近一帶協同該署縣及直隸樂字營並鹽山慶雲等縣按照單開逸犯不分畛域合力兜拏捕役劉紹庭已飭濟南府訊取確供照例懲辦知縣廉存

先以劉紹庭尙能緝賊未見其窩匪實據嗣經委員查辦廉存恐
劉紹庭遠颺將其收禁旋經提解到省尙無包庇賊匪情事惟人
地究有未宜相應請 旨將海豐縣知縣廉存開缺俟有相當缺
出另行補用除咨明直隸督臣轉飭鹽山慶雲兩縣會同海豐縣
一體飭拏外所有遵 旨查辦緣山理合恭摺 具奏伏乞 皇
上聖鑒訓示再海豐縣員缺東省現有應補人員應請扣留外補
合併陳明謹 奏 光緒二十一年九月十二日奉 硃批著照
所請該部知道欽此

奏保舉人才摺附單 光緒二十一年八月二十五日

奏爲遵 旨保舉人才謹就所知文武各員恭摺臚陳仰祈 聖

鑒事竊臣前在萊州營次欽奉光緒二十一年閏五月十三日

上諭爲政之要首在得人前諭中外臣工保薦人才業經次第擢用當茲時事多艱尤應遴拔真才藉資幹濟著各部院堂官及各直省將軍督撫於平日真知灼見器識閎通才猷卓越究心時務體用兼備者臚列事實專摺保奏其有奇才異能精於天文地輿算法格致製造諸學必試有明效不涉空談各舉專長俾資節取該大臣等當念以人事君之義一秉大公詳加考核倘或苟且塞責謬探虛聲甚至援引私人瞻徇情面濫保之咎例有專條定惟原保之人是問欽此仰見皇上延攬英才求賢若渴而復端其始進深恐以僞亂真伏讀再三莫名欽服竊維人臣所以見用不

外德與才兩端而周於德者未必有濟變之方優於才者或不免
踰閑之弊蓋明體尤期達用而實政必本實心也其有德備才全
器識閎遠克勝遺大投艱之任實裕濟時宰物之能此固 聖主
明目達聰所求而慮其弗得者自當亟與明揚用備棟樑之選惟
國家設官分職立賢無方人各懷靖獻之忱使之皆盡所長而
政無不理如六計以廉爲本潔清者見舉則墨吏望而解綬矣萬
事以誠爲基惻幅者登庸則巧宦聞而歛迹矣柔脆不足以任重
則貞固幹事者有必庸迂拘不足以圖功則識畧過人者所必錄
又况强鄰逼處外侮迭乘戎政待修則將才宜備明恥乃可教戰
關茸者應與芟除有勇尤貴知方忠奮者自宜簡拔蓋非有緯武

經文之畧難與奠安內攘外之基我 皇上宵旰憂勤勵精圖治
舉用耆舊廢黜僉壬中外臣工莫不爭自琢磨思各效馳驅之力
臣受 恩深重自愧毫無報稱惟兢兢於以人事 君之義夙夜
不敢忘雖識本愚蒙不克言灼見真知之雅而心無瞻顧尙冀收
拔十得五之功謹就平日所知者得文員十三人武員四人並前
所保四人臚列銜名出具切實考語另繕清單具陳伏候聖明採
擇所有遵 旨保薦人才緣由理合恭摺具 奏伏乞 皇上聖
鑒謹 奏

謹將保薦文武各員銜名臚列清單恭呈 御覽

計開文員

前通政使黃體芳學優行卓剛正不阿忠愛之誠老而彌篤爲物
望所歸應懇 恩擢用河南布政使額勒精額志慮清純德性堅
定公忠體國偉抱匡時著安徽布政使于蔭霖忠清亮直操履謹
嚴廉而不苛惠而能斷以上二員堪勝封疆之任江蘇督糧道陸
元鼎廉明公正爲守兼優該員以州縣起家所至有聲才能肩鉅
山東兗沂曹濟道毓賢清勤明果有守有爲正己率屬吏畏民懷
才堪大用新授甘肅鞏秦階道李光久閱通沈毅文武兼資膽識
過人才堪任重五品卿銜前安徽宿松縣知縣孫葆田品端學粹
守潔才長志節皎然不畏疆禦堪備風紀之選發往山東差遣委
用吏部主事盧昌詒有學有識廉謹不阿軍事吏治無不潛心講

求必期實濟現值地方多事使任以道府必有實效二品頂戴儘先選用道馬開玉治河統軍不避艱險廉勇膽識久爲羣推洵爲有用之才三品銜在任候補道沂州府知府錫良廉明誠篤勤政愛民地方軍務均有實濟尤能留意人才堪勝監司 記名簡放知府署奉天遼陽州鳳凰直隸廳同知徐慶璋歷任均有政聲軍興練團力保遼陽迹其膽勇血誠實非尋常可及應懇 恩超擢安徽督糧通判張廷鑿血性不欺操守可信勇於任事膽識兼優堪勝郡守奉天壬午科舉人劉春煊精天文輿地之學博覽羣書留心經濟才堪錄用

計開武員

已革提督依博德恩巴圖魯李定明久經戰陣胸有韜畧篤實精
明現在山東統領海防各營治軍嚴整有法應懇 恩錄用 記
名提督統領兩江長勝等五營奇朗阿巴圖魯萬本華樸誠廉勇
久歷行陣勤訓練得軍心統帶多營每所到處秋毫無犯可稱統
將之良 記名堪勝提鎮奏調兩江前先用副將統領兩江仁
義忠信智五營張國林勇敢有謀戰功卓著將士畏服紀律嚴明
誠不易得之統將統領新魁各營遇缺升用總兵廣西候補副將
年長阿巴圖魯楊昌魁樸訥勇敢立功苗疆廣西鎮南關之役戰
功尤著今春調令募帶黔勇六營來東防剿允稱戰將之選至烏
魯木齊提督董福祥廣東陸路提督張春發廣東高州鎮總兵余

虎恩廣西右江鎮總兵夏辛酉均勇畧冠羣在將領中不可多得
臣歷次摺內先後 奏明在案查該員等均係專闡大員歷荷
聖恩超擢任川方今時事多艱將才尤亟如董福祥等實堪爲
朝廷干城之寄合併聲明

奏沂州營副將員缺緊要懇仍以陳大勝請補摺 光緒二十

一年八月二十六日

奏爲沂州營副將員缺緊要懇 恩仍以副將陳大勝請補恭摺
仰祈 聖鑒事竊沂州協副將員缺經臣以儘先副將陳大勝請
補於八月二十二日具 奏在案二十四日准兵部咨開滿洲蒙
古漢軍頭等侍衛冠軍使每年用副將一缺今出有山東沂州營

副將一缺係部推之缺應歸揀補月缺輪用鑾儀衛冠軍使人員照例扣歸揀補等因奏奉 諭旨依議欽此咨行到臣竊維量能授職 朝廷所以勸有功爲地擇人疆臣所以資治理沂州界接淮徐素多盜賊出沒副將一缺非廉勇幹練之員不克勝任儘先副將陳大勝緝捕勤能在曹屬帶勇有年迭獲著名巨匪勞績卓著前經臣以該員請補膠州營副將旋准兵部咨經部題以儘先副將詹占元擬補奉 旨允准欽遵在案今以之請補沂州營副將實屬人地相宜若照部推再令向隅似不足以昭勸勉合無仰懇 天恩俯念沂州捕務緊要仍准以儘先副將陳大勝請補沂州營副將出自 逾格鴻慈除咨部查照外謹專摺具 奏伏乞

皇上聖鑒訓示謹 奏 光緒二十一年九月十二日奉 硃批兵部議奏欽此

奏災區需賑孔殷請留本年新漕以資散放摺 光緒二十一

年八月二十六日

奏爲災區需賑孔殷援案懇請截留本年新漕以資散放恭摺仰祈 聖鑒事竊照本年伏秋大汛黃流盛漲異常加以陰雨連綿坡水山泉同時匯注河身不能容納以致利津齊東壽張等縣隄埝先後漫決沿河向無民埝處所與夫運衛兩河亦以洪流漲溢村莊多有淹浸共計被水成災州縣二十餘處情形輕重不等且係積年災祲之區民困未蘇今復猝罹昏墊蕩析離居深堪憫惻

業經臣飭局籌款委員分投查放急賑並將各處漫口設法堵築招集附近災黎以工代賑民情尙屬安謐惟災區較廣待哺嗷嗷轉瞬隆冬饑寒交迫必須預籌接濟來春青黃不接爲日甚長亦應再加撫恤約計冬賑春賑兩項非有鉅款斷難措手現在籌堵各口尙慮集款維艱東省雖展辦三成賑捐派委員紳在於各省勸辦但連年籌賑收數寥寥已成弩末又當順直開辦賑捐之初恐盈於彼者必絀於此以後捐項能否踴躍殊無把握臣與司道等悉心籌商自上年辦理海防以來庫款羅掘一空刻下各營未能盡裁需餉繁鉅而又增此意外賑需更屬無從設措再四思維惟有援照光緒十五十八等截漕成案仰懇 天恩俯念災區需

賑孔殷准將東省本年新漕除扣蠲緩及撥兌例不缺額之東陵西陵等處駐防兵米外下餘運通米石悉數截留備賑隨漕輕齋等項並請按數扣支則億兆災黎得免流離失所皆出自皇仁再造矣是否有當謹恭摺具陳伏乞 皇上聖鑒訓示謹

奏 光緒二十一年九月十二日奉 硃批另有旨欽此

李忠節公奏議卷九終

李忠節公奏議卷十

奏報黃河各工防護穩固摺 光緒二十一年九月十三日

奏爲節逾霜清黃河上中下三游完善各工防護穩固恭摺仰祈

聖鑒事竊照東省黃河袤延千有餘里工程倍於豫省而河身淺窄陡峻卑薄防護亦較豫省爲難是以伏秋汎漲每有漫溢本年雨水過多伏汎來源較旺處處拍岸盈槽險工林立迨交秋汎水勢又迭次增漲兩岸奇險環生刷底淘空埽壩蟄陷一時搶護不及以致利津齊東壽張等縣陡峻先後漫決維時上中下三游工段亦均岌岌可危經臣嚴飭在工文武員弁分投加意修防如上游之孫樓靳莊陳集岳莊張樓朱莊雙合嶺黃花寺紅廟石廟

中游之胡家岸孫莊于家窩陶家嘴楊家廟湖溪渡朱家圈夏家溝河套圈下游之桑家渡潘三莊清河鎮王家集大馬家宋家集王平口蝎子灣鹽窩隄上李家葛家店打魚崔家高家紙坊宮家鐵匠莊邵家小高家閻家歸仁鎮等處均極危險異常節經各總辦督率員弁勇夫人等晝夜搶廂竭數十日之力始克轉危爲安現在節逾霜清工程穩固堪以仰慰 宸厪其搶護險要各工出力員弁應暫行存記歸入下屆覈實彙獎除俟堵口工竣另行

奏報外所有黃河上中下三游完善各工防護穩固緣由理合恭摺具陳伏乞 皇上聖鑒謹 奏 光緒二十一年九月二十九日奉 硃批知道了欽此

奏東省新海防捐輸銀兩請暫緩解部摺

光緒二十一年九月十三日

奏爲東省海防未能遽撤仍請將新海防捐輸銀兩暫緩解部恭摺具陳仰祈 聖鑒事竊 臣准戶部咨開戶部具奏各省新海防捐輸均係解交部庫以充京餉該省事同一律未便辦理兩歧所請仍准留用之處礙難照准等因奏奉 諭旨依議欽此咨行到

臣當即欽遵轉行知照伏念自海疆多事以來徵兵購械耗費已數千萬金部 臣職總度支自應統籌全局 臣曷敢專顧一省致令部 臣爲難惟山東地處海濱當防務正緊之時月餉近二十萬京協各餉准截留一半止敷三月之需近雖戰事已停而強鄰壓境仍須思患豫防 臣以籌餉維艱擬將防營次第歸併而地方喫緊

之處仍未能輕率議裁兼以嵩武軍餉向取之豫省今年亦係由東省墊解加之內地防營總計每月仍需餉十五六萬明知庫款支絀故自軍興以來未嘗請撥部帑而悉索敵賦實已搜括無遺查東省所收新海防捐自第十二次起至六十次止共收銀九萬四千餘兩上年十月遵籌海防軍餉的款已解部八萬九千餘兩祇存四千餘兩煙臺新海防捐第一次起至第四十六次止共收銀二百九十六萬餘兩除前撥河工經費五十六萬兩此次辦理海防提用銀六十萬兩外其煙膠礮臺等項用款應由北洋大臣報銷現在東省並無存款至籌餉新捐僅獎虛銜 封典與山東賑捐略同收數斷難踴躍若再將海防捐提解歸部實難爲無米

之炊查戶部原奏謂東省海防需款甚鉅自是實在情形如有緊要用款令臣奏明由部指撥是部臣於東省拮据情狀思慮不可謂不至體諒不可謂不周而現在餉源已竭與其由部指撥輾轉需時何如就近留支挹注較便臣與藩司張國正及善後局司道再三籌酌非萬不得已斷不敢冒昧瀆陳惟有籲懇 天恩俯念山東需餉孔殷 敕部仍照 旨前次所請將省城新海防捐第六十一次起煙臺新海防捐第四十七次起均暫免提解俟沿海防營盡撤再行解部出自 逾格鴻慈除咨部查照外理合恭摺具奏伏乞 皇上聖鑒訓示謹 奏 光緒二十一年九月二十九日奉 硃批戶部議奏欽此

奏陳管見摺 光緒二十一年九月十六日

奏爲自強全在得人法制未可輕變謹就管見所及恭摺覆陳仰
祈 聖鑒事竊 臣於六月初三日在萊州營次承准軍機大臣字
寄光緒二十一年閏五月二十七日奉 上諭自來求治之道必
當因時制宜况當國事艱難尤應上下一心圖自強而弭隱患朕
宵旰憂勤懲前毖後惟以蠲除痼習力行實政爲先迭據中外臣
工條陳時務詳加披覽採擇施行如修鐵路鑄鈔幣造機器開鑛
產折南漕減額兵創郵政練陸軍整海軍立學堂大抵以籌餉練
兵爲急務以恤商惠工爲本原皆應及時舉辦至整頓釐金嚴核
關稅稽察荒田汰除冗員各節但能破除情面實力講求必於國

計民生兩有裨益著各直省將軍督撫將以上諸條各就本省情形與藩臬兩司暨各地方官悉心籌畫酌度辦法限文到一月內分晰覆奏等因欽此仰見我皇上博采羣言集思廣益伏讀再四欽服莫名臣查諸臣原奏不外籌餉練兵兩端而以敦勸工商爲籌餉練兵之本如開鐵路鑄鈔幣開礦產折南漕減額兵創郵政皆籌餉之事也造機器練陸軍整海軍皆練兵之事也立學堂則所謂練兵籌餉之本原也夫當創鉅痛深之際如謂富強爲不足言此迂闊之談固無當於事理然必事事取則西人而盡變數百年之成法臣竊以爲過矣鐵路之利諸臣類能言之但以修路之費計之前兩廣督臣張之洞議自湖北漢口至蘆溝橋計程三

千里需銀三千餘萬再多開枝路即多需數倍合之數逾萬萬今天下民力竭矣即網羅海內富室亦未易積此巨貲以云取之公帑現在二萬萬輸倭已屬借用洋債若再借修路之款無力遽償勢必以鐵路爲質則全局在其掌握一旦有調兵轉餉之事能必其一無梗阻乎且戰事有勝負設爲敵所乘彼可長驅我難措手是未見其利先受其害也以銀爲幣由來已久鈔虛而銀實天下利之所在雖嚴刑峻法不足以繩之而欲民間以現有之銀易一紙之鈔其誰信之礦產開採已十餘省辦理幾三十年除雲南本有銅礦外亦僅開平一煤礦耳其餘招商試辦者率皆股本耗折迄無成功夫豈器具之不精心力之不專哉國家設立塘汛驛站

行之已久上下相安若改照西法處處設立郵政局所費當亦不貲且勢必官文商信比而同之公私混淆易滋流弊語云利不百不變法事關舊制無取紛更以上各條皆臣之愚所意有未安不能深信以爲利者固不敢空言以附和也至南漕爲 天庾正供而官弁兵丁有費河運海運有費帑項之耗實爲鉅款查湖廣江西漕米久經折色若推而行之江浙概行改折解部如慮京倉空虛再在津兌買南米入倉則漕督以下員弁標兵可以裁汰漕河運船丁夫可以罷免計每歲節省不下數百萬金事在可行擬請 敕部覈議定章分別舉辦綠營疲玩廢弛積習已深議以裁撤誠不爲過然 國家法制所在自提鎮以至千把外委各有實缺

人員一經裁撤均歸無著從前軍興之日各省戰功出力之員類
由行伍游保提鎮 朝廷藉以資鼓勵若概行刪汰此後何以勸
有功擬請酌裁五成裁兵而不裁官先汰老弱仍分五年遞減如
蒙 俞允請自光緒二十二年爲始詳議章程奏明辦理此六者
皆就諸臣疏中籌餉之事言之也至練兵以簡器爲亟各省久設
機器局而有事之日槍礮仍須購諸外國萬難應急應令各省局
擴充製造實力講求協辦大學士臣徐桐請飭各省製造局取快
利合用槍礮之式一律仿造毋許歧異最爲切要之論現在東省
仿造後膛毛瑟槍與洋製無殊更造後膛抬礮較能及遠查諸臣
疏中有聽民開廠之請果使爭相製作精益求精不須仰給外洋

是誠軍事之要務也綠營既議減裁則勇營自當精練而勇營積習相沿弊端百出尤甚綠營其不肖者一得統領則每月餉項幾欲據爲己有於是以前數十金給營官而餉數勇數不令過問謂之包餉其勇數或減至五六成或竟不及五成而此五成勇餉猶措不全發有一年發八箇月十箇月者名曰八關十關謂之壓餉又復巧立名色浮開冒領盈千累萬全飽私囊如皮衣棉衣等項散之勇隊仍按數折餉 朝廷多一分恩典兵勇轉多一分剋扣故久充統領無不坐擁厚貲至十數萬或數十萬百萬者其所用營官哨弁或位置親友或瞻徇請託率皆貪懦無能上行下效勇丁月餉三四五兩本屬不豐再重重剝削一勇月不過得制錢一二

千文安望其用命效死耶故十營無五營之勇五營不能得一勇之心若不重整規條嚴定賞罰有營如無營何以言兵更何以言強臣愚以爲練兵必先選將須操守廉潔而又能謀勇兼優方可充統領之任分統營官均須慎擇而欲懲其貪必先養其廉擬請將營制畧爲變易一營裁勇百名即以此百名之餉分撥統領分統營官酌予增益所有包餉壓餉之弊概行禁絕一切營哨官弁薪水公費勇丁長夫口糧按月由營務處榜示各營倘匿不張貼惟營務統領是問如再有勇數缺額及侵蝕剋扣者一經發覺定以軍法從事並責成各省督撫稽查如知而不舉別經舉發即治該督撫以徇庇之罪務期法在必行若再視爲具文則軍事無可

整飭其操練之法各營刊發簡明條規勤加訓教嚴明紀律而復結以恩信平時有相維相繫之心臨事自可得親上死長之用轉弱爲強要在行法要在得人耳東省威海旣駐倭兵戒備不可或懈臣當飭各營加意整頓以備不虞海軍經營二十年矣旅順威海繼陷全師覆沒議者猶歸咎於鐵甲太少援軍莫繼今欲重振海軍即修復從前舊規已非數千萬不可再議加增數且倍蓰國家帑力有限鉅款何處可籌且刻下海軍將領亦鮮有勝任之人此事似宜緩辦至建立學堂一節查廣西臬司胡燏棻原奏請將各省會及各府縣大小書院一律裁改歸併創立各項學堂將各種西學書分印頒發延西人教習並謂即孔孟復生舍富強無

立國之道舍仿行西法更無富強之術等語此離經畔道之談人心風俗所關不可不辨夫中國之所以維持於不敝者以有聖人之教耳自堯舜湯文以至孔孟所以範圍天地曲成萬物正人心而厚風俗非此莫由中國聖經賢傳大而綱常倫紀之重小而名物象數之微無不備具推而百家九流之書凡天文地輿算學以至樹藝畜牧各有專家今人所詫泰西之法爲神奇者多衍中國之書之緒餘以成爲絕詣特中國不以此專長耳近來 朝廷設立同文館矣設立武備學堂矣謂行軍製器參用西法未爲不可若如胡燏棻之言勢將驅天下之才力聰明併心壹志以專攻泰西之書而加諸聖經賢傳之上即令富強埒於泰西而人心之陷

溺已不可救臣恐天下之患不在夷狄而在奸民不在貧弱而在亂臣賊子其禍有不可勝言者矣近年諸臣中熟悉洋務者莫如大學士臣李鴻章李鴻章之崇效西法亦專且久矣所謂富強者安在哉夫富強之術自不外於籌餉以練兵而餉別無可籌也亦曰節糜費而已矣杜中飽而已矣而欲節糜費而杜中飽亦曰絕瞻徇而已矣 國家歲入七千餘萬生之不可謂不衆而度支奇絀實由用之未舒臣愚以爲欲求節用當自 朝廷始伏願 皇上下明詔禁侈靡崇儉約能土木之工省傳辦之費 躬行節儉以爲天下先 敕下戶部詳查正項經費之外歷年添出各款何者可減何者可裁並 嚴敕各省督撫臣悉心運籌省去不急之

費裁併局務即以汰除冗員但於國體無傷不得避苛刻之名任其虛耗天下無名之費分之雖爲數無多合之則爲費甚鉅綜京外計之歲省當無慮數百萬果能中外一心力求撙節不必言興利之策而度支當可漸裕矣山東自黃河入境投效者趨之若鶩歲糜薪水鉅萬臣嚴加裁汰非從前實有勞績可辦要工者不准投效至各局之可併者已節次奏裁仍當隨時留心稽覈裁減以重帑項我朝賦入有經即關稅釐金亦莫不取民有制乃以有定之財上不在國下不在民而利歸中飽此最不平之事也聞朝廷有大工作自承修大臣而下以至監督丁書各有規費名曰節省銀兩非大臣甚廉正者率未能免到工者不過三四成

內務府承辦供奉及舉行諸 典禮其侵蝕乾沒更復不少外省
如丁漕雜賦或捏完作欠或挪新掩舊至釐金關稅征多報少更
爲叢弊之尤田畝以熟報荒亦屬中飽之一爲大吏者或樂其進
奉與爲彌縫貪不知懲則廉無所勸應請 敕下中外大臣力抉
其竇概與埽除而廓清之化私爲公使涓滴悉歸正用煙臺之東
海關 臣前請改用候補人員並照協辦大學士 臣徐桐條陳委員
密查其有隱匿情弊當令和盤託出從前不實不盡之處官非一
任應請寬其既往臨清關收數亦未能核實 臣近已派員密查酌
辦但能有益 國家不恤身爲怨府蓋積習相沿已有積重難返
之勢非爲大臣者破除情面力絕瞻徇則中飽不得而祛糜費亦

無自而節也而其要必歸
上諭爲政之要首在得人
臣者進退天下之人才者
未有己不廉而能繩人之
臣督撫得其人各盡以
臣尤伏願我皇上任賢
之進退務使舉一人而
人則俊乂同升不患吏治
軍政之不修大法小廉由
以實心實力行之不必修

治法無治人雖盡得泰西之法而效之亦徒使其罔利營私之計耳試觀近數十年凡專辦交涉之事侈言洋務之利者無不家貲千百萬昭昭在人耳目究之其利在公平在私乎亦可立燭其奸矣臣賦性迂拙洋務非所素習而默察治亂之機總以正人心培國脈爲本補偏救弊可也因噎廢食不可也由末及本可也尊夷非聖不可也連日與司道反覆參稽意見相合敢布其管窺之見冒昧上陳恭備 聖明採擇再臣七月由萊州回省因事關重大與司道展轉籌商有稽時日是以覆奏稍遲合併陳明所有遵旨覆陳緣由理合恭摺具 奏伏乞 皇上聖鑒訓示謹 奏

光緒二十一年九月二十九日留中

奏齊東縣城遷徙驛站改道協撥夫馬工料核入奏銷造報

摺光緒二十一年九月二十二日

奏爲齊東縣城遷徙驛站改道協撥夫馬工料核入奏銷造報恭摺仰祈 聖鑒事竊查前准兵部咨覆齊東縣城因何遷於九扈鎮是否奏明有案驛站改道協撥夫馬有關定額未便據咨辦理仍應 奏明核辦等因當經轉行遵照去後茲據藩臬兩司詳稱濟南府所屬之齊東縣城濱臨黃河時虞沖決因查縣境九扈鎮地處高原未經黃水是以遷徙改建土城並將同府所屬之齊河縣丞移駐齊東縣舊城分防以資彈壓光緒二十年正月前撫臣福潤奏奉 硃批交部議奏旋經工部主稿會同吏部戶部禮部

兵部議准覆奏是年五月二十四日奉 旨依議欽此欽遵由兵
工二部抄錄原奏咨行在案惟縣城既已遷徙驛站必須改道緣
齊東青城蒲臺利津等縣一切公文餉鞘人犯差使向由濟陽縣
往來遞送濟陽距齊東舊城七十里今距九扈鎮新城一百一十
里且中隔大小清河兩道若仍由濟陽轉遞道路綿長貽誤堪虞
不若改由章邱縣遞送較爲便捷查齊東縣新城上距章邱縣七
十里下距青城縣四十五里路途平坦並無阻隔上下站皆可朝
發夕至凡有齊青蒲利等縣往來公文餉鞘人犯差使均於光緒
十九年十二月底一律改由章邱縣接遞歷城縣亦改遞章邱較
之原送濟陽程站僅添二十里夫馬尙敷應用無庸另議協撥但

章邱地當東省孔道原設夫馬無多加以改道之繁更屬不敷輪轉擬請在於濟陽縣額設里甲夫馬項下撥給章邱縣馬二匹驢一頭馬夫一名半白夫四名以資協濟其濟陽縣額編工料銀兩即以光緒二十年正月初一日爲章邱縣起支日期核入該年驛站奏銷造報並於各該縣賦役全書內分別收除如此轉移挹注仍與定額相符等情會詳請 奏立案前來 臣覆核無異除咨部查照外理合恭摺具陳伏乞 皇上聖鑒 敕部立案施行謹 奏 光緒二十一年九月十一日奉 硃批該部知道欽此

奏東省賑務仿照義賑章程變通辦理摺

光緒二十一年九月二十二日

奏爲東省賑務擬仿照義賑章程變通辦理恭摺具陳仰祈 聖

鑒事竊自黃河入東以來頻年汎濫幾於無歲不災無歲不賑我
皇上恫瘝在抱凡請蠲請賑無不立沛恩施本年復經臣

奏准截留新漕 湛恩汪濊有加無已 臣奉職無狀以致災歉頻
仍仰體 聖主覆幬之仁敢不竭力盡心俾災黎得沾實惠查放
賑以察覈戶口爲第一要義被災村莊有束手待斃者有稍可自
存者孰應多給孰應減給孰可不給必須逐戶挨查方能覈實東
省辦賑日久乃奉行不善流弊滋生查賑委員不下鄉挨查人數
開白莊長造冊委之書吏而戶口之大小多寡與極貧次貧之差
等得以任意贏縮重領冒領習爲固然真正飢民反不得食即同
一得之亦仍是均攤勻散而溝中之瘠已非一滴所能蘇每年公

文下行賑册上報曰賑過若干人其實災民之生與死未嘗過問
浮濫之與遺漏其罪等耳伏思賑濟一事本 朝廷格外之仁所
以救死也非以博施也所以周急也非以繼富也 國家經費有
限湯年一溉衆所共爭奪飢者之食以實不飢者之腹在不飢者
無所加而飢者死矣節不飢者數家之食以贍飢者一家在不飢
者無所損而飢者一家可以不死矣今之議賑者動曰甯濫毋遺
臣愚以爲濫則反致有遺欲無遺必不可濫近年南紳嚴作霖等
在各省散放義賑皆親歷窮檐察其貧苦等次分別放給最爲法
良意美東省今歲黃水漫決上游東平一州全境罹災壽張東阿
鄆城陽穀等縣亦被淹甚廣下游則青城齊東最重高苑博興樂

安利津等縣皆黃水所經小民蕩析離居情殊可憫此外運衛兩河漫溢及沿河黃水波及者尙有十數州縣之多賑款除奉旨截漕外津海關道先後籌墊賑捐銀十萬兩交南紳嚴作霖攜帶來東俟續行勸捐歸還嚴作霖復電求各處協濟臣已商令先赴青城等縣查放現在賑捐已成弩末臣復分函求助直豫江蘇各省山東京官國子監祭酒臣王懿榮少詹事臣張英麟亦分投電函告貸各疆臣均體念時艱不分畛域直隸督臣王文韶協賑銀八萬兩四川督臣鹿傳霖協賑銀一萬兩兩廣督臣譚鍾麟廣東撫臣馬丕瑤協賑銀二萬兩江蘇撫臣趙舒翹協賑銀二萬兩河南撫臣劉樹棠協賑銀一萬兩上海義賑局南紳施則敬亦協義

賑銀二萬兩常鎮通海道呂海寰捐銀一千兩先後匯解來東查嚴作霖歷辦各省義賑均能實惠及民義聲動遐邇所有下游各州縣即由嚴作霖會同各地方官辦理以期核實其上游東平壽張等州縣臣當飭賑撫局司道遴委操守可信勤樸耐勞之員前往會同各地方官仿照義賑辦法沿莊周歷戶必親填人必面驗票必親給於極貧次貧中擇其尤苦者加給錢文以資拯救其尙能自存及游惰不務正業者即與剔除施放棉衣亦如之倘印委各員仍奉行故事聽憑書差莊長捏開冒領一經查出立即嚴行參處其有不避勞怨實能多救民命者酌予獎勵去一浮濫即蘇一枯瘠於災黎必有裨益惟東省連年災賑民間待食於官已視

爲成例一經認真釐剔濫領者不遂所欲勢不免扳號喧嚷噴有
煩言甚至詈辱官長糾約上控以爲要挾之計似此刁風斷不可
長當飭嚴行懲辦以儆效尤蓋救荒本仁政非輔之以義則仁術
有時而窮懲其爭而法隨之亦猛以濟寬之道也總期帑不虛糜
惠皆下逮仰副 聖主子惠元元至意所有東省賑務下游擬交
南紳上游委員均照義賑章程辦理緣由謹繕摺具 奏伏乞
皇上聖鑒訓示謹 奏 光緒二十一年十月十一日奉 硃批
知道了欽此

奏壽張等縣僱勇起支口糧片

光緒二十一年九月二十二日

再前據藩臬兩司以曹州兗州兩府所屬地多伏莽緝捕緊要擬

請將缺分最苦兗州府屬之壽張縣曹州府屬之觀城縣各僱壯勇五十名又曹屬之武城范縣鉅野三縣各僱壯勇六十名以資巡緝即歸各該縣自行管帶每勇每名按日支給口糧銀一錢按案作正開銷統俟奏明欽奉 諭旨後再行飭令照章起支銀兩詳經 臣於光緒二十一年三月二十二日附片具奏四月十三日奉 硃批著照所請該部知道欽此欽遵行司分飭遵辦去後旋據各該縣遵照奏定章程先後稟報城武縣僱勇六十名鉅野縣僱勇六十名均於四月十三日成軍壽張縣僱勇五十名於五月初十日范縣僱勇六十名於五月十五日觀城縣僱勇五十名於五月二十日一律成軍均經 臣隨時委員前往點驗各勇皆精壯

足額當飭各該縣勤加訓練實力巡防自僱勇以來屢有報獲盜匪地方較爲安謐捕務不無起色茲據布政使張國正彙報該五縣壯勇共計二百八十名一律募齊各於成軍之日起支口糧並聲明該勇糧銀照章併入蘭郟費三縣勇糧奏銷案內另文造報等情詳請 奏咨前來 臣覆核無異除將勇丁花名清冊分咨戶兵二部查照外所有壽張等五縣僱勇成軍日期並起支口糧緣由理合附片陳明伏乞 聖鑒謹 奏 光緒二十一年十月十一日奉 硃批該部知道欽此

奏查覆徐州鎮總兵陳鳳樓被參各款摺

光緒二十一年九月二十二日

奏爲遵 旨覆陳仰祈 聖鑒事竊臣於光緒二十一年八月二

十九日承准軍機大臣字寄八月二十五日奉 上諭有人奏徐州鎮總兵陳鳳樓鑽營狡黠所部各營多不足額每借巡哨爲名冶遊無忌苛派勇丁攤分供給上年帶隊北上剋扣兵餉以致軍心不服在山東境內譁潰鬧餉延燒火藥車傷斃多命等語著張之洞李秉衡按照所參各節確切查明據實具奏毋稍徇隱原片均著抄給閱看將此各諭令知之欽此遵查原奏譁潰鬧餉延燒火藥車係山東境內之事當經轉行確查去後茲據兗州府知府王夔修轉據署甯陽縣知縣李汝封稟稱本年正月徐州鎮總兵陳鳳樓派委參將程曾淮管帶銘字後營馬隊前赴威海初四日行至甯陽縣北關該前署縣曹和浚代雇大車十五輛裝運火藥

軍械初五日行至離城三十里之岡屯村街內因驟頭驚跑車輪
碰石迸出火星致轟燃火藥車三輛軍械車一輛並轟斃差弁李
春發等又延燒民房四十餘戶燒斃大小男婦八名口委係猝遭
火災防護不及並無譁潰鬧餉情事等語核與正月間臣到萊州
據賑撫局司道及前署甯陽縣知縣曹和浚所稟無殊其非因譁
潰鬧餉尙屬可信至原奏所稱鑽營狡黠各營多不足額在鎮借
巡哨爲名冶遊無忌仍苛派勇丁供給北上時剋扣兵餉乾沒皮
衣價銀各節應由署兩江督臣張之洞查覆臣查陳鳳樓於春間
調援威海行至濰縣復奉調赴津臣在萊州未與晤面惟聞其人
頗有貪名習氣甚重人言嘖嘖恐非無因臣旣奉旨確查不敢

稍涉徇隱應俟張之洞覆奏恭候 聖裁所有遵 旨查覆緣由
理合恭摺具 奏伏乞 皇上聖鑒訓示謹 奏 光緒二十一
年十月十一日留中

奏道員積勞病故請卹片 光緒二十一年九月二十二日

再山東歷年委辦工賑積勞病故人員均經前撫臣先後奏蒙

恩准賜卹在案茲查二品頂戴遇缺題奏道李清和經臣於閏五
月檄委督辦上游河工時值伏汛屆臨該道星馳赴工兩岸三百
餘里周歷查看到工不旬日即值高家大廟大隄漫口該道由賈
莊折回口門沿途積受暑溼已病不能支復以工程緊要焦心勞
慮寢食俱廢嗣因病乞假臣以該道任事誠篤可信批牘慰留該

道亦以口門未堵焦急萬分力疾經營不遑將息於光緒二十一年八月十七日歿於工次據河防局司道詳請 奏卹前來臣查該道自奉委到工於修守事宜殫精畢慮勞瘁不辭乃以冒暑過征積勞病故實屬以死勤事核與歷辦請卹成案相符該道前因高家大廟漫口部議降二級調用奉 旨准其抵銷該道有無紀級可抵應候吏部查議惟既因公積勞病故合無仰懇 天恩俯准將二品頂戴遇缺題奏道李清和 敕部從優議卹並查銷降級議抵之案出自 鴻慈除飭取履歷咨部外謹附片具 奏伏乞 聖鑒訓示謹 奏 光緒二十一年十月十一日奉 硃批李清和著准其開復處分並交部從優議卹欽此

奏東綱疲累已深商民交困懇免加價摺

光緒二十一年九月二十五日

奏爲東綱疲累已深商民交困仍懇 恩准寬免加價並免另行

籌款以示體恤恭摺仰祈 聖鑒事竊臣於光緒二十一年六月

初十日承准軍機大臣字寄六月初六日奉 上諭戶部奏需餉

孔殷謹陳辦理情形一摺另單所陳鹽餉加價妥速籌辦等因欽

此咨行到臣查戶部條陳單開沿海防軍未能裁撤仍擬通行各

省每鹽一觔一律加制錢三文倘鹽商藉口滯銷不肯普行加價

必須照應加之數另行籌出等因當經分飭轉行欽遵籌辦伏念

鹽餉加價充餉出於萬不得已部臣職總度支籌餉是其專責而

東省民困商疲久邀 聖明洞鑒上年編修張百熙條奏部議通

行每觔加價二文以佐軍需經臣體察東綱商情與兩淮川廣等省迥不相侔專摺奏懇 恩免欽奉 硃批着照所請戶部知道欽此欽遵行知在案值此時事多艱庫帑奇絀凡在內外臣工苟有餉源可開敢不盡心竭力以期稍補涓埃惟東綱自兵燹以後元氣至今未復加以黃流東趨濱河州縣幾致無歲不災民多蕩析戶鮮蓋藏今夏河決爲患下游呂家窪漫溢成口沖毀鹽灘九十餘副一時規復不易其未被水沖者亦多爲雨水所傷產鹽短絀異常現雖設法借運能否源源接濟尙無把握而航海採購轉運爲難穰價騰昂脚價加重較之往年所費不啻倍蓰商人顧念成本計較錙銖扣稱短觔小民已隱受其害設再增此二文加價

災歉餘生何以堪此倘因加價累民而令各商照應加之數每年另行籌出亦復窒礙難行蓋緣成本過鉅無岸不虧無商不累竭蹶難支尤非上年可比上年報効餉需銀十萬兩原分四年攤扣現已一年扣還無幾疲累之深於此可見今黃流肆虐灘鹽歉收再欲強其所難各商計無所出必仍取贏於鹽觔之中短觔與加價相同不取於民從何挹注且恐官引愈滯私販愈繁課本兩虧有礙大局是餉源愈開而愈塞無補軍需引票日積而日懸轉妨正課委係實在情形並非藉口滯銷據鹽運司詳據引票官商稟請一併 奏免前來合無仰懇 天恩俯念東綱疲累已深商民交困仍准寬免加價並免另行籌款以示體恤出自 逾格鴻慈

除咨部查照外理合恭摺具陳伏乞 皇上聖鑒訓示謹 奏

光緒二十一年十月十一日奉 硃批戶部議奏欽此

奏赴上下游查看漫口工程片

光緒二十一年九月二十五日

再黃河伏秋大汛歷任撫臣均駐工督率臣前辦海防久駐萊州未能赴工現在雖屆霜清惟漫口尙未堵合亟應親歷履勘臣定於九月二十七日由省由陸路先赴上游查看高家大廟漫口再乘舟順流而下沿河查看工程並利津呂家窪海口再登岸由陸路回省所有署中日行公事循例委藩司張國正代拆代行遇有緊要事件仍包封送臣行次核辦理合附片陳明伏乞 聖鑒謹奏 光緒二十一年十月十一日奉 硃批知道了欽此

奏查明甯海等縣被擾懇蠲緩糧賦摺

光緒二十一年十月二十一日

奏爲查明甯海文登榮成三州縣被擾情形懇恩蠲緩糧賦以蘇民困恭摺仰祈聖鑒事竊自上年倭人肇釁擾及海疆甯海文登榮成三州縣相繼失陷官廨民舍焚掠一空僻壤窮鄉蹂躪畿遍即未被擾害之處亦多聞警逃避資糧拋棄耕作失時小民顛沛流離較水旱災傷爲尤甚迨本年二月初間城池先後收復維時城鄉殘破滿目瘡痍倭人意圖要結民心到處放賑殊爲隱患經臣分飭各地方官先行出示停徵閭境錢糧並飭局籌款購麥易錢委員分投散放兼放倉穀辦理平糶招集流亡優加撫恤使其各安生業惟是兵燹之後元氣過傷自應各就地方情形分

別輕重量予調劑以蘇民困飭據登州府知府端謹督同各該州縣查勘明確稟由藩司張國正彙核詳請具 奏前來合無仰懇

天恩俯准將被擾成災最重之甯海州城內社城裡並雙林等社酒館村等共三十九村莊文登縣城內四隅同辛汪等都長峯村等暨併衛屯之半壁山共二百十五村莊榮成縣山後溫泉等都河西莊等三百十五村莊並城內四隅應徵本年上下忙錢糧德麥倉項併衛錢糧灶課鹽課等項一律全行蠲免各該州縣本年錢糧均未開徵並無災前溢完蠲額銀兩毋庸查辦流抵又勘不成災被擾較重之甯海州莒島等社杜家疇等一千七十二村莊同併衛千金屯等十五屯官莊灶等十六灶文登縣雲光等都

望海倪家村等及坊廂併衛共一千二百二十八村莊榮成縣山前朝陽等都前仁子亦等四百三十九村莊應徵本年上下忙錢糧德麥倉項併衛錢糧民佃灶課鹽課票價等項均請緩至光緒二十二年秋後啟徵以上三州縣被擾成災最重並勘不成災較重閣境村莊統計應蠲免正銀九千六十四兩六錢九分應緩徵正銀四萬六千五百四十四兩六錢九分六釐坐落各該州縣民佃灶地以及鹽課票價等項錢糧隨同民田一律辦理應蠲應緩銀數不在前項總數之內其光緒二十年暨十九年以前歷年錢糧均係年清年款並無未完民欠亦無因災原緩遞緩錢糧毋庸議請展緩如此分別調劑民力藉可展舒感頌 皇仁實無既極除

飭造蠲緩冊結另行送部外所有查明甯海文登榮成三州縣被
擾情形議請蠲緩糧賦緣山理合恭摺具陳伏乞 皇上聖鑒訓
示謹 奏 光緒二十一年十一月初七日奉 硃批著照所請
該部知道欽此

奏齊東縣北趙家漫口堵築合龍摺

光緒二十一年十月二十一日

奏爲齊東東北趙家漫口堵築合龍恭摺具陳仰祈 聖鑒事竊查

上游高家大廟下游北趙家兩處大隄前因伏秋大汛宣洩不及
以致漫溢成口經臣於七月初五日在濰縣途次恭摺馳 奏並
將在工各員參處在案維時水勢汎濫迤下之南嶺等處民埝亦
同時漫溢實土難求臣飛飭下游總辦候補道丁達意盤築裹頭

一面購備積料迅籌堵合接據丁達意稟稱該處口門本係順隄支河掣動正河之溜刷寬至一百三十餘丈奪大溜十分之四口門與正河相去里許已成入袖之勢甚爲棘手若就前面正河取直堵合而水寬三百餘丈須填支河三道需款更鉅當茲庫款支絀不得不力求節省經該道於七月下旬督飭營委各員於東岸兩水分流處做迎水壩一道又於西岸上流連做挑水壩五道將入口之水挑出大半西壩口門涸出七十餘丈隨即加築成隄尙餘水工六十餘丈兩壩分路進占又值八月二十日至九月初十日河水接續增漲支流刷深大溜愈見側注丁達意督率文武奮力搶辦九月二十七日將東西金門占做齊二十八日搶進關門

大占業已追壓到底而水勢湍急西壩陡出埽眼兼之河底全係浮沙搜根淘刷將西壩金門占蟄動復牽連新進三占全行蟄落經在工員弁趕用蒲包盛土並軟草茸糝等物併力堵塞已將金門占搶固而西壩隄占接縫之處又潰裂刷成水溝一道寬近六丈深二丈有奇丁達意復飭於西面臨河廂做磨盤埽二段以防回溜東面於蟄動兩占後廂寬二丈餘再另做金門占留寬龍門上口五丈下口四丈至十月初六日將金門占盤築堅實初七日寅刻下占合龍酉刻追壓到底惟入袖之水猝無去路回環鼓盪復出罅漏兩處不得已於前面添做門簾埽後面添做靠枕埽適臣巡閱河工率同中游總辦署濟東道李希杰候補道潘延祖於

初八日到工該道等會同籌商於後面修築邊壩實以膠土竭四晝夜之力始於初十日亥刻閉氣斷流用款僅六萬二三千兩據丁達意稟報前來臣查夏間漫口以北趙家工程爲最鉅口門距正河一里有餘大溜旁趨堵合本屬不易丁達意因雙壩多費料物祇用單占本屬蹈險幸仰邀 聖主福庇得竟成功隄外之水逐漸涸出民間尙可無誤春耕堪以仰慰 宸厪在事文武員弁奔走河干至七十日之久風餐露宿艱苦備嘗復能力戒虛糜事歸核實不無微勞足錄合無仰懇 天恩俯准將下游總辦候補道丁達意查銷降級議抵處分試用府經理何國禔補用縣丞曾碩儒均請免補本班以知縣補用試用從九吳震澤請免補本班

以縣丞補用總兵銜副將用補用參將杜榮福副將銜補用參將
徐天慶均請免補參將以副將儘先補用儘先把總郭成揚連立
均請免升千總以守備儘先補用其因漫口革職之候補知縣湯
宗幹典史潘名彥革職留任之補用遊擊李金書暨呂家窪失事
革職戴罪修築之候補知縣乙沛恩試用巡檢陳式穀革職留任
之補用遊擊朱康仁經丁達意稟調來工均能奮勉圖功不避艱
險應懇 恩一併開復處分湯宗幹乙沛恩二員並請免其送部
引 見以昭激勸至上游高家大廟漫口經 臣親歷履勘口門已
漸挂淤俟劉新石莊民埝築完後堵合尙易爲力估計需款不過
六七千金南嶺一帶民埝本係民修民守惟災黎昏墊之餘異常

困苦擬仍飭下游總辦撥款堵築以紓民力其呂家窪口門前經奏明留爲出海之路惟現在水落歸槽已不似從前之通暢尙應添築大隄挑挖河身俟丁達意勘估稟辦再行具奏所有齊東北趙家漫口堵合緣由理合恭摺具陳伏乞皇上聖鑒訓示

謹奏 光緒二十一年十一月初七日奉 硃批另有旨欽此

奏新造抬槍解呈督辦軍務處驗放片

光緒二十一年十月二十一日

再查火器以堅利及遠爲要堅則耐用無慮臨時損壞利則靈捷敵槍一施我可再注且兩軍相對旌旗未辨礮火先到非致遠不易爲功近來各省均購外國洋槍以爲非中國所能製造不知中國既有各種槍式其機關可拆而視即可範而模且各國槍式不

同求其兼有堅利遠之長者亦不多覩臣屢飭機器局專心製造總期求其在我總辦機器局候補道潘延祖於各國槍式素能潛心考究師其所長棄其所短近造一種洋式擡槍其大端因乎毛瑟兼有比利時之渾堅哈乞克斯之利捷試放可及四里之遠駕毛瑟而上之似爲制敵利器即名之曰堅利遠後膛擡槍茲飭局將造成者委員解送二十桿後膛礮子四千顆又仿照洋式自造毛瑟槍二桿毛瑟槍子二百顆一併解呈督辦軍務處驗收如試放合用似可通飭各省機器局一律仿造俾逐漸擴充備用無須仰給外洋於軍事不無裨益除咨呈督辦軍務處外謹附片具陳伏乞 聖鑒謹 奏 光緒二十一年十一月初七日奉 硃批

知道了欽此

奏查看黃運兩河大概情形及回省日期片

光緒二十一年十月二十一日

再臣查閱河工於九月二十七日出省曾經 奏報在案三十日

行抵東阿陶城堡察看北運河口門十月初一日乘船西上至高家大廟履勘漫口工程復折回由東平州十里堡至戴廟安山一帶察看南運河情形查北運河水無來源全賴借黃濟運當伏汎盛漲之際深慮掣動大溜本年六月漕船前幫已過後幫未來而水勢增漲不已危險萬分南運河自十里堡至戴廟近已淤墊不通舟楫由戴廟至安山僅可通一葉小舟而盛漲之際沙水汎濫隄身半多沖缺均應大加修治查南運河工程向由東河督臣督

飭運河道辦理惟運河自嶧縣入境皆山東地方漕運所經亦民生利害所關臣忝任封圻遇有疏虞不得不引爲己咎也初五日順流東下查看各段著名險工其沿河埽壩經大汎之後不免蟄陷已由各總辦分飭補廂初八日抵北趙家復至南嶺呂家窪等處查韓家垣海口已經淤塞祇有就呂家窪另籌疏洩之法惟兩岸隄身卑薄下游更甚臣此次水陸周歷凡遇險要之處皆步行察看現雖水勢消落而盛漲時之淤痕猶在隄岸卑處僅如田隴間有水與隄平於隄頂搶加一綫子埝者若不急加修培一遇水大年分處處可從隄頂漫過勢將束手無策溯查自光緒十二年以後除歲額經費外所請修培之款共計六七百萬金果能涓滴

到工何至卑薄若斯之甚現在約畧估計上下游兩岸加高培厚需款七八十萬金東省庫空如洗既無可籌部庫亦支絀異常不敢貿然請款而目觀形勢危險若徒勉強補苴冀邀天幸設一旦洪流橫決四溢爲災上無以對 朝廷下無以對百姓此臣所日夜焦思不得不直陳於 君父之前者也臣於十四日在利津縣鹽窩登岸由陸路晉省十九日回署所有臣查看黃運兩河大概情形及回省日期理合附片具 奏伏乞 聖鑒訓示謹 奏

光緒二十一年十一月初七日奉 硃批知道了欽此

奏裁撤煙臺練軍片 光緒二十一年十一月初九日

再東海關常稅每歲額解銀五萬七千兩煙臺練軍一營即歲需

四萬餘兩除底餉五千餘兩由藩庫支領外餘俱由常稅項下支銷又從前泰安輪船歲需銀三萬餘兩係從洋藥釐金項下開支若亦取之關稅即盡數開銷尙不敷用夫 國家設立關稅原爲籌餉計耳乃以關稅一年收數不敷一營一船之用損下而不能益上徒爲關員冒銷侵蝕之資又焉用此關爲現在泰安輪船已歸招商局而練軍照舊開支查煙臺現駐有陝西漢中鎮總兵孫金彪所帶嵩武四營足資鎮攝應請將練軍一營即飭裁撤以節糜費至東海關常稅收數經 臣委員密查實有隱匿中飽情弊惟官非一任應請寬其既往 臣已飭新任東海關道李興銳實力整頓將從前收多報少之弊力與滿除濫支濫應之款概行裁革俟

核定每歲可提出若干再行奏明撥歸公用謹附片陳明伏乞

聖鑒訓示謹 奏 光緒二十一年十一月二十四日奉 硃批

知道了欽此

奏山東歷辦礦務並無成效現擬封禁以靖地方摺 光緒二

十一年十一月十一日

奏爲山東歷辦礦務並無成效現擬封禁以靖地方恭摺具陳仰

祈 聖鑒事竊 臣准北洋大臣直隸總督 臣王文韶咨稱據前山

東濟東道李宗岱登萊青道劉含芳會稟遵查前充招遠礦局總

辦李贊芬辦事乖謬經金山華商林道琚等稟請撤退李贊芬由

該華商等集股再行派人接辦等語林道琚等爲原議開辦之人

應仍准集股購器前來接辦咨請查照飭遵等因 臣維近日言利源者皆以開礦產爲首務果其地不愛寶可以利 國利民 臣亦何不樂爲興辦然歷考山東舉辦礦務則有但見其弊未見其利者請爲 皇上陳之查山東礦務自光緒九年前濟東道李宗岱稟請開辦棲霞等縣金礦因民情不順由登州府等稟請停辦經前撫臣陳士杰咨准北洋大臣從緩計議嗣經該道屢次稟請於光緒十一年開辦平度州金礦先後息借匯豐銀行銀十八萬後忽稱出金不旺停挖赴京日久擱置不理查其虧欠除匯豐銀行外尙欠淮軍銀錢所六萬兩各商股本銀二十一萬兩光緒十七年八月經北洋大臣李鴻章札委前登萊青道盛宣懷將該礦查

封備抵迫派員往查僅存硫磺鐵千餘噸不過值銀五千兩一切房屋器具未能懸估而該礦附近之處復欠有京錢近十萬串債主則自紳富以至隸役錢數則自盈萬以至數串一聞查封之信皆環向其家屬索欠兼積欠礦局丁役匠勇工食均向催討男女喧呶內外鼎沸衣物典質一空債欠仍不能清償此李宗岱歷辦礦務無益有害之情形也李宗岱先於光緒十五年以甯海州礦綫甚旺請將平度礦務歸併甯海一律官督商辦會同候選道馬建忠陳世昌同知徐麟光及金山華商林道琚派出之中書銜李贊芬即李贊勳招股併辦以圖開拓嗣以股本未齊又經停歇迨十七年李宗岱平度局僱事之後李贊芬復約同陳世昌徐麟光

將李宗岱租買招遠縣之玲瓏山紅石崖金礦會同合辦而李贊芬又復辦理乖謬擅取他人器具誑騙他人股本消耗六萬餘金本年十月經李宗岱劉含芳稟經北洋大臣王文韶移咨山東轉飭福山縣將李贊芬解赴粵東交原籍新甯縣收管待金山華商向其清結此李宗岱僱事後李贊芬接辦招遠礦局又復僱事之情形也茲准北洋大臣咨稱李宗岱又以金山華商林道瑒等再行集股前來接辦該商未到以前山李宗岱暫用土法礮石淘金所出之金易銀除每月局用三千五百兩外尚餘銀二千兩解至淮軍銀錢所代收等因自係爲彌補公款洋債起見惟就北洋來咨內敘李宗岱原稟若出金稍劣之日解款不免減色是每月二

千金並不可恃且以後尚須購器建廠修路造橋置買車驟一切用物原稟謂三十萬金尙恐不足是前後成本共計八十餘萬兩矣從前李宗岱之四十五萬李贊芬之六萬餘均已銷歸烏有現存機器房屋所值幾何而謂後來之林道琚先認賠虧空五十餘萬復能多獲利益其可信乎李宗岱爲廣東巨富自總辦礦務以來家貲蕩盡虧負纍纍猶復不知悔悟希圖集股接辦必致舊債未已新債又增此以後開辦未有把握之情形也伏思山東礦務屢辦屢停非止一次此後成本愈重獲利愈難不免復蹈覆轍查開礦所用率多獷悍無賴之人方其開也藏亡納叛奸宄日滋及其停也大慝巨兇無業無家尤慮鋌而走險方今威海所駐倭兵

已七八千人深恐此等不逞之徒散無可歸因而起衅爲患不堪設想臣熟權利害與其貽悔於後曷若審慎於先擬請將東省登萊等府礦務暫行一體封禁俟海疆綏靖之日再行察看情形斟酌辦理臣爲弭患未形起見是否有當謹縷晰恭摺具陳伏乞

皇上聖鑒訓示謹 奏 光緒二十一年十一月二十四日奉

硃批著照所請戶部知道欽此

奏覆遵旨籌辦摺 光緒二十一年十一月十八日

奏爲遵 旨籌辦恭摺覆陳仰祈 聖鑒事竊臣於本年六月初十日在萊州營次承准軍機大臣字寄光緒二十一年六月初六日奉 上諭戶部奏需餉孔殷謹陳辦理情形一摺所擬考覈錢

糧整頓釐金各節皆屬切實可行著各直省將軍督撫查照該部所擬認真妥辦又裁減制兵一條擬令各省挑留精壯三成其餘老弱一概裁撤著該督撫各就地方情形悉心妥籌核實裁汰另單所陳鹽斤加價裁減局員薪費重抽菸酒稅釐各條並著一體實力舉行等因欽此遵即飭行司局分別妥籌議辦去後茲據該司道等覈議詳覆前來除鹽斤加價一條已於九月二十五日覆奏外謹將遵議籌辦情形敬爲我 皇上陳之查錢糧爲 國家經費大宗州縣催科以勤隋分殿最司道府州亦均有督催之責東省向來考覈之法令經徽州縣自每年二月開徵起即將某日徵銀若干逐一開列按月結總造具解支完欠清摺申送上司

查考如查有徵存銀兩多則立予委提少則隨時札催不准久存屬庫致滋虧挪之弊凡未完在一分以上者悉照部章於每年未辦奏銷以前將經徵職名先行揭參但各州縣地方情形不一依限全完者固多而凋敝之區零星小戶亦不無未完民欠合計通省州縣衛所起運地丁正耗等項共歲徵銀三百九萬餘兩內除被潮灘廢沿河坍塌隄占沙壓豁除以及因災蠲緩未完民欠外每年約計完至九分以上尙無官吏侵欺情弊臣仍當督飭藩司認真催查嚴申誥誡如查有以熟報荒捏完作欠及交代不清挪移掩飾情弊定即從嚴參辦以懲貪墨而重正供此考覈錢糧之情形也釐金爲軍餉要需惟收數向無定額徵多報少弊最難防

東省地處偏隅非江浙兩湖閩廣等省水陸交通商賈輻輳者可
比收數歲僅六萬餘金其稽徵章程亦不如南數省之密臣詳加
參考飭令各局卡每月月報將前三年逐月收數開摺呈送比較
收數之盈絀以察其徵解之虛實考覈已臻嚴密近復飭釐稅總
局詳議章程嚴防弊竇至各局委員其闒茸巧滑之人經臣先後
參撤現委各員尙知奉公守法不至任意欺漁其司事巡丁概不
准上司薦託嚴以馭吏寬以恤商總期去一分漏卮即多一分正
課此整頓釐金之情形也各省局所繁多支銷甚鉅東省局面較
小部臣所指各局名色多爲山東所無局員薪費亦與南數省之
報銷浩繁者有異上年臣履任後 奏明將各局所歸併由現任

司道總理局務停支薪水其委員薪水較優者酌予核減並不准兩差兼支本年又裁撤保甲局會辦道員專歸臬司總辦其釐金分卡之可歸州縣兼管者亦經分別裁改計一歲之中裁減局員及汰除投效人員節省薪費已鉅惟東省向無外銷間款從前開支冗濫無非挪東補西幾於捉襟肘見即如南運一局因開銷過鉅致無運本春鹽臣已於另摺陳明此次海防事起除截留一半京餉及海防捐輸外其餘皆就本省司道各庫挹彼注茲搜索殆盡故薪費雖經裁減實無專存報部候撥之款此裁減局員薪費之情形也菸酒耗費民財而有害於禾稼重徵誠不爲過惟部議所指蘭花皮絲等菸皆不產於東省由雜貨等舖帶售並無大莊

屯積轉運即兗沂等屬閒種菸草僅供本地吸食亦無巨商收販
遠處若就零星小戶稽徵稅釐事涉瑣碎恐滋煩擾於餉項仍屬
無益至酒稅每燒鍋一座納稅銀五兩曾於光緒十三年九月奏
准飭行十五年因糧價昂貴飭禁燒鍋遂將酒稅停免今擬重徵
酒稅固有舊案可循惟各州縣中燒鍋多寡資本厚薄不同其偏
僻鄉鎮小民隨在熬釀以備升斗零沽資本甚微銷售甚少似難
一概重徵俟戶部通行章程再行酌辦此菸酒稅釐未能統收之
情形也至裁減制兵一條臣前以實缺人員似難概行裁汰擬請
酌裁五成裁兵而不裁官仍分五年遞減於覆奏廣西臬司胡燏
棻等條奏案內陳明在案查山東額設馬步戰守兵一萬七千一

百四十八名歷年開除裁汰共三千四百六十九名現存馬步戰
守兵一萬三千六百七十九名臣前請裁減五成如蒙 俞允請
自光緒二十二年爲始陸續裁汰將每年節存餉項銀數開單分
別奏咨辦理以上各條由司道會議詳覆臣悉心覈酌凡可以變
通盡利之處皆已次第奉行惟有督飭司道各員力戒瞻徇認真
釐剔入款則嚴防侵蝕出款則禁絕虛糜體部臣維持補救之心
以上慰 宵旰憂勞至意所有遵籌辦理情形謹據實恭摺覆
奏伏乞 皇上聖鑒訓示謹 奏 光緒二十一年十二月初五
日奉 硃批另有旨欽此

奏預籌來年黃河防汛經費摺

光緒二十一年十一月十八日

奏爲預籌光緒二十二年黃河防汛經費懇 恩俯准照數撥用
以資修防恭摺仰祈 聖鑒事竊查東省黃河袤延千有餘里三
汛盛漲奇險環生旣無專管廳汛祇有分派員弁僱募勇夫節節
駐守用人稍多需款因之亦鉅加以河身淺窄水行地上全恃隄
埝埝壩以爲之防埝段愈密則工料愈繁臣自上年蒞任以來督
率各總辦道員力戒虛糜講求辦法裁減人數節省薪工惟於正
雜料物當用之需斷不能省復於險要各處添購磚石拋護隄根
以免屢廂屢墊本年三汛期內上下游險工林立隨時修防搶護
所請原續撥銀六十五萬兩勉強敷用即今春堵合高家紙坊漫
口經費亦在其內並未另案請撥臣於工員開報各款逐一稽核

不准絲毫浮冒各該員尙能仰體時艱實事求是茲查上中下三游兩岸埽壩迭經大汎淘刷半多蟄陷所儲料物早已告罄無存來歲春廂事宜必須提前籌辦採運磚石稽料皆爲汎所必需乘此冬令價值稍平及早分段購備庶免臨時束手現在督同河防局司道通盤籌畫光緒二十二年所需汎經費擬請照案撥銀六十萬兩內由司道各庫撥銀五十萬兩並將藩運兩庫應解籌備餉需銀各五萬兩存留備用臣請撥一分正款期盡一分實心仍當嚴飭在工各員破除情面覈實動支不敢任其稍涉糜費合無仰懇 天恩俯准照數撥用以資修防出自 鴻慈所有預籌來年黃河汎經費緣由理合恭摺具陳伏乞 皇上聖鑒訓

示謹 奏 光緒二十一年十二月初五日奉 硃批著照所請
該部知道欽此

奏山東整頓南運局籌出款項擴充機器情形摺 光緒二十

一年十一月十八日

奏爲恭陳山東整頓南運局籌出款項擴充機器情形恭摺仰祈
聖鑒事竊維用財之道首戒虛糜當物力彫敝之餘尤宜遇事
樽節惜浮費以供正用蓋用之於公雖鉅萬不當恡惜用之於私
雖絲粟亦屬濫支臣查山東南運自同治六年前升任撫臣丁寶
楨因商辦引懸課絀奏請改歸官辦設立南運總局借藩運兩庫
銀五萬兩領引春鹽運至河南商邱鹿邑等州縣派員經理每年

除完繳正雜課款及扣還成本支銷局用外如有贏餘即儘數充
餉於規復額課之外復出其餘以濟軍需之窮法至善也乃其後
奉行不善積久弊生南運一局幾視爲撫署之外府除每年提充
撫署公費銀一萬餘兩外凡冗員之薪水京朝官之情託往來遊
宦之抽豐悉於是乎取給而外閒分局委員亦率多瞻徇薦託漁
利分肥支銷日繁成本日絀近年不獨毫無餘贖尙須多方借貸
始能春運蓋非入之不多實由用之無節也臣稔知其弊於去秋
抵任後以立法必自近始首將臣署每年公費銀一萬二千兩盡
行裁革凡局中挂名薪水一概刪除各分局擇其最優之處酌提
餘利解省嚴飭南運總局詳細鉤稽務使涓滴歸公不留絲毫弊

混計一歲之中逐項撙節可贏餘四萬餘金如能久而行之積漸可成鉅款矣山東庫藏虛竭海防河務羅掘一空而時事艱難練兵製械尤爲當前急務機器局所製洋式後膛擡槍尙能堅利及遠可稱利器惟舊有機器規模太小每月不能多造查外洋製造後膛槍機器多則數十萬兩至少亦需十五六萬兩刻值部庫支絀兵餉尙難籌撥何敢再請購器之款上煩宸厪臣擬將南運局贏餘之項自本年爲始儘數陸續提作購置機器之用機器購就即可擴充製造將來購買鋼鉛煤鐵及添募工匠設鑪建廠等項須歲增數萬金藩庫例撥銀兩不敷甚鉅擬俟機器購成後常年提南運局餘利四萬兩作爲添造槍械之需總辦南運局候補

道康奉藹任事實心釐剔弊端不避嫌怨總辦機器局候補道潘
延祖沈思獨往明敏過人均能精覈節省相與有成臣即責成該
二員籌款則源源接濟製械則精益求精不必動用正款而革無
名之冗費充有用之要需於時務不無裨益所有東省整頓南運
以後裁禁濫用即以此款擴充機器緣由謹繕摺具 奏伏乞
皇上聖鑒訓示謹 奏 光緒二十一年十二月初五日奉 硃
批著照所請戶部知道欽此

奏恩蔭外用恭謝天恩摺 光緒二十一年十一月 日

奏爲恭謝 天恩仰祈 聖鑒事竊臣子政均由光緒二十年

恩詔二品廕生本年入都考試臣恭閱邸鈔九月二十六日吏部

帶領引見奉旨李政均著外用欽此聞命之下感激莫名
當即恭設香案望闕叩頭謝恩訖伏念臣淄青報政績愧靡
揚儒素承家舉慚鯉對值聖孝尊親之典膺朝章任子之
榮臣子政均式穀未能析薪勉荷遠拜六龍之詔俾襄五馬
之班曲被恩施渥叨世祿臣惟有寓書訓誡勵志忠誠材雖等
於菲葑心總傾乎葵藿兢兢業業常懷冰淵怵惕之懷子子孫孫
無忘高厚生成之德所有微臣感激下忱謹繕摺叩謝天恩
伏乞皇上聖鑒謹奏

奏東綱疲累課懸懇恩豁除釐頭減引摺

光緒二十一年十一月二十一日

奏爲東綱疲累課懸懇恩豁除釐頭減引以蘇商困恭摺仰祈

聖鑒事竊據鹽運使豐仲泰詳據引綱商李東興等聯名稟稱
商捐進關釐頭每引捐銀二錢道光二十九年清查案內議以一
錢貼補帑利一錢彌補積欠又東綱額引五十萬五百道自道光
二十三年爲始減領引十萬道歷年以來災歉頻仍商岸滯銷節
經奏奉 恩旨准予分別遞緩遞減在案查釐頭自光緒十九年
遞緩起至二十一年止減引自二十年遞減起至二十二年止各
屆限滿均應循舊辦理惟釐頭減引兩項自清查以後屢請展緩
在推展之初原期商力稍紓即可規復舊制詎咸豐五年銅瓦廂
決口黃流改道北趨始猶暢流入海繼則淤墊日高沿河數十州
縣及永阜一場頻遭氾濫之災民多流亡灘半沖毀本年水災尤

甚產鹽少而銷路微疲累情形日甚一日兼之輸釐助賑捐餉籌
工商人靡役不從無非取資於鹽較諸釐頭奚啻倍蓰且此爲彌
補商虧帑利積欠而設現在商力自顧不暇倘再責令代爲彌補
竊恐舊欠未完新虧又積陳陳相因伊於胡底至減引之案迄閱
五十餘載減剩之引尙有四十萬五百道雖至暢年分領引亦不
過三十餘萬道其餘各年僅領引二十餘萬道並有不及二十萬
道之年推原其故皆由兵燹之後迭逢水患戶口凋零居民蕩析
銷鹽不旺領引隨之是以屢請推展限期總未復還原額以上二
者如在歲豐物阜之時商人具有天良原不敢率請寬免今商困
至此引積又至此若不全懇豁除必致累不可支則東網全局將

類關係匪淺等情詳請 奏豁前來 臣覆核所陳各節均係實在情形溯查二錢釐頭原案係遠年累商虧欠因商參課懸議爲彌補帑利積欠之用夫以參商之積虧責成現商彌補衡情酌理本欠持平即減剩之引四十萬五百道歷經懲勸兼施無如商困岸荒從未全領其減剩者尙多壅滯則已減者更難規復實與進關釐頭同爲各商無窮之累伏念我 朝政崇寬大凡從前官虧民欠情有可原之款一經臣工籲請無不 立沛恩施今前項釐頭減引情事相同且自清查奏減之後閱五十年完領旣屬無期徒以遞推遞展之章屢瀆 聖聽於課帑終無裨益合無仰懇 天恩俯念東綱疲累課懸准將二錢釐頭及減引十萬道悉予豁除

李廷寶奏議 卷十一 三十一
以蘇商困俾減剩引課得以設法整頓將來商力充裕再行復還
原額出自 逾格鴻慈除咨部查照外謹恭摺具陳伏乞 皇上
聖鑒訓示謹 奏 光緒二十一年十二月初五日奉 硃批戶
部議奏欽此

奏遵旨查明知縣被參各款摺

光緒二十一年十二月初四日

奏爲遵 旨查明知縣被參各款恭摺覆陳仰祈 聖鑒事竊臣
於十月初七日在濟陽縣工次承准軍機大臣字寄光緒二十一
年十月初二日奉 上諭有人奏知縣縱盜殃民請飭查辦一摺
據稱山東掖縣知縣楊得成劣迹多端前經李秉衡委查都司李
承卿參案朦混稟覆李承卿實係已革武生李承慶冒充掖縣所

屬村莊劫案多處楊得成概置不理該縣典史亦有劣迹時向楊得成關說暗通賄賂請飭查辦等語著李秉衡按照所參各節確切查明據實具奏另片奏山東臨邑縣掖縣徵收錢漕改折銀錢浮收甚多暨掖縣苛派差徭各節著李秉衡一併查奏原摺片著鈔給閱看將此諭令知之欽此欽遵寄字到臣查前署掖縣知縣楊得成實名楊德成已於七月卸事旋報丁憂遵即遴委妥員會同新任知縣逢蓉調齊案卷逐一確查臣復博采輿論證以平日聲名謹將所得實情敬爲我皇上陳之如原奏已革武生李承卿督率賊黨三百餘人肆行搶掠當上年倭警戒嚴致有搶劫太平灣興盛棧燒斃鋪夥一名路宿村槍斃鄉約劉占和之子甘生

一名前萊州府王鴻烈之女劉王氏西縣曠盛林福均被刀斃並燒其房屋各案沿海居民畏懼逃匿民間赴縣呈訴者一百餘家置之不理一節查李承卿家素業漁置有大網三架每架約用百人然皆附近村民臨打網時受雇而來於起網後隨即散去並非常川聚有三百餘人村民各有室家縱或良莠不齊實無爲匪不法放火搶掠之事調查縣卷太平灣興盛棧被劫燒斃鋪夥一名係光緒十一年十二月前縣郭道清任內之事早經詳報參結鄉約劉占和之子劉元清因協差擊賊被李季幅槍傷越日身死係光緒十九年二月前縣魏起鵬任內之事經魏起鵬派差協同黃縣緝役於二十年七月將李季幅擊獲訊供稟經臣批飭萊州府

審明正法在案又萊州府王鴻烈之孫女劉王氏被人砍傷越日
身死事在光緒十八年三月亦係前縣魏起鵬任內業經驗訊詳
報至盛林福被燒訪明係因點洋油燈失火延燒房屋受傷身死
當時地鄰人等因係自行失火並未報驗以上各案均非出於楊
德成任內亦非出於倭警之時所謂李承卿率賊搶掠民間呈訴
者一百餘家置之不理核與所舉各案年月先後不符當海疆戒
嚴民間遷避實不乏人究無關李承卿之事原奏又稱楊德成受
李承卿賄賂私留在縣署花廳優禮相待將民人控詞隱匿不報
且求萊州府知府彭念宸爲李承卿乞恩李承卿入學之名爲李
承慶並未投效軍營假冒花翎遊擊銜都司李承卿之名一節查

李承卿被人奏參經臣飭令嚴押查辦嗣聞楊德成將李承卿押在花廳左邊廂房屬實是否收受賄賂查無實據前彭念宸面稟亦稱李承卿捕魚爲業所雇打網之人雖多必不敢爲匪行劫民間控案仍請飭訊究辦並非爲李承卿乞恩至李承卿係同治四年考取武生入學現今學冊紅案猶載李承卿之名並非李承慶冒充惟詢其何時投效軍營得保花翎遊擊銜都司語涉含混難保無賚緣朦保情弊原奏又稱當奏報後民人宋學才以李承卿將其妻淫掠嫁賣吳連英吳德域吳仁山皆以霸佔鍋場地段等詞控經巡撫批飭嚴押訊辦巡撫於六月二十五日起程後該縣不獨訟案不理次日竟將李承卿釋放一節查本年三月據掖縣

民人宋學才以王鴻鈞等於二十年臘月將伊妻吳氏搶去逼令伊兄宋學文主婚賣與汪占鳳爲妻等情控經臣批飭楊德成會同前甯海州知州陳壽清審訊旋據監生盛若盞等以宋學文因其弟宋學才赴關東貿易久無音信其妻吳氏不守婦道將其改嫁汪占鳳爲妻嗣經汪占鳳將吳氏送還宋學才完聚宋學才情願息訟呈經楊德成會同陳壽清提訊無異詳請銷案查宋學才原控雖有李承卿之名而首要被告爲王鴻鈞提訊嫁賣吳氏出自其兄與王鴻鈞尙屬無涉似更不與李承卿相干其吳連英吳德域吳仁山各以霸佔鍋場呈控經臣批飭審辦楊德成旋即交卸將李承卿移交代理縣王秉懋王秉懋將李承卿改押班房旋

又移交新任知縣逢蓉管押是李承卿始終在押並無釋放之事
吳連英等控案已經逢蓉會同陳壽清分別查傳訊斷完案原奏
又稱李承卿釋放隨有搶劫朱小村彭文明家吳家莊吳克有家
郭西曠趙進德家桂村李德爵家並拒傷事主聞李承卿之父李
常福其叔李吉福均與王作美同謀李吉福經黃縣拏獲治罪楊
德成反以李承卿等爲良民一節查吳克有彭文明趙進德家於
本年閏五月二十五六月初一二二十五等日被賊竊去衣物並未
拒捕傷人李德爵家係七月初七夜間被竊因失物甚微並未報
案李承卿有父李常福並無胞叔其黃縣拏獲另案正法之李季
福係招遠縣人與李承卿並非同宗其謂李承卿之父及王作美

與李吉福同謀核與李季福犯案正法年月迥異且李承卿被押在縣其不能出外滋事自屬可信原奏又稱張貞順夥同孫克賢威逼本村人徐學孔王者英銀兩一節查張貞順向開錢鋪曾經徐學孔息借京錢一百吊還過京錢八十四吊嗣張貞順錢鋪閉歇聞徐學孔與王者英在京貿易獲利遂借孫克賢前往索討舊欠徐學孔復還銀二十四兩其有無威逼情節事在京都無從查訪原奏又稱義堂村訟師文生孫錫峯黑羊山土棍李喬南等窩賊銷贓一節查文生孫錫峯上年曾充團長李喬南在家教讀經逢蓉親赴其鄉查訪向來均無不法之事謂爲訟師土棍實無確據又另片奏稱掖縣地丁糧銀每兩折收京錢五千六百文一節

查該縣徵收錢糧每兩連火耗解費折收京錢五千六百文係同治八年銀價昂貴時所定至今已二十餘年不自楊德成始惟收數究涉浮多已飭司酌議核減章程轉飭遵辦又另片內稱自去秋至今無日不令丁役下鄉苛派差徭有車輛騾馬者名曰軍需差無騾馬有牛驢者名曰解送火藥箱差無車輛騾馬牛驢而有地者名曰幫差皆折價充其私囊一節查去秋辦理軍需掖縣向無車行楊得成派差役下鄉雇覓車輛雖無折價自充私囊實據而所派丁役不當要不免巧立名目騷擾民間此遵查楊德成被參各款逐條詳加考覈之實在情形也原參謂其縱盜殃民細查各案或年月各異或情節不符未免傳聞失實惟其聽任丁役藉

差騷擾已屬罔恤民艱臣復考其官聲明查暗訪該令平日性情好弄任意嬉遊專以聲色玩好爲樂於民間詞訟及一切應辦公事率多壓擱不理以致案件叢積諸務廢弛實屬有負職守相應請旨將前署掖縣現經丁憂開缺平原縣知縣楊德成即行革職以儆官邪已革都司李承卿雖無庇匪害民情事惟聞其強霸官荒招人耕種因此獲利平日結交官長武斷鄉曲欺壓曠民以致人人切齒實與棍徒無異已飭該府縣嚴行審訊照例懲辦毋許寬縱至掖縣典史陳慶嵩人尙謹飭原奏所稱門丁勾通棍徒及典史霸占道姑關通賄賂等情係福山縣之事已另派委員赴福山查提訊究容再另摺覆陳所有遵查知縣被參各款請旨

懲處緣由理合恭摺具 奏伏乞 皇上聖鑒訓示謹 奏 光
緒二十一年十二月十九日奉 硃批另有旨欽此

奏壽張縣高家大廟漫口堵築完竣摺

光緒二十一年十二月初四日

奏爲壽張縣高家大廟漫口堵築完竣恭摺具陳仰祈 聖鑒事

竊查上游高家大廟大隄前因伏秋盛漲漫溢成口經臣於七月初五日恭摺馳 奏在案該處大隄距河身本屬甚遠因劉新石莊以下民埝冲塌水逼隄根隄外又附近沮河兩面浸透以致塌陷成口維時水勢氾濫一片汪洋經臣批飭盤築裹頭俟水勢稍落再行動工以免虛糜帑項上游總辦道員李清和旋即病故臣檄委統領開字全軍候選道馬開玉暫行總辦督同提調分省補

用知府李祐妥籌辦理十月初一日臣查閱河工至該處察看口門已漸挂淤飭馬開玉調所部開字後營會同河防營趕緊興辦惟沿河民埝尙未堵合積潦縱橫頗難施力經李祐督率營委土料兼施至十月劉新石莊民埝堵合臨黃串溝一律閉塞水已漸次斷流而黃水甫消淤泥深至數尺人夫不能立足幸天氣晴暖營委晝夜催趲勇夫踴躍用命並收買民人牌土併力經營於十一月二十五日堵築完竣計築成圈隄牽長二百二十七丈五尺夯礮俱極堅實隄外之地早經涸出不致有誤春耕所用款項不及五千金據馬開玉稟請具 奏前來 臣查該處漫口當失事之始深慮竄運南趨爲患滋大幸仰叨 聖主洪福黃水爲汶水所

敵由沮河循安山一帶仍歸正河迨臣履勘時口門雖漸挂淤水勢仍滔滔不絕賴馬開玉等佈置得法先飭將民埝堵築完固俾口門涸出不致糜費料物遂得一律成功堪以仰慰宸厪此次工程雖與進占合龍有闕而在事文武員弁奔走河干歷時數月手胼足胝昕夕不遑復能力戒虛糜用款省之又省不無微勞足錄可否仰懇天恩准由臣擇其尤爲出力者文武各數員歸入北趙家合龍大案彙請獎敘之處出自鴻慈逾格除飭將出力員弁開送補行咨部外所有上游高家大廟漫口堵築完竣緣由謹繕摺具奏伏乞皇上聖鑒訓示謹奏光緒二十一年十二月十九日奉硃批另有旨欽此

奏山東境內南運河工程請歸東省試辦摺

光緒二十一年
十二月十六日

奏爲山東境內南運河修濬工程請暫歸東省試辦以利漕運而
衛民生恭摺具陳仰祈 聖鑒事竊查南運河自嶧縣入山東境
經歷十餘州縣至臨清州入衛河綿延七百餘里自黃水穿運以
來黃河以北由東阿至臨清二百餘里歸山東撫臣派員經理黃
河以南由東平州十里堡口門至嶧縣出境五百餘里歸東河督
臣督飭運河道辦理咸豐年間髮捻內訌運道梗阻海運興而河
運幾廢後雖逐漸興復而廳汛州縣辦公率皆草率敷衍光緒十
六年河臣許振禕深悉其弊改章由委員經理原冀湔除積弊以
期日起有功惟運河遠在東境河臣以黃河關繫重大旣不能忽

近而圖遠而所委員弁於培隄挑淺各工仍未能核實舉辦當夏令汝水漲發河身不能容納以致汎濫橫決沿河民田廬舍悉在巨浸之中辦工委員無地方之責但將漕船勉強浮送以後雖有決口不復過問迨次年重運將臨始將上年缺口黏補並不加高培厚其挑濬工程亦只擇要分挖未能一律深挑而隄之卑薄河之淤墊仍復如故本年因高家大廟大隄決口黃水汎溢以致淤墊愈高臣前查勘河工由十里堡運口踏勘至安山一帶河身則淤同平陸隄身則低若田塍其清黃各水汎濫之處如東平壽張等州縣幾於全境罹災日擊弊壞情形欲求變通之法因函商河臣許振禱請 奏明改歸東省辦理河臣亦深咎委員辦理未能

核實擬親駐濟甯另調得力員弁認真舉辦正在籌商間許振祿
欽承 簡命調撫廣東河東河道總督奉 旨以河南撫臣劉樹
棠兼署伏思豫撫遠駐汴省任重事繁兼以黃河應辦事宜尙須
經畫運河相去六七百里旣慮有鞭長莫及之虞而刻下運工廢
弛已深非趕緊督飭修濬一交夏令勢必處處泛溢沿河百萬生
靈同罹昏墊且河身高仰漕艘恐亦難暢行 臣職任撫綏旣不忍
坐視百姓之沈災不思補救且漕船上關 天庾亦不敢謂非 臣
責任稍分畛域遂存諉卸之心溯查光緒十七年淮河 臣來咨以
南北運河同屬行漕之要道亦同屬東省之封圻請將南岸運河
仿照北岸由東省辦理未及舉行今爲患日深不得不亟思變計

再四思維惟有將黃河以南東境運河工程仿照北岸運工暫歸東省辦理臣當遴委妥員趕緊查勘趁春融時認真舉辦事權一則呼應較靈耳目近則欺朦易察如有草率偷減情弊即由臣嚴參懲辦總以工歸核實款不虛糜期於運道民生兩有裨益其應用工需即照往年例津二價及另案專案款項飭藩司徑發興辦毋庸轉由運河道支發以昭簡捷惟今年黃水淤墊更深如例款不敷再由臣設法撥補除檄委候選道馬開玉分省補用知府李祐先將十里堡至靳口一帶詳細勘估妥速興工並咨明調任河臣許振禕兼署河臣劉樹棠暨咨部查照外所有山東境內南運河工程請暫歸山東試辦緣由理合恭摺具奏伏乞皇上聖

鑒訓示謹 奏 光緒二十一年十二月二十九日奉 硃批該部議奏欽此

奏東省舊有各營自二十年七月爲始作正開報片 光緒二

十一年十二月十八日

再臣於上年八月十三日到任正值海防緊要當將應辦事宜擇要布置並將東省舊有各防營派員逐起點驗核與調任撫臣福潤移交之冊相符即於九月初二日出省駐紮東郡籌辦防務所有新募挑練各軍業經先後 奏報在案臣於本年秋間回省旋赴上下游河工至十月間回署現已陸續酌裁營勇清釐各案報銷以便造辦惟查有駐紮曹屬之撫標親軍馬隊九十六員名步

隊七十九員名又兗沂道馬步弁勇八十二員名曹州府靖字副營一哨濮州營威勝勇四十一員名臺莊營練兵一百三員名共計馬步弁勇練兵四百一員名一哨營哨俱確即兵勇馬匹亦皆足額緝捕素稱得力而考核領過銀糧則十年以來向歸外銷並無報部之案亦不知成軍起於何年臣即分檄各該營令其錄報成軍原案一面調查檔冊始得其詳緣光緒九年間法越開衅前撫臣陳士杰添募十餘營籌備戰守至次年軍事既定奏報裁撤因該撫臣以撤遣之勇內有技藝嫻熟散之可惜挑留一百七十五名編爲撫標親軍馬隊步隊又撥歸兗沂道馬步八十名曹州府步勇一哨後編爲靖字副營濮州營四十名編爲威勝營並

飭臺莊營仍留練兵一百名均經派員管帶分防巡緝其時案已奏明未能報銷口糧札飭司道議詳由外籌款撥發此歷任相沿之實在情形也臣查前項馬步勇兵均係有着之營則月支口分津貼並非無名之費由外籌撥雖係以公濟公而事未奏明轉失實事求是之道且東省沿海各軍一時未能盡撤內地工賑並舉司道各庫羅掘一空迥非往時可比臣素性迂拘固不敢以事歷多年稍涉遷就亦不敢因款係外辦以有爲無當飭善後局司道據實詳報茲據該司道詳請具奏前來合無仰懇天恩俯准將東省舊有各營未經報銷之撫標親軍馬步隊一百七十五員名兗沂道馬步隊八十二員名靖字副營一哨威勝營四十一員

名臺莊營練兵一百三員名請自光緒二十年七月爲始分別營
勇練兵統歸內地各營報銷案內一律作正造報以昭覈實出自
鴻施除咨部查照暨由臣統籌東省現有之營酌留裁撤另案
彙報外理合附片具奏伏乞 聖鑒訓示謹 奏 光緒二十
二年正月初五日奉 硃批該部知道欽此

奏辦理平糶折耗本銀數目片

光緒二十一年十二月十八日

再東省爲濱海之地積歉之區素鮮蓋藏全賴海艘販運奉糧接
濟乃自上年海疆不靖糧販不通沿海各屬民食已甚缺乏復值
大軍雲集兵食浩繁維時風鶴頻驚價益翔貴人心惶惑殊切隱
憂臣維足食急於足兵攘外必先安內當與司道再三熟商非籌

款設局辦理平糶不足以抑市價而安閭閻隨派候補知府孫承
鑑總司其事並委員赴江淮豫皖邊境分投採購米麥雜糧轉輸
轉運雖貴糶賤糶不無耗費而民食兵食得以不致匱缺糧價亦
遂平減地方卒賴以安誠於大局有裨自光緒二十年十二月設
局起至二十一年三月撤局止共糶市斗大米小麥雜糧九千八
百七十一石四斗一合四勺零星平糶接濟貧民統計折耗本銀
一萬四百七十兩四錢八分八釐在於截留新海防捐輸項下如
數支銷款與軍需稍殊實則相因而起據藩司張國正會同善後
局司道詳請具 奏前來除咨部查照外謹附片陳明伏乞 聖
鑒謹 奏 光緒二十二年正月初五日奉 硃批戶部知道欽

此

奏謝賞福字摺 光緒二十一年十二月二十一日

奏爲恭謝 天恩仰祈 聖鑒事竊臣於光緒二十一年十二月

十九日奉到 御賜福字一方當即恭設香案望 闕叩頭祇領

欽惟 皇上道符乾健 治洽離明 鴻文括 四庫丹黃安居

福地 駿惠周萬方蒼赤廣種福田茲當歲改龍躔猥荷 恩頒

鼇禁 日星並耀 一人裕敷錫之原 雲漢爲章百爾協來同

之慶臣自慚駑蹇渥荷 鴻慈惟有益勵丹忱無違素志竊幸桑

榆非晚勉籌綏靖之方願同草木知春共享 昇平之福所有微

臣感幸下忱謹恭摺叩謝 天恩伏乞 皇上聖鑒謹 奏 光

緒二十二年正月初五日奉 硃批知道了欽此

奏東省海防並內地勇營練軍分別裁撤調回歸伍摺 光緒

二十一年十二月二十四日

奏爲東省海防並內地勇營練軍分別裁撤調回歸伍日期彙案
恭摺奏報仰祈 聖鑒事竊照東省添募挑練各營業經 臣將成
軍日期迭次 奏報在案伏查省東濱臨海澨爲北洋咽喉形勢
最關緊要現雖軍事底定而威海旅團一日不撤則防務一日難
鬆且登萊所屬駐紮各營處處與威海可通未便概議裁撤惟餉
需奇絀自應酌量緩急分別汰留當將續經挑募調回及酌撤各
營檄行司局查明詳辦去後茲據善後局司道彙案詳稱萊州府

知府彭念宸管帶端字左右步勇兩營嗣經改委前沂州營副將曹正榜接帶於二十一年四月底裁撤提督唐有貴管帶濟康左營步勇一營於五月初十日裁撤廣西補用副將楊昌魁統帶新魁副前營步勇一營於六月底裁撤又新魁右營步勇一營於十一月初一日起飭委雲南副將馬柱統帶改爲濟字右營並提督喬鳳友管帶濟康右營步勇一營亦於十一月初一日派委馬柱統帶改爲濟字左營武定營遊擊張振乾管帶鎮武前營步勇一營內有練兵一百五十名均於八月十五日分別裁撤歸伍都司喻文祿管帶濟康後營步勇一營亦於八月十五日裁撤副將劉耀遠管帶精健步勇一哨係二十一年三月初五日成軍於九月

十五日裁撤都司都振邦管帶撫標親兵五十一員名於九月底裁撤廣西右江鎮總兵夏辛酉所統驥武東字福字登榮練軍等十營並馬勇礮車於十月十五日起每營裁勇一百名共裁減一千名已革總兵署理膠州營副將李楹管帶東字練軍一營內練兵三百名壯勇二百名於十一月初三初五等日分別裁撤歸伍總兵江保泰管帶利捷水師礮船原設管帶員弁水手等二百二十八員名於十二月起酌留礮艇二隻並哨弁水手礮手舵工人等二十六員名改歸兗州鎮統帶下餘概行裁撤又署沂州營副將何成忠挑練兵丁一百一員名係二十一年二月初五日成軍於三月底裁撤署曹州鎮總兵曹福勝練兵二百二員名係二月

初八日挑練一百一員名又是月十二日挑練一百一員名均於
六月底裁撤臨清營練兵一百二十二員名於七月底裁撤登州
府知府端謹雇勇四十名於五月初五日裁撤招遠縣巡勇四十
名亦於五月底裁撤黃縣軍裝分局巡勇二十名於六月底裁撤
十六名尙留四名甯海文登榮成三州縣各雇巡勇二百名均於
七月底裁減一百名每處尙留一百名又守備史鎮廷管帶濟康
前營於四月初一日由海防調回內地副將杜榮秀管帶濟字前
營於五月初一日由海防調回內地遊擊朱康仁管帶泰靖中營
步勇一營於八月十五日由海防調回裁勇一百名仍符內地營
制於九月二十一起改歸河防又候補道丁達意所統河成右

營泰靖右營原駐海防其河成右營係參
二十一日調歸河防暨都司張鳳儀管帶
十一日調赴河防署單縣營參將岳金堂
四月初一日由海防調回內地正任曹州
軍步隊中左二營兼帶練軍馬隊左營並
於二十年九月奉調北上本年關外撤防
籍將該二營二哨派委副將周保林代統
日起仍照舊章支領餉銀津貼以上除長
八百九十九員名練兵八百七十五員名
止餉銀所有各營原領軍裝器械等項均

繳善後局軍械所點驗收訖至回籍各勇亦俱分別道路遠近酌給川資妥爲遣歸沿途均極安靜並無一人滋事其調回內地及改歸河防各營月餉仍照東省舊章辦理一面將已撤之營發過餉銀數目另文造冊報銷等情詳請具奏前來臣覆查無異除咨部查照並將海防內地各營續有裁減再行酌量奏聞外所有已經裁遣歸伍各日期理合恭摺具奏伏乞皇上聖鑒訓示再前調青州駐防馬步三營并登州鎮總兵章高元所統福字二營一哨業經先後飭回裁遣奏報在案合併陳明謹奏光緒二十二年正月十三日奉 硃批該部知道欽此

奏河臣到任需時來年應用物料預爲儲備摺 光緒二十一年

年十二月二十四日

奏爲新任河臣到任尙需時日所有黃河來歲應用料物預爲儲備隄埝緊急工程擇要修培恭摺具陳仰祈 聖鑒事竊臣准工部咨稱工部覆奏御史胡景桂奏山東河工宜責成河道總督經理一摺議將山東境內所有黃河從濮州荷澤起以達利津入海之路統歸東河總督一手經理以專事權等因奏奉 諭旨依議欽此欽遵咨行到臣溯查黃河改由東省入海已四十年河身逐歲加淤漸至不能容納誠如部臣所議一遇盛漲雖竭力堵築往往漫溢爲災歷任撫臣勉事籌防迄無經久之策臣去秋履任即值海防事起駐登萊者將近一年舉凡練兵籌餉察吏安民以及

鹽務漕運諸大端罔敢偏廢兼以黃河險工日出自維力小任重
深懼隕越貽羞部 臣體察兩省情形折衷定議仰荷 聖慈俯允
俾 臣仔肩稍卸得以專意吏治軍防謹當勉竭愚忱以報 高厚
伏查河工修防以稽料爲主當秋冬之際新料登場價值尙平正
宜預爲採購以備三汛之用若至伏秋大汛臨時購買恐委員營
哨各官未能核實藉口於隨買隨用隨廂隨墊在岸者不及驗收
入水者更無從究詰金錢鉅萬盡付洪流最爲河工之蠹 臣九月
赴工即飭各總辦道員派委向無習氣人員分投採辦堆積河干
再遴員逐垛驗收斤重務須足數計上中下三游年底明正可購
稽料五千餘萬斤通計一年之用已可得半惟兩岸隄身卑薄一

遇大汎處處有漫溢之虞臣赴工時約畧估計通工加高培厚需款七八十萬金曾於恭報回省摺內陳明在案刻值部庫支絀東省更一空如洗鉅款難以猝籌又不敢坐視其阡危不思補救因飭將下游最卑最險之處擇要勘估計工需六萬餘金現在河臣尙未簡放有人而工程緊要臣何敢存五日京兆之見稍自諉卸已飭司照估款籌撥飭下游總辦擇委操守可信之員將所估修培工程春初即趕緊興辦限於桃汎以前蒞事俾新任河臣有所藉手期仰副 聖主慎重河防至意除俟新任河臣到東再將一切工程並所購正雜料物移交核辦外所有河工來歲應用積料預爲儲備應修堤埝擇要修培各緣由謹繕摺具 奏伏乞

皇上聖鑒訓示謹 奏 光緒二十二年正月十三日奉 硃批
另有旨欽此

李忠節公奏議卷十終

李忠節公奏議卷十一

奏瀝陳礦務利害情形摺 光緒二十二年正月二十四日

奏爲山東礦務欽奉 諭旨飭辦謹瀝陳利害情形恭摺仰祈

聖鑒事竊臣於上年十二月二十八日承准軍機大臣字寄光緒

二十一年十二月二十四日奉 上諭御史陳其璋奏山東開礦

不宜停止請飭派賢員實力開辦一摺現在帑項支絀籌款維艱

前經通諭各直省疆吏體察本省情形將礦務實力開辦原期收

地利以裨國用覽該撫前奏不過以辦理不得其人暫請封禁今

該御史謂不宜停止頗屬有見自未便因噎廢食即著李秉衡督

飭李興銳詳細查勘擇要開辦該撫毋得因已允封禁之請稍執

成見原摺著鈔給閱看等因欽此仰見 皇上因時制宜開利源以裕度支之至意方今帑藏空虛財用匱乏苟可以收地利而裨國用臣敢不恪遵 諭旨勉力籌辦以裕不匱之源惟臣詳察往事審度利害實見山東礦務仍有宜於緩辦者敬爲我 皇上陳之查該御史論開礦之法曰選礦師也購機器也度地勢也禁私人也意謂有此數端則開採總可大獲利益然臣嘗歷考其本末矣山東礦務自光緒七年候選中書馬建常稟請試辦九年以前濟東道李宗岱總理其事殫精畢慮者十有餘年先後所聘西洋礦師曰璧赤曰阿魯士威曰瓦尊皆所稱礦學之最精者也購器則開山屏水及化金等項機器皆自美國之金山購來所稱用之

必大有成效者也度地則自莒州平度甯海招遠以及福山棲霞萊陽掖縣濰縣沂水日照蒙陰臨朐安邱凡登萊青沂四府所屬之地相度幾徧其平度之三座山酒店雙山等處則壁赤所指爲金穴阿魯士威所指爲比之美國亦算超等之礦者而卒以出金不旺棄之是礦師非未選機器非未購地勢非未度也所謂獲利益者安在哉至於禁用私人自係當然惟礦產本無把握則又不私人之盡去與否爲得失也該御史又謂甯海礦產饒富爲德商所垂涎臣以爲不必慮也中國九州土腴財賦之區所在多有彼族即懷貪謀而中朝之疆土權自皇上主之不難據理以相折也夫 朝廷所以允開礦之請者原欲以濟國用諸臣之屢請

開礦者亦無不以利國動 朝廷然近十餘年來各省之議開礦者屢矣如直隸順德之銅礦江南徐州之鐵礦湖北鶴峯長樂之銅鉛礦奉天金州之駱馬山煤鐵礦皆旋開旋停不獨於 國計絲毫無益並其自集資本亦歸耗散往事歷歷可徵已即李宗岱先後集股並息借款項共四十餘萬金固早已付之東流矣其礦丁自停辦後多已四散餘因找算工價未去者人數無多若再開辦非另行招集不可現在倭兵屯駐威海 臣前奏請封禁正慮其招集多人聚處滋事而該御史反謂封禁恐致貽患則非 臣愚所敢知也 臣仰荷 天恩高厚凡於 國家有益之事即 廷旨所未及猶當盡心力而爲之若復稍執成見不獨無以對 朝廷抑

亦負慙夙夜臣雖至愚萬萬不敢出此實見夫有害無利權衡已熟不得不披瀝上陳伏乞 聖明俯納臣言仍如 前旨暫允封禁俟遲數年後倭兵盡退再飭李興銳詳細查勘應如何籌議可以有利無弊之處當 奏明請 旨遵行臣不勝悚懼屏營之至謹繕摺具 奏伏乞 皇上聖鑒訓示謹 奏 光緒二十二年二月初九日留中

奏撥款修培隄埝片 光緒二十二年正月二十四日

再臣承准軍機大臣字寄光緒二十二年正月初七日奉 上諭李秉衡奏河臣到任需時所有黃河來歲應用料物豫爲儲備隄埝緊急工程擇要修培一摺東省河工極關緊要仍著責成該撫

將應行修培之處趕緊興修務臻穩固等因欽此仰見 聖主慎重河防至意臣於上年赴工即飭將最卑最薄之處擇要勘估計工需六萬餘金已飭司照估籌撥惟司庫本不充裕各防軍需餉尙鉅竭蹶異常查上年估堵北趙家高家大廟兩處漫口共請撥銀十五萬兩嗣經 臣督飭各總辦加意撙節兼以高家大廟形勢稍變兩處共用銀不過七萬兩尙餘存八萬兩即將此款提撥六萬兩爲培隄之用謹當恪遵 諭旨督飭工員趕緊興修務於桃汎以前截事又北運河自陶成堡以北水無來源每年借黃濟運當盛漲之際一經開壩勢若建瓴深懼大溜全趨運河爲患甚大且黃水所至之處河復淤墊至回空時不敷浮送仍須設法引水

諸多窒礙現擬於陶成堡運口內修建水櫃引濮州范縣一帶坡水由張秋掛劍臺導入水櫃以資儲蓄至重運渡黃之時如水勢尙旺則清可敵黃當不致仍前淤墊查中游總辦道員李希杰辦理中游河工任事實心不遺餘力復能節省經費爲數甚鉅臣已飭前往試辦該道員亦以自任甚勇應用款項先儘堵口項下培隄餘贖之二萬兩動用如有不敷再另行設法籌撥合併聲明謹附片具 奏伏乞 聖鑒訓示謹 奏 光緒二十二年二月初九日奉 硃批該部知道欽此

奏山東南運額引未能全銷摺

光緒二十二年正月二十七日

奏爲山東南運額引實係未能全銷並無捏完作欠情事恭摺瀝

陳仰祈 聖鑒事竊臣於光緒二十一年十一月具 奏裁革南運濫支款項提出擴充製造機器一摺欽奉 硃批著照所請戶部知道欽此欽遵在案茲准戶部咨開山東鹽務南運先後奏歸官運額引十萬二千二百餘道應徵課銀二萬五千零四十餘兩該省歷年造報銷引徵課均不過得半之數今該撫但節浮費即有盈餘四萬餘兩而每年所報徵收課銀乃不過一萬兩上下明係捏完作欠殊屬不成事體應令嚴飭各該委員嗣後務須按年銷完額引十萬二千二百餘道徵足課銀二萬五千零四十餘兩不准再有短少至此次提歸機器局銀四萬餘兩歸於該省機器局何年報銷案內造報應令查明聲覆以憑考核等因自係爲慎

重課款起見惟查南運引岸河南商邱等九州縣每年額引七萬八百一十道自道光二十九年至同治五年官商並運共計未領引七十九萬五千六百九十三道同治六年前撫臣丁寶楨奏請改歸官辦以餘利提充軍餉每年領引亦不過二萬四千餘道多者二萬六千道至同治十年安徽宿州改歸官辦增額引一萬三千七百三十五道光緒元年渦陽縣改歸官辦增額引二千三百道光緒十八年江蘇銅山縣改歸官辦又增額引一萬五千三百五十六道通計每年額引十萬二千二百一道考其銷數則同治十年以後每年銷引三萬一千及三萬二千餘道不等光緒元年以後惟十三年銷引五萬道其餘年分則自三萬二千道至四萬

三千餘道不等光緒十八年額引增至前數而所銷亦祇四萬七千三百道十九年銷引五萬道二十年銷引六萬餘道二十一年銷引五萬二千餘道而歷年完繳課銀已領未銷之引現尙積存數萬餘道實由河南各州縣南北通衢淮私蘆私分道浸灌安徽宿渦及江蘇銅山淮私浸灌引岸疲敝已極雖迭經設法整理難期成效此歷來額引未能全銷之實在情形也臣前奏謂盈餘之款每歲可得四萬金即指近年所銷五萬餘引之餘利除完納正雜課款外約可盈餘此數查此項餘利當十八年以前銷引較少獲利雖不盡有四萬之多要皆濫支濫應上下朋分無銖兩充公家之用者至課之多寡本視銷引之衰旺爲增減初不得因有餘

利遂謂能多銷引數也溯查南運引積課懸由來已久以前者無論已即道光二十九年以後五十年來銷引從未過半部臣不責以未能也自丁寶楨以後歷年餘利盡飽私囊部臣亦無從而知之也今臣舉向時上下私攫之款絜而歸之公家而部臣轉責以全銷額引是舉數十年所不能辦者督過於一時臣即有桑孔之術亦無所施其力總之未完之課實有未領之引臣迭飭局員認真整頓總辦道員康奉藹潔已奉公深知自愛用能合力一一歸公惟歷年所銷實止此數而遽蒙以捏完作欠之咎亦非臣心所安且以向歸私飽之四萬餘兩尙奏請歸公而以應繳額課之一萬餘兩反捏完作欠雖在會饗亦愚不至此至此次擴充機器局

需款十數萬兩所提銀兩臣前奏已聲明須積至數年始敷購機器之用俟集有成數自當列入機器局收項照例報銷不得以已經奏明之款復任弊混也在部臣總司出納自有考核之權而微臣體念時艱凡所以除浮濫而裨正用者已無不竭忱盡智期於涓滴歸公如東海關臨清關等處臣迭飭嚴加釐剔皆有提出充公之款俟章程詳定均當舉以上聞若臣革除一弊而部臣於除弊之外復刻以相繩臣實無從措手迂直之性不得不據實上陳所有東省南運額引實係未能全銷並無捏完作欠緣由謹專摺具奏伏乞皇上聖鑒訓示謹奏光緒二十二年二月初九日奉 硃批戶部知道欽此

奏凌汛期內黃河兩岸防護平穩摺

光緒二十二年正月二十七日

奏爲凌汛期內黃河兩岸防護平穩恭摺仰祈 聖鑒事竊維黃河歲分四汛固以桃伏秋三汛爲重而凌汛易於出險亦關緊要當冬令嚴寒冰塊凝結迨春融冰泮上下游寒暖不齊不能同時全釋斷冰雜流每於河灣壅積堤埝塌壩當之無不被沖故凌汛期內失事者往往有之臣先期嚴飭在工員弁於河身淺窄灣曲處所密排椿木並多備敲凌器具遇有險工隨時相機搶護幸本年氣候較暖東風解凍河流順軌兩岸工程現均一律防護平穩洵堪仰慰 宸廑轉瞬桃汛經臨凡有上中下三游卑薄隄埝業已分派勤幹各員認真增培應需各項料物亦已委員採購按段

堆存備用新任河臣未到東以前臣仍當督飭加意修守務臻穩固以重河防不敢稍涉疎懈所有凌汎期內黃河兩岸防護平穩緣由謹恭摺具陳伏乞 皇上聖鑒謹 奏 光緒二十二年二月初九日奉 硃批知道了欽此

奏請免扣甯海等十二州縣軍需三成摺

光緒二十二年二月十五日

奏爲甯海等十二州縣缺分最苦請免接扣本年軍需三成養廉以示體恤恭摺仰祈 聖鑒事竊東省文武各官養廉上年核扣部提軍需三成充餉當因新舊並扣不敷辦公請將無關部庫之由外彌補軍需一成二成三成銀兩暫行停扣並將額廉無幾之文職首領佐雜武職千把外委各員弁免其提扣三成經臣 奏

明通飭遵照在案茲准部咨戶部具奏仍照前案核扣成數再行
接扣一年等因奉 旨依議欽此咨行到臣自應欽遵辦理伏查
養廉軍需三成本年既照前案接扣一年則由外彌補軍需一二
三成廉銀以及首領佐雜千把外委各員弁養廉亦應再行分別
停扣免扣以資辦公其有關部庫之停給核減各成並六分減平
仍舊照案核扣惟通省一百七州縣內有下下苦缺三十二處辦
公本形竭蹶加以上年扣解部提軍需三成爲數較鉅更慮入不
敷出因思養廉之設原所以激勵廉隅若扣成過多未免因公賠
累轉啟虧挪之漸臣與司道再四籌商擇其下下苦缺中之最苦
者甯海文登榮成棲霞招遠高苑博興新城齊東青城利津霑化

等十二州縣或經兵燹或鄰防所或遭水患其瘠苦情形均較他處爲尤甚如再接再扣本年軍需三成實屬力有未逮據藩司張國正詳請具 奏前來合無仰懇 天恩俯念甯海等十二州縣缺分最苦准免接扣本年軍需三成養廉以示體恤出自 逾格鴻慈除咨部查照外謹恭摺具陳伏乞 皇上聖鑒訓示謹 奏

光緒二十二年二月三十日奉 硃批著照所請戶部知道欽此

奏南運河工程暫歸東省試辦片

光緒二十二年二月十五日

再南運河工廢弛已深非力除積習大加修濬漕艘不能暢行民生不能補救擬請暫歸東省試辦並委候選道馬開玉分省補用知府李祐詳細勘估興工經臣奏奉 硃批該部議奏欽此自應

欽遵靜候部議惟查南運河自江蘇黃林莊入山東嶧縣境起至東平州十里堡口門止綿長五百四十餘里年久失修加以上年高家大廟黃決漫灌十里堡至靳口一帶節節淤飽無異平陸即靳口以南至黃林莊出境河道廢弛已久一綫單隄亦復低若田塍殘缺如鋸實於運道民生關繫匪淺及今不治害無已時但修濬工程必先煞壩蓄水堵口斷流方能次第舉行本年江蘇江北漕糧仍行河運節氣較早煞壩已遲月餘迭准兩江督臣江蘇撫臣暨漕臣先後咨催即使併日趕辦猶恐緩不濟急倘再遷延觀望必致貽誤事機此中緩急輕重在部臣當必深籌熟計若議歸東省暫辦臣固冀免遲誤之咎即議歸河臣辦理亦未敢遽存諉

卸之心蓋以河臣蒞任伊始統籌全局無不首重治黃而運工爲日迫促漕艘轉瞬經臨恐一時不及兼顧祇有由臣暫行分任仔肩苟能於事有濟斷不敢避嫌畏難稍分畛域業已飭司發款分投挑築兼施以速補遲估計工需往年例津二價及另案歲修等項共銀七萬餘兩此次大加修治隄則加培高厚河則挑挖深通共估工需銀十萬餘兩所費不過多三萬金上下而工歸實際項不虛糜以視從前幾同虛擲者較有區別洵於漕運民生有裨俟重運漕船過竣如仍歸河臣接辦即當一一交代除咨部查照外理合附片具陳伏祈 聖鑒訓示謹 奏 光緒二十二年二月三十日奉 硃批著照所請該部知道欽此

奏查明署任知縣被參各款摺 光緒二十二年二月十八日

奏爲遵 旨查明署任知縣被參各款恭摺覆陳仰祈 聖鑒事

竊臣於光緒二十一年十二月初十日承准軍機大臣字寄十二月初七日奉 上諭有人奏酷吏怙惡不悛據款糾參一摺據稱前署山東黃縣知縣徐賡陞署任年餘疊次因案索賄所得贓銀不下五萬金劣蹟昭著請嚴參究辦等語著李秉衡按照原奏所指各節確切查明據實具奏毋稍徇隱原摺著抄給閱看將此諭令知之欽此欽遵寄字到 臣遵即委員前赴黃縣會同現任知縣蕭啟祥提集案卷逐款確查詳覆如原奏平度難民流徙黃縣將十三歲幼女賣與王姓炮烙致死該員得賄詣驗指爲蒸變逼勒

具結尸母冤忿成瘋該員將其驅逐出境一節查平度州民婦陳于氏於光緒十八年隨夫攜一子一女逃荒來至黃縣經平度州人在黃縣開設飯店之陳相說合將伊女配給楊曹氏之孫楊壽仔爲婚過門童養議定財禮京錢十六千付過八千下欠八千楊曹氏本係招遠縣人隨夫楊景雲早年流寓黃縣林家莊始自賣娼繼又以買女買媳爲名令女媳賣娼十九年二月楊曹氏令童孫媳楊陳氏搬取煮熱湯麪楊陳氏將麪盆扳倒致被燙傷楊曹氏用油敷治未愈因火毒流注於左手背突生一疔以致走黃身死時陳于氏之夫已故陳于氏喊稟到縣徐廣陸親詣勘驗係因燙傷後火毒流注並非炮烙致死飭自棺殮並以楊曹氏於童孫

媳燙傷後不即告知伊母致啟訟端且聞其平日役使女孩多所磨折當堂薄責限一箇月內驅逐出境其所欠陳于氏財禮八千當堂追給完案查楊曹氏既係流娼非能行賄之人且斷結後將其驅逐出境尙無不合陳于氏於結案後自行出境乞食並非該員驅逐原參謂係賈與王姓及得賄勒逐自係傳聞之訛原奏又謂智家村趙王氏墓被盜開棺扭去首飾掙落尸頭該員因無賄託不肯往驗一節查智家村已故王趙氏並非趙王氏係王程庠之孫媳塋被盜空王程庠赴縣呈報徐廣陞即親往勘驗驗得塋土刨開棺蓋前頭砸開一孔據王程庠用胳膊探入棺內摸試尸身如舊手鐲無失隨將勘驗情形並未顯露尸身亦無失物形迹

詳報在案其非無賄不肯往驗尙屬可信原奏又稱縣紳田篤恭因家產涉訟斷與四千金勒令充公一半並將田篤恭贖責嚴押一節查田篤恭係六品軍功與田措祖田洪昌田篤生田篤慶田洪仁等係從堂叔姪先於咸豐十一年夥開恒益盛錢鋪至光緒七年歇業帳目膠轄不清遂致互控爭訟光緒十九年二月徐廣陞提訊查核恒益盛遠年帳項並各房長支短欠各款斷令田篤恭繳京錢八千餘串田篤恭延抗不繳該員將田篤恭功牌追繳管責嚴押又追繳田措祖京錢二千二百餘串田洪昌京錢一千七百餘串又追繳恒益盛鋪夥李相林京錢一千六百餘串又追繳允興號店東王禧田舊欠恒益盛京錢五千串均擬按恒益盛

股分大小分派給領據田措祖田洪昌田洪仁等供稱王禧田之款係遠年濫帳情願捐作書院寶興之費合計所繳存庫錢項共京錢一萬零七百餘串內斷給田洪仁應領京錢四千一百餘串下賸京錢六千六百餘串徐廣陞因公挪用京錢六千四百餘串卸事後未及移交後任旋往江南經現任知縣蕭啟祥函催於二十一年十月將前款如數匯還由蕭啟祥稟明存庫俟全案訊結後分別充公給領查王禧田所繳京錢五千串係據田措祖等情願捐作寶興並非該員勒令充公原參殆即因此原奏又謂商民因錢財爭訟無不勒罰存庫房約兩萬緡署任年餘所得贓銀不下五萬金撥充公源錢鋪其帳目以景星慶雲四字爲號煙臺謙

益豐亦有撥兌一節查該縣庫帳徐廣陞在任年餘出入約計一萬餘串隨出隨入未便指爲勒罰之款復查城內公源錢鋪有慶字堂帳據又查公義勝錢鋪有景星雲等字帳據其星慶雲三字堂號共存過京錢一萬零二百三十餘千於十九年十二月由縣庫房如數取去其中有無因訟勒罰之錢查無實據景字堂存京錢三百五十七串零至今未取訊據鋪夥供稱係徐廣陞家丁劉信經手臨行時言係該員親眷之錢查該縣庫房及兩錢鋪通年出入均不過京錢一萬餘串至謙益豐遠在煙臺距黃縣一百八十里即間有來往未能指爲贓款所謂贓私不下五萬金似屬傳言之過原奏又稱查拏田房稅契徧張告示賞格招人互訐其罰

款盡飽私囊遂致四鄉騷動在押者常七八十人而劫盜重案十無一二各節檢查徐廣陞任內舊卷因田房漏稅間有罰款修理廟宇爲數無多尙存有開支帳簿至張貼告示賞格招人告訐徧查均無實據復查十九年十一二兩月押犯實多至七十五名內有竊盜各案人犯三十三名其餘係詞訟及滋事之犯此歷查徐廣陞在黃縣任內被參各款之實在情形也臣覆查徐廣陞由廣東候補通判因案革職經前撫臣張曜恭摺 恩詔奏請送部引見奉 旨開復原官發往山東補用因救護觸礁船隻保升直隸州知州十八年委署黃縣知縣年滿回省嗣經署兩江督臣張之洞奏調於二十年十月前往江南並非該員自行投效此次被

參貪劣各款亦均查無實據惟於田篤恭等訟案斷繳存庫應分別充公給領之款輒自因公挪用究屬不合應請 旨將候補直隸州知州前署黃縣知縣徐賡陞交部議處所有遵查知縣被參各款據實覆陳緣由理合恭摺具 奏伏乞 皇上聖鑒訓示謹 奏 光緒二十二年二月三十日奉 硃批徐賡陞著交吏部議處欽此

奏查勘呂家窪決口情形摺 光緒二十二年二月二十五日 奏爲欽奉 諭旨通籌全局謹將上年呂家窪決口實係未能堵合暨現再委員前往查勘情形恭摺覆陳仰祈 聖鑒事竊臣於二月十六日承准軍機大臣字寄光緒二十二年二月十三日奉

上諭前據李秉衡奏山東利津縣呂家窪黃河決口勢難堵合
旋據奏稱韓家垣海口已經淤塞祇有就呂家窪另籌疏洩之法
茲據給事中王會英奏稱呂家窪決口寬僅里餘與其挑挖百餘
里不可知之河何如堵築里餘之決口且韓家垣入海流非不暢
未壞鹽灘尙可修復李秉衡剛愎自用惟信道員李希杰丁達意
之言置民生疾苦於不顧等語修築黃河固宜順水之性民生昏
墊豈可坐視不拯呂家窪決口究竟能否堵合李秉衡務當通籌
全局平心酌度不可自信太深廻護前說尤不可因人言指摘悻
悻負氣有則改之無則加勉亦未始非該撫鍼砭之一助原摺著
鈔給閱看將此諭令知之欽此仰見我 皇上慎重修防勤恤民

隱猶復 鑒臣之愚察臣之愆不加譴責 訓誨周詳自顧何人

仰沐 高厚跪誦之下感激涕零敢不恪遵有則改之無則加勉

之 聖訓惟上年呂家窪決口未能堵合情形實因爲大局所關
有不敢草率從事者請再爲我 皇上敬陳之竊維治水之法不

一端要以順其性爲主就下者水之性也黃河數千里來源奔騰
以達於海入海之路不暢則拂其就下之性必至旁溢潰決而不
可遏其勢然也自咸豐五年銅瓦廂決口水入東境由鐵門關入
海者三十餘年光緒十五年河水漫溢由韓家垣沖出河身前撫
臣張曜奏請築隄束水改道由此入海因其勢也數年以來韓家
垣逐漸湮淤河身高仰入海尾閘不暢以致上年六月下游呂家

窪北趙家及南岸民修民守之南嶺子十六戶等處先後決口臣
委員查看韓家垣正河淤塞分水僅十分之二繞趨韓家垣南支
河由楊家河入海臣於是有不堵呂家窪之議亦因其勢也然臣
猶未敢遽以定局也臣十月查河至南嶺子見該處溜勢頗大查
光緒十二年南嶺子決口即有人建由此入海之議臣尙擬於北
岸建築挑水壩逼溜南趨儻該處入海勢順則呂家窪仍可堵合
故呂家窪築隄疏河詳議歷久未敢具奏臣未嘗不遲回慎重於
其間也冬令海濱冰凍無可施工迨入春後察看南嶺子溜勢漸
微入海不暢十六戶更見淤塞居民已自行堵合臣以南嶺子既
不能入海即應早爲堵合以免分行力弱當飭酌發銀兩撥給繕

料津貼民間督令趕緊辦理今十六戶已堵合完竣南嶺子工程已得其半計日可以蒞事而韓家垣之河身淤墊如故若復將呂家窪堵合水將安歸乎夫利害切於身者其立詞不嫌於過激給事中王會英籍隸利津僮戶非其姻親即其族黨當黃水漫決之際壞廬舍蕩田園切近之災創深痛鉅其歸罪於臣也固無足怪臣上年九月具奏呂家窪礙難堵合摺內聲明僮戶失業者多不免噴有煩言或至上瀆 聖聽即逆計王會英之必有此奏彼時未便顯言也王會英謂韓家垣流非不暢以爲呂家窪可堵夫韓家垣入海果暢臣亦何惡於呂家窪之民而必以之爲壑乎呂家窪地勢本低口門迤下村莊僅十餘處再下爲鹽灘其地斥鹵不

生五穀迤上則人煙稠密武定濟南所屬各縣處處與直隸毘連
呂家窪一堵以數千里奔流赴壑之水責之於高仰不能宣洩之
韓家垣勢不至於迤上州縣橫決潰溢不止決口愈上則受害愈
寬且鉅勢將禍及畿輔王會英但顧其鄉里一隅耳他處利害
之重輕未遑恤也夫臣亦非敢謂呂家窪不堵遂無水患也但不
堵雖難保無意外之虞而一堵則害必立見川壅則決理固然也
臣仰蒙皇上天恩畀以封圻重任黃河自荷澤入境以至利津
海口尺地一民皆當爲皇上護惜無論何處一有潰決即上無
以對朝廷下無以對百姓臣之罪本難道惟海口淤墊已非一
朝一夕之故欲爲水籌去路必有所舍乃克有所全與其專顧一

隔而禍不旋踵曷若綜度全局以圖宣洩之宜臣前奏謂兩害相形則取其輕使王會英處臣之地亦當合全境籌之不至如斯之口不擇言矣道員丁達意係下游總辦道員李希杰乃中游總辦臣委令會同丁達意查看海口及各處情形該員等但以韓家垣淤墊及呂家窪漫水情形稟復不堵之議臣自主之非該員等倡其說也乙沛恩爲防汛委員決口後經臣奏參交部議處彼方急求堵合以圖開復唐寶珍爲永阜場大使亦欲堵合以衛鹽灘其敢爲不堵之說乎惟唐寶珍於所收鹽釐有無侵蝕入己情事應即委員澈查以昭覈實至永阜場灘池一百六十餘副決口後沖壞九十餘副又續淹三十餘副其餘復漸次波及僅存七副可照

舊曬鹽臣以 國課攸關飭運司設法借運並於他處另開新灘據運司豐仲泰詳報除借運各場外如官台永利西絲王家岡等場共開新灘四百餘副其工本皆竈戶自備暨由商人借給並未動用公款惟富國場新開四十副在運庫借給工本銀四千兩議定由鹽價內扣還並據各場稟報產鹽之數足可無誤額課王會英謂引額不可復收及開灘不成虛糜帑項無亦未之詳察乎總之水必有所歸乃不致汎濫爲患使韓家垣不淤呂家窪自無不堵之理韓家垣旣淤則水無入海之路堵一呂家窪而他處之受害其實廣有倍於呂家窪者亦勢將指擗及於臣身臣職任撫綏固不恤爲民受過而於全河大局有礙臣心何以自安此 臣所熟

思審處而嫌怨有不敢避者也茲復仰承 聖訓以能否堵合下
詢 命臣通籌全局平心酌度臣曷敢堅執已見辜負 天恩謹
當遴委明習河務之員再赴呂家窪韓家垣兩處周歷查勘詳審
地勢高下俟河臣到東與之悉心商酌倘近日情形稍有變更可
循韓家垣舊路臣當會同河臣將呂家窪迅籌堵合以畢臣未竟
之功如勢不可行臣亦不因怵於人言顧一隅而害全局惟當摒
除意氣審酌事理之宜仰副 朝廷軫念河防勤求民瘼之至意
除俟河臣到東會議詳覆外所有上年呂家窪決口未能堵合情
形近復委員詳細查勘緣由謹先行恭摺覆 奏伏乞 皇上聖
鑒訓示謹 奏 光緒二十二年三月初十日奉 硃批知道了

即著派員詳細察看候任道鎔抵東後會商具奏欽此

奏查明福山縣被參丁書通賄舞弊各情摺

光緒二十二年三月十四日

奏爲遵查福山縣被參丁書通賄舞弊各情謹將查明議擬緣由恭摺覆陳仰祈 聖鑒事竊臣於上年十二月初四日具 奏遵

查平原縣知縣楊德成被參各款一摺聲明原參門丁勾通棍徒典史霸佔民女各案係福山縣之事已另派委員赴福山縣查提訊究在案查原奏內稱福山縣盜賊于福臣搶劫鄰封棲霞縣有案移文調訊經差役拏獲該縣受賄故縱文覆以貿易出外任賊遠颺其門丁王晶山勾通棍徒蕭銘恒霸佔民人劉三登已許字之女爲妾蕭銘恒倚爲護符捏造僞字詐陷良懦該縣典史則硬

霸幼道姑爲妾上房村牟姓家被搶案內竟有該典史親族人置之不究有于鴻泰楊子良被控案關逆倫罪名以開設游藝堂藥鋪解姓道人與刑書傅泉霖與典史關說暗通知縣皆以賄免等因前經委員密查復以家丁書吏通賄舞弊非指名提訊不能得實隨飭將王晶山傅泉霖蕭銘恒提省發委濟南府審訊茲據濟南府知府劉景宸說明議擬前來查王晶山即王靜山係歷城縣人向充福山縣稿案門丁光緒十九年不記月日與住城充役之劉三登出嫁女趙劉氏通姦嗣向其夫講允賣休給錢一百千遂買作妾並非蕭銘恒說合亦無捏造僞字情事傅泉霖係福山縣刑書光緒二十一年縣民楊子良因所畜牲口踐食其無服族叔

楊汝能地內禾苗彼此口角爭毆遂致興訟知縣康鴻達正在考試委典史姚鶴齡代訊楊子良託傅泉霖向典史行賄傅泉霖並未應允亦無解姓道人關說賄賂暗通知縣之事案內亦無于鴻泰之名惟傅泉霖因楊汝能素不安分曾向典史面稟屬實蕭銘恒係福山縣人向在城內開設盜帽鋪與縣民欒象琦素識光緒十九年九月欒象琦因其兄毆妻斃命在押來城料理訟事住蕭銘恒鋪內蕭銘恒曾爲其打點差役開銷飯食錢文並借給欒象琦銀兩後因向索未還又欒象琦涉訟經該縣傳訊未結此提訊王靜山即王晶山等各供之情形也于福臣係福山縣人畜有騾馱欒象琦在縣城時其姪女與棲霞縣人親眷李姓有私謀與偕

逃攜帶銀兩雇于福臣驛轎載往棲霞欒象琦聞知在棲霞縣控告移文傳訊于福臣時已他出並非搶劫該縣實無受賄故縱情事至典史姚鶴齡買道姑二人實有其事惟年均幼小姚鶴齡買爲婢女並非作妾上房村人牟起祿雜貨鋪被劫經該縣拏獲首夥盜犯謝成林等四名分別定擬尙有夥盜王慶太王少玉晉書林等三名在逃未獲並非該典史親族此委查知縣典史及丁書等被參各款之情形也臣查王靜山即王晶山充當門丁輒敢與在縣充役之劉三登出嫁女趙劉氏通姦買休殊屬玩法應酌量由姦罪杖枷上加等擬徒事犯在恭逢光緒二十年正月初一日恩詔以前應准援免惟門丁犯法未便寬縱擬發縣監禁數年

再准保釋刑書傅泉霖因縣民楊子良與其無服族叔楊汝能爭訟雖未爲楊子良通賄輒以楊汝能素不安分向典史面稟蕭銘恒因樂象琦住伊鋪內輒代其打點差役開銷飯錢均屬不合傅泉霖蕭銘恒均應照不應重律杖八十傅泉霖折責革役惟久充刑書有無另犯不法情事應仍交該縣管押查明如無別情再行釋放蕭銘恒事犯亦在 恩詔以前所得杖罪應准援免遞籍交保管束典史姚鶴齡查無向知縣關說賄賂情事惟身係職官輒買幼道姑爲婢殊屬不合業經 臣於 計典案內劾參應無庸議福山縣知縣康鴻遠查無縱賊受賄各情惟該縣地近煙臺華洋雜處該員於此缺殊不相宜應請開缺留省另補所有遵查福山

縣被參丁書通賄舞弊查明議擬緣由謹繕摺具陳是否有
乞 皇上聖鑒訓示所遺福山縣員缺東省現有應補人員
扣留外補合併陳明謹 奏 光緒二十二年三月二十七
硃批著照所請該部知道欽此

奏預購稽料以防伏汎片 光緒二十二年三月十四日

再臣於上年十二月具 奏黃河應用料物預爲儲備隄埝
工程擇要修培一摺本年正月初十日欽奉 寄諭東省河
關緊要仍著該撫將應行修培之處趕緊興修務臻穩固等
此當即欽遵轉行各總辦一體遵照茲查前次所購稽料已
完竣修培工程先後據報竣工已有十分之七本擬俟河臣

一併移交核辦惟本年節氣較早現在桃汛將過轉瞬節交夏令
即屆長水之期前購稽料計一年之用僅得其半若不寬爲籌備
一屆伏汛臨時倉猝購覓恐不免糜帑誤工查河臣至今尙無來
東之信而修防工程日緊一日臣何敢稍存觀望致滋貽誤謹當
檄飭各總辦將伏汛應用稽料趕緊購買仍委員逐垛驗收以昭
核實臣一日仔肩未卸即當勉盡心力未雨綢繆期仰副 朝廷
廑念要工至意謹附片具 奏伏乞 聖鑒訓示謹奏 光緒二
十二年三月二十七日奉 硃批知道了欽此

奏挑濬北運河估需經費數目摺

光緒二十二年三月十四日

奏爲遵 旨挑濬北運河以利漕行估需經費數目恭摺仰祈

聖鑒事竊照江北江蘇本屆漕糧仍辦河運業經兩江督臣奏奉諭旨飭將漕船經行河道認真挑濬務期一律疏通以利漕行等因欽此伏查東境南北運河通計共長七百餘里南路工程先經臣奏明本年改歸東省派委候選道馬開玉督辦共估經費十萬餘兩已飭司發款興工並將堵合汶壩湖口壩日期會同署河臣任道鎔附片奏報其北路運河向歸東省辦理亦已檄委候補道李希杰勘估在案茲據該道稟稱北運河自陶城埠進口起至臨清衛河止計長二百餘里地勢南高北低歷年借黃濟運水過沙停河身節節淤飽自口門以至草橋爲黃水入運咽喉積淤較厚而口門之外又淤起沙灘一片出入梗阻尤甚迤東里許

之臨黃舊口門與斜接正河之支河一道更形淤塞非大加挑濬深通不能暢行無阻至各口門兩邊裹頭埽段及攔黃大壩左右魚鱗埽兩岸護沿埽經歷三汛埽壩塌陷物料朽腐必須逐一修復方足以資捍衛漕船經行東阿陽穀聊城堂邑博平清平臨清等七州縣河道綿長挑淤培隄工段所在皆是經費限於定額實屬不敷分佈當此時事多艱庫款支絀又不得力求撙節統計挑修各工共估需土方工料銀四萬九千五百四十四兩九錢三分一釐減平在內造具估冊呈請核辦前來臣覆查該道估計工段經費銀數尙爲覈實應照歷辦成案飭由藩司籌款發領責成該道督率印委各員趕緊興工認真辦理南北運河勒限於漕船

未到以前一律葺事以利漕行仍俟工竣飭將用款分案造冊報
銷除咨部查照外所有挑濬北運河估需經費數目緣由理合恭
摺具 奏伏乞 皇上聖鑒謹 奏 光緒二十二年三月二十
七日奉 硃批該部知道欽此

奏嚴核關稅提款充公摺 光緒二十二年三月二十五日

奏爲遵 旨嚴覈關稅謹將山東東海臨清兩關提款充公情形

恭摺具陳仰祈 聖鑒事竊 臣於上年九月覆奏閏五月二十七

日欽奉 諭旨一摺業將東海臨清兩關委員密查有無隱匿中

飽情弊於摺內陳明在案查東海關常稅正額五萬兩額內盈餘
一萬二千兩額外盈餘八千兩歷年收數除正額五萬兩外每年

盈餘不過六七千兩下短之數照例免六賠四實則報部共只六萬餘兩而此六萬餘兩中練軍經費一項即支銷三萬餘兩再除去各局卡經費七千餘兩解部之數不過二萬餘兩上年協辦大學士臣徐桐條奏謂關道歲入私囊在十萬內外其數雖未必符合其弊實所難免也惟積習相沿已非一日臣上年十一月奏裁練軍片內聲明官非一任應請寬其既往已荷 聖慈洞鑒臣先派委員嚴密查訪復飭升任東海關道李興銳核實鉤稽力祛從前徵多報少之弊其在外支銷款內有 臣署公費銀四千兩先已裁革合計可提出歸公之款約在三萬兩內外擬請自上年十月初三日李興銳到任之日爲始每年正額五萬兩額內外盈餘二

萬兩並正額盈餘隨徵耗銀七千兩一併照實數報部不准再有短收賠繳名目此外長餘之銀每年約尙有二萬兩儘數提出報候部撥其銷款之練軍一營經臣奏明裁撤後只續留一哨計可節省二萬餘兩合之報部之數共歲增銀五萬餘兩此東海關提款充公之情形也臨清戶工兩關正稅盈餘共額定六萬二千餘兩向係儘徵儘解惟正稅之外取於商者名目繁多有名爲監督辦公而實歸書吏坐扣之一分石耗一款有歸濟東道辦公之三分一款有歸臨清州辦公之三分一款又傾費一款收數多寡不等皆隨正稅徵收如正稅暢旺每年外收之款約在二萬兩上下此項本可裁禁惟相沿已久商民習爲固然當茲餉項支絀之

時不如化私爲公提充正用擬請自上年六月初三日戶關屆滿之日爲始每年於正額盈餘儘徵儘解之外將各項名目內提出銀一萬兩作爲常年報部之款聽候部撥下餘一萬兩上下提解司庫留充本省緊要公用查歷屆臨清工關收數未能足額均以戶關長收之數抵補據報本年戶關截至三月十三日止已溢收銀一萬餘兩至六月一年期滿除抵補工關外其長收之數約可一萬數千兩即此亦可見徵收實報之效此臨清關提款充公並正數溢收之情形也臣維關稅之設無異正供所以裕國家之度支非以盈官吏之谿壑自奉行者視爲利藪百弊叢生損下而不能益上殊失設關之意臣習知其弊飭將各關出入數目澈底

清查升任東海關道李興銳現署臨清州知州許桂芬亦皆潔已奉公銳意整頓用能力祛積弊稍助餉源以後關稅衰旺容有不齊而大致當不甚相遠但得經徵者潔清自矢所定之數約可取盈是在辦理之得人耳抑臣更有請者東海關設在煙臺較之津海江海及閩粵等海關其繁盛遠有不逮臨清關更僻在一隅經此次釐定東海關歸公之款計增五萬餘兩臨清關提款並溢收之款亦不下三萬兩以此類推其各省關之局面較大收數較多者若能實力稽查其可提出歸公之數合之當成巨款可否 敕下各督撫監督於所在關稅嚴飭認真整頓以裕餉需之處伏候 聖裁所有東海臨清兩關嚴覈關稅提款充公緣由理合恭摺

具奏伏乞 皇上聖鑒訓示謹 奏
光緒二十二年四月十
一日奉 硃批另有旨欽此

李忠節公奏議卷十一終

李忠節公奏議卷十二

奏敬摠管見摺光緒二十二年四月初一日

奏爲敬摠管見恭摺瀝陳仰祈 聖鑒事竊臣准戶部咨開准

圓明園咨行光緒二十二年二月二十六日欽奉 諭旨圓明園

大宮門並看視解馬之含輝樓以及園內各等處首領太監值房

並外圍王大臣坐落處所現已傾圮均應一律黏補整齊所需錢

糧著戶部於各省每年應解土藥稅釐內除撥解頤和園銀十五

萬兩奉宸苑銀十五萬兩外其餘銀兩儘數撥歸圓明園以備陸

續興工應用統俟年終由該園彙總報銷欽此相應飛咨欽遵等

因咨行到臣事關興辦要工臣曷敢有異議惟以臣之愚觀時事

之艱虞念度支之匱乏竊以此項工程尙有宜於緩辦者伏查
圓明園爲 列聖臨御之所自咸豐十年英夷肇釁 文宗顯皇
帝巡幸木蘭園內悉被焚燬後雖撫局漸定而 先朝堂構盡付
劫灰在昔日爲創深痛鉅之時在今日即爲觸目警心之地況今
強敵憑陵外患迭起上年倭韓之役要素我土地搜括我貨財以
視咸豐十年之變又加甚矣我 皇上懲前毖後思有以雪 國
恥而振 天威 深宮之乾惕當有非淺見所能窺測者其忍侈
遊觀之樂耽土木之娛此念時勢之艱所宜緩辦者一也夫 國
家之財用皆百姓之脂膏取之甚難耗之甚易大學言用之者舒
則財恆足易曰不節若則嗟若自古聖王未有不以躬行節儉裁

省土木爲美德者漢文帝惜白金之費不作露臺唐太宗將修洛陽宮鑒於隋而遂止史冊所載皆傳爲盛事今天下財力竭矣借款至二三萬萬之多攤還至數十年之後此即刻意撙節如沃焦釜捧漏卮猶懼不及安所得艱難之帑項作不急之工程譬猶久病之人元氣虛弱培養之不暇其可縱嗜欲以耗之也哉此念財用之細所宜緩辦者又其一也欽惟我 皇太后聖德淵深黜華崇樸同治十二年停修 圓明園僅量修 三海工程復 敕撥節勘估 聖慈儉德薄海同欽我 皇上孝隆養 志特修 頤和園爲 聖慈燕憩之所迄今規模具備較 三海稍增闕廓矣 皇太后歲時臨幸優游泮奐已足娛悅 慈顏當物力凋敝之

時 皇太后恭儉爲懷必不欲重勞民力臣伏願我 皇上追維
往事 厘念時艱崇儉約以裕餉源信賞罰以勵將士常存震動
恪恭之意毋作豐亨逸豫之圖急其所當急緩其所可緩馴至外
患不作四海永清措天下於磐石之安以仰答 皇太后數十年
憂勤之意則 慈懷之怡豫當遠勝於臺榭之遊觀實率士臣民
之幸再 臣恭繹 諭旨此次應修工程係指 圓明園大宮門並
含暉樓及園內外王大臣坐落處所首領太監值房並非普律
興修 聖心已有權宜無俟 臣總總過慮惟工程既舉必有不識
大體者意存沾潤或以爲觀瞻之未肅或以爲輪奐之宜崇勢將
踵事增華上 聖聽惟仰懇 特降明諭一律停修以杜覬覦

之漸臣分居疏逃何敢妄測 高深惟仰荷 天高地厚之恩迫
而爲愛 君憂國之悃極知僭踰不敢避罪伏冀 聖明採納臣
不勝悚懼屏營之至謹繕摺具 奏伏乞 皇上聖鑒謹 奏

奏東省餉需萬緡請將土藥稅釐銀兩暫行截留摺 光緒二

十二年四月初一日

奏爲東省餉需萬緡請將土藥稅釐銀兩暫行截留以資挹注恭
摺仰祈 聖鑒事竊准戶部咨開准 圓明園咨行欽奉 諭旨
著戶部於各省每年應解土藥稅釐內除撥解頤和園十五萬兩
奉宸苑十五萬兩外其餘銀兩儘數撥歸 圓明園等因欽此相
應飛咨欽遵均照實徵之數按年迅速報解以濟要工等因咨行

到東自應欽遵辦理惟查東省入款以地丁爲大宗每年除應解部撥京協各餉及本省旗綠各營兵餉內地防營勇餉大小文武各官俸薪養廉暨河工經費外本不能有所贏餘自光緒二十年海防事起募勇購械之費一年至一百數十萬兩蒙 恩准截留京餉一半兼以海防捐輸各款湊集始克勉強支持嗣因款議已定各省先後撤防東省則登萊武定各府環海爲疆威海旣駐倭兵膠澳時來俄艦懲前毖後時復有積薪厝火之虞不得不酌留勇營以備緩急除先後裁撤歸併已及部議三成外計所留海防勇隊尙有四十餘營歲需餉銀尙須一百萬兩內外爲常年所未有之出款現當部庫空虛旣未敢奏請指撥上煩 宸厪海防捐

款已提解部庫京協各餉亦俱關緊要未便專顧一省再請截留
臣與司道各員通盤核計凡可以節糜費而歸正用者固已錙銖
必計搜索無遺再四思維惟此項土藥稅釐向係解歸海軍衙門
之款茲海軍衙門既經裁撤合無仰懇 天恩俯念東省餉項支
絀准將所收土藥稅釐銀兩暫行全數截留以充軍餉出自 鴻
慈俟海疆靜謐防營盡撤當再遵照解部聽候提撥除咨部查照
外所有東省餉需萬絀請截留土藥稅釐緣由謹繕摺具 奏伏
乞 皇上聖鑒訓示謹 奏 光緒二十二年四月十六日奉
硃批戶部議奏欽此

奏山東河工處分請敕部仍照舊例核議摺

光緒二十二年
四月二十三日

奏爲山東河工處分舊例已嚴擬請 敕部嗣後仍照舊例核議
恭摺具陳仰祈 聖鑒事竊臣前准部咨議覆御史胡景桂條陳
摺內吏部以歷屆成案河工失事革職及降調無級可抵即行開
缺人員合龍後向即保奏開復現擬於合龍後保奏到部時將原
議革職者改爲革職留任四年無過方准開復原議降級調用者
改爲降級留任三年無過方准開復等因兵部以議覆御史張仲
炘摺內聲明嗣後山東修築河隄係半年以內衝決者擬將遊擊
參將處分於原例降四級調用上加等議以降五級調用如過半
年仍在限內衝決者擬將修防守備等官加等降四級調用遊擊
參將加等降三級調用嗣後即按前奏加等定章分別議處等因

自係爲工員知所做畏即當加意防範起見惟查河工定例從前係爲東河南河舊有廳汛之地而設舊黃河河面本極寬廣隄身亦復高厚廳汛各官常年駐守責有專歸處分自不容寬假自銅瓦廂決口改道山東以寬不盈里之大清河受數千里黃河之水其始河底尙深猶能容納以後頻年淤墊愈積愈高幾至水行地上每當伏秋汎漲往往高出隄頂以致補苴無計漫溢頻聞溯自光緒八九年以來其未經漫決者不過二三年耳其各處防汎委員因節省經費每年至夏令河水漲發始行派委一有漫決參罰隨之即照舊例核議已與設有廳汛者無所區別若再於合龍後不准開復改爲降革留任扣限四年三年則黃河既難操三四年

不決之權委員即無三四年無過之望是一參之後開復無期其
罰未免過重查吏部原奏內稱光緒十五年奏定東省河工比照
黃河隄岸衝決例議處本屬從嚴辦理處分實無可再加等語是
東省比例之嚴部臣已自深悉乃於無可再加之處仍復議加以
致防汎一差人皆視爲畏途臣何以收得人之效至武職各員雖
係常年駐守而當黃流滿溢之際亦屬力無可施伏思處分條例
私罪不可不嚴而公罪不妨稍寬私罪嚴則人莫敢意存諉卸公
罪寬則人皆自奮於功名擬請嗣後東省河工除工員防守疏懈
承辦不實以致失事臣當從嚴參辦不稍姑息外其有事出倉猝
人力難施以至措手不及者其罪雖無可寬其情實有可恕合無

額懇 天恩飭下吏兵二部於參奏到日仍查照從前舊例分別核議將此次議覆御史胡景桂摺內所擬加等處分章程即行查銷俾在工各員咸知感奮庶人皆樂爲盡力臣亦得收羣策羣力之用出自 鴻慈逾格臣爲河工用人須留餘地起見謹專摺具奏是否有當伏乞 皇上聖鑒訓示謹 奏 光緒二十二年五月初七日奉 硃批著照所請該部知道欽此

奏報籌辦河工並出省查勘海口日期摺

光緒二十二年四月二十三日

奏爲遵 旨照舊籌辦山東河工並報明出省查勘海口日期恭摺具陳仰祈 聖鑒事竊臣恭閱邸抄光緒二十二年三月二十五日奉 上諭前據工部議覆御史胡景桂奏請將山東河南河

工變通辦理熙麟奏河督應轄全河請飭另議先後諭令任道鎔
妥籌具奏茲據奏稱河督移紮濟甯窒礙難行山東河工應仍歸
巡撫兼管等語自係實在情形河南山東兩省河工應仍照歷年
辦法著河道總督山東巡撫各專責成認真經理以一事權而免
貽誤至疏濬海口一節著李秉衡酌度情形奏明辦理該部知道
欽此仰見 朝廷慎重河防於諸 臣所議執兩用中權衡至當欽
服莫名伏查黃河自河南有工之處下至山東海口綿亙一千二
百餘里山東所轄即有九百餘里其利害之切與防守之難有不
得不陳於 聖主之前者山東黃河北岸自濮州入境南岸自荷
澤入境其居泰山之麓不致汎濫者祇南岸肥城長清百數十里

聞耳其餘地皆平衍上游北岸設有疏失則水由東昌臨清奪漳
衛以入海而河間天津等郡受其害南岸菏澤之賈莊壽張之孫
樓皆稱奇險設有疏失則水由曹單濟甯奪汶泗諸水以趨舊黃
河而淮徐等郡罹其災其爲北病畿輔南病江南財賦之區已與
河南無異下游北潰則入徒駭河南決則入小清河此兩河之中
如武定所屬十州縣及濟南府屬之歷城章邱鄒平齊河濟陽齊
東青州府屬之高苑博興樂安等縣迭遭昏墊頻年議獨議賑耗
國家之帑項仍無補百姓之阡危爲患幾無止境此其害之較
然衆著者也而其防守之難則有更甚於河南者河南河面寬至
十餘里水得遂其游衍之性則其勢稍紓山東寬不過里許狹處

僅只半里加以節節坐灣年年淤澱河身高仰既苦水不能容海口阻滯又患水不能洩而隄岸之低卑處又幾若田隴稍遇汎漲即便出槽以致漫決頻聞補救無術河臣任道鎔舉東河之病曰淤曰曲曰窄固已悉其要領也至疏濬海口本爲治河之善策惟水中挑挖人力旣無可施工其疏濬器具前人制作不同亦無經久不敝之法光緒十一二年間前撫臣陳士杰張曜先後造濬河船均因不適用於旋即廢去張曜復購德國挖泥機器船二隻迨分別試驗吸水而不能吸泥後經前撫臣福潤退還蓋黃流入海挾泥帶沙海中潮汐頂托以致泥沙停蓄愈積愈多漸至堅不可破此即添籌經費不敢謂辦理遂有把握也臣不諳河務於古人

修防之法素未講求本擬俟河臣來東商辦一切茲既欽奉 諭旨仍照歷年辦法各專責成臣曷敢不勉力圖維上紓 宵旰憂勤之至意現查南嶺子及十六戶兩處民埝均已堵合呂家窪口門臣前委員復往查勘據稱口門溜勢甚大而迤下分爲三股水流散漫入海仍復不暢臣已飭在呂家窪口門迤上於對岸挑挖引河一道冀掣溜勢俟引河開後如大溜能趨向正河呂家窪溜力漸微再行斟酌辦理臣定於四月二十五日出省親赴呂家窪及韓家垣海口周歷察看測量地勢高下何處入海較順並如何設法疏濬俟勘畢當據實 奏陳臣赴工之日署中所有日行事件循例委藩司代拆代行緊要公事仍包封送臣行次核辦所有

三
旨照舊辦理河工並出省查看海口緣由謹恭摺具 奏伏
乞 皇上聖鑒訓示河臣任道鎔因欽奉 諭旨辦理河南河工
不克來東會商是以未經會銜合併陳明謹 奏 光緒二十二
年五月初七日奉 硃批知道了欽此

奏查看黃河形勢請仍由鐵門關舊河入海摺光緒二十二
年五月十七日

奏爲查看黃河海口形勢擬請仍由鐵門關運下舊河入海謹繪
圖貼說並將籌辦情形恭摺具陳仰祈 聖鑒事竊臣前奉 諭
旨疏濬海口一節著李秉衡酌度情形奏明辦理等因欽此業將
出省查看海口日期恭摺 奏報在案拜摺後於四月二十五日

率同下游下段總辦候補道丁達意並暫委下游上段總辦之候補道潘延祖復延請精於測量之尙志堂山長在籍翰林院庶吉士宋書升由灤口乘舟下駛二十九日抵呂家窪查該處口門東西相距三百餘丈已奪正溜十分之八東壩淤有沙灘水深三四尺不等西壩水寬溜大中洪深二丈有奇口門以內一片汪洋臣復易小舟督同各員逐處查勘測量水勢高下其正溜由口門北趨水深四五六尺不等經八里莊迤北折而東行過豐國鎮丁河圈至陳家屋子復折而東北由鹽灘之納潮溝入海自陳家屋子以上溜勢頗大以下則汎濫各灘池入潮道溝水勢仍屬散漫其旁溜自口門西北一帶平漫數十里由西北之西林河及正北之

小汭河等處入海雖一望瀰漫無際並未沖出河身不能作出海之路復折回由正河至韓家垣以下逐段查看河身處處淤澱其淺處幾可褰裳而涉入海之處復不深通疏濬亦無良法若挽由此處入海恐下流壅遏上流必致橫決其害不可勝言此呂家窪決口及韓家垣正河入海均不通暢之情形也伏查鐵門關以下黃河本爲大清河入海舊路自咸豐五年黃河改道東省由此處入海者三十餘年光緒十五年韓家垣漫口因之爲入海之路於陳家莊築攔黃大壩而舊河遂廢臣因兩處入海均屬不暢不能不爲水尋去路因舍舟而陸由攔黃壩循舊河而下經榆樹坨壩鐵門關牡蠣背蕭神廟窪拉二溝子三溝子紅頭窩等處直抵海

口逐段測量愈下則河身愈低牡蠣背以下海潮所能到之處計深四五六尺不等再下則深至八九尺河身較韓家垣新河復低數尺其相傳口門外之鐵板沙詢之士人據言當黃水由此入海時海潮頂託停沙多至凝結今則海水滌盪已無復存是此處固天然入海之路未可舍而他求也臣先於呂家窪南岸挑挖引河原欲掣口門之溜使歸正河再將陳家莊攔黃壩創毀導水仍入舊河惟陳家莊上至呂家窪決口之處尙隔八九里河身僅存一綫呂家窪已將奪全河之溜若必挽歸正河再導水自攔黃壩而入地高費繁仍不敢謂辦理遽有把握查呂家窪口門至陳家屋子十餘里溜勢甚順陳家屋子之南有籠壩一道過籠壩里許即

係舊黃河擬俟汎漲時將竈壩決開使水入舊黃河故道則呂家窪迤下鹽灘盡可修復而水有所歸即西北一帶平漫之水亦可漸涸再俟秋後水落歸槽從呂家窪西壩起築長堤一道下抵陳家屋子竈壩作爲北岸大隄其韓家垣新河溜勢本微亦易籌堵塞免致兩行力弱臣近飭於陳家屋子竈壩以南趕挑引河一道斜接舊河河身再於河身淤澱之處自陳家屋子起至牡蠣背止一律挑挖深通引河之上建築橫隄免將來水至倒漾其舊河身自韓家垣改道後由他處徙來之民現已多成聚落應另擇高阜之區將陳家屋子以下居民先令遷徙已飭丁達意遴委妥員分投趕辦此臣擬將呂家窪之水引歸舊黃河並籌辦一切之情形

也臣維水勢就下其性則然韓家垣海口高仰既苦無法疏濬其河身亦不若牡蠣背以下河身之低而就呂家窪口門迤下十餘里爲黃水經行之路至陳家屋子仍引歸舊河其勢甚順將來長隄築後呂家窪西北各莊仍可各復舊業臣此次於各處往返數過再四詳求目前疏濬海口之計似無逾於此者惟黃河溜勢靡定瞬息變遷現在節過夏至倘伏秋大汎另有變更當隨時相度情形另行 奏明辦理臣查勘海口後沂流而上察看沿河埽壩均屬齊整各段補修隄工亦尙堅實茲已於五月十一日回省合併陳明所有查看黃河海口擬請仍由鐵門關迤下舊河入海並籌辦一切緣由謹專摺具 奏並繪圖貼說恭呈 御覽是否有

當伏乞 皇上聖鑒訓示謹 奏 光緒二十二年六月初五日
奉 硃批另有旨欽此

奏籌撥挖河築隄經費請截留京餉片

光緒二十三年五月
十七日

再臣此次查看海口請將呂家窪漫水挽入舊黃河舉凡開挖引
河挑溶河身建築橫隄均應於大汛前趕辦臣已飭一面勘估一
面由司挪款興工以期迅速蒞事俾得導水入河免致日久汎濫
其河身舊有居民及呂家窪黃水經行之處莊民均應擇地遷徙
亦須酌給遷費以資安輯秋間水落後建築呂家窪北岸長堤及
堵塞韓家垣新河需款亦鉅合計各項工程節省估算約需銀十
萬兩上下東省本無閑款司道各庫均入不敷出無可挹注臣與

各司道再四籌商惟有顧懇 天恩俯念黃河工程緊要准於應
解京餉內截留銀十萬兩俾得次第舉辦出自 鴻慈臣當督飭
工員核實動支不准稍涉浮冒俟各項工程完竣分款造冊報銷
以重帑項謹附片具 奏伏乞 聖鑒訓示謹 奏 光緒二十
二年六月初五日奉 硃批戶部議奏欽此

奏留臬司暫緩交卸片 光緒二十二年五月十七日

再臣准吏部咨光緒二十二年四月十二日奉 上諭江西按察
使著松壽調補毓賢著補授山東按察使欽此當經欽遵轉行由
調任江西按察使松壽具摺叩謝 天恩籲請 陛見奉 旨著
毋庸來見欽此自應飭令交卸山東臬篆前赴江西調任惟山東

三月廿一日
卷一
十一
訟獄繁多松壽自到東以來以振揚風紀爲己任舉凡詰奸禁暴
察吏安民辦理悉臻妥協深資臂助新授臬司毓賢交卸亮沂曹
濟道篆尙須籲請 陛見到任需時合無仰懇 天恩俯准松壽
暫緩交卸俟毓賢 陛見回東後再行飭赴調任出自 鴻慈謹
附片具 奏伏乞 聖鑒訓示謹 奏 光緒二十二年六月初
五日奉 硃批著照所請欽此

奏下游利津北岸趙家菜園漫溢請將在工各員分別參處

摺 光緒二十二年五月二十四日

奏爲黃河伏汎盛漲下游利津縣屬北岸之趙家菜園漫溢成口
所有在工各員分別參處恭摺具陳仰祈 聖鑒事竊臣前次出

省履勘海口並順道查看河工回省業經 奏報在案五月十一日節交夏至伏汎屆臨河水陸續增漲各工紛紛報險上游南岸壽張縣屬之靳莊頭壩埽段墊陷大溜刷底淘搜勢甚危險搶修數晝夜始漸平穩下游北岸濟陽縣屬之桑家渡百義閣形勢坐灣大溜緊逼埽前墊陷甚重惠民縣屬之唐家莊董家莊小高家王棗家等處皆屬頂衝埽壩多平墊入水幸營委各員奮力搶護均保無虞濱州北岸之打魚崔家十三段磨盤埽墊陷入水十四段魚鱗埽亦相繼沖去經各營委竭力搶辦添做魚鱗埽兩段幸臻穩固惟利津縣屬北岸之趙家菜園該處河身南高北下大溜側注埽根水深二丈四五尺埽壩多有墊陷該營委等隨墊隨廂

自二十八段至五十段均已搶廂出水四五尺而該處土性鬆浮迭出漏洞趕用棉衣麥秸堵塞至十八日戌刻西南風大作驚濤駭浪力莫能施竟於該處五十一段大埽逆下隄根漫溢出槽沖刷約寬五六丈大溜灌入圈隄立時漲滿浪湧風急又復漫溢成口刷寬至七八十丈深八九尺計分溜十分之三溜分兩股曲折由東北土塘順流而下約七八里即與呂家窪倒漾之水相接等情由下游總辦道員丁達意稟報前來臣維河至東省既窄且淤而尾閘復不宣暢夏至後旬日之間上游長水四尺七寸下游即長至八尺有奇隄埝之卑薄復如田隴臣去秋擬加高培厚約畧估計需銀七八十萬兩無從籌此鉅款後只就下游殘缺之處擇

要黏補未能普律加修伏汎水勢暴漲以致出槽漫溢實屬人力
難施惟防汎文武員弁責有專歸仍應照例參處應請將承防之
管帶河成中營副將徐天慶即行革職防汎委員候補知縣張學
易分防委員候補巡檢方棟林均請革職留工下游提調候補知
府倉爾頰應請摘去頂戴下游總辦候補道丁達意應請 旨交
部議處 臣督率無方請一併 敕部議處現飭將口門盤築裏頭
免致續塌其被淹村莊已飭賑撫局委員查勘分別撫恤刻下甫
屆伏汎爲日方長謹當分飭各總辦加意防護力保完善之區 臣
前請將呂家窪大溜引歸舊河正在興辦現聞此股漫水與呂家
窪之水合而北注形勢又有變遷須俟伏秋汎過方能定局 臣仍

當親詣察看隨時 奏明辦理所有伏汎盛漲下游趙家菜園漫
溢請將在工文武各員參處緣由理合恭摺具 奏伏乞 皇上
聖鑒訓示謹 奏 光緒二十二年六月十一日奉 硃批另有
旨欽此

奏請將誤工之已革副將徐天慶等從嚴參辦片 光緒二十

二年六月十三日

再河工修防最關緊要一旦決口壞廬墓蕩田禾甚則淹斃人命
傷慘之狀真有目不忍觀耳不忍聞者而堵合之費賑撫之資耗
朝廷款項多則數十萬少亦數萬糜帑殃民莫此爲甚全賴在
工文武各員認真修守以期弭患未形果其人事已盡猝遇異漲

力無可施自可寬其公過若平時漫不經心臨事又防守疏懈以致失事非從嚴參辦不足以儆貪庸臣於四月二十三日 奏請將河工處分仍照舊例核議摺內即已聲明在案此次趙家菜園漫口經臣 奏參欽奉 諭旨副將徐天慶即行革職知縣張學易革職留工應即欽遵辦理惟近查該處決口實因人力未盡文武各員有不得辭其咎者該處險工自四月二十五日即已搶辦經總辦丁達意飭令張學易收買現錢土以期應手臣五月初六日自呂家窪回至該處登岸逐細履勘見其廂埽厚積積料中未用土填實即將徐天慶嚴行申飭諭令加土勻填並飭張學易趕緊買土俾得迅速加築近查該處漫決之時民埝圈隄共有漏洞

四五處其所辦工程始終未能堅實可知復查張學易現錢買土亦有不實不盡之處是該二員辦事虛僞貽誤要工均未便稍予寬縱相應請 旨將已革副將徐天慶永不敘用並不准投効軍營知縣張學易請即行革職不准留工庶在工各員知所做懼不敢仍前玩泄謹附片具 奏伏乞 聖鑒訓示謹 奏 光緒二

十二年六月二十七日奉 硃批另有旨欽此

奏辦理曹單等處會匪情形摺

光緒二十二年六月二十四日

奏爲山東曹單等處會匪與江南碭山會匪勾結滋事已拏獲首要各犯懲辦民情安謐謹將辦理情形恭摺具陳仰祈 聖鑒事竊臣於五月十四五等日迭准總理衙門電開碭山旗丁龐三焚

燒劉隄頭教堂又勾串山東刀會擾及蕭豐等處希與江皖籌商
會剿等因又准兩江督臣劉坤一電同前由二十三日又欽奉
電旨山東曹單一帶本係盜賊之藪此次刀匪藉毀教之名出沒
於江南山東兩省之間著劉坤一李秉衡各派隊伍速往鎮壓如
敢抗拒即就地剿除等因欽此當將派員馳往查辦並調營分駐
彈壓情形先後電覆並電請總理衙門代 奏在案查此案臣先
准各處來電並據曹州府及曹單等縣先後具稟以碭山縣匪徒
龐三即龐三傑又名龐盛選因教民劉蓋臣搶割伊地內麥禾起
衅勾結東省大刀會擾及單縣東南鄉拆毀教民房屋等情時新
授臬司毓賢交卸兗沂道篆尙未來省臣即委派該臬司會同兗

沂道錫良馳往查辦一面飛調候選道馬開玉所統之開字三營分往曹縣單縣魚臺等處會同原有防營單縣參將岳金堂守備史鎮廷相機防禦統歸毓賢調遣並委候補知府楊傳書兗州府通判陳光綬候補知縣屠乃勳分往各處隨同彈壓開導兗州鎮總兵田恩來亦帶濟字中營出駐魚臺縣與毓賢等會商策應此各路布置之情形也臣查大刀會即金鐘罩邪教由來已久雖經地方官示禁根株總未能絕上年海疆不靖民間以此教可避槍礮傳習愈多幾於無處不有其愚者以爲可保衛身家其黠者遂藉以逞其兇暴兼以外來游匪從而煽惑漸至聚衆滋事若不先行解散一概勦捕恐激則生變轉至結成死黨爲患滋大先由臣

出示曉諭解散脅從並飭毓賢等周歷勸導以安人心必其大股
抗拒者飭即嚴行剿辦續據毓賢等稟稱查礮匪龐三傑因挾教
民劉蓋臣搶麥之嫌勾邀東南兩省刀會於五月初五十一等日
先後至單縣各教民家砸毀器具並焚燒薛孔樓洋學復槍斃未
入洋教之民人龔克亮王學亮二名十五日至豐縣戴套樓焚燬
教堂十八日龐三傑糾邀牛金聲即尤金聲彭桂林韓炳義陳玉
得劉仲文等會日領黨四五百人在江南山東交界之馬良集盤
踞其匪首劉士瑞曹得禮二名雖未出境會合而劉士瑞倡習邪
教徒衆繁多曹得禮亦係會中主謀之人其串通勾結與龐三傑
等均屬同惡相濟十九日龐三傑等在馬良集搶劫鹽店京貨雜

貨等鋪及江南裁缺外委衙門二十日至單縣東南鄉搶劫糧食馬匹匪目彭桂林等未至單縣被江南徐州府防營及民團擒獲該匪龐三傑等聞信折回救應單縣知縣李銓會同參將岳金堂督帶勇隊馳往勦捕單縣團長張安玉郝紹棠等協力堵禦在馬良集迤北迎頭截擊當場轟斃匪衆二名生擒匪衆楊成玉等十八名二十一日岳金堂帶隊又擒獲匪衆孫景倫等十一名又鄉團緝送二名解回單縣經錫良督同印委嚴訊除內有脅從三名訊明開釋外其餘據供分隸曹縣單縣碭山豐縣亳州虞城等州縣均係投入刀會焚燒搶掠抗拒官兵不諱電稟由臣批飭就地正法餘匪四散逃逸其劉士端一犯經曹縣知縣曾啟垣於二十

七日會營拏獲由毓賢訊明正法曹得禮一犯亦經單縣知縣李銓拏獲由錫良訊明正法其愚民之誤入刀會者見首惡伏誅皆悔過自新閭閻一律安堵此毓賢等辦理此案之情形也臣查此次會匪由於民教相讎其始非欲爲亂後因黨羽漸多並有各處游勇聞風麇至遂至肆行焚掠其勢漸張緩之則恐貽滋蔓之虞急之又恐激困獸之鬪恭繹 諭旨命臣等派隊鎮壓如敢抗拒即就地勦除是 聖主如天之仁原不欲概行誅殛該司道等率同委員親歷各縣曉諭化導但能悔罪出會准其自新在會者聞朝廷法外之恩多能洗心革面其頑梗抗拒者又即迅速捕獲悉與殲除曹單兩知縣於著名匪首均能不動聲色擒獲正法不

令遠颺爲患尙屬寬猛合宜辦理頗爲妥協現在渠魁授首民心
又安堪以仰慰宸厯除飭該府縣嚴禁刀會如有餘孽滋事即
行查拏一面通飭緝拏匪首龐三傑牛金聲等務獲究報並咨兩
江督臣外所有東南兩省會匪勾結滋事已拏獲首要各犯懲辦
地方漸就安謐緣由理合恭摺具奏伏乞皇上聖鑒訓示謹

奏 光緒二十二年七月初十日奉 硃批知道了欽此

奏請敕催曹州鎮總兵萬本華迅速來東片 光緒二十二年

六月二十四日

再臣准兵部咨開光緒二十二年五月十九日奉 上諭山東曹
州鎮總兵著萬本華補授欽此查曹屬界連直豫盜賊繁多近年

經臣 奏派升任兗沂曹濟道毓賢督辦緝捕事宜盜賊稍知斂迹今毓賢升授按察使新任兗沂曹濟道錫良到任未久正賴有實任武職大員坐鎮其間得以會商辦理萬本華樸勳廉勇臣所素知仰荷 天恩簡授來東俾臣得收指臂之助欽感莫名查該員前經湖廣督臣張之洞奏調鄂省差委今曹屬地方緊要懇 敕下湖廣督臣催令該員迅速來東以重職守出自 鴻慈謹附片具 奏伏乞 聖鑒訓示謹 奏 光緒二十二年七月初十日奉 硃批另有旨欽此

奏民教相讎情形請旨飭議豫弭後患片

光緒二十二年六月二十四日

再臣查此次會匪滋事固由龐三傑因教民劉蓋臣搶麥起釁而

民教之所以積不相能者則以平日教民欺壓平民教士袒護教民積怨太深遂致一發而不可制其釀亂之由有不可不亟圖挽救者自西教傳入中國習其教者率皆無業莠民借洋教爲護符包攬詞訟凌轢鄉里又或犯案懼罪藉爲遁逃之藪而教士則倚爲心腹恃作爪牙凡遇民教控案到官教士必爲之關說甚至多方囑咐地方官恐以開釁取戾每多遷就了結曲直未能胥得其平平民飲恨吞聲教民愈志得意滿久之民氣遏抑太甚積不能忍以爲官府不足恃惟私鬪尙可洩其忿於是聚衆尋釁焚拆教堂之事雖致身罹法網罪應駢誅而不暇恤是愚民之敢於爲亂不啻教民有以驅之也至民教滋事之案又輒以毀壞什物焚

拆教堂索賠償之費不知各國傳教雖多要惟通都大邑建有教堂其各州縣偏僻村鎮皆由各國教士就教民之稍能識字者使爲教師即因其所住房屋爲教學之所名爲教堂實則破屋數間室如懸磬一日有事則教士以毀壞什物焚拆教堂張大其詞以告主教主教復張大其詞以告各國公使而公使遂以之詰責總署百端要挾異議橫生其實並無洋人房屋器具議給賠費徒以長奸猾教民訛詐之風耳前准總署來電以德使函稱據濟甯教士電開單縣等處拆毀教堂共二十餘處臣飭毓賢等周歷各縣並委員詳查多係教民破爛房屋並無洋樓此案既經拏獲首要各犯正法應即了結自可無庸置議惟民教相讎終恐日久生事

擬請 旨飭下總理衙門與各國公使酌議嗣後遇有民教案件由地方官秉公訊斷教士毋許干預如或鬪毆滋事查非焚燬洋房但照應得罪名科斷不得再議賠償總期彼此無所偏袒久之猜嫌漸釋民教或可相安臣爲豫弭後患起見謹附片具 奏是
否有當伏乞 聖鑒訓示謹 奏 光緒二十二年七月初十日
奉 硃批該衙門知道欽此

奏查覆永阜場大使唐寶珍並無侵蝕鹽釐情事片 光緒二

十二年六月二十四日

再臣前奏遵 旨通籌黃河全局將上年呂家窪決口未能堵合情形恭摺覆陳案內聲明永阜場大使唐寶珍於所收鹽釐有無

侵蝕入已情事應即委查當經飭據鹽運使豐仲泰委員確查傳訊詳覆如給事中王會英原奏內稱舊有由鹽務抽釐稅銀萬餘金存永阜場署原爲修築河隄之費衆人請撥築隄護灘唐寶珍不惟不允並將萬餘金盡入私囊據爲已有等語查該場十餘年來或因修築灶壩或因修復灘池屢有請借庫帑抽釐繳還之款截至光緒二十年唐寶珍未經回任以前河西灶戶業將借款陸續清還河東灶戶尙有蒂欠至今未清唐寶珍自二十年四月回任以後既未接收前任移交亦無續行徵起銀兩惟該場有應還新借運庫灶壩經費銀四千兩係二十年前運司李希蓮任內借發飭令無論官商每鹽一包捐銀二分按月報解歸款唐寶珍還

照收捐均由繩蓆鋪經手抽收扣至二十一年底止共收河平銀七千二百四十三兩六錢八分除解還運庫銀四千兩下存銀三千二百四十三兩六錢八分內唐寶珍經手支銷火耗解費補平補色及交付灶壩局搶險等費共銀八百九十一兩六錢四分灶紳王元英尙宜經手支銷修工各款共銀一千八百八十六兩九錢三分餘銀四百六十五兩一錢一分唐寶珍因另案撤省交卸後截清收數由原經手之德裕祥繩蓆鋪撥交灶紳收存集訊王元英尙宜等認明支銷屬實取有親供附卷即所撥四百餘兩亦係隨後抽釐支剩之項並非當時存在場署委無不允請款侵蝕入己情事復委候補道丁達意切實訪查稟覆相符臣維鹽釐之

有無侵蝕應以鹽釐之有無存銀爲斷永阜場署既無存銀則唐寶珍之並無侵蝕入己尙屬可信原奏似係傳聞之訛應毋庸議謹附片覆陳伏乞 聖鑒謹 奏 光緒二十二年七月初十日 奉 硃批知道了欽此

奏東省認還洋債並無專款可撥摺

光緒二十二年七月初十日

奏爲東省認還洋債並無專款可撥謹將移緩就急竭力湊解情形恭摺具陳仰祈 聖鑒事竊准部咨光緒二十二年五月初八日戶部具奏每年應還俄法英德兩款本息數鉅期促擬由部庫及各省關分別認還各摺片奉 旨依議欽此開單咨行到臣當經分飭欽遵籌辦伏查單開俄法一款山東指撥鹽斤加價銀一

萬兩地丁鹽課鹽釐貨釐雜稅等款銀十二萬兩東海關洋稅洋藥稅釐銀三萬兩英德一款山東指撥鹽斤加價銀一萬兩地丁鹽課鹽釐貨釐雜稅等款銀十七萬兩東海關洋稅洋藥稅釐銀五萬兩歲共撥銀三十九萬兩內除鹽斤半文加價銀二萬兩款尙有着其餘指撥各項均係應解應用之款如地丁雜稅關稅等項應撥解京協各餉及動支俸餉工需鹽課亦係支解京餉鹽釐則撥作黃河防汛經費貨釐則專供固本兵餉東海關洋藥釐金經臣 奏准留供海防軍餉此外別無餘款可撥誠以東省歲賦所入止有此數無事之時出入僅足相抵自光緒二十年海防事起募勇購械之費一年至一百數十萬兩庫款搜括無遺不得已

奏請截留京協各餉並留用海防捐輸始克勉強支持是東省竭蹶情形早荷 聖明洞鑒嗣因款議已定各省先後撤防而山東環海爲疆倭兵尙駐威海償款一日不清防營一日難撤雖迭經裁減歸併現在尙留海防勇隊三十餘營歲需餉銀七八十萬兩爲常年所未有之出款加以河患未除工賑兼籌需款亦鉅已屬籌措爲難今再歲增洋債三十餘萬之多無米之炊誠如部臣所慮至原奏謂力除中飽嚴汰冗費當不至十分爲難自是節以制度之意臣上年九月遵 旨覆陳時務摺內即以節糜費杜中飽上言兩年中如歸併局務裁汰冗員比較釐金清查關稅凡可以祛積弊而歸正用者固已較及鎔銖然只能化私而爲公不能

強無而爲有臣與各司道再三籌畫殊屬挹注無方惟此項洋債
振古未聞在 朝廷本爲萬不得已之度支在部臣亦屬無可如
何之區畫爲疆臣者受 恩深重目視時艱已亟敢不通力合作
上紓 宵旰之憂勞遵即督飭各司道查照部議無論何款先行
劃提湊解茲據藩司張國正詳報先提接扣軍需三成養廉新舊
裁兵節餉土藥稅釐等款並將鐵路經費貴州協餉暫行停解共
籌銀七萬五千兩運司豐仲泰詳報先提撥剩鹽斤半文加價並
將內務府工部帑利天津道剝船經費漕督運河道河工經費等
款暫行停解共籌銀一萬五千兩併委正任黃縣知縣蕭啟祥管
解又據東海關監督錫桐詳報先提洋稅洋藥稅儘數湊撥共籌

銀二萬五千兩飭委直隸候補知縣江開泰管解均於六月內解赴江海關道衙門交納統共銀十一萬五千兩作爲認還本年第一期英德借款本息之項其英德第二第三兩期暨俄法九月應還四成借款本息現仍督飭司道趕緊設法籌撥依限續解但能有可通挪斷不敢稍遺餘力第就山東以論山東所慮爲數太鉅爲期太遠年復一年終恐難乎爲繼是又夙夜旁皇所不能已者也所有東省認還洋債竭力湊解情形除咨部查照外理合恭摺具陳伏乞 皇上聖鑒謹 奏 光緒二十二年七月二十五日奉 硃批戶部知道欽此

奏報出省赴下游河工日期片

光緒二十二年七月二十八日

再河工遇有緊要事務應由臣親履查勘前經 奏明在案查黃河屢決總由入海尾閘不暢臣前擬從呂家窪口門順流而下至陳家屋子仍引歸鐵門關迤下舊河入海嗣因趙家菜園決口形勢變遷於五月二十四日 奏報摺內聲明俟伏秋汛過再察看情形辦理現在節屆白露水勢已定其何處入海較順應即親往查看以便設法疏導 臣擬於八月初六日出省赴趙家菜園漫口及溜行入海尾閘詳悉查勘應如何辦理之處俟勘畢再行 奏報所有臣署日行事件循例委藩司代拆代行緊要事宜仍包封送臣行次核辦謹附片具陳伏乞 聖鑒謹 奏 光緒二十二年八月十一日奉 硃批知道了欽此

奏黃河上中下三游分飭道員管理片

光緒二十二年七月二十八日

再山東黃河袤延千有餘里向分上中下三游各派道員管理查北岸自濮州入東境起至壽張縣張秋鎮止南岸自荷澤縣入東境起至壽張縣十里堡止爲上游向歸兗沂道管理本年兗沂道毓賢升任按察使新授兗沂道錫良五月到任即馳赴曹單等處查辦會匪不暇兼顧當經檄委候選道馬開玉爲上游總辦自東阿而下北岸至歷城濟陽交界止南岸至章邱齊東交界止爲中游係歸候補道李希杰管理李希杰已蒙簡放安徽鳳穎道經臣奏明俟中游遴委有人再行飭赴新任茲查有候補道蔣兆奎堪以接委中游總辦並兼辦北運河工程惟刻值漕船入運正

當喫緊仍飭李希杰暫行會同辦理其北岸自濟陽縣屬起南岸自齊東縣屬起下均至利津縣海口爲下游係候補道丁達意管理前因下游工段較長分下游上段委總辦機器局候補道潘延祖暫行兼辦現撥北岸濟陽縣屬六十餘里劃歸中游併交蔣兆奎管理自惠民以下及南岸下游全境仍歸丁達意總辦潘延祖即無庸兼辦仍專辦機器局各專責成除分檄飭遵並責令常川駐工督率文武員弁認真防守外謹附片陳明伏乞 聖鑒謹

奏 光緒二十二年七月二十五日奉 硃批該部知道欽此

奏核減山東通省錢糧折收錢數摺

光緒二十二年七月二十八日

奏爲遵 旨覈減山東通省糧銀折收錢數恭摺覆陳仰祈 聖

鑒事竊臣於光緒二十二年五月初八日在下游工次承准軍機大臣字寄五月初二日奉 上諭有人奏山東掖縣等州縣糧銀折收過多請飭迅行核減一摺據稱萊州各屬掖縣平度每銀一兩折收京制錢五千六百文膠州高密即墨每銀一兩折收京制錢五千八九百文均係同治年間所加其時銀價每兩錢三千八九百文現時庫平足色銀每兩祇京制錢二千六百餘文各屬浮收多至一倍有餘請飭核減等語著李秉衡確查各州縣徵收數目如有浮收情弊一律從實覈減以恤民生等因欽此仰見 皇上子惠黎元體恤周至跪誦之下欽感莫名伏查山東各州縣錢糧有照銀數徵收有照錢數折收其照錢數折收者當同治八九

年間銀價昂貴每兩連火耗加平解費折收京制錢五千六百文至五千八九百文不等現在銀價日低以各處市價牽算每兩易錢不過二千七八百文而收數仍相沿未改實屬浮多臣上年覆奏掖縣知縣楊德成被參各款案內已飭司酌議覈減章程轉飭遵辦茲復欽奉諭旨自應覈實刪減以利民生臣復查各州縣錢糧收數向不畫一其折收至五千以外者尙不止萊州一屬爲然今旣另議覈刪自應普律均霑使無畸重畸輕之弊臣復督同藩司悉心核議除照銀數徵收者各仍其舊外凡折收錢數之各州縣衛所鹽場無論紳戶民戶統自光緒二十二年下忙開徵爲始每糧銀一兩折收京制錢四千八百文一切火耗加平解費等

項均在其內此外不准另加分文其向來不及四千八百文者仍應照舊完納不准藉口加增倘將來銀價昂貴州縣實不敷辦公之用當再察酌情形 奏明辦理除由臣刊刻告示飭發各屬張貼曉諭如州縣中有陽奉陰違於定章之外設法巧取分文者即當嚴行撤參外所有山東閩省錢糧折收錢數一律駁減緣由理合恭摺覆 奏伏乞 皇上聖鑒訓示謹 奏 光緒二十二年八月十一日奉 硃批戶部知道欽此

奏請將副將周保林等降革片

光緒二十二年七月二十八日

再查候補副將周保林前隨曹州鎮總兵王連三帶隊北上上年王連三請假回籍該副將代統練軍回東將所帶火藥沿途私自

存放據齊河縣知縣王敬勳稟稱周保林於上年八月道經齊河將火藥五箱鉛丸十箱銅帽五十匣寄存城外客店並未知會該縣本年四月復派弁將前項軍火運去等語當經臣札飭該副將將此項軍火存放何處據實稟覆旋據稟稱前項軍火用船運至濮州遭風覆沒等情其爲隱匿捏飾顯而易見查該副將於軍火要件並不隨帶回營沿途私自存寄已屬意存漁利迨臣查出飭詢復任意譸張爲幻實屬居心狡詐不堪造就又候補游擊房景山於前署堯中營游擊任內因娶親強派各汛賀禮後其父病故又令各汛攤派奠儀更屬罔利營私不知自愛相應請 旨將候補副將周保林以守備降補候補游擊房景山即行革職以示懲

傲謹附片具 奏伏乞 聖鑒訓示謹 奏 光緒二十二年八月十一日奉 硃批另有旨欽此

奏節逾白露黃河險工搶護平穩摺

光緒二十二年八月初五日

奏爲節逾白露黃河險工搶護平穩恭摺仰祈 聖鑒事竊照山東黃河本年伏汎盛漲下游利津縣屬之趙家菜園漫溢成口當即盤築裹頭並兩岸險工迭出搶廂穩固情形均經 奏報在案入秋以來汎水疊次漲發較伏汎搜淘尤甚各處奇險環生如上游之賈莊紅廟靳莊孫樓國莊雙合嶺藍路口馬劉莊徐家沙窩中游之桑家渡史家塢王家窰于家窩楊家廟夏家溝陶家嘴下游之董家莊小高家榆林莊沙嶺王棗家蝎子灣王家或坐灣頂

沖大溜滾刷或對岸生灘全溜側注以致新舊挑水壩及魚鱗磨盤各埽墊陷頻仍其餘灰石各工亦多剝落迭經分飭上中下三游總辦督率文武員弁會同各地方官激勵勇夫聯絡莊民分投晝夜搶護並添修埽壩加築後戢幸均轉危爲安現在節逾白露水勢已定察看通工情形一律平穩堪以仰慰 宸厪惟時距霜降尙遠不敢稍涉疎懈臣現赴下游查勘海口河工仍當督飭各總辦加意認真修守期保無虞以仰副 聖主慎重河防之至意所有節逾白露黃河險工搶護平穩緣由理合恭摺具 奏伏乞 皇上聖鑒謹 奏 光緒二十二年八月二十一日奉 硃批知道了欽此

奏遵旨相度地勢撥款建造火藥庫摺

光緒二十二年八月初八日

奏爲遵

旨相度地勢撥款建造火藥庫以昭慎重恭摺仰祈

聖鑒事竊查東省前准部咨光緒十九年十一月二十四日奉

上諭薛福成奏各省建築火藥庫宜在空曠寥廓之區以昭慎重等語火藥爲操防要需儲藏宜格外慎重著各該督撫酌核情形相度地勢擇空廓僻靜之處妥爲存儲等因欽此當經前撫臣福潤轉飭欽遵勘辦嗣因海防事起需用火藥浩繁未及擇地存儲現在軍務已平經臣飭催相度地基勘估建庫去後茲據總理機器局務按察使松壽候補道潘延祖等會稟稱勘得距局西南六里許有無影山高而不峻頂平土燥東西約寬六十丈南北約寬

四十丈以之建築火藥庫四面村莊皆遠相去省城八里取藥存藥均尙便捷惟山頂已高再加庫房未免顯露擬就平頂砂鬆之處挖下六尺周圍砌石爲牆出地後接砌懸磚發旋爲頂上加三合土築實不用木料瓦片每座相離尺許內寬八尺深一丈五尺中間留路出入兩旁及後面俱鋪地板安置藥箱共建二十座藏藥四十萬磅以局造火藥計之足敷存儲環築土圩二百丈高八尺頂寬三尺底寬一丈五尺圩門一座外蓋看守員弁住房三間勇丁住房四間圩外淘井一口統計磚灰石瓦木料匠工地價土方等項共實估工需銀六千五百餘兩稟請 奏咨撥款興工前來臣維火藥爲操防要需其製愈精其性愈烈儲藏不密輒釀巨

患咸豐九年山東火藥局失慎曾罹此厄前車可鑒未便戒備稍疎亟應擇地建庫妥爲存儲今無影山地僻空廓辦法悉合機宜所估工需銀兩減無可減擬請在於藩庫如數撥發興工將來建造完竣覈實驗收歸入機器局光緒二十二年報銷案內一併造報以清界限除分咨戶兵工三部查照外所有相度地勢撥款建造火藥庫以昭慎重緣由理合恭摺具陳伏乞 皇上聖鑒訓示謹 奏 光緒二十二年八月二十一日奉 硃批該部知道欽此

奏山東現辦河工革除積弊情形摺

光緒二十二年八月二十八日

奏爲欽奉 諭旨謹將山東現辦河工革除積弊情形恭摺具陳

仰祈 聖鑒事竊准吏部咨開內閣鈔出光緒二十二年七月十一日奉 上諭御史宋伯魯奏山東黃河積弊已深敬陳管見一摺所稱冒領朦銷宜嚴定處分收發各料宜設法稽查申明賠修舊例武弁認真巡察各條著山東巡撫嚴飭在工各員革除積弊認真辦理等因欽此仰見 朝廷慎重河防實事求是莫名欽悚伏查黃河奪濟迄今四十餘年同治年間一決於侯家林再決於賈莊其時上游壅閼而大清河尙屬深通故下游未罹其害迨其後河身淤澱日積日高漸至水不能容橫溢潰決自光緒八年桃園決口以來或一歲一決或一歲數決以關隴晉豫直東數省之巨浸責之於寬不盈里之大清河譬猶尊壺之水注之杯勺其不

能翕受早在 聖明洞鑒之中若專論河工剔弊之方則臣近年辦理情形有該御史所未及周知者請爲我 皇上敬陳之從前河工有事每歲額款而外或請至數十萬或百餘萬大吏之耳目稍有未周則嗜利者遂趨爲腥羶之藪原奏所稱冒領朦銷之弊誠不敢謂其必無自臣履任以來凡出入款項無不親自鈎稽每年防汛經費河防營勇餉若干正料需款若干雜料需款若干各局月報旬報臣皆逐條考覈上年歲修之款中游節省至五萬餘兩堵合高家大廟北趙家兩處漫口原請款十五萬兩嗣復飭撥節動用祇銷銀七萬餘兩所餘之款移作下游修培之用不復另行請款似侵冒之弊臣已搜剔無遺至買料不實之員上年已將

邵守正崇貴參革辦工買土不實之員本年又將徐天慶張學易加等嚴參均先後欽奉 諭旨人所共見是處分之條臣固不稍寬假矣原奏又謂河工以收支料場爲最優買稽椿蒜土次之皆重賄營謀巧取豪奪等語查三游各設收支局凡購買正雜各料委員向局領銀所購各項價值由委員自行通報筭收支者祇司出納大數並不經手採辦臣復飭各總辦留心稽查當不能有所弊混至買稽料之弊不外架井中空從前不肖委員與營員通同作弊在所不免臣痛懲此弊飭局詳定章程凡購辦稽料必擇操守可信之員購齊後由臣及各總辦派員驗收臣赴工之時再隨處抽查斤重如不足數分別參懲現在買料一差人多視爲危途

若謂重賄營謀巧取豪奪揆諸近日情事迥不相侔臣查河工以稽料爲大宗而石料椿蒜所需亦鉅現由臣遴派廉正素著之員分辨石料椿蒜三項務期涓滴歸公一洗從前痼習仍當隨時稽察以絕弊源原奏又謂申明賠修舊例自是責成保固之意查賠修之例本係爲南河舊有廳汎之地而設然使堵口工具有草率偷減情弊致甲年堵合者乙年又復開口自當查照舊例核辦毋許將地名任意更換以杜規避取巧之私至武員專事逢迎最爲河工陋習臣到東後即通飭嚴禁凡臣衙門委派營官及臣查工到境無許書吏差弁需索分文並不准供應迎送自總辦以下現均一律遵行風氣已爲一變臣於河工非所素習然兩年以來博

考輿論勤加訪察凡河工舊日積弊已無不次第漸除與爲更始
茲復欽奉 諭旨自當慎益加慎嚴飭在工各員潔清自矢無許
日久弊生仰副 聖主厯念河防至意惟是除弊之法臣力所能
盡者勞怨在所不辭而以東省河工之難歷任撫臣百計圖維迄
無善策即此次該御史所奏山東地勢迫狹則讓地與水之議既
不能行土性鬆緩則以隄束水之方亦不足恃若謂實力奉公即
可爲一勞永逸之計微論臣之才力有所不逮即起古之善治水
者爲之恐亦難言遽有把握臣惟有勉竭心力求尾閭稍暢之處
無拂其就下之性以求澹此沈蓄而已所有山東河工革除積弊
暨辦理爲難情形謹恭摺覆陳伏乞 皇上聖鑒再臣前 奏明

八月初六日出省因骸疾觸發趕緊醫治數日嗣於十二日力疾赴工合併陳明謹 奏 光緒二十二年九月十四日奉 硃批知道了欽此

奏東省兵餉支絀請敕部撥留京餉片

光緒二十二年八月二十八日

再山東海防各營節經先後裁併照現在營數除嵩武一軍賴豫省力顧大局籌濟全餉外仍歲需餉銀五十餘萬內地防營尙不在此數查上年防務喫緊之際主客各軍費餉幾二百萬賴海防捐收數尙旺又截留京餉一半再就本省挪東補西始克勉強支應本年海防捐已歸部庫京餉未敢截留又奉部撥攤還洋債三十九萬入款減而出款頓增使無河工運工歲須七十餘萬鉅款

司道各庫猶可隨時羅掘現雖經臣嚴切鉤稽力汰冗濫而綜計
出入款目不敷尙鉅故論兵力則非議增不可論餉力則即不增
兵已難爲繼臣與各司道日夕籌維均屬徬徨無策伏念自海疆
事起國帑已耗費不貲部臣籌餉之艱亦與外省無異惟東省
值強鄰壓境勢處萬難兵力餉力均有未逮拮据之況不得不直
陳於聖主之前在部臣體國公忠當能力維全局如允照臣
議增兵數指撥的餉臣當慎選將領卽爲添募以立自強之基倘
撥款不能如數臣卽不敢輕言增募祇合就現有各營加意訓練
惟此五十餘萬之餉亦屬無著應請 敕下部臣自光緒二十三
年爲始無論如何爲難務於例解京餉內撥留銀二三十萬以供

軍食不敷之款再由臣設法騰挪此實於無可節省之中勉求節省之計伏冀 聖慈飭部照覆施行謹附片具 奏伏乞 聖鑒訓示謹 奏 光緒二十二年九月十四日奉 硃批覽欽此

奏請獎勵陳壽清杜榮秀片 光緒二十二年八月二十八日

再山東盜風以兗沂曹濟等屬爲最著而毘連之東昌臨清各屬及瀕海之海豐濰化等縣亦皆盜賊繁多深爲地方之害臣上年自海防回省因各處稟報搶劫之案層見疊出遴委留營差遣之已革甯海州知州陳壽清會同候補副將杜榮秀督帶防營周歷各屬隨處贖捕以輔地方官耳目之所不及免致蔓延爲患該革員等每到一處廣覓眼綫設法兜捕計先後擒獲著名首要各犯

數十名均會同地方官訊明懲辦閭閻賴以安堵現仍加意督捕不少鬆懈臣查陳壽清勤幹有爲勇於任事歷任東平汶上等州縣均能勤政愛民循聲卓著光緒十七年 題補甯海州知州二十年十二月到任甫及月餘即值倭人肇衅時防營不敷分布該州並無勇隊駐紮居民亦逃徙一空無與爲守遂致失陷臣 奏參後因該革員才力實堪任用 奏請留營該革員亦以身負重咎深知愧奮遇事黽勉不遺餘力洵屬有用之才可否籲懇 天恩俯允將已革甯海州知州陳壽清 賞還原銜之處出自 鴻慈逾格副將杜榮秀久著戰功勇於治盜而不擾民在武員中尤爲難得可否 恩施存記以備錄用而示鼓勵恭候 聖裁謹附

片具 奏伏乞 聖鑒訓示謹 奏 光緒二十二年九月十四

日奉 硃批著照所請該部知道欽此

奏請敕部撥餉添練勇營摺 光緒二十二年八月二十八日

奏爲夷情叵測山東首當其衝擬請添練勇營以固封守而衛

京畿恭摺瀝陳仰祈 聖鑒事竊自倭人構衅攘我藩封據我城

邑我 皇上覆幬之仁以息事安人爲急不惜盡廢其欲而豺狼

卒無厭心也 臣愚以爲和未可恃也恃在我之能戰能戰而後可

以不戰恃和則必不能久和倭以三島立國非有泰西各國之兵

力也祇以密邇中華見我武備廢弛漸生覬覦同治末年窺我臺

灣其勢尙未強盛而我允給兵費未加懲創後遂破滅琉球夷爲

屬縣駸駸狡焉思逞矣上年朝鮮之役我始以將驕卒惰失律喪師 皇上赫然震怒召將徵兵兵力亦漸厚矣和款一定天下痛心既割全省之版圖復給不貲之賠費通商各省又盡擅天下利權在倭人始念聊舉以嘗試而吶喝者無不如其意以去譬猶以肉飼虎肉盡終必噬人况又爲之傅之翼而助其餓猶望其俯首帖耳長就我之範圍豈可得哉中國東南七省皆與倭一水可通然閩粵江浙均各國互市之區互相牽制倭不敢多府衆怨高麗既爲倭屬與東三省毘連而俄勢方強早不便其所爲倭亦不敢驟樹大敵然則倭之所欲先發難者非山東而何山東登萊青三府橫插海中威海水陸相依爲其要害倭既駐兵威海進可以得

尺得寸而退亦不失巢穴此其可慮者一也登州北對旅順東對高麗向猶恃爲藩服今則高麗之地皆倭所屯儲高麗之人皆倭所指嗾一旦有事可迫爲前驅此其可慮者二也登威而外如萊州武定所屬各處皆有海口北窺武定各口可拊我天津之背南窺膠澳可斷我江南之援又由沂州之日照海面下窺清口可以梗我運道阻我南北水陸之氣此其可慮者三也即倭人深匿其迹猶不能不預爲之防况彼族近多改裝易服深入內地測量繪圖其蠶食之心已大彰明較著哉夫養虎而罔知貽患其始計已疏亡羊而猶憚補牢則後禍曷已方今海軍已覆全恃陸軍加意簡練以爲禦敵之謀乃以餉項艱難防營迭次裁汰東省除河南

協餉之嵩武一軍外現祇留定字三營東字正副各三營登防五
營新魁四營暨臣親軍一營通計不足萬人籌餉之艱已屬力盡
筋疲朝不謀夕然疴羸之病不治益深設彼再一旦背盟深慮無
以制敵 皇上聖謨廣運當已燭照無遺伏乞 聖慈俯念山東
爲濱海要區敵所必爭之地准由臣合現有營隊添足二萬人並
懇 敕部籌撥的餉源源接濟俾臣盡心籌畫選樸誠之將朝夕
訓練期成勁旅使在我無可乘之隙彼自不生易視之心山東幸
甚大局幸甚臣爲慎固封守屏蔽 京畿起見是否有當謹恭摺
具 奏伏乞 皇上聖鑒訓示謹 奏 光緒二十二年九月十
四日奉 硃批該部妥議具奏片併發欽此

奏請議卹已故知縣劉鑑片 光緒二十二年八月二十八日
再查已故署汝上縣知縣劉鑑自去秋抵任以來於地方應辦事
宜無不悉心經理而緝捕一事尤爲認真汝上與曹屬毘連盜賊
向多出沒該故員巡行村鎮各處躡緝每月衙齋居不數日本年
夏間因下鄉巡緝感受風寒旋探明巨盜溫二等蹤跡復於六月
間力疾親帶勇役會同防營候補副將杜榮秀等格斃溫二等三
名並擒獲盜首王黑等訊明正法卒以積勞過甚加受暑溼於是
月十五日病故據藩臬兩司詳請 奏卹前來臣稔知該故員辦
事實心不辭勞瘁委因捕盜致疾積勞身故合無仰懇 天恩俯
准 敕部議卹以爲緝捕勳能者勸出自 鴻慈除將該故員履

歷咨送吏部外謹附片具 奏伏乞 聖鑒訓示謹 奏 光緒

二十二年九月十四日奉 硃批著照所請該部知道欽此

奏請獎勵緝捕勤能各州縣片

光緒二十二年八月二十八日

再爲政首在養民而安良必先除暴山東盜風之熾異乎他省其
被盜之慘酷焚殺擄掠幾如破卵覆巢不獨財產一空抑且性命
莫保閭閻被禍之烈莫此爲甚故牧令之循良不止緝捕一端而
論東省近日情事必以緝捕爲最要其有能認真捕務擒獲巨盜
以鋤兇暴而安良善亟應予以獎敘以勵其餘茲查有調補荷澤
縣利津縣知縣朱慶元調補曹縣知縣曾啟垣調署清平縣招遠
縣知縣朱鍾琪金鄉縣知縣張鴻鈞署鉅野縣題補陵縣知縣許

廷瑞前署曹縣現署在平縣候補知州王鍾儒署莒州候補知縣
董燕署霑化縣候補知縣汪麗金署城武縣候補知縣楊義堃均
能整頓捕務破獲巨案無論本境鄰境盜賊皆多方擒捕有犯必
懲洵屬留意地方著有實效據按察使松壽會同布政使張國正
詳請 奏獎前來合無仰懇 天恩俯准將朱慶元等九員傳
旨嘉獎俾爲牧令者知緝捕之勤惰關民生之休戚人皆知所觀
感則捕務必日有起色而善良可以安枕矣臣爲綏靖地方起見
是否有當伏乞 聖鑒訓示謹 奏 光緒二十二年九月十四
日奉 硃批另有旨欽此

奏請敕照會倭使定期撤軍片

光緒二十二年八月二十八日

再馬關之約第一第二兩次賠款交清通商約章互換倭即撤回
軍隊查賠款一次若干臣不知其詳前准戶部奏派各省攤還英
法俄德借款自係借以償倭現聞一二次賠款已交商約已定而
倭兵尙不聞議退深恐日久另生枝節許之則難措手不許則啟
衅端應請 敕下總理衙門照會倭國公使定期撤回軍隊以符
條約而免後患謹附片具 奏伏乞 聖鑒訓示謹 奏 光緒
二十二年九月十四日奉 硃批該衙門知道欽此

李忠節公奏議卷十二終

李忠節公奏議卷十三

奏查看黃河尾閘形勢擬由蕭神廟入海并將趙家菜園呂

家窪漫口堵合摺

光緒二十二年九月十一日

奏爲查看黃河尾閘形勢擬由舊黃河東岸挑挖新河仍導入蕭
神廟舊河入海並將趙家菜園呂家窪漫口次第堵合謹繪圖貼
說恭摺具陳仰祈 聖鑒事竊臣前因察看海口於五月舟赴下
游維時呂家窪口門至陳家屋子溜勢甚旺擬從陳家屋子掘開
西竈壩導入鐵門關迤下舊河入海嗣因趙家菜園決口水由東
北土塘順流而下與呂家窪漫水合而北注形勢已有變遷擬俟
伏秋汎過再察看情形辦理業經先後 奏明在案臣此次舟至

趙家菜園易坐小舟從口門溜勢經行之處順流而下至霑化縣屬之泮河復由泮河沿慶定溝沂流而上至呂家窪口門往復周巡詳加察看趙家菜園之水由左家莊經邢家南窪後窪等莊直趨利國鎮刷開王家小河流入泮河又東行一股至季家屋子與呂家窪之水會合由慶定溝匯入泮河查泮河即徒駭河下游自黃水入泮之處至海口四十餘里由此入海本極通暢惟上游商河惠民濱州等州縣之水皆以泮河爲尾閘再增黃水由此入海勢不能容必至漫溢爲患此趙家菜園亟宜堵合之情形也呂家窪之水其正溜先由八里莊迤北折而東行過豐國鎮至陳家屋子復折而東北由鹽灘之納潮溝入海自陳家屋子以下溜勢漸

徵故臣前請掘開竈壩歸入舊河迨趙家菜園決口水至季家屋子合而爲一掣動大溜挾以北趨至慶定溝流入泮河現在水向西行其口門東壩至陳家屋子均已淤成平陸若仍照前議須由口門至陳家屋子平地挑挖工鉅費繁且口門迤東新淤之處均係嫩灘將來築隄亦難堅實臣於五月十七日摺內以黃河溜勢靡定不可以人力爭即此可見惟降河既實不能容則此處西行之水亦應堵塞而韓家垣河流復不能暢又無宣洩之方此呂家窪不可不堵而又不能遽堵之情形也臣查舊黃河自蕭神廟以下地勢愈低入海之路本無逾於此者惟陳家屋子以上淤地既難挑挖若將正河攔黃壩掘斷水循舊河而下則歷年遷居河身

民戶鱗次櫛比又無地可以安插臣復從舊河兩岸逐處相度查東岸竈壩以外地皆平行並無居民如水由此處經行其勢甚順現擬於舊攔黃壩迎東韓家垣之上開挖新河一道計十七里有奇至李家竈將竈壩掘開又三里有奇至平字灘接入舊黃河再將舊河身高仰之處約近二十里擇要加挑至牡蠣嘴以下深處爲止於李家竈之下從東竈壩起斜築格隄一道計長七里有奇接至西竈壩止以防黃水入河倒灌爲患其河身內所居民戶無多另行擇地遷徙復查呂家窪口門對岸臣六月內所挑引河勢尙通順擬再從引河上添挖引河一道須較前挑引河更加寬深復從呂家窪口門上岸建築攔黃大壩將大溜逼入引河則呂家

窪西口亦可挂淤再將口門堵合使正溜全歸新河由蕭神廟迤下入海其韓家垣舊河擬留作減水支河盛漲時亦可爲分洩之路綜計趙家菜園堵口呂家窪以下空河築隄及堵塞呂家窪漫口工程浩大需費甚鉅臣督飭核實勘估力從減省處計算擬請撥銀二十萬兩卽飭定期開工次第興辦如將來款項實在不敷再行 奏請添撥臣當慎選廉幹素著向無習氣之員認真舉辦總期工歸實用款不虛糜仰副 聖主慎重河防實事求是之至意所有察看黃河尾閘擬將舊河東岸挑挖新河仍導入蕭神廟舊河入海並將趙家菜園呂家窪漫口次第堵合緣由謹專摺具陳並繪圖貼說恭呈 御覽伏乞 皇上聖鑒訓示臣查勘事竣

於八月二十九日由利津折回九月初五日抵省合併陳明謹

奏 光緒二十三年十月初二日奉 硃批另有旨圖留覽欽此

奏節屆霜降黃河一律安瀾摺

光緒二十二年九月二十三日

奏爲節屆霜降秋汛期內黃河一律安瀾恭摺具陳仰祈 聖鑒

事竊查節交白露上中下三游河防搶護平穩情形經臣於八月

初五日 奏報在案往年白露以後黃河即漸消落今歲秋汛之

大有逾伏況至九月節交寒露河水猶增漲不已以致險工迭出

岌岌可危如上游之靳莊孫樓紅廟等處埽壩蟄陷高家大廟合

龍處之護沿埽亦被漂沒中游之黃陡崖枯河程官莊等處魚鱗

埽皆平蟄入水胡家岸淤灘殘埝沖刷殆盡水齧隄根下游自歸

仁鎮至清河鎮新舊埽壩一百九十餘段入水者已十分之八均
紮柳枕攔溜用雜草填鋪後塘潘三莊王棗家邵家等處尤爲極
險邵家隄身刷去三十餘丈隄後漸至裂縫其他險要各工不可
枚舉經三游各總辦督率營委各員奮力搶廂隨時設法補救茲
幸節交霜降各工俱慶安瀾堪以仰慰 宸厪伏查山東河工河
窄隄卑時時有盈滿之患下游因尾閘不暢水勢更見擡高本年
五月伏汛初臨趙家菜園即至漫決迨秋汛期內黃水暴漲其水
與隄平之處於隄頂上搶修子埝而驚濤駭浪或濺過隄頂或刷
塌隄身其危險情形幾至無可措手仰賴 聖主洪福 河神默
佑得以化險爲夷 微臣實深寅畏相應懇 恩頒發大藏香由臣

祇領恭詣 大王廟祀謝以答 神庥刻下節過霜清水勢漸定
仍未大見消落臣當督飭各總辦隨機修守妥慎經營以仰副
朝廷慎重河防至意所有節屆霜降黃河一律安瀾緣由理合恭
摺具 奏伏乞 皇上聖鑒訓示謹 奏 光緒二十二年十月
十一日奉 硃批另有旨欽此

奏山東境內南運河工程請仍歸河督經理摺 光緒二十二

年九月二十六日

奏爲山東境內南運河工程請仍歸河臣經理恭摺具陳仰祈
聖鑒事竊查東境南運河工程前以歲久失修處處堙圯臣上年
巡閱黃河順道履勘目觀敝壞情形亟思設法整頓因念河臣遠

駐豫省工員無地方之責於民生利害漠不關心擬將修濬工程由東省暫行試辦於上年十二月奏奉 諭旨交部議奏本年二月復因署河臣任道鎔尙未到任爲期已促恐致後時復奏申前請奉 旨俞允旋准工部議覆暫歸東省委員經理俟河督到任後統籌全局何者宜歸河督何者宜歸東撫令與河臣會商辦理等因奏奉 諭旨依議欽此欽遵咨行到臣伏查南運河工程向由河臣督飭運河道廳暨沿河各州縣分任辦理光緒十七年改爲委員承辦而所用工需如冬挑例津二價及歲修另案各款共銀九萬餘兩俱由東省司庫撥解逐年因司庫款項不充歲撥銀七萬餘兩使能工歸實用經費本自裕如乃工員積習相沿類多

草率敷衍河身從未深挑隄埝任其殘缺每至重運屆臨始間段黏補而河淤太甚水不能容漕船隨過隨決重運僅能無誤而民生之昏墊已不堪言臣奏明後飭委候選道馬開玉分省補用

知府李祐自十里堡黃河入運起至嶧縣黃林莊出東境止五百餘里中應修應挑工段逐一勘估興工始以工鉅費繁恐例款尙不敷用曾於兩次摺內陳明擬另行設法撥補嗣經馬開玉等核實舉辦任勞任怨絲毫不使虛糜工竣核算祇用銀六萬五千九百餘兩比照往年例銷銀款尙節省幾及三萬兩之多而河道一律深通加以上年高家大廟決口灌入安山至十里堡四十里間多半淤成平陸亦均挑濬通暢較往年工程又多至數倍經此次

大修之後來年但擇要加修即可事半功倍款項亦大可節省惟此項工程本向歸河臣辦理署河臣任道鎔亦深鑒從前積弊前准函稱欲蠲除痼疾規復舊制擬霜清後即赴濟甯籌辦自應將一切修濬事宜統歸辦理由河臣核實工料力加整頓但工程盡在東境漕運所關亦民生休戚所繫臣仍當不分畛域隨時籌商仰副 朝廷慎重要工至意所有東境南運河工程仍歸河臣辦理緣由謹會同河東河道總督臣任道鎔恭摺具 奏伏乞 皇上聖鑒訓示謹 奏 光緒二十二年十月十二日奉 硃批該部知道欽此

奏請將督辦南運河工之候選道馬開玉等獎敘片 光緒二

十二年九月二十六日

再運河經由東境七百餘里自黃水穿運以來北岸由東阿陶成堡至臨清入衛計二百餘里爲北運河南岸自東平十里堡至嶧縣黃林莊出境計五百餘里爲南運河北運河今年因伏汎過小頗形阻滯而南運河五百餘里中節節淤淺亦稱難治兼以上年高家大廟決口自安山以北至十里堡一帶淤成平陸隄身更殘缺不堪臣於上年十二月 奏請歸東省試辦至本年二月始奉部覆飭委候選道馬開玉分省補用知府李祐迅速估辦方慮工程繁鉅恐致後時賴馬開玉等核實經營嚴督在工文武各員併力興修用款省而程功速迨重運經臨暢行無阻據江安糧道馬

恩培呈報運隄卑薄者既築修高厚河身淤淺者亦疏濬深通辦理甚爲得法此前數年未有之事等語實屬著有微勞合無仰懇

天恩將二品頂戴候選道馬開玉三品銜道員用分省補用知府李祐 俯准交部從優議敘以昭激勸出自 鴻慈謹附片具

奏伏乞 聖鑒訓示謹 奏 光緒二十二年十月十二日奉
硃批著照所請該部知道欽此

奏陳山東河工未能確有把握情形摺
光緒二十二年十月十五日

奏爲欽奉 諭旨謹將辦理山東河工未能確有把握情形恭摺
瀝陳仰祈 聖鑒事竊臣於九月二十四日承准軍機大臣字寄
光緒二十二年九月二十一日奉 上諭李秉衡奏查看黃河尾

閭形勢擬由舊黃河東岸挑挖新河仍導入蕭神廟舊河入海並將趙家菜園呂家窪漫口次第堵合繪圖呈覽一摺覽奏均悉即著照所擬辦理惟所開新河大溜引入之後能否通暢從前沖壞鹽灘能否一律涸出蕭神廟一帶產鹽處所是否不致另有窒礙該撫統轄東省全河責無旁貸經此次改歸舊河入海大舉興辦之後務使一勞永逸方爲不負委任如仍未能妥治惟該撫是問等因欽此仰見 聖慮周詳實事求是跪誦之下悚惕莫名臣仰荷 天恩畀以重任苟有一得之愚敢不竭力圖維求經久不敝之法惟治河古無善策而治山東今日之河則尤無善策如謂一經舉辦即可一勞永逸臣實不敢輕言自任於 君父之前致蹈

歎飾之咎伏查治河之法見之載籍者甚詳即光緒九年十年之間山東河決數十處中外臣工條陳河務者先後十餘人撮其大要約有四端曰展寬河身也疏濬河淤也開通支河以減水也築隄束水以攻沙也此四者皆治河之要領而山東則有難於施行及行之而未能見效者請爲我 皇上敬陳之豫省河隄兩岸相去遠或三四十里近或一二十里水得遂其蕩漾之性故爲患較少東省自黃河奪濟愈下愈狹民間築埝自衛寬者一二里隘者不及一里一遇汎漲漫決頻仍言者遂多主築遙隄不守民埝之議然濟武兩郡地狹民稠沿河村鎮廬墓不可數計兼以齊河濟陽齊東蒲臺利津等縣城皆近臨河干一聞民埝不守人心惶懼

震駭非常當時部臣亦以數十萬生靈恐歸淪沒未敢議准後雖興築大隄仍將齊河以下民埝改爲官守此展寬河身之難也疏濬之法代有制作迄無推行盡善之方光緒十年前倉場侍郎臣游百川前撫臣陳士杰仿河臣靳輔遺法奏明用船隻拖帶鐵籠子混江龍等具上下疏刷卒以笨重難行未能見效十三年前撫臣張曜復定購法國挖泥機器船嗣在利津太平灣及天津蠻子營試驗僅能吸水不能挖泥遂復退還良山黃水渾濁挾泥帶沙機器既難旋轉且濬河器具輕則入水不深未能得力重則陷入泥底行駛維艱均之難收實效海口則潮汐往來之處率皆軟泥不能立足人力亦無所施此疏濬河淤之難也凡物合則見多分

則見少以濟河一瀆受黃河之水勢不能容於是侍郎游百川有
建築滾水壩分減黃流之奏擬一從歷城之杜家溝引入徙駭一
從長清之五龍潭引入馬頰嗣經前直隸總督臣李鴻章以直境
地勢低下恐開引之後橫浸驟決貽害 京畿馬頰之議遂寢徒
駭河則以黃水頻年漫溢上游惠民濱州等處河身日漸淤平一
經分洩必至漫水平鋪橫溢爲害事亦中止前撫臣張曜復有酌
減三分入南河之請格於部議不行光緒十六年復於齊河迤上
之趙莊建分水閘卒以徒駭河節節堙淤未能開放此開河減水
之難也以上三端既不可行則惟有築隄束水藉以攻沙之一法
查大清河自東阿魚山而下至利津海口原寬不及一里深至四

五丈束水可謂緊矣自咸豐五年銅瓦鑲東決以來二十年中上游侯家林賈莊一再決口而大清河以下尙無大害然河底逐年淤澱日積日高道光緒八年桃園決口以後遂無歲不決無歲不數決雖加修兩岸隄埝仍難抵禦今距桃園決口又十五年矣昔之水行地中者今已水行地上是束水攻沙之說亦屬未可深恃現在河底高於平地俯視隄外則形如釜底一有漫決則勢若建瓴海口復愈見高仰尾閭不能宣洩河患日深民生日蹙此亦智勇俱困之秋矣臣於河工非所素悉然博稽掌故參考輿論欲求補偏救弊之方上年呂家窪決口臣於九月親往察看見口門溜勢甚大韓家垣正河已見淤塞欲以呂家窪爲出海之路至今年

五月復往審視西北一帶漸見淤淺惟口門至陳家屋子溜勢尙順復查看舊河自蕭神廟以下至紅頭塢海口地勢愈下愈低極爲通順臣是以有由呂家窪至陳家屋子掘開龍壩導入舊河之請迨伏汎初臨趙家菜園決口水入霑化縣屬之澤河澤河即徒駭河下游臣復擬改道由此入海則利津以下從此可免沈溺至八月復乘舟相視則徒駭河水已盈隄拍岸勢不能容且由趙家菜園至入徒駭之處不過十餘里畧有溜溝以下則一片瀰漫旣無河身又無隄岸若欲開河築隄勞費甚鉅勢不能行而呂家窪至陳家屋子復漸淤乾臣是以有堵合兩處口門從老河東岸開挖新河以達蕭神廟舊河之請蓋以黃河變遷無定非可以人力

強爭更不容以私意穿鑿惟因勢利導覺目前補救之計舍此別無良圖非敢謂所擬各端遂臻妥洽也復查韓家垣河身用小舟順流逐節測至海口有深五六尺者有僅深二三尺者鹽船至此非用小船剝運不能上駛臣此次所挑新河擬定面寬十六丈底寬四丈深一丈較之現在韓家垣河身深至數尺將來大溜引入雖不敢謂必能通暢而地道變盈而流謙揆之水性就下之理或不至遽形阻滯至呂家窪口門以下鹽灘共有一百六十餘副上年已沖壞一百二十餘副今既擬將呂家窪堵合則此處沖壞鹽灘盡可涸復蕭神廟係舊日河身本非產鹽處所自不致另有窒礙此則可以上紓宸廑者也伏思河工一項向爲國家漏卮

從前東南兩河每興辦大工一次費帑多則一千數百萬少亦數百萬即就山東言之除每年額撥防汛經費不計外其另案之款光緒十二年請至二百二十餘萬十六年請至二百八十餘萬其餘則數十萬不等計十年之間已不下八百萬而河工之敗壞仍復日甚一日今臣所辦工程擬堵合趙家菜園呂家窪兩處口門復開挖新河二十餘里兼以修隄建壩挑辦引河及津貼西韓家民埝各項共祇請銀二十萬兩即使不敷隨時續請計亦不過數萬兩實以款項艱難於無可節省之中力求節省且以黃河水性變幻莫測有人之智慮所不能及者故臣此次所辦祇圖復舊非能另興鉅工一一更新也惟就目前言補苴之方仍祇有以隄範

水一法而河日淤墊隄日卑庫今年西韓家民埝即係從埝頂漫過其他水與隄平之處皆搶加一綫子埝藉救危急及今不治恐明年大汎一到處處有漫溢之虞而約計兩岸長隄一律加高培厚需款總在數十萬金明知款不易籌而目覩危險情形實有岌岌不可終日之勢容臣飭三游各總辦核實勘估再行另摺 奏陳所有山東河工辦理難有把握情形謹瀝情恭摺具 奏伏乞 皇上聖鑒訓示謹 奏 光緒二十二年十月二十八日奉 硃批另有旨欽此

奏報出省查勘河工日期片

光緒二十二年十月十五日

再臣接據下游總辦候補道丁達意稟稱西韓家民埝漫溢之處

愈塌愈寬近已走溜至五分有奇利津以下正河漸見淤墊形勢較初漫時大有變遷等語臣查西韓家漫口臣於八月間往勘見口門雖寬而溜勢尙不甚緊本擬俟他處竣工再發給津貼令營委協同民間堵合以紓民力乃時甫月餘情形大變至奪溜五分有餘恐水已別尋出海之路惟口門以下是否通暢應否仍照原議堵合非臣親歷查看不敢冒昧定局茲定於十月十五日出省仍舟赴下游詳細履勘應如何辦理之處俟勘畢再行陳奏臣出省後臣署日行事件仍委藩司代拆代行緊要公事送臣行次核辦謹附片具奏伏乞聖鑒謹奏光緒二十二年十月二十八日奉 硃批另有旨欽此

奏報趙家菜園漫口堵築合龍摺

光緒二十二年十月二十四日

奏爲利津縣趙家菜園漫口堵築合龍恭摺馳陳仰祈 聖鑒事
竊查趙家菜園隄埝前因伏汛盛漲漫溢成口經 臣將在工文武
各員先後 奏參在案該處河身坐灣東壩頭正當頂沖口門內
週溜淘刷裏頭屢築屢塌 臣於八月間親詣察看其大溜東北兩
股會合呂家窪之水同入徒駭河西北溜勢較淺亦一望瀰漫無
際查該處河向外越形如弓背隄身又純係浮沙以致頻年潰決
非退後取直即勉強堵合爲患終無已時 臣復周歷審視由東壩
頭迤北五里許董王莊之南可作堵口東壩基由西壩頭迤北一
里許王家莊之東有舊日殘隄可作堵口西壩基從此建壩合龍

雖工程較鉅而河身取直堵合後防守較有把握惟董王莊以南有前左後左兩莊居民七百餘戶非擇地遷徙無以奠厥攸居臣復飭利津縣勸諭居民爲之擇地安插復允優給津貼限於明年桃汎以前一律遷竣並許於合龍後暫築護莊小埧俾得陸續遷徙民間知退後堵合係爲避危就安起見亦均樂從臣九月回省後將趙家菜園應堵情形於察看海口摺內 奏陳即飭下游總辦候補道丁達意籌備正雜料物估計水旱工程委員分投辦理迨霜清後水勢漸落西壩土工計長八百五十餘丈中有溜溝七十餘丈先飭營委各員次第堵塞測量口門尙寬四十二丈水深一丈及八九尺不等丁達意與提調候補知府倉爾穎分駐東西

兩壩復調中游河防營直隸紫荆關副將沙明亮下游河防營提督彭秋揚及在工文武各員併力經營兩壩同時進占自十月初九至十七日竭九晝夜之力兩壩各進四占並將喫緊處做成魚鱗埽十五段復於董王莊迎南兜溜之處開挖引河爲水預籌去路迨金門收窄口門之水登時擡高數尺洶湧異常適臣於十七日到工督同丁達意激勵在工各員奮力工作於十八日寅刻挂纜合龍一面將引河啟放以分溜勢復加錢買土填築後戩並將蒲包淤土上下拋堵至是日亥刻閉氣斷流壩外之水亦即逐漸涸出災民可補種春麥堪以仰慰 宸厪據丁達意稟請具 奏前來臣查此處工程水勢已成入袖土性又復沙鬆辦理初頗棘

手幸賴各員弁齊心努力勞瘁不辭得以剋日歲事復能破除積習力戒虛糜寸土尺料均歸實用不無微勞足錄所有前因漫口獲咎之總辦候補道丁達意仰懇 天恩飭部查銷降調處分給還加級提調候補知府倉爾頰請開復降調處分免其送部引見分防之候補從九方棟林請開復原官其餘出力文武各員容俟呂家窪西韓家兩處合龍後由臣擇尤彙案酌保以示鼓勵出自 鴻慈除飭將西壩隄工及善後事宜妥速辦理並將在工出力文武員弁銜名咨部外所有趙家菜園漫口堵築合龍緣由理合恭摺由驛馳 奏伏乞 皇上聖鑒訓示謹 奏 光緒二十二年十一月初一日奉 硃批另有旨欽此

奏籌辦西韓家堵口情形片 光緒二十二年十月二十四日
再利津西韓家民埝前因漫口愈塌愈寬臣恐形勢變遷須親履
察看前經 奏明在案臣先派員乘小舟至口門上下測量臣出
省後於十七日舟至該處察看口門寬至三百四十餘丈大溜距
東壩頭二十丈以外水深至一丈五六尺其西壩頭二百餘丈水
深六七尺及四五尺不等由小甯海至檀家溝一帶分散入海自
口門迤下十餘里溜勢即散漫倒漾波及博興樂安等縣平淺不
成河槽亦應亟籌堵合仍照 臣原奏由蕭神廟舊河入海查該處
隄埝向係民修民守而頻年災歉民間無力培補以致隄身處處
殘缺此次堵口大工斷非昏墊遺黎力所能辦 臣擬調撥河防營

一律由官堵合來年即改爲官修官守惟南北兩壩一綫單隄非大加修築不能建立壩基臣已遴派妥員將兩壩隄埝先行加高培厚一面於西岸淤出灘背取直挑挖引河一道於淤灘上游建立挑水壩以托溜勢俟呂家窪合龍後以全力萃於此處進占合龍查此處奪溜五分有奇較趙家菜園呂家窪兩處尤爲工艱費鉅幸趙工已完呂工現已進占臣嚴飭事事核實絲毫不任虛糜即以兩處節省之款籌辦西韓家堵口工程如將來實在不敷再行奏請添撥謹先將擬辦情形附片由驛馳陳伏乞 聖鑒訓示謹 奏 光緒二十二年十一月初一日奉 硃批知道了欽此

奏參規避取巧及人地不宜之州縣請分別懲處摺 光緒二

十二年十一月十四日

奏為特參規避取巧及人地不宜之州縣請 旨分別懲處恭摺
仰祈 聖鑒事竊維 朝廷設官分職所以求治理非以肥身家
也牧令身膺民社閭閻之休戚繫焉宜為缺擇人不宜為人擇缺
其有缺分素瘠而地稱難治不得不擇人而任以重地方果其人
能堅苦耐勞動求治理即再量予調劑亦可以鼓勵羣僚此中操
縱之權自上司主之非屬員所可意為趨避也茲查有輝縣知縣
姚廷範前因觀城縣有聚眾鬧漕之案經 臣行司將該縣知縣祥
成撤任以姚廷範稍有才能檄飭前往代理該員奉委後輒以先

人墳墓被水沖刷爲詞稟請開缺回籍查該員在任已閱數年果有墳墓待修何不陳情於嶧縣本任之時一至奉委調任即行稟請明係因觀城缺分較瘠又值關漕案尙未結不願前往其爲有意規避顯而易見又濮州知州恩奎上年調署平原縣本年春間飭回本任該員藉口交代未能清解延不赴任查平原縣缺較濮州爲優交代本不難清結該員以濮州缺分較瘠故意宕延迨臣行司將濮州另行委署始稟報交代清楚亦屬有意取巧均未便稍事姑容相應請 旨將嶧縣知縣姚廷範交部議處濮州知州恩奎勒令休致以爲規避取巧者戒至觀城縣知縣祥成才欠開展與此缺不甚相宜應請開缺留省察看該縣聚衆鬧漕之案已

飭曹州府督同接任知縣查拏訊辦以儆刁頑所遺觀城縣缺係選缺東省現有應補人員應請扣留外補合併聲明謹恭摺具

奏伏乞 皇上聖鑒訓示謹 奏 光緒二十二年十二月初一

日奉 硃批著照所請該部知道欽此

奏報呂家窪合龍日期摺 光緒二十二年十一月二十八日

奏爲利津呂家窪漫口堵築合龍恭摺馳陳仰慰 聖懷事竊查

呂家窪自上年六月漫口臣於去秋往勘以韓家垣正河淤澱日高該處地勢較低擬留爲入海之路迨本年五月八月復兩次周歷各海口詳加察看定擬由蕭神廟以下舊河入海將呂家窪及趙家菜園西韓家口門次第堵合均經臣先後 奏明在案查呂

家窪地形偏北上年漫口已成入袖之勢若就原處籌辦不特堵合不易且河勢坐灣來年大汛屆臨終虞後患臣再三相度先於南岸之西灘挑挖引河一道引溜南趨擬從原口門西壩迤上三里許之台子莊添築新隄一段計長四百一十丈有奇作爲西壩基從陳莊迤西之崔家莊接築新隄一段計長四百丈至新挑引河頭迤東作爲東壩基兩面進占將正河截斷以引河作爲正河復從引河上二里許添挖新引河以備合龍時分擊溜勢因利津三處漫口同時舉辦下游總辦道員丁達意勢難兼顧添派候選道馬開玉督辦呂家窪堵合工程臣於十月十八日趙工合龍後即赴該處駐工督率先飭籌備料物派委河定左營直隸紫荊關

參將沙明亮精健前營已革都司葉雲升分掌東西兩壩臣督同在工文武各員於十月十九日開工東壩全進水占西壩挑開淤泥填實壩基先進早占繼進水占計水旱各占共長一百一十餘丈至十一月十二日兩壩金門占已成留龍門五丈有奇水深二丈餘尺於十四日辰刻開放引河未刻挂纜合龍當金門收窄之際溜勢擡高上口較下口高五六尺在工各員弁奮力加廂土料並進至亥刻已追壓到底因該處本正河河身底係淤沙至夜半忽將東壩金門占塌陷入水復加壓土料數坯隨廂隨墊又值凌水陡漲六尺餘寸新做埽占雜有冰凍以致漏洞疊出幾致不可收拾臣飭於龍門占上口加廂魚鱗埽東西四十餘丈復飭道員

丁達意出西韓家調撥營勇三百名來工幫同廂護加壓大土始將翻花溜漸次壓平而埽眼處處過水未能閉氣丁達意復與馬開玉會商於下口添做埽壩圈成土匱周圍數十丈用蒲包盛土拋填三萬餘箇窮十餘晝夜之力始於二十七日辰刻閉氣斷流水循新舊引河順流東下民田可漸次涸復不至再誤春耕據馬開玉等稟請具 奏前來 臣查此處工程初動工時尙稱順手詎料合龍後河底淘深將高出水面二丈餘之金門占陷入水底即老於河工者無不駭異兼以自十四日起北風雨雪天忽嚴寒凌水暴漲冰塊蔽河而下排空撞擊致埽占各處透水河底漸深不可測翻花大溜層出不窮在工各員無不怵心劇目相顧失色 臣

亦慮設有疏失勢將糜帑誤工莫名焦灼幸仰賴 聖主洪福
河神效靈得以轉危爲安非 臣始念所及所有辦工文武員弁在
工四十日之久露宿風餐手皸足瘃卒能晝夜不懈克竟全功洵
屬勤勞倍著合無仰懇 天恩俟西韓家合龍後由 臣彙案酌保
以示鼓勵除飭將善後事宜妥慎辦理並將出力文武員弁銜名
咨部外所有呂家窪漫口堵築合龍緣由謹專摺由驛馳 奏伏
乞 皇上聖鑒訓示謹 奏 光緒二十二年十二月初六日奉
硃批覽奏已悉所有出力員弁准其俟西韓家合龍後彙案酌
保毋許冒濫欽此

奏中俄新約受制太甚請敕改議摺

光緒二十二年十二月初二日

奏爲中俄新約中國受制太甚無以自立謹瀝陳中外大勢懇

敕下王大臣熟權利害酌中改議以維大局而固邦基恭摺具陳
仰祈 聖鑒事竊維遼東之役俄人以其有德於我索報甚奢

朝廷息事安人政崇寬大自當酌予利益以聯邦交然臣近閱九
月所定新約十二條皆要挾過甚許之則無以立國謹綜舉全勢
爲我 皇上披瀝陳之俄人蠶食回部拓土開疆環中國萬餘里
經營水陸兩軍凡數十年其囊括席捲之謀蓄志已久以英法奧
意諸國助土耳其遏之於黑海而不能逞志於西也於是欲改轍
而東又以東方無不凍之海口未能逞其志也於是改轍而脩西
比利亞之鐵路西比利亞偏俄之東境西起烏拉嶺東距大洋海

北距北冰海南抵外興安嶺與黑龍江索倫喀爾喀烏梁海諸蒙古哈薩克回部均相毗連其舊有鐵路西自聖彼得羅堡俄京起東至庫春海口止而西比利亞鐵路實巨其中縱橫一萬五千餘里其支路復由阿摩斯直達哈密約計六七千里聞均限五年告成夫俄土廣而民貧度支之絀視我爲甚而不惜集款至一二萬萬之鉅修路至一二萬里之長環我東西兩部而籠罩之其蓄制我之謀可知我制而倭且隨之初未嘗謀制倭也遼東一役倭虜崛然而起竟敢與我樹敵俄遂緩制我之術以先制倭然陽爲制倭而陰實制我觀今日所訂新約挾遼事居間之惠迫之以勢其制我之謀已著矣新約第一條允彼之鐵路與中國邊界接連自

琿春築至吉林之恒春向西北通吉林省城另一枝由西比利亞
築至黑龍江之艾琿由艾琿向西南築至齊齊哈爾又由齊齊哈
爾至伯都訥再向東南繞至吉林省城其第三條中國擬由山海
關接至奉天省由奉天省接至吉林省准俄國豫備銀兩代中國
由吉林築起果爾則奉天吉林黑龍江三省皆爲彼所有矣雖第
二條吉林黑龍江鐵路允三十年後由中國備價贖回奉天鐵路
允十年後由中國備價贖回然此二年中所借俄法英德之款已
攤還至三十餘年之後其能否償清尙不敢必更從何處籌此鉅
款爲買回數千里鐵路之資且買回章程屆時再行商訂彼必故
昂其值以難我藉遂其久假不歸之私是俄人以之欺我我即以

之自欺竊恐贖路之議未成而制我之害已先見矣又如第四條中國自山海關至奉天牛莊開平金州旅順大連灣等處鐵路均須照俄國章程辦理夫所謂照俄國章程者照其車輪之廣狹耳車輪廣狹既從彼制則彼由俄京調兵徵餉電掣風馳不過七八日可抵山海關且可由山海關徑達津沽以抵蘆溝橋彼之來誠便易矣其如我不能往何而彼猶慮我之或能往也於第五條又中之以准俄人派馬步兵隊自行保護之約查萬國公法未有假道築路之事更未有准鄰國派兵越境保護之事如其有之必是彼之屬國否則歸其保護不能自主之國耳以堂堂中華大國而彼以此危我以此辱我我詎不能據公法以爭之况彼族立約輾

轉繙譯文義淆雜偶一不慎輒受其欺如此條許以派兵保護勢必節節分布回環數千里分似無多合則盈千累萬鐵路神速咄嗟可集設彼一旦與我爲難其能阻之禦之乎此害之彰明較著不待智者而知也又如第九條將山東膠州灣賃與俄國建築營庫船塢第十條遼東灣旅順口大連灣等處如俄國別有兵事准其將海陸各軍屯駐果爾則中國方自顧不暇更何能爲他人擔當戰事以樹衆矢之的且膠州爲東海咽喉遼東灣旅順口大連灣爲北門鎖鑰彼踞而不退南北洋即梗塞不通縱彼第爲蠻觸之爭我能無虞統之懼乎其他如第七條准俄人在黑龍江吉林長白山等處開礦在此十二條中一若尙非要害然長白山爲我

朝發祥之地磅礴鬱積以奠我億萬年丕基乃裂山穿石陵阜
變遷焚鑿所加山靈能無震動我 皇上宅中圖大豐鎬舊治當
必有深加護惜之思亦不能任他人縱其尋斧也 臣嘗舉十二條
新約反覆觀之無非彼享其利我罹其害假我吉林黑龍江之道
接鐵路以運陸兵而東三省非我有也假我膠州旅順大連灣之
地修船澳以泊水師而黃海以北遼海以西非我有也我有地而
彼據之我有礦而彼開之因我之財憑我之險束縛我權力煽惑
我人民還而蹙我土疆以制我之命是不但脅我謀我直從而藐
我玩我矣且俄之所謂厚施於我者不過反我遼南數州縣之地
耳而我亦嘗以三千萬贖之於倭矣今復以修鐵路允俄鐵路附

於地有土地而後有鐵路今我之土地而俄修之是俄之有矣夫失之於倭者不過奉天數州縣耳乃德俄之居間排解不獨酬以奉天全省更並吉林黑龍江兩省之地而附益之恐未有如此失計之甚者也且今之謀危我大局者又不止一俄也即以保遼之役言之俄之外有法有德酬德者不過擴充天津漢口租界酬法者不過於潞河湄江兩國輪船彼此通行皆不及酬俄遠甚萬一德法援俄爲口實以肆其無厭之求其徇之乎否乎至不與保遼之役而與俄爲敵者則又有英夫英固陽暱我陰袒倭而實則嫉俄者也中俄之合英且以嫉俄者嫉我矣萬一英以俄爲爭霸而逞其捷足之謀其徇之乎否乎不徇其請則立開兵釁徇其請又

無以立國如之何其可也且夫英俄法德互謀兼併皆非有愛於我而不爲我害也特彼此牽制顧忌欲觀釁而動耳越南入於法法之鐵路遂由西貢以達東京今則已抵鎮南關矣緬甸入於英英之鐵路遂由印度以達新街勢將直抵白馬關矣再過數年兩關之外胥有英法鐵路環環乎環中國之藩籬無一非外夷之軌轍如以俄約爲先路之導法必請由鎮南關接路至兩粵以通南洋英必請由白馬關接路至滇蜀以通西藏當是時也其結英法以拒俄乎抑結俄以拒英法乎外國與中國交涉往往先之以恫喝恫喝不已繼之以訂阻訂阻不已繼之以要挾要挾不已繼之以保護保護不已繼之以攘奪至攘奪而亦受之則兼併之志成

而中國無以自立矣伏惟我 皇上聖度如天馭遠以信俄既助
我於危急之日我自當厚其酬報之情方今軍事雖平敵氛猶惡
既不能別開邊釁又何肯輕絕外援 朝廷萬不得已之苦衷應
爲天下臣民所共諒然必我自可以立國而後可厚結於人不審
慎於先幾必貽悔於後日查西洋各國遣派使臣相與議定條約
均應由各國核准施行是准駁之權仍制自 皇上此次所訂新
約係九月定議距六箇月畫押互換之期尙遠仰懇 敕下總理
軍務處暨總理衙門王大臣會同俄國議約之員另行妥議於假
道修路借地屯兵各條拒而不許或以各國牽制爲解或以公法
扞格爲難彼如不就範圍再別予以通商優例如酌訂稅則擴充

市埠之類但擇其害之較輕者予之並懇 聖謨獨斷明降 諭旨將此各條爲公法所無萬難應允之故反覆曉諭推至誠以宣示杜非分之干求彼如震懾 皇威庶可挽回大局說者謂俄人陰鷲非常彼其蓄志已深不予恐開邊釁臣愚以爲予之則腹心之疾將永不可除而邊釁之患亦並不能緩欲求紓患之方宜務自強之計東三省爲根本重地物產豐饒風氣剛勁自古兵馬所萃爲控制天下之資應請 敕下東三省將軍大臣於練兵事宜加意講求認真整頓將材必須慎選黜貪詐而拔廉誠士卒宜予拊循禁剋扣而懲虛額兼之集流亡以實邊圉廣屯墾以助軍糈務使田有餘糧士懷鬪志此備邊之切務即禦侮之要圖臣尤伏

願我 皇上聖敬日躋 神謨廣運法 祖宗之成憲嚴察辯言
亂政之非定中外之大防勿任用夷變夏之術黜幽陟明以馭羣
吏信賞必罰以勵戎行節無益之費以裕餉源求敢死之將以任
邊事 君臣交儆上下一心常矢臥薪嘗膽之忱力求亡羊補牢
之計外洋之人各有耳目果使生其敬畏自不敢肆其憑陵正不
必斷斷於鐵路礦產而後爲自強之計也我能自強即失俄之援
俄亦無如我何我不能自強俄即援我我其如英法德何且俄不
我援反而謀我我又其如俄何縱觀古今得失之林橫覽中外成
敗之迹未聞有恃人爲援而可以自強者也請以中國前事證之
韓魏附於秦假秦以攻齊楚燕趙之道齊楚燕趙未下而韓魏先

亡於秦南宋合金以破遼繼又合元以破金遼金破而南宋之社
亦隨之而墟乞援以攻人者其害固如是也再請以外夷近事證
之士俄交証英人糾德法奧意諸國合力助土以拒俄俄雖請和
而諸國於土之險塞名城以保護爲名豆剖瓜分十去三四近年
英更以兵力箝制之論者謂不至如印度之盡爲所併不止乞援
以自固者其害又如是也古今一貉中外同揆圖兼併人國者始
以利餌繼以威脅終必制其死命而無能救藥是皆往事之可爲
殷鑒者矣查此約近尙秘密外臣不應與聞然已刊之申報傳播
遐邇閱者咸疾首蹙額詎爲異聞臣待罪疆圻膠州是臣守土况
東三省爲我朝龍興舊地拱衛神京根本旣危枝柯安附剝

牀有象切近之災臣籍隸奉天先人邱隴之鄉螻蟻私衷亦孺結不能自己每一念及輒中夜以興繞室徬徨罔知所措用敢披肝瀝膽冒死上陳不勝悚懼屏營之至謹恭摺具奏伏乞皇上聖鑒訓示謹奏光緒二十二年十二月十六日留中

奏東省黃河隄埝卑薄擇要修培請截留京餉摺光緒二十

二年十二月十八日

奏爲東省黃河隄埝卑薄太甚亟應擇要修培謹酌估經費銀兩懇 敕部照數截留來歲京餉以資工用恭摺具陳仰祈 聖鑒事竊臣於十月十五日覆陳辦理河工情形摺內聲明兩岸長隄應請加高培厚俟核實勘估再行另摺奏陳在案查山東臨河隄

埝北岸自濮州白岡隄起至利津近海止長八百七十餘里南岸
自荷澤縣賈莊起至利津近海止除東阿柏木山一帶係泰山之
麓未有隄防外餘長七百餘里兩岸共計一千五百八十里均係
光緒年間因大清河逐漸淤高不能容納始先後興修其規模本
屬卑隘不若豫省老隄之屹然可恃加以雨淋風蝕溜刷浪淘積
久愈見殘缺雖經前撫臣迭請鉅款加培而略事補苴半皆有名
無實當伏秋大汛有出水僅賸一尺及數寸者有水與隄平者不
得已於隄頂搶築一綫子埝藉資攔護臣前奏謂隄埝卑如田隴
實因年中上下往來其危險情形皆所目覩若不趕緊修治將坐
視其漫溢而不能救民生昏墊將無已時惟兩岸道里綿長若普

律加高培厚需款七八十萬兩費從何出惟有擇其最要工段酌量加修臣十月具 奏後即飭上中下三游各總辦於所管地

親歷履勘其舊隄尙可抵禦者概從緩辦其出水太卑萬不可緩者視盛漲時水痕加至出水三尺爲率其餘殘缺者應即培補單薄者畧加幫貼綜計三游共需經費銀十五萬二千餘兩據各總辦及河防局司道詳請具 奏前來臣覆加查核均係必不可緩之工所需經費亦係力從節省處核實勘估無可再減應請如所擬辦理惟山東司道各庫本入不敷出加以籌發勇餉攤還洋債拮据萬分實難再行籌湊臣與各司道再四酌商惟有籲懇 天恩 敕部將光緒二十三年指撥東省應解京餉准臣截留十五

萬兩俾春融冰泮即行興工不敷之數再由臣設法湊撥臣當督飭各總辦及承修委員認真經理務使涓滴歸工不許稍涉糜費俟工竣後分晰造冊報部核銷所有擇要修培隄埝請撥經費緣由謹恭摺具 奏伏乞 皇上聖鑒訓示謹 奏 光緒二十三年正月初四日奉 硃批著照所請該部知道欽此

奏預籌光緒二十三年黃河防汛經費懇准照數撥用摺光

緒二十二年十二月十八日

奏爲預籌光緒二十三年黃河防汛經費懇 恩俯准照數撥用以資修防恭摺仰祈 聖鑒事竊東省自黃流奪濟河身愈下愈窄河底愈淤愈高兩岸工段綿長千有餘里向無專管廳汛祇有

分派員弁僱募勇夫節節駐守用人既多需款因之亦鉅加以尾閭不暢水行地上全恃隄埵收束埽壩護持工大費繁倍形喫重臣督率修防嚴飭各總辦道員力戒虛糜講求辦法裁減人數節省薪工惟於正襟料物當用者斷不能省復於險要各處添購碎石拋護隄根以免屢塌屢墊本年大汎期內奇險環生上中下三游埽壩迭被淘刷墊陷迨節屆霜清水勢仍有長無消幸得在工各員隨時搶護平穩所儲料物早已告罄無存來歲春廂事宜亟應提前籌辦採運藉石椿蒜各料皆爲修防要需而搶險廂埽尤以藉料爲大宗無如沿河地方連年積歉出產不豐必須遠道購求料價日貴銀價日賤暗中折耗尤多乘此冬令用料較少採辦

稍易及早分段購備庶免臨時束手現在督同河防局司道通盤籌畫光緒二十三年所需防汛經費擬請照案撥銀六十萬兩內由司道各庫撥銀五十萬兩並將藩運兩庫應解籌備餉需銀各五萬兩存留備用臣請撥一分正款期盡一分實心仍當嚴飭在工各員破除情面覈實動支不敢任其稍涉糜費合無仰懇天恩俯准照數撥用以資修防出自鴻慈所有豫籌來年黃河防汛經費緣由理合恭摺具陳伏乞皇上聖鑒訓示謹奏光緒二十三年正月初四日奉 硃批著照所請該部知道欽此

奏報由下游河工回省日期片

光緒二十二年十二月十八日

再臣於十月十五日出省赴下游河工前經奏報在案到工後

趙家菜園及呂家窪口門先後堵築合龍趙家菜園係退後取直以避頂衝呂家窪係向前取直以防入袖均添築新隄八百餘丈陳莊迤下新河地段太長未及竣工因韓家垣淤仰不暢以致兩次被凌水漫入幸平字灘以下勢極通暢迭飭抽溝放水將未完工段趕緊補挖臣因工程繁鉅往來督率於十二月初四日始折回西韓家查該處堵口工程已經過半俟新河補挖完竣去路水可通暢再行定期合龍已飭總辦道員丁達意妥慎辦理臣以封印期邇臣署緊要公事尙待清釐於初七日由西韓家起程十一日回省理合附片陳明伏乞 聖鑒謹 奏 光緒二十三年正月初四日奉 硃批知道了欽此

奏謝賞福字摺 光緒二十二年十二月十八日

奏爲恭謝 天恩仰祈 聖鑒事竊臣於光緒二十二年十二月

十五日奉到 御賜福字一方當即恭設香案望 闕叩頭祇領

欽惟 皇上乾符御宇 泰運調元 建中昭曠載之仁萬靈效

順 錫羨篤臣民之慶六合同春茲當鳳律初更仰沐 鴻施下

逮 義畫與九霄映彩 丹翰鸞迴箕疇以 一字增榮青齊驩

忭臣忝膺疆寄酌水勵清甫歷河干履冰滋懼荷 龍光之賚寵

益鼇戴益以難名惟求海岱乂安永集 昇平之瑞更祝寰區康

樂同游 熙皞之天所有微臣感幸下忱謹恭摺叩謝 天恩伏

乞 皇上聖鑒謹 奏 光緒二十三年正月初四日奉 硃批

知道了欽此

奏保徵收釐金出力之知縣懇恩給獎摺

光緒二十二年十月十九日

奏爲特保徵收釐金出力之知縣懇恩分別給獎以昭激勸恭摺仰祈 聖鑒事竊查釐金之衰旺視地方之繁僻尤視徵收委員之賢否東省地處偏隅非若江浙等省之繁盛釐金收數每年不過數萬金爲大吏者往往不甚措意從前徵收委員亦遂任意中飽贏縮聽其開報漫無稽查臣愚以爲收數無論多寡而取之於商輸之於 國絲粟皆關餉源豈容稍有弊混上年自海防回省即飭善後釐稅局司道嚴定比較章程諄飭各委員實力稽徵獨除痼習其不能得力者即行撤換本年各處委員皆能力求整

頓徵收大有起色東省河路釐金祗灤口姜家溝館陶石村安山
岔河六處茲查館陶釐卡本年收貨釐京錢十三萬六千五百餘
千係知縣劉聚奎徵收比較上三年多收錢六萬一千八百餘千
及七萬九千餘千六萬八千一百餘千不等石村釐卡本年收錢
三萬四千七百餘千係知縣奎光鄭熾昌先後徵收奎光自二月
至四月比較上三年多收一萬零四百餘千及五千九百餘千九
千一百餘千不等鄭熾昌自五月至十一月比較上三年多收八
千零九十餘千及六千零七十餘千六千三百八十餘千不等灤
口釐卡本年收錢二萬二千四百餘千係知州張思澄知縣楊名
鑑先後徵收張思澄自正月至七月比較上三年有盈無絀楊名

鑑自八月至十一月比較上三年多收六千九百餘千及三千餘千三千九百餘千不等岔河釐卡本年收錢九千六百餘千亦係知縣奎光徵收比較上兩年多收七千千及七千八百餘千不等綜計各員收數多者加至一倍其次亦加至三分五分以上他如姜家溝安山兩處亦比較均有盈餘雖由本年貨船較旺而各委員之涓滴歸公滿除積弊洵屬不遺餘力應請擇尤予以獎勵以勸將來合無仰懇 天恩俯准將同知銜候補知縣劉聚奎 賞加四品頂戴試用知縣奎光 賞加同知銜題補臨朐縣知縣鄭熾昌同知直隸州用候補知縣楊名鑑均 賞加三級以示鼓勵出自 鴻慈逾格查劉聚奎請加四品頂戴與例稍有未符惟該

員收數京錢十三萬餘千之多較往年加至一倍有餘似宜破格獎勵以爲潔已奉公者勸除俟以錢易銀將收支總數另案報銷並飭取各該員履歷咨部外正爲整頓釐金策勵僚屬起見是否有當謹專摺具 奏伏乞 皇上聖鑒訓示謹 奏 光緒二十三年正月初四日奉 硃批著照所請該部知道欽此

奏請將不能約束勇丁之遊擊馬振武等分別懲處片 光緒

二十二年十二月十九日

再臣於六月間據魚臺縣知縣張則程稟稱駐紮該縣之開字前營勇丁有滋事傷人闕鬧縣署情事當經檄飭該管官幫帶將肇衅勇丁查拏解省飭發濟南府審辦旋據該府提訊勇丁李自槐

張錫魁張得龍呂得勝及革弁韓毓桐等據供當時赴縣署滋鬧
實係勇丁海忠生馬連瑞張書生海大漢仔等數人稟經臣復飭
該營查拏海忠生等到案迄今日久未據報獲查該營管帶遊擊
馬振武幫帶都司馬玉明平時既不能嚴加約束迨勇丁滋事又
不上緊拏獲任其脫逃實屬咎有應得馬振武兼統中營雖勇丁
滋事之時該員已赴曹縣青園集而防範不嚴亦難辭責相應請
旨將前管帶開字前營補用遊擊馬振武摘去頂戴幫帶補用
都司馬玉明暫行革職仍勒限兩箇月嚴緝逸犯海忠生等務獲
解究倘逾限不獲再行嚴參除咨兵部查照外謹附片具 奏伏
乞 聖鑒訓示謹 奏 光緒二十三年正月初四日奉 硃批

著照所請兵部知道欽此

奏參不職之牧令教職摺 光緒二十二年十二月十九日

奏爲牧令教職各員查有未能稱職與不堪造就者亟應請旨分別撤參恭摺仰祈 聖鑒事竊維州縣不勤民盡職則地方無由治官吏若鮮恥妄爲則仕風隨以頹值此時艱使不就時嚴行甄別更何以資補救茲查有德州知州王佑修辦事平穩未能振奮有爲於多訟多盜之區治理殊形竭蹶選補甯海州知州署招遠縣知縣玉興人甚老實惟家丁書役用事本缺難期勝任諸城縣知縣王曾俊遇事未能悉遵繩墨家屬亦欠約束尙有應行查訊案件候補知州秦業進頗有小才惟行事鞫獄聲名俱劣昭昭

在人耳目候補知縣蕭炳榮邪僻取巧且有與娼優爲姻親情事
實屬有玷官箴候補知縣徐立言久充海關委員把持漁利因而
致富營商聲名甚劣候補知縣王鴻勛素不安分與其尊屬成訟
忘本傷化滋陽縣訓導王衍恒利心太重士林不服觀城縣教諭
趙金鎔居心陰險遇事架唆此番觀城開漕該教諭亦慫恿其間
尙須查辦邱縣訓導苗琦遇事圖詐行同市儈以上各員未便稍
事姑容相應請 旨將德州知州王佑修甯海州知州王興均開
缺另補諸城縣知縣王曾俊開缺察看候補知州秦業進以縣丞
降補候補知縣蕭炳榮候補知縣徐立言候補知縣王鴻勛滋陽
縣訓導王衍恒觀城縣教諭趙金鎔邱縣訓導苗琦均請即行革

職以庸官常所遺德州甯海諸城三缺東省現有應補人員均請
扣留外補合併聲明所有牧令教職應請分別參革開缺緣由理
合恭摺具陳伏乞 皇上聖鑒訓示謹 奏

李忠節公奏議卷十三終

李忠節公奏議卷十四

奏明山東減收錢糧折數及釐定收漕章程通飭立碑摺光

緒二十三年正月初十日

奏爲山東減收錢糧折數及釐定收漕章程請通飭勒碑立案以垂久遠恭摺仰祈 聖鑒事竊查山東各州縣徵收錢糧從前因銀價昂貴每兩折收京錢五千六百至五千八九百文不等經臣酌覈刪減除照銀數徵收者尙無出入無庸議改外凡折收錢數之各州縣衛所鹽場統自光緒二十二年下忙開徵爲始每正銀一兩連火耗加平解費只准折收京錢四千八百文其向來不及四千八百者仍照舊完納不准藉口加增於上年七月二十八日

專摺 奏明並出示曉諭在案因思錢糧既經覈減其漕米之向有浮收者亦應一律剔除以恤民隱查東省漕米亦有收本色折色之不同其收折色者於咸豐十一年經前撫臣譚廷襄 奏定章程每正米一石折收京錢十二千文耗米一斗五升折收京錢一千八百文二共收京錢十三千八百文其收本色者以米合錢亦不得有逾此數近聞有漕地方於正耗米之外復有捲尾斛尖樣盤等項名色殊屬額外浮收均應一律裁禁臣復通飭有漕各屬自上年開徵新漕爲始只准捲勺成合不准再捲合成升其斛尖樣盤各名目概行禁革亦經出示曉諭在案臣查上年錢漕兩項經臣酌定新章嚴飭各屬張貼告示俾得家喻戶曉下忙錢糧

及開徵漕米均係照新章徵收民力既可留其有餘州縣等亦不
至遂形不足既經明定章程應即永遠遵守第恐各州縣賢愚不
一或致積久弊生且愚民得寸思尺或妄生希冀不免藉端把持
亦屬有礙賦課相應 奏明立案一面由臣督同藩司通飭各州
縣將臣兩次告示勒石立碑以垂久遠則官吏不能上下其手而
取民有制民自樂於輸將於 國賦亦不無裨益除鈔錄示稿咨
呈軍機處外謹恭摺具 奏伏乞 皇上聖鑒謹 奏 光緒二
十三年正月二十六日奉 硃批戶部議奏欽此

奏陳海防緊要密保水師提督彭楚漢摺

光緒二十三年正
月初十日

奏爲海防緊要海軍統將不堪再誤謹密保堪勝水師提督之大

員懇 恩擢用以固海疆恭摺仰祈 聖鑒事竊臣承准總理各國事務衙門電開現訂英德各船計日到華請派登萊道會同北洋委員前往膠州辦理船澳等因仰見 朝廷慎重海防意在簡練水師以爲自強之計莫名欽服竊維禦侮之方以練兵爲急練兵尤以能得兵心之統將爲最急近來各營統將習氣太深視尅扣虛額爲固然以粉飾彌縫爲長技攘利則勇禦敵則怯不慎加選擇雖購船製械適以啟外人輕視之心關繫實非淺鮮臣伏查前福建水師提督彭楚漢秉性忠貞操守廉潔爲前陝甘督臣楊岳斌舊部於水師操練之法旣素切講求更深得兵民之心後升任總兵添擢水師提督歷經前大學士臣曾國藩前兵部尙書臣

彭玉麟先後保奏彭玉麟謂其膽識兼優勇於任事自愧弗如是該提臣之才堪大任久在 聖明洞鑒之中方今宿將凋零水師將才尤爲難得如彭楚漢之忠清亮直而又胸有韜畧熟悉江海情形洵屬一時無兩 朝廷重整水師於膠州創建船澳訂購兵船自須慎簡統軍將領若畀彭楚漢以水師提督之任必能蒐簡軍實整頓操防於海疆大有裨益溯從前創立海軍耗帑金數千萬徒以統將貪庸一蹶不振船礮盡以資敵前車可鑒一誤豈堪再誤明知專閫重寄用舍之柄 朝廷自有權衡非外臣所敢妄擬且臣與彭楚漢亦素未識面惟數十年留心諮訪實見該提臣立心行事名實相符實爲當今水路將才之冠伏乞 宸衷獨斷

界以事權該提臣忠勇性成當能振興戎務遠播皇威副朝廷腹心干城之寄臣爲海防任重將才難得起見謹恭摺密陳是否有當伏乞皇上聖鑒謹奏

奏請免扣甯海等十二州縣及首領佐雜部提軍需三成摺

光緒二十三年正月十二日

奏爲甯海等十二州縣缺分最苦首領佐雜額廉無幾請免接扣光緒二十三年部提軍需三成並免各年推展補扣以示體恤恭摺仰祈聖鑒事竊照光緒二十一、二兩年東省文武各官養廉接扣部提軍需三成充餉當因新舊並扣不敷辦公請將無關部庫之由外彌補軍需一成、二成、三成銀兩全行停扣並將額廉無

幾之文職首領佐雜武職千把外委各員弁以及下下苦缺之甯海文登榮成棲霞招遠高苑博興新城齊東青城利津霑化等十二州縣免其提扣三成均經臣奏奉 硃批著照所請戶部知道欽此欽遵轉行在案茲准部咨戶部具奏光緒二十三年外官養廉文職自府經縣丞以下武職自都司守備以下仍照全數開支其文職州縣以上武職參將遊擊以上再行接扣一年等因奉旨依議欽此咨行到臣自應欽遵辦理惟查布經按經鹽經州同州判雖同是首領佐雜額廉無幾而官階品級皆在府經縣丞以上至甯海文登榮成棲霞招遠高苑博興新城齊東青城利津霑化等十二州縣爲下下苦缺中之最苦者養廉不敷辦公光緒二

十一二兩年分別 奏准免扣二十三年事同一律亦應援案請免其餘文武各官原奏聲明全廉全扣半廉半扣不支不扣一年限滿扣不足數推展年限總以扣清爲止當時以爲廉扣三成事僅一載是以如此辦理今既逐年遞扣無異歲以爲常若再以各年半扣不扣之廉銀遞年推展日期勢必互相套搭年復一年愈推愈遠轆轤不清且武職都守已在免扣之列倘仍責令將二十一二兩年推展未經扣清之廉銀一律補扣則必有或扣或不扣又恐辦法兩歧轉致無所適從擬請概免推展補扣庶款目少一糾纏即交代少一轆轤所有光緒二十三年部提軍需三成統按在任實支養廉之數接扣各清各年免其推展年限以歸簡便其

無關部庫之由外彌補軍需之一二三成銀兩亦照前案停扣有
關部庫之停給核減各成暨六分減平仍舊照案核扣用示區別
據藩司張國正詳請具 奏前來合無仰懇 天恩俯念甯海等
十二州縣缺分最苦首領佐雜額廉無幾准免接扣光緒二十三
年部提軍需三成並免各年推展補扣以示體恤出自 逾格鴻
慈除咨部查照外謹恭摺具陳伏乞 皇上聖鑒訓示謹 奏

光緒二十三年正月二十六日奉 硃批戶部議奏欽此

奏凌汎漫口限期籌堵摺 光緒二十三年二月初二日

奏爲凌汎異漲歷城章邱交界民埝被冰凌冲塌成口現擬趕籌
堵合恭摺仰祈 聖鑒事竊查黃河自南而北上下游氣候不齊

下游海風凜冽解凍較遲而上游堅冰先開蔽河而下每於坐灣狹曲之處層累堆積壅水不得下流最易出險上年冬令天氣嚴寒爲近數年所未有臣即慮春融冰泮凌汎難於抵禦迭飭三游總辦轉飭各防營加意防護迨正月節交雨水天氣漸暖上游冰解凌塊滿河所至齧岸摧隄奇險疊出經各防營晝夜搶護俱臻平穩自濟陽以下至利津海口凍尙未解冰凌阻塞距濟陽八里之北河套十里堡水漫隄頂者數處幸次日水即消落隄身尙未冲塌惟歷城章邱交界之小沙灘胡家岸等處因冰凌將河面壅塞水不能行防營勇夫拚命敲擊而凌塊堅厚人力難施自二十一日酉刻至亥刻三時之間陡漲一丈有餘致將小沙灘及胡家

岸埝身沖刷成口中游總辦候補道蔣兆奎先於十七日赴東阿陶成堡辦理運工事宜臣接據中游提調候補知府吳煜及候補都司劉振興稟報即於二十六日親往查勘小沙灘口門寬二十餘丈胡家岸口門寬四十餘丈深均二丈上下水由郭宗寨大隄殘缺之處經齊東高苑博興樂安等縣入海所有被淹災民先派員散放饘餅並飭賑撫局遴委妥員攜帶銀錢分投前往各縣查放其水到之處有無淹斃人口即飭查明寬爲撫卹一面購備料物迅籌堵合應需經費飭即核實勘估約不過二萬金即在本年防汛經費內挪用不再另行請撥此臣親往查看之情形也伏查黃河險工以桃伏秋三汛爲最著然三汛之期水有去路無所阻

滯即遇盛夏異漲而其水以漸而至但使料物齊備尙有能以人力挽救之時可以見功者即無可諉過若凌汎則自河南至山東海口此千有餘里間氣候有寒暖之殊解凍有遲早之別下游堅冰未解上游凌塊已層遞而來其冰頃刻可以山立其水即頃刻可以尋丈即萬衆環觀亦苦於無法可施實非疏於防護之咎山東因節省經費霜清以後桃汎以前均無防汎委員此次凌汎漫口總辦道員將兆奎先期前赴運工提調知府吳煜營官都司劉振興均在工竭力搶護實因冰厚水猛迤下猶復凍結冰水壅積一無去路以致無從措手與三汎期內防護不力者有間可否暫緩參處限一月內堵合完竣再請 恩施寬免之處出自 鴻慈

至臣督率無方仍應請 旨將臣先行交部議處臣俟該總辦勘估動工仍即親往駐工督率所有款項當飭力求撙節無任絲毫虛糜總期趁桃汎以前趕緊堵合以期上慰 宸厪臣此次往勘後於二十八日回省合併陳明所有凌汎漫口現籌堵辦情形理合恭摺具 奏伏乞 皇上聖鑒訓示謹 奏 光緒二十三年二月十八日奉 硃批另有旨欽此

奏德州等四州縣雇募壯勇請援例作正開銷片 光緒二十

三年二月十二日

再濟南府屬之德州禹城平原並東昌府所屬之茌平縣地當衝衢爲東南各省晉京大路餉鞘行旅絡繹於途且時有轉運北洋

軍火護送巡防倍關緊要向來責成勇營分段扼紮常川護送近年係飭精健副右營馬步勇丁分防巡護嗣因該營勇不能得力經臣於光緒二十二年十月三十日檄行裁撤彙入續汰海防內地各軍案內 奏報在案惟該州縣等轄境遼闊向爲梟匪馬賊出沒之區防營旣撤地面空虛額設捕役又不敷分布而內地勇營裁存無幾承防曹濟各屬勢難抽撥填紮自應另籌善策期免貽誤 臣與司道妥爲商酌擬以德州在平縣各雇壯勇五十名禹城平原二縣各雇壯勇四十名援照二十一年壽張等縣雇壯勇奏准成案仍令該四州縣自行管帶認真訓練隨時迎護過境要差以昭慎重每勇每日支給口糧銀一錢作正開銷較之長年

駐紮勇營所省經費實多當經分飭雇募去後旋據德州禹城平原在平四州縣先後稟報均於二十二年十一月初一日如數募齊派員前往點驗皆係精壯足額酌給軍裝器械以資應用臣復諄飭該州縣倘雇勇之後於護送餉鞘軍火等差稍有疎虞以及短勇尅餉情弊定即從嚴參辦茲據善後局司道具詳併聲明該勇丁一百八十名各以成軍之日起支給口糧彙入壽張等縣勇糧案內造報等情轉請 奏咨前來臣覆核無異理合附片具陳伏乞 聖鑒訓示謹 奏 光緒二十三年二月二十九日奉 硃批該部知道欽此

奏東綱鹽斤擬請分別加耗加課摺

光緒二十三年二月十二日

奏爲東綱鹽斤擬請分別加耗加課以濟餉需恭摺仰祈 聖鑒
事竊查運庫歲撥京協各餉銀二十餘萬兩徵收鹽課等項往往
不及此數加以海防河工洋債三者兼籌時虞入不敷出若不設
法接濟終恐難乎爲繼經 臣迭飭運司有無開源節流可以挹注
之款諭綱集商籌議茲據運司豐仲泰詳據引票綱商福安長等
稟稱東綱疲累日深商民交困上年加價半文雖已 奏明照准
而察看地方凋敝情形未敢加之於民仍由各商認攤已屬竭蹶
萬分若再添籌撥款實屬力有未逮商等殫竭愚忱屢次集議惟
有加耗加課一法尙可畧資挹注查北運鹽包例重三百二十斤
南運鹽包例重三百二十五斤光緒十八年辦過成案每引票加

課銀一錢加耗鹽六十斤今請援案辦理至引地北運之曹單南運之豐沛蕭碭票地之昌濰蘭鄒莒日等十二州縣上年並未加價既請一律加添耗鹽應每引票隨加課銀二錢以免偏重等情該司查加耗一舉前經奏停原恐佔礙銷數然目前籌餉之策舍此別無良圖第每包加耗六十斤未免過多該司悉心核議變通酌減請自光緒二十三年起將北運各州縣曾經加價之引票每張加抽課銀一錢其並未加價之曹單昌濰蘭鄒莒日及南運商辦之豐沛蕭碭等十二州縣每引票一張加抽課銀二錢以上各處每鹽一包於例重之外統加耗鹽三十斤又已領未春二十二
年之引票均已交納半文加價應遵新案一律加耗加課俾免參

差引課於進關時加兌票課於出庫時全完約計可增課銀三萬餘兩存候專撥海防河工洋債三款一俟庫款充裕支撥稍輕即行詳請停止如此分別辦理可期銷數無礙似於籌餉之中兼寓恤商之意至南運局辦河南九州縣加價係實加於民俗渦銅山三處並未加價此次均援上屆成案毋庸加耗加課以示區別等情詳請 奏咨前來 臣查該司所請既於餉需有裨亦於商民無損自應准其照辦除咨部查照外理合恭摺具陳伏乞 皇上聖鑒訓示謹 奏 光緒二十三年二月二十九日奉 硃批戶部議奏欽此

奏參買料不實之知縣請交部議處片

光緒二十三年二月十二日

再河工需用以稽料爲大宗而河工積弊亦以買稽料爲最重山東稽料向章以一萬斤爲一垛各總辦驗收率以料垛高寬丈尺爲準不肖委員尅扣價值料販亦遂恣意分肥料垛中架井凌空弊端百出名爲萬斤一垛其實不過五六千斤甚至不足五千斤致兩垛僅敷一垛之用糜帑誤工莫此爲甚臣稔知其弊於光緒二十一年將買料不實之員擇尤 奏參在案上年冬飭委購買本年防汛稽料限正月內一律購齊上垛由臣派員抽查斤重每接見買料委員諭以斤重必須核實如有短少即行參處諄諄告誡不啻三令五申茲有買料委員候補知縣趙翰先經中游總辦委購防汛稽料二百萬斤嗣因小沙灘凌汎漫口迭催該員先撥

一百萬斤於正月底運至工次正月限滿復展限二月初十以前運齊上塚聽候驗收備用臣於初九日到工該員所購之料僅堆就七塚臣親過秤抽驗斤重多不足數下短之料未到者延不運送已到者堆積河干經臣到工之三日疊次嚴催又僅成四塚其餘仍不趕緊上塚交驗明係因堵口用料孔亟希圖工員急切取用以掩其斤重短少之弊實屬取巧誤公未便寬容應請 旨將候補知縣趙翰先行交部議處勒限十日如數交齊其短少斤重俟臣將各處料塚通行抽查如數目多有懸殊再行一併參辦以破積習而除積弊謹附片具 奏伏乞 聖鑒訓示謹 奏 光緒二十三年二月二十九日奉 硃批趙翰著先行交部議處餘

依議欽此

奏副將在營積勞病故請優卹片

光緒二十三年三月十五日

再查儘先補用副將陳大勝係湖北沔陽州人同治二年投効霆軍轉戰江西廣東直隸山東陝西等省並在新疆諸路歷次剿匪出力洵保今職光緒十二年隨前撫臣張曜來東委帶濟字後營馬隊先紮金鄉縣移駐曹屬鉅野縣一帶該副將以該處界連直隸伏莽夙多親督所部周歷巡緝雖祁寒嚴暑未嘗一日耽逸宵小因而斂跡商旅賴以款安嗣經調任撫臣福潤奏准留東差遣復委帶親軍馬隊並靖字濟康等營步隊躋緝梭巡無間風雨著名巨匪悉就擒獲計自到防迄今十年以來先後拏獲盜犯不

下三百餘名均隨時稟明解歸各地方官分別懲辦遂致積勞成疾觸發軍營舊傷於光緒二十二年六月初八日在防次病故該縣闔邑紳民咸爲痛悼愛戴難忘呈由該縣府詳經營務處司道轉請 奏卹前來 臣查該故副將陳大勝營規整飭紀律嚴明轉戰各省夙著功績在東十年管帶馬步勇營能與士卒同甘苦駐曹最久獲盜又最多前值海防戒嚴曹屬匪徒因內地各營移調省東乘機蠢動斯時若非該副將與前曹州府升任臬司毓賢合力搜捕迭殲渠魁幾至不堪收拾卒使內匪無匿跡之區外匪絕勾結之患實屬勤勞卓著 臣於二十一年間因膠州營副將出缺奏請以該副將序補俾資得力旋經兵部議駁詎意積勞病故

將領難得臣甚惜之合無仰懇 天恩准將已故儘先補用副將
陳大勝照軍營立功後積勞病故之例 勅部從優議卹以慰忠
魂出自 鴻施理合附片具陳伏乞 聖鑒訓示謹 奏 光緒

二十三年三月二十九日奉 硃批著照所請兵部知道欽此

奏西韓工堵口現辦情形並請添撥銀兩摺

光緒二十三年
三月十五日

奏爲恭陳西韓家堵口現辦情形並經費不敷擬請添撥銀兩以
濟工需恭摺仰祈 聖鑒事竊臣上年因堵築趙家菜園呂家窪
漫口並開挖陳莊新河修築格隄 奏明請款二十萬兩復因西
韓家民搶口門改歸官堵飭將呂家窪等工力從節省即勻撥此
款移辦西韓家堵口工程如實在不敷再行奏請添撥於上年十

月 奏明在案嗣呂家窪合龍後合計趙工呂工開河築隄各項共祇用款十四萬兩下餘六萬兩即作西韓工經費該處口門三百餘丈款項本屬不敷猶冀工程順手所短或不致過鉅查該處自上年十月興工東壩進至十八占西壩進至三十占時屆隆冬冰凌凍結不能前進遂於臘月二十三日停工至本年正月底冰凌漸開復於二月初三日接續進占東壩又進七占西壩又進九占口門收窄溜勢愈緊今歲桃汛較早自二月二十四日以後水漲四五尺口門淘深至三丈有奇東壩第二十四五兩占相繼墊陷其餘各占亦岌岌可危臣接據總辦道員丁達意稟報即飭開放引河而溜勢已全注口門仍尙未能得力臣於小沙灘合龍後

初七日到工察看情形恐進占難免走失反致虛糜帑項飭令將前進之占設法保護一面審度形勢於對岸淤灘前開引河迤上迎溜之處加挑引河一道尅期趕緊開挖俟挑成再接辦合龍以昭穩慎所用款項計自興工至今已用銀十一萬餘兩以後工程愈難非再加六七萬金不能濟事前用之款除呂趙各工節省項下六萬兩外其餘係在司道各庫搜括實已羅掘無遺惟有仍申前請額懇 天恩飭部將本年撥解京餉由臣再截留六萬兩以濟工用臣當督率工員事事核實不准絲毫虛糜以重帑項所有西韓家堵口現辦情形及請撥經費緣由理合恭摺具 奏伏乞 皇上聖鑒訓示謹 奏 光緒二十三年三月二十九日奉

李廷寶才疏學淺
卷一百一十一
硃批戶部議奏欽此

奏參前濟東泰武臨道張上達片

光緒二十三年三月十五日

再回籍修墓之前濟東泰武臨道張上達臣於光緒二十年八月履任接見未久即赴海防該道於二十一年五月開缺回籍臣自是年七月回省兩年中周歷河干訪求利弊僉謂山東河工風氣之壞自張上達始該道小有才能歷任撫臣皆委辦河務旋充中下兩游總辦憑權藉勢賄賂公行屬員求得差委率以重貲拜認師生得差後凡購買椿料等項亦遂任意剋扣上下朋分臣兩年來嚴切整頓而積習已深未能盡挽是風氣之壞實以該道爲罪魁現既開缺回籍本可寬其既往惟該道頗負治河之名臣一旦

離東該道必旋即到省倘當事者再誤探虛聲委以重任必致復蹈故轍引用私人於河工大有關繫相應請 旨將開缺前濟東泰武臨道張上達嚴行懲處俾辦工者知所做畏積弊或可漸除臣爲山東河工重要嚴杜用人再誤起見是否有當謹附片具

奏伏乞 聖鑒訓示謹 奏 光緒二十三年三月二十九日奉

硃批另有旨欽此

奏調勞乃寬來東差委片 光緒二十三年三月十五日

再山東河工緊要辦理全賴得人不獨修守工程防河利病必須深明方畧始能措置得宜而錢糧爲百姓脂膏尤須事事稽察破除情面不容浮冒虛糜方爲核實臣此次上下河干乘便抽查稽

料其架空短少之弊不一而足容當另摺奏參竊念河工痼習漸
瀆已深亟欲求廉正不苟之員來東相助臣藉得次第整頓查有
直隸候補道現任大名府同知勞乃寬久任河工講求有素且辦
事認真不避勞怨向爲臣所深知合無仰懇 天恩俯念山東河
工緊要 敕下直隸督臣將候補道現任大名府同知勞乃寬開
缺飭令迅即來東俾臣得收指臂之助出自 鴻慈謹附片具
奏伏乞 聖鑒訓示謹 奏 光緒二十三年三月二十九日奉
硃批著照所請吏部知道欽此

奏請將積勞病故之巡檢優卹片

光緒二十三年四月初八日

再候補巡檢吳潤理係直隸清苑縣人於光緒二十二年四月到

省本年歷城小沙灘辦理堵口工程臣以該員年力正強飭委西
壩收買土料該員辦事認真不辭勞瘁當工程緊急之際露立壩
頭十日夜眠食俱廢遽以積勞致疾陡患嘔血之症迨工竣後飭
令回省醫治不過十日已病不可支於三月十四日身故實屬以
死勤事查河工效力人員積勞病故歷經 奏卹奉 旨允准在
案該員因公病歿查與請卹成案相符合無仰懇 天恩將山東
候補巡檢吳潤理 敕部從優議卹出自 鴻慈謹附片具 奏
伏乞 聖鑒訓示謹 奏 光緒二十三年四月二十一日奉
硃批著照所請該部知道欽此

奏陳東省酌減錢漕辦理情形摺

光緒二十三年四月初八日

奏爲東省酌減錢漕告示先已通飭立碑民皆稱便並將漕糧捲尾及耗米隨正徵收情形恭摺覆陳仰祈 聖鑒事竊臣准戶部咨開議覆臣擬折收錢漕兩項數目可否作爲定章應俟舉行一二年毫無窒礙再行動石立碑所稱耗米一斗五升折收京錢一千八百文檢查前案並無此項耗米名目自應歸併正米計算不得再收耗米之價所稱祇准捲勺成合不准捲合成升並無似此成案應令自行酌核嚴定章程務使官吏不能藉端中飽以肅漕政而恤民艱等因奏奉 諭旨依議欽此欽遵咨行到臣自應遵照辦理伏念錢漕爲百姓脂膏不容稍有賒削臣所以嚴定章程力杜中飽者與部臣之意正相脗合上年遵 旨飭查將閩省錢

糧一律裁減復訪聞漕米亦有浮收流弊並將斛尖樣盤各名目概行禁革無非爲體恤民艱起見惟尾數賦額攸關勢難刪去光緒十三年正月前撫臣張曜覆 奏平原縣楊德成被參各款案內聲明糧米按合收納不准再捲成升通飭各州縣一體遵照在案蓋取民之數簡則易明升合以上人皆知之勺抄以下則愚民有不盡知者矣而書吏之浮收即於民所不盡知者巧爲算取夫積合之數至十而成升值制錢五六十文折合之數爲十而成勺則所值尙不及一文不明定限制則畸零之數不獨一合可以升計即一勺一抄亦可以升計而民之苦累愈甚定以按合收納則其數盡人皆知而吏胥不能巧取此循案辦理之尙無流弊者也

至耗米一項向章額徵正米一石隨徵耗米一斗五升內係坐支車脚米五升津貼旂丁米三升五合並食米二升共支米一斗五合下餘米四升五合照例每升八釐變價交幫加增席片銀三分運隨養廉銀六釐儘數支銷而委員盤費及漕船守凍尙不在內是隨徵一五耗米實涓滴皆有開銷惟從前徵收折色州縣任意浮收隨時加增武定一帶至有每石折京錢二十餘千折銀至七八兩者迨咸豐十一年前撫臣譚廷襄奏明每米一石定爲收制錢六千文並未分晰正耗維時州縣浮收雖稍減於前亦未遵照定章同治四年前撫臣閻敬銘因州縣猶有浮收更多耗外加耗復於窮鄉僻壤徧爲出示曉諭凡有米麥豆一升折收制錢六十

文並批飭各州縣照章隨正徵收一五耗米於由單串票分別註明正米若干耗米若干其孤貧兵米向不徵耗者概行剔除不容稍有牽混自是以後凡向徵折色各州縣正米耗米均照制錢六千分別折算鄉民知有應徵正米即有隨正之耗米並有應納之錢文上下相安均無異言同治六年正月前撫臣丁寶楨覆奏濟陽縣陳來忠並未浮收錢漕案內亦已切實陳明此隨徵一五耗米委非歸併正米計算之實在情形也上年臣飭定核減章程民皆稱便下忙錢漕俱能踴躍輸將紛紛呈請勒石立碑以垂久遠臣恐鄉民藉端斂費徒滋紛擾不准民間私自立碑是以督同藩司通飭各屬由官立碑大堂一面奏明立案現在各處鑄立

已將次報齊並無異辭此勒石立碑毫無窒礙之實在情形也臣仰荷天恩俾膺疆寄凡有利於民之事無不竭力奉行此次核減錢漕正所以紓民力惟漕糧折價正耗分計自同治年間以來相沿已久官民視爲固然較從前之任意浮收已有限制前撫臣閻敬銘丁寶楨均實心爲民凡病民之政無不極力革除而漕糧折收任其正耗分計自係體察情形實見有不能盡革之處旣已相沿至今似可仍循其舊無庸另行改議臣當隨時查察如有官吏藉端浮收中飽即行從嚴參辦決不姑寬以仰副朝廷勤恤民隱至意除將立碑告示抄錄咨部查照外理合恭摺覆奏伏乞皇上聖鑒謹奏光緒二十三年四月二十一日奉 硃

批戶部知道欽此

奏參買料斤重短少各委員請懲處摺

光緒二十三年四月初八日

奏爲特參河工買料短少斤重之委員請旨分別懲處恭摺仰
祈聖鑒事竊查河工修防首重稽料凡險工最鉅之處需料亦
更多必須斤重足數一垛方得一垛之用東省買料章程向以一
萬斤爲一垛從前驗收祇以堆垛高寬丈尺爲準委員與料販通
同作弊率多架井排空斤重任意短少每至臨時缺乏貽誤要工
關係實非淺鮮臣於上年冬間通飭上中下三游豫購今年防汛
稽料凡接見買料委員無不告誡諄諄諭以斤重必須核實臣自
二月到工上下往來數次自歷城以下至利津南北兩岸堆存稽

料皆臣親督過稱抽查歷城以上即委中游總辦候補道林介景
抽查通計斤重購足一萬者竟無一人其短少尙不甚遠者由臣
分別記過停委以示薄懲惟查有候補知縣楊先甲王惟賢慶瑞
劉家善松秀車映斗等六員所購之料斤重短少太鉅皆在七千
斤以下甚至有不足六千斤者似此痼習已深牢不可破若不嚴
行懲處則積弊終不可除河工將無從著手查楊先甲等料垛短
少斤重不一臣即以所短之多寡定懲處之輕重相應請 旨將
買料斤重太少之候補知縣慶瑞劉家善松秀車映斗四員即行
革職候補知縣楊先甲王惟賢均以府經歷縣丞降補以示懲儆
其林介景所查各處如再有短少情弊臣當續行奏參臣爲整頓

河工挽回風氣起見謹專摺具 奏伏乞 皇上聖鑒訓示謹

奏 光緒二十三年四月二十一日奉 硃批另有旨欽此

奏報桃汎防護平穩暨西韓工現辦情形摺

光緒二十三年
四月初九日

奏爲恭報桃汎防護平穩暨西韓工現辦情形恭摺仰祈 聖鑒

事竊查山東黃河既淤且窄不獨伏秋大汎處處堪虞即凌汎桃

汎亦均有盈滿之懼前因凌汎漫口先後堵合經 臣 奏報在案

本年桃汎較早自二月二十四日以後河水漸次增漲至三月初

三日節屆清明接續漲至四尺有奇上游南岸陽穀縣屬之紅廟

壩壽張縣之靳莊頭二兩壩國莊小壩孫樓新壩均有墊陷北岸

臨黃隄濮州之廖家橋大溜撞擊壩根已見塌陷均經各營委分

投搶護幸保無虞下游蒲臺利津隄埝尤爲卑薄南岸曹家店李家莊老官趙家打魚張家等處出水均僅數寸風浪濺過隄頂張蔣家圍埝白家莊隄身均因水逼隄根突出漏洞宋家莊王家院莊埝壩沖刷亦皆岌岌可危經營委各員分別搶築子埝堵塞漏洞添廂魚鱗護沿各埝始漸平穩現在桃汎已過上中下三游一律保固惟利津西韓家堵口工程自二月開凍後接續舉辦東西兩壩分投進占山三百丈以至數十丈溜勢愈逼愈緊洶深至五丈有奇每進一占用料幾及二百垛所需楮料椿繩及現錢土料一切工費較從前勘估多至數倍刻計口門祇贖二十餘丈而工程之艱鉅實爲東省歷屆堵口所未有臣自小沙灘合龍後駐工

一月有餘日擊艱險情形莫名焦灼惟有激勵在工員弁殫竭心力晝夜經營總期趁四月內趕辦合龍俾得上紓宸厪所有挑汎防護平穩及西韓工趕辦堵口緣由理合恭摺具奏伏乞

皇上聖鑒訓示謹奏光緒二十三年四月二十三日奉 硃

批知道了仍著督飭在工員弁趕緊合龍毋稍遲誤欽此

奏參荒謬不職之守備請革職摺

光緒二十三年五月初二日

奏爲特參荒謬不職之守備請旨革職以肅官箴恭摺仰祈

聖鑒事竊臣接准兗州鎮臣田恩來咨稱本年四月初九日兗中營守備王金詔克右營守備楊晉階因廩生顏振翰開設之福源茶葉舖收買土硝八斤派兵前往查拏經街鄰向該守備等求情

罰令顏振翰修理該營馬神廟戲樓限端陽節前興工取具顏振翰甘結呈鎮該鎮查兗州府城內遍地產硝各舖戶零星價買應用在所不免顏振翰如果窩回與販該守備等既經拏獲自應移會有關訊辦何得勒罰鉅款致累商民且更難保非藉端訛索當向王金詔等申飭詎王金詔負氣不服即赴中軍游擊余西庚署中將鈐記呈繳而楊晉階聽信王金詔之言亦將鈐記具稟繳鎮與王金詔一同晉省咨請核辦前來臣查該守備王金詔楊晉階既查獲顏振翰茶葉鋪收買土硝並不照例移縣訊辦輒勒罰修理馬神廟戲樓迨經該鎮申飭復敢負氣不服呈繳鈐記擅離職守實屬荒謬糊塗未便稍事姑容除委員前往接署並澈查顏振

翰是否國販硝斤另行核辦外相應請 旨將堯中營守備王金
詔堯右營守備楊晉階即行革職以肅官箴再所遺堯中營堯右
營守備員缺東省現有應補人員應請扣留外補合併陳明理合
恭摺具 奏伏乞 皇上聖鑒訓示勅部查照施行謹 奏 光
緒二十三年五月二十日奉 硃批著照所請兵部知道欽此

奏陳韓工籌辦情形摺 光緒二十三年五月初二日

奏爲西韓家工程太鉅堵合未能迅速謹將先後籌辦情形恭摺
瀝陳仰祈 聖鑒事竊臣於四月初九日 奏報桃汎平穩並陳
西韓工堵口情形一摺欽奉 硃批知道了仍著督飭在工員弁
趕緊合龍毋稍遲誤欽此仰見 皇上軫念河防勤求民瘼跪聆

之下欽悚莫名竊維西韓家口門原寬至三百餘丈自上年十月興工已做成二百餘丈本年二月開凍後接續進占至四月初旬只賸二十餘丈其時水已深逾五丈進占倍極艱難猶冀竭力經營趕於四月內合龍藉可上紓宸厪乃自節逾立夏黃水增漲該處地勢坐灣本屬兜溜以數千里來源之水匯於口門又挾長水之勢奔騰澎湃數日之間淘深至七丈有奇致將東西兩壩已做成之工各沖失一占其餘各占亦相繼蟄陷工具拚命搶廂將蟄陷者盤壓完固而前兩占已經走失口門復寬至三十餘丈驚濤怒湍竟至無從措手臣目觀形勢危險焦灼萬分查此處工程向係民修民守自此次漫口後臣因民力不逮即改歸官堵值此

工艱費鉅議者或謂一隅之地不必以全力爭然使從此停工經
伏秋大汎冲刷則前此已成之工悉歸烏有必致奪全河之溜蕭
神廟以下尾閭雖暢勢已隔絕不通而口門內五里以外即無河
槽水行於平地之上汎濫橫溢又不能作出海之路無論尺地一
民皆當爲 朝廷護惜而以全河之水無處歸壑勢必於上游各
處潰決關係大局匪淺 臣籌思無計寢饋難安再四圖維惟有在
西壩迤上添築大順水壩一道托住大溜漸次順歸中洪一面於
原築東西兩壩距口門各在十丈以後接出壩基另行進占俟圍
過口門六七丈深水之外再圍堵合如順水壩挑溜得力口門可
漸次落淤即從原處籌堵亦易集事 臣督率在工文武各員晝夜

趕辦無許片刻延誤倘仗 聖主洪福事機順手趁大汛前得以合龍斯爲厚幸如或汎水暴漲不能成功猶冀藉順水壩以拓溜勢俾正河得免淤塞原築之壩不再走失將來秋汎過後再行接辦亦得有所藉手然非盛漲實在力無可施臣亦決不畏難自阻容俟夏至前後審度情勢再當據實 奏陳至所需經費上年用堵口項下節省銀六萬兩司庫籌墊銀五萬兩本年三月請截留京餉六萬兩彼時水深祇三丈餘尺寬亦不過三十丈今水深至七丈添建各壩所需椿料麻繩又須增購款項不敷甚鉅伏查山東堵口工程以光緒元年荷澤縣賈莊爲最鉅十年十一年濬溝十四戶兩處亦稱要工所用工需或一百餘萬或數十萬然未有

寬至三百丈又深至六七丈如西韓工之艱鉅者臣以帑項艱難力求樽節又以河工積習率多浮冒開銷故臣勘估工款力從減省處核算上年堵合趙家菜園呂家窪兩處及開挑陳莊新河共祇用銀十四萬兩前後各工臣皆親駐工次逐款稽覈即一束之料一簣之土無不親爲查考不令稍有虛浮無如此處工程太鉅深水處每進一占需料至一百數十萬斤需薪至七八萬斤再加椿土及培築後戩計一占之費已屬不貲約計此工歲事總需銀二十餘萬臣雖不敢遽請續撥而萬分爲難情節不得不先陳於聖主之前現飭河防局司道暫行籌墊俟功成之日統計實用若干但可設法騰挪亦即不敢上煩宸廑所有西韓工先後籌

辦緣由理合恭摺具 奏伏乞 皇上聖鑒訓示謹 奏 光緒二十三年五月二十日奉 硃批知道了著添築大壩以期挑溜得力仍著督率趕辦合龍毋稍鬆勁欽此

奏參買料不實各委員請懲處片

光緒二十三年五月初二日

再臣前 奏參買料斤重短少之委員業經奉 旨欽遵在案臣以河工積弊太深非雷厲風行不足以挽回痼習原冀一經懲創委員知所做畏不致相率效尤茲查有即用知縣程芹香開缺另補知縣劉登雲承辦防汛稽料 臣疊加詰誡諭以前次短少斤重之員業經參處不可蹈其覆轍該員等始雖漫應迨 臣親往抽查其斤重仍不足七千斤殊屬不知自愛未便姑寬相應請 旨將

另補知縣劉登雲以府經歷縣丞降補程芹香係進士出身文理
尙優請改以教職選用謹附片具 奏伏乞 聖鑒訓示謹 奏

光緒二十三年五月二十日奉 硃批著照所請該部知道欽

此

奏江浙兩省海運漕船初次收口放洋日期船數片 光緒二

十三年五月初二日

再本年江浙兩省起運光緒二十二年分漕糧仍分裝招商局輪
船並沙衛各船由海運津前准該省督撫臣咨會當經 臣檄飭登
榮練軍照章雇用民船配駕兵丁出洋迎護一面咨行登州鎮總
兵暨該管道府轉飭沿海各州縣營汛在於緊要口岸巡查彈壓

在案茲准登州鎮臣章高元咨並據管帶登榮練軍候補游擊王步清及該管道府等稟報本年二月三十日起至三月十六日止江蘇鎮洋縣漕船金寶順陽湖縣漕船金恒發憶發順元和奉賢兩縣漕船金萬年吳江縣漕船沈恒發無錫縣漕船玉發順奉賢縣漕船鈺發順浙江嘉興縣漕船新乾泰秀水縣漕船周同春計九隻先後駛入東境收口旋即陸續出口放洋由練軍護送北上等情除仍飭查探續到船隻隨時迎護催趲外所有江浙兩省海運漕船初次在東收口放洋日期船數理合附片具陳伏乞 聖鑒謹 奏 光緒二十三年五月二十日奉 硃批知道了欽此

奏韓工暫請停辦摺 光緒二十三年五月十七日

奏爲節近夏至大汎已臨西韓家堵口工程實屬力無可施應請
暫飭停工俟秋後再行接辦恭摺具陳仰祈 聖鑒事竊臣前因
西韓家口門太深未能速堵業將添建順水壩就東西壩迤後另
接壩基情形並聲明如順水壩挑溜得力即仍從原口門籌堵於
五月初二日 奏報在案查該處自上年六月漫口以後續塌寬
三百餘丈正河日見停淤臣深慮堵合不能成功至伏秋大汎水
勢直趨口門必至奪全河之溜故亟亟於添建順水壩以圖補救
自建壩之後大溜漸歸中洪口門微見落淤臣方幸機有所乘飭
舍去新接壩基仍就原口門進占在工文武各員皆以工鉅期迫
無不奮迅將事雖晦冥風雨未敢片刻少休惟口門新落之淤本

未堅實一經土料追壓入水仍深至六七丈迨東西壩各進兩占口門愈逼愈緊兼以時近夏至汎水暴漲驚濤駭浪排山倒海而來如雷霆砰訇聲震數里致將已作未成之金門占又復冲塌臣籌思無計焦灼莫名若復勉強前進勢仍盤壓不實徒糜料物再四思維惟有暫飭停工先將已成之三百丈竭力保護俟秋汎過後溜力漸微再行接辦似可事半功倍所賴順水壩尙屬得力正河北岸灘嘴已刷去一百餘丈河身日見淘深如溜勢不再變遷當不致遽行淤塞此西韓工程不能不暫從緩辦之實在情形也伏思此處工程本係民修民守臣以該處水皆平漫並無出海之路恐民力不能堵合將致貽害大局故不恤身任其事改歸官堵

自上年十月興工至本年五月在工文武各員衝寒冒暑艱苦備
嘗乃因口門過寬溜勢過大以致汎水猝至計無可施實非辦工
不力惟臣職總全河責無旁貸此工辦理已逾八月費帑二十餘
萬卒未能早爲堵合上慰 聖懷實深愧憤應請 旨將臣交部
嚴加議處下游督辦河工候補道丁達意督辦無方亦難辭咎應
請摘去頂戴營官候補副將賂金玉候補都司王恒德承辦要工
雖因工程過難究屬未能迅速應請一併摘去頂戴俟秋後接辦
如再不能得力即行嚴參所有節近夏至西韓工暫請停辦緣由
理合恭摺具 奏伏乞 皇上聖鑒訓示謹 奏 光緒二十三
年六月初二日奉 硃批另有旨欽此

奏利津縣北嶺子西灘兩處民埝漫溢片

光緒二十三年五月十七日

再利津南岸民埝上自蒲利交界之三里莊起下至韓家垣止計六十餘里向係民修民守上年西韓家決口臣以民情困苦 奏明官為堵合以後即歸官守該處頻年漫溢村民皆於隄上穴居幾無跬步之隙且上下六十里並未修有埝壩無可抵禦臣飭俟西韓工堵合後隄上居民遷徙即將殘缺卑薄之處官為修培並添修埝壩以資防守因刻尙堵口未完未及趕辦茲據利津縣稟報北嶺子迤上里許及迤下之西灘地方因連日風大水猛均被水漫過埝頂民夫搶護不及致將兩處埝身刷塌北嶺子沖開五六丈西灘已刷寬二十餘丈淹斃人口三名兩處之水匯由迤南

舊岔河入海臣已飭下游督辦道員丁達意即日前往察看情形酌量刻下能否堵合統由官爲籌辦以紓民力該處地近海濱村落無多並飭利津縣查明由臣撥款派員酌予賑撫俾免流離失所謹附片具陳伏乞 聖鑒謹 奏 光緒二十三年六月初二日奉 硃批知道了欽此

奏陳河工情形並報回省日期片

光緒二十三年五月十七日

再山東黃河河身淤澱隄埝卑薄一切爲難情形經臣疊次陳奏在案臣近駐西韓工次連日河水暴漲附近下游兩岸紛紛報險臣親往查看如北岸之大馬家大田家張家灘豆腐巷梁莊安莊利津城關南岸之曹家店卞莊梅莊下至南北嶺西灘辛莊等

李廷管公奏議 卷十四
處隄埝出水高者不逾一尺低者或僅數寸或已與隄平南岸之
埝係民修民守殘缺尤甚或於隄上累土爲子埝藉顧目前而各
處罅漏迭出應接不暇少加風浪即可平漫而過臣前因經費難
籌雖 奏請擇要加倍僅以出水三尺爲度然隄加三尺而河身
之淤亦隨之則加如未加矣即各處儲備料物以爲搶險計然上
下數百里間處處可以漫溢一遇汎漲卑者不能驟使之高是無
處非險並無處可搶矣伏思豫省黃河寬至數十里及十餘里其
隄身之高厚屹若長城河臣專心致志以全力副之故能得以無
事東省隄埝之卑薄則有如田隴河面之狹隘則僅勝溝渠近年
因尾閘不暢節節淤飽河底高於平地全恃一縷危隄將洪流束

範滿則必溢處處皆岌岌可危將欲大爲修培則數百萬帑金既無從籌畫欲展寬河身則數十萬居民又無地安插種種難辦情形較豫省不啻倍蓰而以撫臣兼司河務事繁責重又不能如河臣之壹意經營此即智慮過人猶懼不逮況以臣之愚拙更覺竭蹶萬分現在伏汎將臨在在險要臣忝膺重寄曷敢不勉荷仔肩即各處工員經臣訓飭再三亦無不動奮趨工力求穩慎惟以萬里黃河歸宿之處而河身不能翕受即竭力補救而防其衝決安能禁其盈滿一屆大汎其橫溢四出勢所必至自愧宣防無術莫澹沈菑實覺上負 聖明下慚黎庶捫心午夜寢饋難安此 微臣歉悚下忱所不得不直陳於 聖主之前者也臣自二月初九日

出省歷時已逾三月署中一切事件亟待清釐本年屆鄉試之期
所有應行預備事宜須與司道商辦臣拜摺後即於五月十八日
由利津陸路回省所有滌陳山東河工情形及恭報回省緣由謹
附片具 奏伏乞 聖鑒訓示謹 奏 光緒二十三年六月初
二日奉 硃批知道了欽此

奏報夏辛酉服滿片 光緒二十三年五月十七日

再統領山東登州防營 記名提督廣西右江鎮總兵夏辛酉前
因海防緊要經 臣奏請緩赴新任並聲明該總兵已丁承重憂應
否改爲署任於光緒二十一年八月二十九日奉 硃批夏辛酉
著改爲署任准其仍留山東以資得力兵部知道欽此欽遵轉行

知照在案茲據夏辛酉稟稱自光緒二十年十一月十八日聞訃
丁繼祖母承重憂之日起扣至二十三年二月十八日不計閏二
十七箇月服滿懇爲 奏明起復等情臣查該總兵廉勇樸訥圖
效血誠駐紮登州將近三年嚴明紀律整頓操防恩信足以相孚
軍民無不翕服洵海防最爲得力之員今該員已屆服闋相應籲
懇 天恩准其仍留登防以資鎮攝其廣西右江鎮總兵原缺可
否仍准實授之處理合聲明請 旨恭候 欽定除咨部查照外
謹附片具 奏伏乞 聖鑒訓示謹 奏 光緒二十三年六月
初二日奉 硃批另有旨欽此

奏挑濬北運河估需經費數目摺

光緒二十三年五月二十
六日

奏爲遵 旨挑濬北運河以利漕行估需經費數目恭摺仰祈

聖鑒事竊照本年江北起運漕米一十三萬五千餘石仍辦河運

業經兩江督臣奏奉 諭旨飭將漕船經行河道認真挑濬務期

一律深通以利漕行等因欽此除本年南路運河 奏明仍歸河

臣經理外所有陶城埠迤北河道經 臣檄委東昌府知府洪用舟

勘估去後茲據該府稟稱北運河綿長二百餘里南高北下河身

淤墊年甚一年上年重運經臨黃汎短弱開壩三次黃流挾沙而

行積淤甚厚陶城埠口門一帶已成平陸迤東之支河並木涵洞

亦均淤平攔黃壩兩面壩頭朽墊殆盡皆須折修換料至左右臨

黃魚鱗埽兩岸護沿埽多有坍塌壩頭迤北兩岸本係純沙見水

即塌現擬一律甬掃其口門以下東阿之新開陽穀之七級聊城之周家店李海務等處地據上游灘嘴甚多隄埝尤多卑薄堂博之棧隄梁家淺土橋清平之魏家灣等處雖受淤稍輕挑工稍省而臨清之雷神廟至箔口壩一段積淤較深歇馬亭壩及轉筒兩座亦有損壞急應逐段分別挑築疏濬深通以利漕行惟庫款支絀異常不得不力求撙節統計挑修各工共需土方工料銀四萬九千四百一十六兩二錢二分三釐減平在內造具估冊呈請核辦前來臣查該府所擬辦法並估計經費銀數均尙核實應照歷辦成案飭由藩司籌款給領責成該府督率印委各員趕緊興工認真辦理勒限於漕船未到以前一律完竣不准草率偷減仍俟

工竣將用款造冊報銷除咨部查照外所有估挑北運河工緣由
理合恭摺具陳伏乞 皇上聖鑒謹 奏 光緒二十三年六月
十一日奉 硃批該部知道欽此

奏參試用從九請革職片

光緒二十三年五月二十六日

再河工修培隄埝取土有遠近之不同臣迭飭營委各員凡民間
廬舍墳墓畦園不准妄行損壞茲查有試用從九沈祖授委派利
津宮家監修隄工竟將民間兩處果園泥土任意挑挖以致樹木
枯萎臣查工目睹並察看附近尚有沿河淤灘並非無土可取該
處果園民所資以爲生計乃竟敢如此妄爲難保無詐索不遂情
事未便姑寬應請將試用從九沈祖授即行革職以示懲儆謹附

片具 奏伏乞 聖鑒謹 奏 光緒二十三年六月十一日奉
硃批著照所請該部知道欽此

奏設河安中營片 光緒二十三年五月二十六日

再東省黃河下游地段本長險工亦多本年又將利津縣境南岸
民埝自三里莊至韓家垣六十餘里改歸官修官守原設河防各
營實屬不敷分布必須添設一營以資修防當經飭據原帶成字
土夫營守備郭成按照河定河成等營勇六夫四章程於本年正
月二十一日募齊六成弁勇三百七員名稟報點驗一律精壯足
額名曰河安中營口糧等項即於是日起支其四成土夫應俟察
看情形隨時添募所遺成字營土夫即派遊擊李開元接管各專

責成據河防局司道詳請 奏咨立案前來除咨部查照外謹附
片具陳伏乞 聖鑒謹 奏 光緒二十三年六月十一日奉
硃批該部知道欽此

李忠節公奏議卷十四終

李忠節公奏議卷十五

奏寬免嚴議謝恩摺 光緒二十三年五月二十九日

奏爲恭謝 天恩仰祈 聖鑒事竊臣前因大汎屆臨請暫停西

韓家堵口工程並懇將臣交部嚴加議處於五月十七日由工次
專摺具 奏在案拜摺後於五月十八日由陸路起程二十一日
到省茲閱電鈔五月二十六日欽奉 上諭李秉衡自請嚴議之

處著加恩改爲交部議處等因欽此聞 命之餘莫名感悚伏念

臣治黃無術保赤徒殷莫澹沈災深愧民居之未奠即膺嚴譴亦
爲臣罪所當然乃蒙 大造之生成僅 予照常之處分 天恩

愈厚臣志滋慚聞 容儆於 九重思彌澤洞考宣防之三策倍

懷冰淵臣惟有勉竭衰庸恪遵 聖訓狂瀾力挽敢憚胼手胝足之勞順軌心儀願展平地成天之頌所有微臣感激下忱謹恭摺叩謝 天恩伏乞 皇上聖鑒謹 奏 光緒二十三年六月十六日奉 硃批知道了欽此

奏陳西灘北嶺漫口情形摺 光緒二十三年六月初九日

奏爲續陳利津縣西灘北嶺兩處漫口情形恭摺仰祈 聖鑒事竊臣於五月十七日 奏停西韓家堵口工程並將西灘北嶺民埝漫口及河工爲難情形分別附片陳明均奉 諭旨欽遵在案該兩處漫口之後因風大水猛各刷寬七八十丈臣比飭督辦道員丁達意趕飭營委各員分投盤做裹頭以免續塌茲據丁達意

稟報西灘北嶺兩處裏頭均經盤壓穩固西灘口門業已挂淤水勢緩弱似可逐漸淤塞惟北嶺口門大溜側注西壩水深一丈有餘出口後分爲三股一山南嶺莊後繞至雙河東南入小甯海一沿北嶺護莊埝外經西灘漫口至辛莊會合中一股大溜其中一股山東而北經永阜莊南禹莊辛莊再折而南由楊家河邈邈至小甯海會西韓漫口之水散漫入海口門奪溜已至七八分而出口三里以外僅深二三四五尺不等皆平漫未成河槽入海不能通暢正河對岸淤出灘嘴伸過東壩頭二十餘丈致河身日見淤塞東壩裏頭以下正河深僅一二尺再下至孟莊一帶則二三四尺不等陳莊新河頭亦深僅一二尺所有重運船隻節節淺阻臣

聞報之下莫名焦灼伏查黃河以入海爲歸宿必尾閭通暢方無橫決之虞臣前因韓家垣海口高仰不能宣暢於上年 奏開陳莊新河仍由蕭神廟舊路入海現在新河自平字灘以下一律深通而新河頭至陳莊以上正河節節淤飽以致水行地上遇滿則溢今北嶺漫口幾至奪全河之溜雖該處近海村莊無多不過一隅之地而水勢旁洩則正河受病愈深刻當大汎屆臨一片汪洋無處取土堵口既不能施工挑淤亦無可駐足臣籌思無計寢饋難安所幸西韓家自添建順水壩之後北岸淤灘日漸淘刷自西韓至北嶺迤上五十餘里正河較從前已見深通惟黃河溜勢變遷朝夕靡定臣現派員於口門內外隨時察看審度形勢妥籌辦

法一俟秋汎過後當再 奏明辦理所有西灘北嶺漫口後現在情形謹恭摺具陳伏乞 皇上聖鑒訓示謹 奏 光緒二十三年六月二十三日奉 硃批知道了著俟霜清後查勘河勢分別辦理欽此

奏東綱商捐軍餉銀兩仍請按照海防例給獎摺 光緒二十

三年六月十一日

奏爲東綱商捐軍餉銀兩仍請援案照海防事例給獎以歸劃一而昭公允恭摺仰祈 聖鑒事竊准部咨戶部議覆臣奏東綱商捐軍餉銀兩請援案給予獎敘一摺當時並未聲明照海防事例給獎不得援引兩淮鹽捐爲比祇准照籌餉新捐章程給予虛銜

封典翎枝貢監等項咨部請獎等因奏奉 諭旨依議欽此欽遵咨行到臣自應遵照辦理伏查東綱商捐解部銀十萬兩時當海防喫緊之際需餉孔殷該商等志切同仇捐助鉅款接濟經臣於光緒二十年九月間隨案 奏明另行請獎在案其時籌餉新捐尙無開辦明文商捐前項銀兩既係解部撥充海防軍餉循名責實自應照海防事例請獎且與兩淮成案事同一律所以初未聲明者良由於此查兩淮與山東雖助餉有多寡之別商力有厚薄之殊然其急公報効之忱初無二致今兩淮已准照海防事例獎給實官而東綱僅獎虛銜等項虛實相較未免向隅即以山東而論光緒十七年戶部籌餉案內東綱曾捐銀十萬兩亦係准照

海防事例給獎此次捐數情事均與上屆相同若竟獎敘兩歧似無以勸將來而示大信據鹽運使豐仲泰詳據引票綱商聯名稟請改獎具 奏前來合無仰懇 天恩俯准將東綱商捐軍餉銀十萬兩援照兩淮及山東上屆助餉成案仍按現行海防事例給獎以旌勸一而昭公允出自 逾格鴻慈除咨部查照外謹恭摺具陳伏乞 皇上聖鑒訓示謹 奏 光緒二十三年六月二十三日奉 硃批戶部議奏欽此

奏陳裁汰勇營情形摺 光緒二十三年六月十六日

奏爲欽奉 諭旨裁汰勇營謹將東省遵辦情形恭摺覆陳仰祈 聖鑒事竊 臣於五月初二日在利津西韓工次承准軍機大臣

字寄光緒二十三年四月二十五日奉 上諭督辦軍務王大臣等會奏議覆御史李擢英奏請酌裁長江水師暨各省勇營一摺前據戶部奏請業經諭令各直省督撫認真裁汰並著通力合籌趕緊辦理仍將所裁兵勇數目日期分晰具奏毋稍延緩等因欽此欽遵寄字到臣當即轉行遵照去後伏查山東自光緒二十年海防事起陸續召募計新舊各軍共三萬餘人事定後節次裁汰計遣撤防勇一萬六千餘人練軍一千九百餘人伏讀光緒二十三年三月初四日 寄諭裁兵減勇一事據戶部奏稱自行知各省以來惟山東一省奏明將制兵分限五年裁減五成並將防營練勇分別裁減等因欽此是 微臣力求節餉之心爲部臣所深知

亦爲 聖明所洞鑒惟東省瀕臨大海接壤江淮居南北之要衝
爲 畿疆之屏蔽刻雖海疆粗定而威海尙有倭人佔踞既有實
逼處此之虞膠澳爲各國所覬覦更有狡焉思逞之懼積薪厝火
隱患方殷非多練精兵無以爲禦侮之計臣是以於上年八月有
增兵萬人之請復念部庫支絀的餉難籌臣是以又有不敢輕言
增募祇就現有各營加意訓練之請蓋帑力有限應增者不能遽
增而事變堪虞欲減者亦未敢遽減也今河南又裁去駐東嵩武
三營東軍愈形單弱揆時度勢實屬無可再裁惟旣欽奉 諭旨
令各省合力通籌仰維 宵旰憂勞臣曷敢不勉爲籌畫查奏調
來東之廣西補用總兵楊昌魁所統新魁五營上年六月已將後

營裁撤前營一營又於中左右三營中汰弱留強共裁去勇丁五百名合前營共裁遣一千員名餉銀均於五月底截止其遣散各勇籍隸滇黔湘鄂等省各按道路遠近加給川資作爲恩餉俾不至逗遛生事所留三營營哨官弁各仍其舊以便有事時勇額易於募補此係於無可裁減之中爲力求節省之法據善後局司道具詳請 奏前來除咨部查照外所有遵 旨裁撤勇營據實覆陳緣由理合恭摺具 奏伏乞 皇上聖鑒訓示謹 奏 光緒二十三年七月初一日奉 硃批該部知道欽此

奏明豫省請裁駐東嵩武三營摺

光緒二十三年六月十六日

奏爲豫省請裁駐東嵩武三營謹遵部議專案 奏明恭摺仰祈

聖鑒事竊准部咨戶部議覆河南巡撫劉樹棠奏裁汰防營並請照裁出省防軍一摺內稱嵩武軍十營月餉向山豫省供應該撫擬令裁汰三營除河南索回二營自行裁汰外山東再裁一營歸併作爲裁汰三營之數惟該軍駐紮山東膠防辦理船澳關繫緊要能否再裁一營未能遙度請 旨飭臣體察情形專摺奏明辦理等因奏奉 諭旨依議欽此欽遵咨行到臣伏查嵩武軍駐紮東省已二十年光緒十八年前河南撫臣裕寬請撥兩營回豫經前撫臣福潤以東省正築礮臺需勇工作請俟臺壘工竣再調回豫奉 旨允准欽遵在案迨光緒二十年倭韓事起復將該軍分布海防是豫省雖有調回兩營之名而東省實全收十營之用

該軍所駐之處除驍武左營馬隊分駐曹州府屬專辦緝捕外其分布海防者膠澳四營煙臺四營登州一營各該處地屬巖疆兵力本不爲厚不獨膠澳辦理船澳誠如部臣所議關係緊要未能裁營即煙臺登州亦實有不能再減之勢惟該軍餉銀向由豫省籌解當茲庫藏支絀各省皆同豫撫臣請裁三營期在節餉以償洋款臣既不能自備三營之餉何敢令豫省獨爲其難不得已將膠澳烟臺登州三處各裁去嵩武一營照豫撫臣原奏共裁三營一面將甯海州上莊等處所駐東字副軍三營分調膠澳煙臺登州三處填補嵩武三營之缺以重防務以後豫省祇籌解七營之餉其所裁三營騰出之餉即由豫省提出湊還洋款此三營餉銀

截至五月底爲止仍照案以豫省所解六月之餉作爲遺餉俾各
勇得資生計以廣 皇仁除咨戶部兵部暨河南撫臣查照外所
有照裁駐東嵩武三營緣由謹專摺具 奏伏乞 皇上聖鑒訓
示謹 奏 光緒二十三年七月初一日奉 硃批該部知道欽
此

奏摺獲用藥迷拐幼孩匪徒審明懲辦片

光緒二十三年七月初三日

再據金鄉縣知縣張鴻鈞稟稱光緒二十三年三月初九日該縣
訪聞有城內幼孩被匪用藥迷拐情事當即飭差查拏去後旋據
縣民張奉臣呈報本月初九日早伊年甫四歲幼子張金香在門
前玩耍被匪拐去經伊查找追至西門裡將伊子由拐匪手內奪

回等情並據派出差役將該犯倪學蔥拏獲搜出隨身攜帶藥匣藥瓶送案查驗張金香尙復昏迷不省人事遂即設法將其救醒因年幼不能取供提訊倪學蔥據供係郟城縣人先曾習醫營生並未爲匪犯案光緒二十三年三月初間因生意淡薄貧苦難度獨自起意迷拐幼孩希圖採割配藥給人治病漁利即配就迷人藥丸攜帶身邊赴各處假充賣藥屢遇幼孩終未得便下手三月初九日早行至縣城內東小街適張奉臣幼子張金香在門口閒玩伊四顧無人將藥丸用紅糖粘裹填入張金香口內張金香喫食立時昏迷伊乘間抱取逃走即被訪聞拏獲詰無傳授藥方並知情同夥之人等情臣查定例用藥及一切邪術迷拐幼小子女

人藥並獲將起意爲首之犯照強盜律擬斬立決此案該犯倪學
蔥輒因貧起意用藥迷拐四齡幼孩希圖採割配藥若非該縣即
時拏獲則張金香幾至慘遭採割且曹濟等屬人心浮動上年大
刀會邪教甫經從嚴懲辦今復有此等匪徒以罔利之心濟其殘
忍之性必至無所不爲實屬罪浮於法臣已批飭該縣於覆訊後
將該犯倪學蔥即行就地正法俾昭炯戒除飭錄敘供招由州司
詳咨外謹附片具陳伏乞 聖鑒訓示謹 奏 光緒二十三年
七月十六日奉 硃批刑部知道欽此

奏審明疎防越獄之禁卒人等按例定擬摺

光緒二十三年
七月初三日

奏爲審明疎防監禁斬梟盜犯越獄脫逃限滿無獲之禁卒人等

按例定擬恭摺仰祈 聖鑒事竊照曹縣斬梟盜犯陳泳椿前因越獄脫逃經臣將管獄有獄各官 奏參於光緒二十二年七月十七日奉 旨這所參疎防斬犯越獄之管獄官山東代理曹縣典史劉廷桂著即革職拏問交李秉衡提同刑禁人等嚴訊有無鬆刑賄縱情弊按例懲辦有獄官代理曹縣知縣曾啟垣雖據報先期公出究屬疎於防範著交部照例議處仍勒限將逸犯陳泳椿嚴緝務獲究辦餘著照所議辦理該部知道欽此經臣欽遵轉飭緝拿陳泳椿未據報獲先經批司飭提刑禁人等並劉廷桂同卷宗至省發委濟南府研訊茲據該府劉景宸審明擬議由臬司毓賢解勘經臣親提研鞫緣陳泳椿謝儉分隸定陶曹縣等縣陳

泳椿一向在外游蕩先未爲匪犯案謝儉充當曹縣禁卒光緒二十一年十一月二十七日陳泳椿與素識已獲同姓不宗之陳空會即陳恐會又名陳四朱白笙即朱二王鈺鷄即王四楊云懼即楊四白茂州王西現即王卯又名王西言曹獫即曹獫先在逃之王三規曹意遇道貧難陳泳椿起意行竊陳空會等允從是夜同夥十人陳泳椿與朱白笙王鈺鷄各攜洋槍陳空會等分攜刀棍偕抵曹縣事主張景唐家門外一齊爬牆進院開啟大門撥屋門入室行竊張景唐之佃戶主三驚起喊捕陳泳椿糾允陳空會等行強陳泳椿開放洋槍轟拒致傷王三胸膛倒地一同劫得衣物並將張景堂幼子張留先捉去勒贖詎王三移時因傷殞命陳泳

椿等因聞拿緊急旋將張留先放回將賊俵分各散事主報經該縣曾啟垣會營勘驗詳批飭緝勒差先後獲犯訊明錄供稟經臣批司檄委候補直隸州知州秦浩然前往會同曾啟垣將該犯陳泳椿審依竊盜臨時行強但有一人執持洋槍在場者不論曾否傷人不分首從均擬斬立決梟示章程擬斬立決梟示照章稟辦二十二年四月初十日曾啟垣會同防營赴交界之直隸東明河南考城一帶巡緝公出十一日傍晚該代理典史劉廷桂帶領刑書吳萬益進監收封驗明各犯刑具完固將陳泳椿收入西監房南裡間木籠內飭令禁卒謝儉小心看守復派營兵田景雲在監值宿巡邏更夫劉萬成在內封支更封鎖獄門回署吳萬益向不

在監值宿亦即回科房辦公是夜四更時分風雨交作劉萬成進屋避雨與禁卒人等均各困倦睡熟詎陳泳椿乘間扭斷鐐銬揭起籠底木板攀折籠木鑽出籠外由墻根挖孔越獄脫逃謝儉驚覺喊同田景雲追捕一面報經該典史會營馳往勘驗督率兵役人等查拿無獲適曾啟墳公回途次接據該典史申報隨即馳回親詣覆勘訊供稟報經臣奏參將該代理典史劉廷桂撤任行司同刑禁人等一併委提至省發委濟南府審辦該府劉景宸因查卷宗未齊飭縣檢齊申司發府劉景宸審擬由司解勘提訊供認前情不諱詰係依法看守一時疎忽並無鬆刑賄縱情弊應即擬結查例載監犯越獄如獄卒果係依法看守一時疎忽偶致脫

逃並無賄縱情弊審有確據者一律減囚罪二等治罪又律載不應爲而爲事理重者杖八十各等語此案禁卒謝儉於監禁斬梟盜犯陳泳椿並不小心防範致被越獄脫逃雖訊係依法看守並無賄縱情弊究屬疎忽百日限滿犯無弋獲自應按例問擬謝儉合依監犯越獄獄卒果係依法看守一時疎忽偶致脫逃並無賄縱情弊審有確據者依律減囚罪二等治罪例應於陳泳椿斬罪上減二等擬杖一百徒三年到配折責充徒限滿報明遞籍安插營兵田景雲更夫劉萬成疏忽監犯陳泳椿越獄雖訊非賄縱亦屬不合自應酌量問擬田景雲劉萬成均應酌照不應爲而爲事理重者杖八十律各擬杖八十折責發落分別革伍革役刑書吳

萬益訊止隨同收封向不在監值宿其于斬犯陳泳椿越獄脫逃
無從防範應免置議管獄官已革前代理曹縣典史劉廷桂於疎
脫斬梟重犯訊非禁役賄縱應照例留於地方協緝俟五年限滿
有無獲犯再行照例辦理有獄官曹縣知縣曾啟垣現已丁憂開
缺應聽由部議結逸犯陳泳椿飭緝務獲究報除將供冊咨部外
所有疎防越獄斬梟盜犯無獲將禁卒人等審明定擬緣由理合
恭摺具陳伏乞 皇上聖鑒勅部核覆施行謹 奏 光緒二十
三年七月十六日奉 硃批刑部議奏欽此

奏捐建已故將軍善慶專祠並懇列入祀典摺 光緒二十三

年七月初三日

奏爲已故將軍立功東省遵 旨捐建專祠懇 恩列入祀典以
順輿情恭摺仰祈 聖鑒事竊據布政使張國正按察使毓賢鹽
運使豐仲泰候補道郭鑑襄積慶沈廷杞崔鍾善志永候補知府
李馨恭曾郭驤候補同知朱鍾洛等聯名稟稱原任福州將軍善
慶於咸豐同治年間帶兵勦賊轉戰各省多立奇功旋隨僧忠親
王至東摧宋憬詩於東昌殲劉得培於淄川搗白蓮池教匪於鄒
嶧大小百餘戰所向無不披靡復與劉銘傳等軍防守運河進扼
膠萊在日照諸城高密樂安濰縣壽光等處剪除匪黨不可勝數
逆首任柱賴汝洸卒就摧滅厥功尤偉積年巨愆次第削平用兵
紀律嚴明秋毫無犯閭閻賴以安堵嗣在福州將軍任內因病出

缺東省士民間風哀悼迄今追念前勳謂非千秋血食不足以伸
比戶心香恭讀光緒十四年四月二十八日 上諭福州將軍善
慶老成幹練忠勇性成咸豐同治年間帶兵勦賊轉戰直隸河南
安徽江南湖北山東等省所向克捷卓著勳勞殲斃逆首任柱等
厥功尤偉歷任杭州副都統杭州甯夏江甯將軍旋補授正紅旗
漢軍都統並令管理神機營幫辦海軍事務均能實心任事克稱
厥職上年簡授福州將軍到任以來整頓操防不辭勞瘁方冀可
享遐齡長資倚任遽聞溘逝軫惜殊深善慶著照將軍在軍營病
故例賜卹加恩予諡任內一切處分悉予開復應得卹典該衙門
察例具奏其生平戰功事蹟著宣付國史館立傳並於立功省分

建立專祠等因欽此凡在臣民同深欽感而然以遵 旨建祠爲請因一時擇地積貲未如茲復呈經該司等查得省城僧忠親王直隸同鄉服官在東者捐貲購地遵 旨建隸京旗事同一律查僧忠親王祠之左尙有基建祠所需經費仍由八旗奉直同鄉各官籌欽亦不必藉資士民以示體恤稟懇 奏官春秋致祭以降報享等情前來臣維該故勦賊迭殲巨愨功績彪炳業經奉 旨准在專祠今該司等因紳民遺愛難忘謹思勿替

同鄉官集貲在省城 臣署東北僧忠親王祠側建立該將軍專祠
免籌庫帑不藉民捐洵屬崇德報功之意除飭批照辦外相應額
懇 天恩俯准列入祀典由地方官春秋致祭以順輿情至建祠
經費悉係捐集而成應免造冊報銷所有捐建已故將軍立功省
分專祠並懇列入祀典緣由謹恭摺具陳伏乞 皇上聖鑒訓示
謹 奏 光緒二十三年七月十六日奉 硃批著照所請該部
知道欽此

奏伏汎期內黃河搶護平穩摺 光緒二十三年七月十六日
奏爲伏汎期內黃河險工搶護平穩恭摺仰祈 聖鑒事竊照山
東黃河河身狹隘本患水不能容近年因尾閘不暢節節淤飽河

底高於平地全恃一縷危隄束範洪流每遇汎水漲發動輒漫溢
出槽實有防不勝防之勢前因節近夏至大汎猝臨來源洶湧以
致利津縣屬之西灘北嶺兩處民埝漫決業經臣分飭盤築裹頭
並將河工爲難情形先後奏明俟伏秋汎過查勘河勢分別辦
理均奉諭旨欽遵在案迨入伏以來陰雨連綿水勢有長無落
淮河臣咨會上游萬錦灘黃河迭次報長東省地處下游河身淺
窄難容處處拍岸盈隄險工林立如上游之雙合嶺賈莊紅廟靳
莊孫樓廖橋中游之王家梨行桑家渡楊史道口小沙灘胡家岸
徐家坊豆腐窩五里堡郭家紙坊河套圈下游之北趙家蝎子灣
胥家碼頭彭家廟小崔家三合莊曹家店打魚崔家王平口宋家

集彩家莊馮家莊等處非坐灣頂沖即掃壩墊陷甚至縷隄刷透均屬危險異常各總辦往來督率搶護運料運石分投加廂幾至應接不暇所幸在工員弁勇夫人等均能不避艱危踴躍用命沿河居民亦能幫同防守晝夜搶辦得以轉危爲安伏汎期內各工一律平穩堪以仰慰 宸厪惟秋汎甫屆爲日方長 臣仍當分飭各總辦加意修防不准稍涉疎懈以仰副 聖主慎重河防之至意所有伏汎期內搶護險工平穩緣由理合恭摺具 奏伏乞 皇上聖鑒謹 奏 光緒二十三年七月二十九日奉 硃批知道欽此

奏西韓家堵口現籌接辦摺 光緒二十三年八月初二日

奏爲利津縣西韓家堵口工程現擬霜清前接辦恭摺具陳仰祈
聖鑒事竊查西韓家堵築漫口前因大汛屆臨經臣於五月內
奏請停工欽奉 上諭此時伏汛已至人力難施自應暫准停
工俟秋後再行接辦惟已成之壩座三百丈必須竭力保護勿稍
疏虞一俟秋汛溜勢漸微即著併力施工以重河防等因欽此仰
承 訓誨周詳莫名欽悚遵即遴派妥員分駐東西兩壩飭令會
同防營隨時相機搶護毋稍疏懈臣回省後疊據兩壩委員稟報
節交庚伏汛漲日增致將前建口門迎上之順水壩沖去二段大
溜直注口門洶湧撞擊東西兩壩疊見墊塌賴料物應手隨塌隨
加計自六月以來兩壩加鑲各十餘次前停工時出水二丈餘尺

之壩頭均已追壓入水仍鑲出新壩頭二丈有餘幸入秋以後汎水時漲時落順水壩雖走失兩段所存之十餘丈仍甚得力大溜拓歸中洪口門溜漸平緩所有已成之壩座三百餘丈一律保護穩固現在節逾秋分汎水可期漸落應即續籌興工以期早日堵合臣已飭將應用料物趕緊添購並飭下游下段督辦直隸候補知府勞乃寬迅即赴工妥爲籌辦候補道丁達意前因督催不力由臣奏參摘頂嗣經撤去督辦改爲隨工差遣臣已飭令先期前往經理始終其事臣俟鄉試揭曉後即赴工布置一切總期趁立冬節前趕緊合龍仰副朝廷慎重河防之至意再東鹽窩地勢坐灣工極險要近因秋汎搜淘致將大磨盤掃走失兩段刻正

併力搶護合併附陳所有西韓家堵口現籌接辦緣由理合恭摺
具陳伏乞 皇上聖鑒訓示謹 奏 光緒二十三年九月十八
日奉 硃批知道了欽此

奏節逾白露黃河險工搶護平穩摺

光緒二十三年八月二十一日

奏爲節逾白露黃河險工搶護平穩恭摺仰祈 聖鑒事竊照山
東黃河本年伏汎盛漲兩岸險工林立搶廂穩固情形業經 奏
報在案入秋以來汎水疊次漲發淘底搜根較伏汎溜勢尤勁險
工逐處環生如上游之賈莊紅廟廖橋孫樓高家大廟徐家碼頭
田樓靳莊中游之劉家廟霍家溜胡家岸玉符河葛家溝鐵匠店
郭家紙坊鄆家渡桑家渡葛家店北店子楊莊老徐莊小魯莊下

游之董家集曹家店鄭家紙坊官家埽宋家灘小董家園孫家園
林家打魚張家王家碼頭趙家壩李家口宋家集小孫莊辛莊韓
家垣等處或坐灣頂沖大溜滾刷或對岸生灘全溜側注以致新
舊挑水壩及魚鱗磨盤各埽墊陷頻仍其餘灰石各工亦多剝落
迭經分飭上中下三游總辦督率文武員弁會同各地方官激勵
勇夫聯絡莊民分投晝夜搶護並添修埽壩加築後戢幸均轉危
爲安現在節逾白露水勢已定察看通工情形一律平穩堪以仰
慰 宸厯惟時距霜降尙遠不敢稍涉疎懈臣仍當督飭各總辦
加意認真修守期保無虞以仰副 聖主慎重河防之至意所有
節逾白露黃河險工搶護平穩緣由理合恭摺具 奏伏乞 皇

上聖鑒謹 奏 光緒二十三年九月初四日奉 硃批知道了
欽此

奏謝補授四川總督摺 光緒二十三年九月初九日

奏爲恭謝 天恩仰祈 聖鑒事竊 臣於光緒二十三年九月初
二日承准總理衙門電開奉 旨本日降旨李秉衡授四川總督
張汝梅授山東巡撫李秉衡俟新任到後即著迅速來京陛見欽
此當將欽感下忱電請總理衙門代奏在案初八日復准吏部咨
同前由又恭閱電鈔光緒二十三年九月初二日內閣奉 上諭
四川總督著李秉衡補授未到任以前著恭壽兼署欽此跪聆之
下感悚交縈伏念 臣起家牧令游陟監司縮疆符於陳臬之時

擢皖撫於引疴之際疊荷 殊恩之異數皆非寤想所敢期嗣蒙
簡調來東正值海疆多事戎公未敏難追失律之愆河患方殷
莫奏宣房之績凡地方未理之事皆微臣負疚之端屆述職於三
年益懷慚於五內茲復欽承 簡命作督西川自顧何人渥膺
寵遇受 恩愈重圖報愈難查四川幅員遼闊政務殷繁舉凡察
吏安民籌邊裕餉在在均關緊要臣力小任重懼弗克勝謹當遵
旨俟新任撫臣張汝梅到東即行入都 陛見聆 聖謨之指
示勵臣志之靖共期仰答 高厚鴻慈於萬一所有微臣感激下
忱謹恭摺叩謝 天恩伏乞 皇上聖鑒謹 奏 光緒二十三
年九月二十三日奉 硃批知道了欽此

奏報利津縣西韓家漫口堵築合龍日期摺

光緒二十三年
九月十六日

奏爲利津縣西韓家漫口現已堵築合龍恭摺由驛馳陳仰祈

聖鑒事竊查西韓家堵口工程前因大汎屆臨經臣於五月 奏

停至八月汎水漸消即飭接續興辦於九月初二日 奏明在案

該處口門夏間值伏汎暴漲將金門占沖失水深六丈有餘本屬

無從措手蒙 皇上天恩准暫停工遵飭留工各員弁將已成之

壩座三百餘丈竭力保護幸前建順水大壩極爲得力入秋後汎

水漸落溜向北移沖開夏間新挑引河將正河刷深口門遂見落

淤惟黃河之水挾泥沙而行水緩力弱則見淤水急力猛則見刷

若從正口門遽進新占則新淤尙未堅實恐口門收窄後愈刷愈

深又致不可收拾隨工道員丁達意因夏間功敗垂成力求穩慎會同新派下游督辦道員用直隸候補知府開缺同知勞乃寬周歷審度查得口門迤下二十餘丈兩旁已見露淤土性尙堅中間雖已成河槽而深不盈丈視口門之深至六丈者較易爲力擬在該處就兩頭露出淤土加築新隄另作邊壩中間二十餘丈接進水占一面撥運料物調集下游河防各營東西壩同時並舉迨口門收窄中間淘深至二丈有奇復從邊壩迤上正壩迤下用長椿雙排由東而西添做滾水柳壩一道以托溜勢占前之水遂漸平緩丁達意見機有可乘即就近添調下游防汛委員分投兩壩跑買現錢土料晝夜搶堵九月初三日將東西金門占盤壓穩固於

初四日辰時挂纜合龍層土層料追壓到底並用蒲包淤泥上下拋擲復買車土澆築後餞忽兩面金門占後接縫之處各出漏眼勢如泉湧旋出翻花大溜幾致債事各員并督飭勇夫拚命搶堵並令營勇中善泅者覓入水底尋出漏洞用蒲包填塞加拋高出水面實以淤泥至初八日始得斷流惟正壩水勢太深此次改從退後堵築添做邊壩係因避深就淺冀得節省料物而水勢已成入袖非將正壩堵合終難閉氣丁達意等復督率在工文武各員從正壩東西兩面同時進占幸椿料應手弁勇踴躍用命附近民夫見大功可成亦皆奮揚齊集荷鍤成雲於初九日將金門占做成初十日趕做關門大占至亥時追壓到底一面填築後餞至十

二日戌時正邊兩壩一律閉氣後面之水漸次涸復民間可以及時播種堪以仰慰 宸厯伏念此工自上年十月興堵以來工長三百餘丈時歷八月之久至五月間已用款二十餘萬復以事機不順奏奉 諭旨停工秋後再行接辦臣以口門太深未易集事故前奏接辦摺內寬以時日限立冬前堵築合龍賴下達意勇於任事於大汛時督率工員將壩座三百餘丈隨墊隨加搶護穩固秋後復籌退後搶堵之法會同勞乃寬併力程功費省而工速在工文武員弁皆能齊心努力危險不辭未屆霜清大工已克蒞事實屬異常出力惟有仰懇 天恩從優給獎以示鼓勵查上年十月堵合趙家菜園漫口十二月堵合呂家窪漫口奏報摺內俱聲

明侯西韓工合龍後彙案請獎先後奉 旨允准欽遵在案今西
韓工已歲事自應一併擇尤隨摺請獎所有前參摘頂之二品頂
戴存記道丁達意擬請 賞還頂戴仍交部從優議敘副將駱金
玉都司王恆德請一併 賞還頂戴其尤爲出力之下游下段督
辦道員用直隸候補知府開缺大名府同知勞乃寬請免其再補
同知以知府仍歸原省儘先即補四品銜補用直隸州知州盧昌
詒請免補本班以知府補用並加三品銜分省試用同知查爾崇
請免補本班以知府仍分省補用同知銜直隸州用分省補用知
縣王崇閻請免補本班以直隸州知州仍分省補用並加四品銜
同知銜直隸州用候補知縣杜秉寅請俟歸直隸州知州後加四

品銜並 賞加隨帶三級藍翎同知銜分缺間用知縣朱猛指分
東河候補知縣鄧際昌均請俟補缺後以直隸州知州補用並
賞加隨帶三級揀選知縣吳璋舉人鄒道沂均請以知縣不論雙
單月遇缺選用並加五品銜同知銜候補知縣房學禮五品銜江
蘇候補知縣祝嗣隆均請俟補缺後以直隸州知州補用候補縣
丞吳震澤請免補本班以知縣補用並加同知銜試用府經歷李
文中請免補本班以知縣補用分省試用縣丞郭恩敷請免補本
班以知縣仍分省補用總兵銜儘先副將直隸紫荆關參將沙明
亮請以總兵在任候升開復遊擊銜留東儘先都司葉雲升遊擊
銜補用都司李玉田補用都司郭成均請免補都司以遊擊補用

其餘出力員弁容再分別勞績優次彙核請獎所有應辦善後工程已飭工員妥慎辦理除將用過工需銀兩另飭核實造報並將請獎員弁履歷彙齊咨部外所有堵築西韓家漫口合龍日期理合恭摺由驛馳 奏伏乞 皇上聖鑒訓示謹 奏 光緒二十三年九月二十三日奉 硃批另有旨欽此

奏報銷光緒二十二年黃河防汛經費摺

光緒二十三年九月十七日

奏爲報銷光緒二十二年黃河防汛經費銀兩數目恭摺仰祈 聖鑒事竊查山東黃河上中下三游自曹州府荷澤縣入境起至利津縣海口止袤延千有餘里汎漲搶險極關緊要所用防汛經費銀兩截至光緒二十一年止業已按年造册 奏銷准部核覆

在案茲據河防局司道詳稱二十二年防汛經費額撥司道各庫
臨關銀六十萬兩續撥藩庫銀五萬兩均經 奏准如數撥解到
局轉發支用由該司道等督同承辦工員詳細勾稽是年上中下
三游各處搶險廂掃拋護碎石修蓋營房需用一切工料並僱用
民夫津貼及防管弁勇口分總分各局委員鹽糧等項應歸戶部
核銷銀十三萬九千四十六兩八錢六分三毫工部核銷銀五十
萬一千九百八十四兩六錢三分八釐一毫二共請銷支款銀六
十四萬一千三十一兩四錢九分八釐四毫俱係實用實銷並無
扣存成平銀兩查收款項下共收到原續撥前項經費銀六十五
萬兩連上屆防汛案內報明餘存銀二千一十七兩二錢八分八

釐六毫二十一年報銷案內刪除荷澤土夫營一半公費銀二百四十五兩八錢三分三釐三毫統共收銀六十五萬二千二百六十三兩一錢二分一釐九毫除支尙存銀一萬一千二百三十一兩六錢二分三釐五毫歸於下屆防汛案內造報等情繕具收支總細各冊出具印結呈請 奏咨前來 臣覆核冊開收支各款數均相符並無浮冒情弊除將冊結分咨戶工二部查照外所有報銷光緒二十二年防汛經費銀數緣由謹恭摺具陳伏乞 皇上聖鑒 勅部核銷施行謹 奏 光緒二十三年九月三十日奉 硃批該部知道欽此

奏山東文闡價買民田添建號舍摺

光緒二十三年九月二十九日

奏爲山東文闈坐號不敷現擬展拓基址添建號舍謹將購買民地籌款興辦情形恭摺具陳仰祈 聖鑒事竊東省鄉試貢院原有及續增號舍共計一萬二千四百間除去號軍栖止及溷廁之號計可容士子一萬一千四五百人從前歷屆鄉試應試者不滿萬人尙屬寬裕近數科人數日增號舍僅足敷用本年丁酉科鄉試闈前投卷者多至一萬三千餘名臣以號舍不敷飭令添蓋棚號計可容八百餘人而風雨火燭在在堪虞此第一時權宜本非經久之策山東爲聖賢桑梓之邦士多嚮學學臣歲科兩試每屆取進不下二千人應試者有增無減多士涵濡 聖澤有志觀光未便阻其上進之路棚號旣非久計且貢院地基狹隘即增蓋棚

號亦無隙基非另拓基址添建號舍不可臣於入闕以前即與各司道悉心商酌籌議展拓之法查貢院坐落布政司街東西圍牆以外西接藩司衙署東鄰大街均屬無地可展惟北圍牆外有地十餘畝東一段爲湖田西一段爲民間廬舍飭據署歷城縣知縣汪望庚並添派委員紳士周履丈量自西至東橫寬五十五丈自南至北縱長十二丈可添建號舍二千一百九十間所佔之地計民房一百五十間旱地二畝五分水田十畝零一分小民安土重遷必須厚給價值方免播遷失所估計房屋地畝各價共合京錢二萬九千四百餘千新蓋號舍二千一百九十間並另建圍牆填墊湖田鋪砌甃石共估計京錢八萬六千零四十餘千二共合京

錢十一萬五千四百八十餘千約需銀四萬五千餘兩當茲帑項支絀不敢請撥正款東省司道各庫比年軍需洋款悉皆取給實已搜索無遺而貢院爲拾才之地事關大典又未敢因陋就簡致令士子向隅現飭於司道各庫及善後局積年節省外銷之款極力挪湊尙勉強可以敷用已飭於九月十七日動土開工由濟東道吉燦升督飭印委各員暨本省公正紳士認真經理總期工堅料實毋許稍涉浮冒所用款項出自外銷節省並未動用正款請免造冊報銷據藩司張國正等具詳請 奏前來除咨部查照外所有山東文開價買民地添建號舍緣由理合恭摺具 奏伏乞

皇上聖鑒訓示謹 奏 光緒二十三年十月十二日奉 硃

批該部知道欽此

奏請以北嶺口門及陳莊新河爲入海之路摺光緒二十三

年九月二十九日

奏爲韓家垣舊河現已淤塞擬以北嶺口門及陳莊新河兩處爲入海之路謹繪圖貼說恭摺具陳仰祈 聖鑒事竊查利津南岸

北嶺西灘兩處民修民守之埝於五月漫口經臣於五月十七日

附片 奏明並飭道員丁達意將該處入海情形應否堵合詳細

查勘稟覆嗣據稟稱西灘口門已經漸次淤塞惟北嶺之水奪溜至七八分出口向東由永阜莊趨南禹莊辛莊經楊家河折向南行順二道嶺由絲網口入海現已刷成河槽勢極通暢等情臣此

次赴工於察看西韓家堵口工程後即至北嶺口門乘坐小舟至
二道嶺絲網口等處詳細查看由北嶺至絲網口約六十餘里溜
勢甚順絲網口以下十五里即係海面再十五里爲太平洋大洋
誠爲天然去路伏查黃河以入海爲歸宿比年因韓家垣尾閘不
暢以致漫決頻仍臣上年 奏開陳莊新河由蕭神廟入海本冀
韓家垣尙可分洩留作支河今韓家垣已不能通船北嶺至絲網
口旣屬深通自應留爲入海之路惟北嶺口門已將奪溜迤下正
河日見淤淺仍應開段挑挖使分正溜入新河蓋論目前之形勢
則北嶺分溜較多而度將來之情形則蕭神廟以下河身較絲網
口更爲低下不可不留此正道爲久遠之計也現已飭下游下段

總辦直隸候補知府勞乃寬分飭委員將正河淤淺之處設法疏導並擬於北嶺口門南北岸添築遙隄使水由兩處分洩入海以免壅閼爲患惟水性就下將來有無變遷亦惟隨時因勢利導而已所有現擬北嶺口門及陳莊新河兩處分流入海緣由理合恭摺具 奏並繪具圖說恭呈 御覽伏祈 皇上聖鑒訓示謹 奏 光緒二十三年十月十二日奉 硃批著照議妥辦該部知道圖留覽欽此

奏保治行卓著之郡守牧令摺

光緒二十三年九月二十九日

奏爲特保治行卓著之郡守牧令請 旨分別獎勵以昭激勸恭摺具陳仰祈 聖鑒事竊維牧令爲親民之官郡守有率屬之責

牧令賢則百里受其福郡守賢則閩屬蒙其庥蓋民生之休戚所關即地方之治亂所由繫也 臣數年來留心考察守令中循分供職者固不乏人其有志潔才長實能以民事爲己事者自當亟爲甄敘以示優異查有武定府知府尙其亨志趣超卓明練有爲在任三年於地方水利隄防銳意講求士民翕服沂州府知府丁立鈞宅心正大蒞事嚴明督率各州縣懲貪去蠹吏畏民懷前署青州府候補知府楊傳書操履篤實廉謹不阿歷委要差均能實力實心不避勞怨請補濟甯直隸州知州凌芬諸練動明才堪治劇濟甯政繁俗敝頗不易治該員剛柔互劑措理裕如陽穀縣知縣胡建樞廉明慈惠所至有聲調署清平縣單縣知縣李銓勤政愛

民力祛積弊博平縣知縣李惟誠政平訟理愷悌宜民調署曹縣
堂邑縣知縣金林緝捕勤能與情悅服招遠縣調補嶧縣調署單
縣知縣朱鍾琪除暴安良有膽有識以上九員均堪循循良之選
查楊傳書係候補人員可否仰懇 天恩交軍機處存記錄用之
處出自 聖裁其尙其亨等八員懇 恩傳 旨嘉獎以示優異
此外尙有才堪任用者容再續陳其不堪造就者亦即隨時甄劾

仰副 聖主澄敘官方至意謹恭摺具 奏伏乞 皇上聖鑒訓

示謹 奏 光緒二十三年十月十二日奉 硃批另有旨欽此

奏節交霜降黃河一律安瀾摺

光緒二十三年九月二十九日

奏爲節交霜降黃河一律安瀾恭摺具陳仰祈 聖鑒事竊查節

交白露三游險工防護平穩情形臣於八月二十一日 奏報在案本年秋汛較小黃水時漲時落惟秋汛淘底搜根溜性較伏汛尤勁以致險工疊出如上游南岸之賈莊藍路口中游北岸之枯河黃陡崖下游之王平口等處皆因大溜側注勢極險要均經搶護平穩惟利津北岸之東鹽窩河勢曲屈該處正當坐灣危險尤甚其迎溜頂衝之處埽段共五十座經秋汛淘刷自十四座以下全行墊塌致將隄身沖刷過半岌岌可危督辦道員馬開玉知府勞乃寬先後駐工分投購撥料物督飭防汛營委各員晝夜搶廂先後五十餘日始漸平穩臣此次赴工親詣查看復飭勞乃寬添建順水壩三座以拓溜勢以後汛水漸落當可無虞伏查今年黃

汎爲時較早當五月未交夏至之前北嶺前歸民修民守之埝即被漫決其兩岸官守隄埝出水高不盈尺迨伏汎一屆水與隄平各處搶加子埝而風濺浪激時時有漫溢之虞臣五月奏報摺內謂防其沖決不能禁其盈滿實自愧宣防無術恐難免疏失之虞也幸仰賴 聖主洪福 河神效靈俾通工一律安瀾臣慶幸之餘倍深悚懼相應請 旨頒發大藏香由臣祇領虔詣 大王廟祀謝以答 神庥在工文武員弁自春徂秋胼胝經營不辭勞瘁應請暫行存記照章歸入下屆彙保其總辦道員擬請先行獎敘以昭激勸除下游上段督辦道員馬開玉臣已另片奏保下段督辦知府勞乃寬已於西韓工案內列保不敢再請獎敘外合無仰

懇 天恩俯准將上游督辦兗沂曹濟道錫良中游督辦候補道
林介景均 交部從優議敘刻下節屆霜清水勢漸定尙未大見
消落仍當督飭各總辦隨時相機修守不敢稍涉鬆懈仰副 朝
廷慎重河防至意所有節交霜降黃河一律安瀾緣由理合恭摺
具 奏伏乞 皇上聖鑒訓示謹 奏 光緒二十三年十月十
二日奉 硃批另有旨欽此

奏請嘉獎在籍翰林宋書升片 光緒二十三年十月初六日
再在籍翰林院庶吉士宋書升係山東濰縣人品端學邃於書無
所不窺經臣延聘主講尙志書院敦崇正學誘掖後進士林翕然
宗之其學以聖經爲鵠旁及天文地輿測繪算法亦皆循流溯源

各探其奧臣以治河之法必資測算頻年查勘河道皆邀與偕該
庶吉士以桑梓利害所關跋涉河干往來測量衝寒冒暑口不言
勞臣查該庶吉士澹泊明志不希寵榮而學有本原通知時事無
愧明體達用之選臣不敢壅於上聞可否仰邀特旨嘉獎以
資觀感之處出自天恩謹附片具奏伏乞聖鑒訓示謹奏
光緒二十三年十月二十三日奉 硃批宋書升著李秉衡傳
旨嘉獎欽此

奏密保道員蔣兆奎知府盧昌詒摺

光緒二十三年十月十
五日

奏爲特保才堪任用之道府恭摺密陳仰祈 聖鑒事竊維治理
之隆替以得人爲先人臣之報稱尤以薦才爲亟道府有率屬之

責非志潔行端不足以資表率臣撫東三年於僚屬賢否無不因事隨時盡心考察期備朝廷器使之用查有二品頂戴候補道蔣兆奎臣前護廣西撫篆時該員署理桂林府果於任事膽識俱優後補授柳州府知府廉惠有聲上年以道員改發來東經臣委辦中游河工及籌濟漕運事宜皆能擘畫精詳不避嫌怨臣查該員有守有爲才堪幹濟雖到東甫及一載而委任各事無不奮迅圖功措施悉當又三品銜補用知府盧昌詒臣自光緒二十年到東稔知該員植品甚端凡海防河工地方重要事件委令襄理皆能實心實力終始不渝經臣疊次保薦蒙恩洊升今職臣查該員經濟博通遇事懃懃懇懇不避險阻學識操持均爲公論所推

重不以久而或異臣賦性迂拘於用人一途尤爲矜慎不敢謬舉以貽誤亦不敢濫舉以市恩竊見該二員才具優長操守亦卓然可信洵爲道府良選若畀以實任必能正己率屬於吏治民生均有裨益臣交卸在即敬念古人以人事君之義謹密舉上陳用備聖明採擇應如何 恩施錄用之處出自 逾格鴻慈非微臣所敢擅請謹專摺密 奏伏乞 皇上聖鑒訓示謹 奏

奏密參登州鎮總兵章高元摺 光緒二十三年十月十五日

奏爲海疆要地總兵不得其人恐滋貽誤謹據實密陳恭摺仰祈 聖鑒事竊查東省膠澳地方筦南北洋之樞最稱險要近奉 旨中國自建船澳而夷船之進澳遊弋者猶絡繹不絕無非以地

居形勝各懷窺伺之心全賴鎮守斯地者修明武備輯睦軍心俾
外人有不敢輕量之意猛虎在山則藜藿不採其所關爲至鉅也
茲查統帶膠州海防營登州鎮總兵章高元習氣太深利心太重
在任年久驕恣日形臣稔知其痼習難除緩急斷不可恃上年年
終密考單內曾以據實上陳近聞其所統各營每營月扣津貼銀
一百兩又索取空額二十餘名統領責之營官營官復取之弁勇
層層剝削必至士卒解體且復性耽麴糵日在醉鄉更縱容其子
招權納賄營務大不可問以海疆重要之地似此貪劣將領久廁
其間墮軍實而啟戎心關繫大局匪淺或者謂該總兵久駐膠防
情形熟悉不知統將所重必能樹威信輯兵民方足以綏近懷遠

章高元在防愈久積弊愈深其貪戾恣睢久爲衆所共悉惟該總兵平日喜結納延聲譽故不知者或猶有恕辭臣三年中詳細訪查實見其貪黷性成不堪任用今臣去東有日若猶緘默不舉深恐有負 聖恩惟係專閫大員應如何懲處之處伏求 宸斷施行非臣下所敢擅擬臣爲海疆重要恐滋貽誤起見謹專摺密

奏伏乞 皇上聖鑒訓示謹 奏

奏保直隸補用知府勞乃寬片

光緒二十三年十一月初三日

再二品銜道員用直隸儘先補用知府勞乃寬經臣 奏調辦理

山東河工該員於八月到工派委下游下段總辦勤求修守措理裕如嗣經直隸督臣王文韶以該員操履清廉志趣遠大奏請送

部引 見欽奉 諭旨允准咨行到臣現飭將經手事件趕緊清
釐俟辦理完竣由新任撫臣給咨送部臣查直隸爲該員服官省
分遇事實心實力著績河防講求吏治器識操存倚任足據洵爲
道府中不可多得之才應如何 加恩之處出自 鴻慈謹附片
具 奏伏乞 聖鑒謹 奏

奏東省機器局添建槍廠購買機器籌撥各款銀兩摺 光緒

二十三年十一月初四日

奏爲東省機器局擴充製造謹將添建槍廠購買機器籌撥各款
銀兩情形恭摺具陳仰祈 聖鑒事竊查東省機器局由前升任
撫臣丁寶楨於光緒元年創立原議次第推廣自造洋槍嗣因籌

款維艱僅造火藥槍子經臣於二十一年整頓南運籌出款項擴充機器 奏明常年提南運局餘利銀四萬兩作爲添造槍械之需奉 旨允准欽遵在案茲據總辦機器局務按察使毓賢候補道潘延祖會詳稱添造槍械必先採辦洋料增建廠房購買機器方足以資製造前與局員再三詳度在於機器廠後建立洋式大槍廠一所造槍需鋼鐵零件最多熟鐵廠必須擴充當於舊鐵廠之後另建洋式熟鐵大廠一所造槍則用子倍多故於槍子廠之東另建洋式槍子大廠一所槍子需銅最夥故另建軋銅大廠一所外洋視鍋爐之大小以定煙筩之高下茲造成九十五尺高煙筩一座七十五尺煙筩一座五十五尺煙筩一座鐵煙筩一座廠

其挖深五尺煙筒基挖深八尺均密釘排椿上築三和土蓋以大石板再砌條石以爲牆脚上則扁磚實砌純灌灰漿梁棟皆外洋方木柱則生鐵鑄成以期鞏固方勝機器震撼不致有鼓裂之虞此外軍械日富當預謀存儲之方工匠日多當代籌棲息之所是以建造軍火庫二十間工匠房四十間又如水龍房以備不虞泥工廠以資修葺皆係必不可緩之工共計添廠四座羣屋八十餘間較原廠擴充三分之二均經修造完竣委員驗收結報在案至製造擡槍機器外洋本無擡槍名目故無此專門機器嗣經江蘇候補道潘學祖與洋行參酌定造擡槍機器並可兼造毛瑟洋槍計共六十餘種鍛爐地軸皮帶鏈鉗軸枕螺絲各種輪模刀鑽共

一百七十餘件俱已運解到局一俟機器裝齊工匠募到造槍銅鐵鋼料購運來東即可開車鑄造統計購買機器建造廠屋一切工料價值運脚均在其內約共用銀十二萬兩內由南運局先後籌撥銀七萬兩並在藩庫借撥銀三萬兩河防局借撥銀二萬兩仍由南運局分年籌還等情詳請 奏咨立案前來臣維槍械爲行軍之要需製造實當時之急務東省建立槍廠幾費經營規模現已大備惟期推行盡利精益求精所造之槍足與外洋火器相敵庶臨時不必購自遠方可以有備無患除飭將機器價值運脚彙入建廠工料項下造冊報銷並分咨總理各國事務衙門暨戶兵工三部查照外所有東省籌款添造槍廠購買機器緣由理合

恭摺具陳伏乞 皇上聖鑒 敕部立案施行謹 奏

奏交卸撫篆並因病請假摺 光緒二十三年十一月初六日

奏爲恭報微臣交卸撫篆日期並因病懇 恩賞假調理恭摺仰

祈 聖鑒事竊臣蒙 恩簡授四川總督前奉 電旨俟新任到

後即著迅速來京陛見等因欽此茲新任撫臣張汝梅於十一月

初五日行抵山東省城臣於初六日飭委濟南府知府劉景宸臣

標中軍參將劉雲會將山東巡撫關防一顆鹽政印信一顆臨清

關監督關防一顆暨 王命旗牌文卷等件一併齎送新任撫臣

張汝梅接收臣即於是日交卸本應迅速入都 陛見仰稟 聖

謨指示並抒瞻戀之忱惟臣本年自二月出駐河工至五月底回

省舟中積受暑溼觸發咯血舊疾數月未愈秋間文閣監臨畢後
又復馳赴河工回省接辦武闈鄉試衰茶之體實覺竭蹶萬分近
日病愈增劇狀類怔忡兼患瀉利之症據醫者云肝氣上衝心脾
交損非靜心調理難期速痊惟有籲懇 天恩賞假兩箇月臣擬
赴直隸就醫趕緊調理一俟假期屆滿即當星馳入都趨赴 闕
廷跪聆 聖訓不勝悚懼屏營之至所有微臣交卸撫篆日期並
因病請假緣由謹恭摺具 奏伏乞 皇上聖鑒訓示再此摺仍
用山東巡撫關防拜發合併陳明謹 奏

奏因病請開川督缺片光緒二十三年十一月初六日

再四川一省地大物博政務殷繁關係極重臣前奉督川之命

自忖才識迂疏而犬馬之力尙可自效亟欲勉策駑鈍上酬高厚之恩乃近來舊疾日增未能迅速就道總督事繁責重豈容久曠職守五中焦急寤寐難安惟有顛懇天恩開去臣四川總督之缺另行簡員補授俾臣得安心調理一俟假滿病痊再當泥首宮門另效驅策決不敢稍存安逸自外生成所有微臣因病懇請開缺緣由謹附片具奏伏乞聖鑒訓示謹奏

李忠節公奏議卷十五終

李忠節公奏議卷十六

奏赴奉查辦事件途次拏獲匪首摺

光緒二十五年八月十八日

奏爲途次訪查綁票匪首現經拏獲並請及時捕勦恭摺仰祈

聖鑒事竊臣膺 命前往奉天查辦事件當經跪請 聖訓仰蒙

面諭肫摯於關外綁票賊匪肆擾尤切 厯懷曷勝欽佩隨即

束裝帶同隨員編修王廷相於本月十二日起程先後由大路並

鐵軌馳行十六日抵關外中後所地方訪聞匪勢漸遠地面稍安

代統武衛左軍總兵馬玉崑已將匪首田先性等拏獲田先性者

在匪首中尤爲著名其初本未爲匪緣被匪周洛疔疔擄縛數次

家業蕩盡亦招聚衆匪網人勒贖並有擄掠婦女重情各匪見其

驟得重利無人敢問因而紛紛四起平時各領各股如聞有官軍消息則由近而遠調匪抗拒爲數既衆又有快馬快槍是以肆行無忌其各股匪首曰張磚頭劉紅蘭王坤施錫齡谷得磁等本年七月間馬玉崑所部武衛左軍在紅螺山之北地名八百隴與之接仗打傷頗多劉谷各匪遂與田匪合成一夥該軍追勦先後將王坤打死施錫齡就擒正法餘匪多竄出邊外逃匿八月初十後劉紅蘭張磚頭被獲田先性方蹙西竄至山海關西三四十里亦被該軍擒獲此武衛左軍跟蹤追勦於朝陽奉錦辦賊之情形也查匪首雖多就獲餘匪四逃難免潛伏復發應請 諭令馬玉崑督飭所部始終其事庶有成效仍責成盛京將軍將督捕事宜分

別獎勸嚴懲認真整頓必期勦捕淨盡地方久安再臣聞奉錦所屬賊匪之熾全山已革統領恩興釀成該統領所帶各營專司捕盜實則縱賊以至口甚一日自將軍增祺到任將該統領參辦奉軍捕務始有轉機此番綁票股衆之起周洛疙疸實爲最早最爲著名之渠首自在朝陽就撫効用後雖聞其小有捕獲皆係平日深讐而於著名同黨仍多縱放周洛疙疸以積惡巨匪不立置重典反假以權使其藉公護賊旣不足明示懲創更恐相效踵起爲患滋深是朝陽奉錦綁票之多實以周洛疙疸爲禍始惟有請旨密飭直隸總督熱河都統查明該撫匪所在立即正法以快人心而戢賊燄除仍前往查辦外所有途次訪查情形深知上繫

聖鑒謹就愚見擬請辦理緣由理合先行具摺由驛馳陳伏乞

皇太后 皇上聖鑒再臣經過地方關內稍形缺兩關外收成中
稔民情尙安此摺係借甯遠州印信即由州城拜發合併陳明謹
奏

奏報到藩日期摺 光緒二十五年八月二十九日

奏爲陳報到藩日期恭摺仰祈 聖鑒事竊臣膺 命奉天查辦
事件曾於甯遠州途次將訪聞綁票匪首就獲並請及時勦捕緣
由具摺馳陳拜發後仍即前進每日車行六七十里得以詳細詢
訪茲於八月二十七日行抵瀋陽敬謹展謁 福陵 昭陵訖已
與將軍增祺晤面知防營總統榮和壽長業經奏奉 電旨先行

撤換以臣訪聞該營大畧情形增祺此奏甚得關要與臣意見相
同此時仁軍已經交替育軍亦以速行交替爲宜尤以擇地趕紮
營壘爲要至臣沿途所見自經東役民氣未蘇增祺到任以來加
意整頓無如積弊已深臣於所聞知當向備告俾籌釐革補救之
法至若關係大局尤重者但使管蠡有見可以裨補一二並當自
行具陳期仰副 睿念根本之至意除將查辦事件逐一求詳再
行據實覆奏外所有到藩日期合行具摺由驛馳陳伏乞 皇太
后 皇上聖鑒再臣經過錦州遼東地方秋成一律中稔民情亦
安此摺係借用奉天總督印信合併陳明謹 奏

奏密籌奉省防軍統制辦法片

光緒二十五年八月二十九日

再正摺繕就方封發間由將軍增祺知會本日榮和一軍業經德克登額接收日內當可交割清楚查該兩軍之設原以備大敵必須廉勇夙著紀律嚴明深得兵心之員方可勝任現在將軍增祺奏遵 電旨准派晉昌德克登額暫統仁育二軍立意原以去兩總統爲急當此強鄰逼處萬不可不慎選將領爲維持根本重計惟軍制事權總須歸一將來似宜一軍統十營其另一軍亦統十營並總統兩軍則總統有控制之權事機方合臣每念時艱常以留心將才爲務况奉省防軍尤爲喫重必須統將得人方足以資捍衛容俟將查辦事件覆奏後再就夙知深信之員另摺奏 聞以備採擇謹再附片密陳伏乞 聖鑒謹 奏

奏查明仁育兩軍總統被參各款摺

光緒二十五年九月初七日

奏爲查明仁育兩軍總統被參各款據實覆陳請將榮和壽長分別懲處恭摺仰祈 聖鑒事竊臣膺 命奉天查辦事件於八月二十九日將到瀋陽日期具摺馳陳是日由驛遞回甯遠州拜發一摺奉 硃批另有旨欽此臣於沿途並到瀋陽後率同隨員編修王廷相留心確訪並將仁育兩軍初設營制開支餉期與前將軍依克唐阿等報效八萬銀款一案咨由將軍增祺查明案據咨覆臣細加考覈與原參多半相同請敬謹陳之查原參防營廢弛款目雖多綜計五項曰嗜好曰情故曰排場曰不修營壘曰報效銀兩不實嗜好一節兩總統煙癮俱深又皆嗜酒難掩衆目情故

一節查育軍爲榮和所統多用其本家子姪仁軍爲壽長所統所用類多親故育軍將弁多庸懦榮和自以用韓登舉充統領爲得計實則營哨官弁概不由統領委派仁軍營委多狡黠壽長內姪廖姓與該軍營務處委員縣丞雷鈞衡尤爲用事將軍府尹會銜告示雷鈞衡竟敢抗拒不令張貼他事之膽大恣橫可知該兩軍總統一以驕一以惰其全軍不相聯絡則實同之幸得及早撤換不然恐爲害猶不僅虛糜餉項已也至各統領有無未嘗從軍之弁調查履歷大都有出征打仗字樣此皆軍營板樣故套惟各營管帶哨弁旣多由情託操練安能認真民間目爲兒戲原參所謂士卒譁然俄人訕笑誠爲勢所必有排場一節出門響號弁兵隨

擁猶爲統營之常至舍騎乘轎一層詳細訪查依克唐阿未出缺之先增祺旣到任之後尙無其事原參稱眷屬出門亦復如是查榮和壽長係屬姻親榮和與依克唐阿戚屬亦近女眷出門不過姻好往來有無夸耀似乎不必苛求不修營壘一節該兩軍自成營後初以採地爲名總以請款託故久之營壘未立仁軍現以八營分往省北駐紮呂圖開原一帶育軍盤踞省城不肯遠去近始遣出三營餘或借住老營仍多寄居客店營址甫在省城迤西勘定尙未興築在該總統利其散處無所稽考任意缺額而民間之騷擾不堪問矣報效一案原參稱去歲仁育二軍兩總統與前將軍依克唐阿共報效銀八萬兩添購軍械其實依克唐阿捐銀無

多係以舊餘槍枝捏報充數兩總統則以兵未招齊一律先支之
餉彌補此款後此尅扣亦所不免一節咨由將軍查明覆稱光緒
二十四年十二月初九日前將軍依克唐阿向信義洋行訂購七
密里小口徑毛瑟快步槍一萬桿子母五百萬粒立有合同等語
是添購軍械屬實並非以舊餘槍枝捏報充數覆咨又稱前將軍
依克唐阿報效銀四萬兩曾據糧餉處於上年十二月二十九日
收到併入槍價匯津惟兩總統報效銀兩迄今未交等語是兩總
統報效四萬兩銀款實係未交並無先支兵餉彌補尅扣情事臣
以爲榮和壽長旣已撤去總統此款自勿庸令其再交應請將所
得獎敘撤銷又原參稱馬賊橫行錦甯尤甚逼近城邑致錦州府

有白晝闕城之事查五六月省西綁票之多自以錦甯爲最甯遠州距城二里確有金姓被綁之案七月間不知何事甯遠州城暫閉旋開徧訪無錦州闕城之事似屬傳聞之誤其錦甯事體臣隨後另有奏陳以上所查皆與原參各款多半相同之實在情形也方臣未到瀋陽之先增祺已先奏奉 電旨准將榮和壽長撤換壽長當即交割清楚榮和遲緩數日屢經增祺嚴催聞其於二十八日補放哨官哨長慶喜等十二名始於二十九日將育字一軍交出似此延宕無非爲彌補空額之計此案既交增祺確查又特命臣前來認真查辦實爲整頓防營維持根本重計臣何敢稍有瞻徇查榮和世受 國恩總統防營不圖報稱百種荒謬交替

之際又復任意遲延實有應得之咎除育軍總統已由增祺奏撤外仍請予以懲處爲統兵大員縱弛玩視者戒壽長偏裨之才不勝統將重任於營伍亦多不實厥咎與榮和同惟係多隆阿之孫金州之役頗以忠奮敢戰見稱此番交割尤極爽速業將仁軍總統奏撤再應如何酌懲或予以媿勵自新之地均係副都統大員非臣所敢擅擬惟祈出自 聖裁至仁軍營務處委員縣丞雷鈞衡請即行革職不准復留本營所有查明總統被參各款謹據實繕摺覆陳伏乞 皇太后 皇上聖鑒訓示此摺係借用 盛京禮部印信臣於拜摺後即帶同隨員起程回京合併聲明謹 奏

奏密保錫振張國林二員片光緒二十五年九月初七日

再奉省所關甚重近來強鄰逼處耽耽虎視待釁而發兵力必不
宜單計通省惟馬玉崑代統武衛左軍二十四營爲有用惟係拱
衛京畿在此仍爲客兵有事便須調遣他去奉軍三十營專司緝
盜尙須加意整頓前將軍依克唐阿就敵愾舊部新練防軍二十
營實爲必不可少之兵無如總統有二立法未善又不得其人臣
前奏已將軍制事權貴一須以一軍統十營其另一軍亦統十營
並總統兩軍明白具陳急宜照此更正此軍關係奉省安危必須
精選良將臣訪聞得前提督樂善之孫現任甯夏將軍錫振沈毅
廉明勇於任事在軍能得兵心以忠臣之裔現任將軍總統防營
聲威較重擬請 特旨派爲總統使統十營並兼統兩軍又臣於

召見時保奏張國林一員業蒙傳旨宣召未知已否到京該員久充統領紀律嚴明身先士卒同勞共苦行營所至壁壘堅完秋毫無犯洵屬節制之兵即可派統十營歸錫振總制計一軍十營統將須有分統並令各自選置並同分統遞選營哨各官如不得力隨時更換務使固結一體認真操練爲能戰能守之軍庶於固本捍疆可收實效近來營伍積習皆重情託主將之於偏裨才畧短長並非夙識且恩不已出權不自操威不可伸情不相洽平口不能責以實事有事斷難協力同仇譬如指不附臂臂不附身操縱安能如志應請特宣諭旨嚴申禁令使念朝廷大計勿得曲徇私情以誤已事倘復仍蹈故習必加以違制之罪則營

伍可期整肅師出亦當有功今日奉省情事莫急於選眞將練實兵謹舉所知堪任統將者以備擢用不勝望切 簡命之至再總統有搜羅幕才接洽將校之需統領亦須有責以能廉之道所定公費必使展布有餘始足以盡心力收成效當此更定軍制宜就仁育兩軍歸併裁省之項較核原定章程寬爲籌給並請 飭下將軍詳酌辦理謹此附片密陳伏乞 聖鑒訓示謹 奏

奏請飭奉天將軍趕築營壘片 光緒二十五年九月初七日

再臣查將軍增祺咨覆文內仁育兩軍自本年正月即開支正餉至今已逾八月之久尙未築有營壘是聚多營兵衆一任遊蕩散漫無歸緩急安所用之查此兩軍之設原以備大敵刻下總以趕

緊築壘爲急應使各紮各營復各就一軍相爲聯絡不可以暫時
代統稍有稽延其駐營處所須擇近省一二十里或扼要四達之
地計兩軍二十營各得一空闊地方租地緩糧便可相安應用務
使成一重屯整部伍以勤訓練便稽查以杜虛額集全軍以速征
調厚兵力以壯聲威此實不容少緩於今日者也若謂聚則易滋
事端但使得賢良之將恩威服衆雖再增多營亦必能悉就約束
不然分紮愈多即無處不滋擾矣應請 飭下將軍督令兩軍署
總統迅速籌辦以免紛擾而重操防謹再附片奏陳伏乞 聖鑒
謹 奏

奏查奉省情形臚陳管見摺

光緒二十五年九月初八日

奏爲查看奉省情形謹擇要臚陳並抒管見恭摺仰祈 聖鑒事
竊臣面奉 聖諭令將奉省地方情形並大局利害吏治賢否分
別留心查核仰見 廑念根本之至意臣於查辦事件外隨地考
校綜覈其利弊源委因就關係尤重者詳細籌畫得固本之計宜
切實整頓者二曰課吏治以結民心變營章以維軍事救弊之方
宜及時裁定者三曰釐錢法以平物價汰稅委以保餉源結團保
以弭盜賊特辦之件宜覈實者三曰防營日墾務曰礦廠正本清
源之道有一曰慎簡大僚以挽風氣請一一陳之奉省經兵警之
後強鄰逼處當以固結民心爲急務乃各州縣貪玩成習書差各
種恣橫因之民不勝累富者相率入教貧者迫而爲賊東南多教

民省西多賊匪職此之故地方官不能息民反益困民安望斯民效順亟宜嚴課吏之法州縣賢員重加獎勸其不肖者查有劣跡即予罷黜一切應行公事責以務實必使實惠及民在今日能安二十餘廳州縣之民乃能保二十餘廳州縣所出之餉若仍如前貪玩民怨日滋一有疆事害何忍言此吏治之宜從嚴督課也現當整頓防營奉軍亦當酌量變通該軍定制分別五路零星散布並無訓練合操之日何能成爲勁旅亦宜擇要紮壘相爲聯絡以便嚴約束勤操練使爲有用之兵與防軍主客相爲聲應並酌分馬隊選善緝捕之將督之優加津貼嚴定賞罰爲游弋之兵專責以拏盜搜窩遇有失事亦與州縣官並同處分地方庶可久安惟

查奉軍三十營均係八成隊伍而馬隊實居其半人馬月餉七兩
物力艱貴不敷所用每致擾民宜留捕盜馬隊四五營餘俱改爲
步隊並將三十營酌加歸併使足十成之數如此則官弁公費可
減馬隊月餉可省七十萬鉅餉始可歸於實用各營統領營官尤
須擇其將才威望夙服兵衆者使之整飭營規則營伍當有起色
兵民亦可相安此軍制之宜及時更張也奉天省城錢法之壞一
壞於去歲開鑄銀圓抬價行使求利太速而銀價因之驟漲百物
亦隨騰貴再誤於官錢局憑帖抬價收銀市價亦不能低落舖戶
亦不出帖又以銀圓色低價昂所有現錢始而深藏繼而外運現
在錢荒已極民間出入只以銀圓買物必準所持幾角儘數花使

每有應找還三五文錢而不可得貧民嗟怨景象不堪救之之法
惟在有錢流通則使用較便銀圓價自可平銀價亦隨之自落得
與四外市價不相懸殊百貨便能運通不至過形昂貴現經增祺
開鑪鑄錢先開兩鑪日可出東錢一千數百吊擬再擴充每年如
得東錢三五百萬吊定有大效雖官本不無虧折而虧本害小救
困利大倘由外籌補不敷尙鉅應請准其作正開銷此專爲固本
緊要起見他省不得援以爲例仍不煩另外動款即以奉軍裁馬
改步或汰弱裁撤三數營計通年裁省之款已合東錢可得數百
萬吊並有由外籌補之項大約每年所鑄新錢之虧折總可彌補
斷不可畏難中輟新錢視他省稍輕較之偶見之本省舊錢則又

重大倍之外運無利嚴禁偷運亦易奉行則省城之民困可紓矣
奉省餉源自前將軍依克唐阿清釐東邊稅務增添鹽釐斗秤等
捐歲增四十餘萬兩本地籌餉不必仰給於部庫有裨於奉省軍
制者甚大但捐局委員不免藉端勒取或有私設名目濫行搜括
之事各屬多分設斗秤土藥鹽釐各局多一委員即多一自肥之
路若由州縣經辦亦多滋弊審籌再四莫若併捐稅爲一局釐定
畫一章程將應捐應稅各項名目刊刻告示交地方官張牌示衆
不准於此外別有科取要在慎選局員以專責成並嚴行考核不
准以投効人員與非地方人員濫行位置尤須有力絕供應能耐
勞苦之廉明大員如前青州副都統訥欽者爲之寬籌公費使總

司稽覈各局隨時
餉源可常保矣團
有官款官械只須
西畏賊其機可乘
助畏敵之地宜鄉
根原聯其氣勢大
程悉心經畫使擇
董其事統責成地
則訓練認真於防
臣與增祺晤敘音

行籌措務令斟酌盡善及時整頓至特辦之件防營現已查辦臣
並有營制改章之奏墾務礦務亦另有臚陳至於正本清源端由
大吏陪都重地多設大員本爲厚培根柢若不得其人弊病亦
因之而大大員好酬應則屬吏之賄獻不敢不周大員多營私則
小民之脂膏不能不削況今日強敵憑陵根本幾有動搖之慮豈
可復使毒蟲潛相齧噬以速其仆雖鈐轄文武鞏固封圻將軍之
任最重而奉天府尹五部侍郎均有率屬保民之責必須得人而
理相與和衷共濟此後凡遇奉天簡畀大吏惟有仰懇聖慮
詳裁必得品望才望足資幹濟之選責以盡心職守實事求是如
是則積弊可除百廢俱舉元氣內固外侮亦不至速乘矣臣愚昧

之見是否有當謹繕摺具陳伏乞 皇太后 皇上聖鑒訓示此摺借用奉天總督關防合併聲明謹 奏

奏密參奉天府尹恒壽及刑部侍郎英煦片

光緒二十五年九月初八日

再奉天府尹一缺係兼行巡撫事所賴與將軍督課吏治表率各府廳州縣者惟府尹是責此職在今日爲尤重查恒壽自到任以來並無整頓而操守難言實於此缺不宜又刑部侍郎英煦辦理旗民蒙古詞訟無案不賄信任門丁劉姓恣意苛索聲名甚劣臣既有所聞不敢緘默謹附片密陳伏乞 聖鑒謹 奏

奏密保盛昱文悌玉恒請調奉任用片

光緒二十五年九月初八日

再今日需才孔亟奉省尤甚 臣前摺所陳固本救弊各條必須卓

練之才或廉正勤民者任其事始可收幹旋之功臣熟知前祭酒盛昱才望卓著早以通學著稱近年專從切實著力潛心國計留意人才於奉省利弊源流尤爲熟悉奉省官場因循成習得此真實有用之才必能培固根本振興庶務以底久安又貴州臬司王恒秉公持正潔己愛民在禮部爲前協辦大學士李鴻藻所識拔歷任山西雁平道署冀甯道貴州貴西道皆以廉靜爲治奉省地方官屬尤須率以廉樸之風又現任河南府知府文悌通達治體聲望冠時其才識異常當在 聖明洞鑒現今奉省急務如課吏治保餉源辦團練諸政均須體用兼備之才文悌抱負殊深尤非一郡守可限惟祈 眷念艱局加以破格之施倘能用之奉省竭

其所長深謀遠慮力復 國初敦樸之風則三省之氣俱厚矣臣
感念時艱愧無補救重維以人事君之義思抒深根固蒂之謀竊
見盛昱文悌俱傑出之英玉恒亦救時之選必欲置之奉省者桑
梓之計猶後大局之憂實深用敢冒昧縷陳無任悚切欽盼之至
謹附片密奏伏乞 聖鑒訓示謹 奏

奏保知縣增韞請破格擢用摺 光緒二十五年九月初八日

奏爲特保知縣政績卓著才堪重任擬請破格擢用恭摺仰祈

聖鑒事竊觀奉省奔競成風吏治疲玩求才於州縣難求異才於
州縣尤難 臣自入奉省邊境即聞通省州縣以安東縣知縣署理
承德京縣增韞爲賢員第一比行入錦縣界內適值增韞調署錦

縣赴任之初百姓懽慶如得膏雨一路皆然臣於高橋松山接見該員兩次與詢通省政治一一指陳利弊洞曉源流議論識見皆歸於正大聞其於光緒二十一年曾署錦縣值大兵絡繹之時應付兵差彈壓地面始終兵民相安爲來往帶兵大員所欽重今年在署承德縣任內抑洋價平糧盤不爲奸商巨僧所撓民困得減辦理教案外人惕服似此卓然自立毅然有爲可以弭變端任艱局實爲奉省必不可無之員查錦州府全屬皆與朝陽連壤近年盜賊充斥民不聊生現在匪蹤雖遠捕務未可稍鬆消弭盜源保甲團練均須實力舉行臣以爲西路干城應惟增韞是倚該員之才非牧令可限惟祈 聖明裁斷重念需才之亟立予破格之施

委以重任既使循良効績兼可風厲其餘臣幸得真才謹據實上
聞冀仰副 宵旰憂勤求治求賢殷殷若渴之至意所有保薦
知縣才堪重任緣由專摺具陳伏乞 皇太后 皇上聖鑒訓示
謹 奏

奏請獎勵義州知州高欽片 光緒二十五年九月初八日

再本年夏間錦府圍屬盜賊甚熾義州南界錦縣西近朝陽與兩
縣情形相等該州知州高欽身率兵衆盡力捕勦擒獲頗多賊衆
畏之逃散遠避當時惟州屬之民得安遠近服其膽力其平日官
聲亦有幹練之目現當捕務緊要之時應請 旨酌予獎勵以爲
盡力民事者勸謹附片具陳伏乞 聖鑒謹 奏

奏參奎華陳善寶片 光緒二十五年九月初八日

再錦州府屬當馬賊肆擾之後緝捕宜嚴鐵路要衝多須彈壓必
得才幹兼優樸實勤民之員始資整頓現任錦州府知府奎華尙
無劣跡而振作非其所長於此缺未能勝任臣言之增祺亦以爲
然應請 旨開缺另補又甯遠州知州陳善寶官聲甚劣家丁常
順藉辦差爲名任意苛索細縛良民有案距州城二里許金姓被
賊綁票往訴該州置之不理並聞有因重征撤任案未完結資緣
回任之事奉省吏治疲玩似此庸劣之尤未便姑容並擬請 旨
將甯遠州知州陳善寶即行革職以示懲儆謹再附片具陳伏乞

聖鑒謹 奏

奏查明知府被參各款請立予罷黜摺

光緒二十五年九月二十四日

奏爲查明知府被參各款據實覆陳請立予罷黜以儆貪虐恭摺仰祈 聖鑒事竊臣九月十二日承准軍機大臣字寄光緒二十

五年九月初六日奉 上諭有人奏知府營私罔利縱盜擾民請

飭查辦一摺據稱奉天昌圖府所屬通江口爲南北要衝商務大

宗專恃糧石知府陳震到任後即禁糧行買期賣期兩經商人劉

起田與門丁等行賄說合遂即弛禁劉起田以商人出入府署其

典當內皆有該府存放生息銀兩奉省馬賊橫行動輒擄人勒贖

該府身任地方毫無覺察捕務實屬廢弛等語著李秉衡按照所

參各節確切查明據實參奏毋稍徇隱原摺著鈔給閱看將此諭

令知之欽此遵 旨寄信前來當經隨員王廷相改装易服前往
昌圖府並折由通江口地方按照原參逐款查訪均已得實與臣
在省訪問相符查原參營私罔利各節自以通江糧行開買期賈
期之禁得賄銀八千兩爲最要節目以商人劉起田出入府署爲
通賄之路又以廣增隆等鋪存放生息爲貪婪無厭之徵現經王
廷相於通江糧行公議會值月廣增達廣增通廣勝泰廣益信各
鋪查得該員於本年三月間前署將軍文興奏定期市開禁之時
向該行索得賄銀二千五百兩爲該行衆號公共所出有公議會
賬目可憑至該員行賄之路甚多門丁陳姓尙無聲氣曹姓已不
在署劉起田出入府署爲衆目所屬無可掩飾戶書單子寶亦有

物議王煥章查無其人至存銀生息一節查該府署歷任皆與廣
增隆交易銀兩各屬交款領款概由該號經理尙無他弊該員之
與廣增隆交涉以此巨盛典當亦有交涉款項惟該員所存之款
不輕動用需銀則每向各號另行挪借外議謂其存放生息不爲
無因又原參縱賊擾民係指人和泰天益長兩鋪號被賊綁票兩
事查人和泰鋪夥張姓於去年冬間被馬賊結牛一股綁去旋用
銀五百兩贖回並無中人關說詢之該鋪袁姓並不知曹海泉王
乃慶爲何人亦與捕役無關又天益長鋪號係在奉化縣街曾被
賊綁票其如何贖回無從訪悉惟該員於賊則一味寬縱於民則
任意苛求以致盜賊橫行事主不敢呈報原參所謂縱賊擾民確

乎不虛該員近日怨聲沸騰則又以大糧戶之案大糧戶者種田多頃家道殷實之稱本年七月間匪首海紅在通江就獲供認搶劫多案該員不即懲辦任其誣攀夙有仇怨搶劫未遂之大糧戶五六家概指爲賊刑逼甚慘勒得重賄乃釋有周振德者係富戶良民爲賊指供闔村呈保不准府衙鋪戶公保又不准周振德年屆六十與同案兩糧戶俱刑逼不堪方以賄免幸九月初省城將該犯提訊現已正法民心始快是該員不但縱賊擾民直有藉賊虐民情事臣查陳震身任郡守惟以剝民肥己爲事實縱賊匪虐及無辜以致途人憤怨未便稍事姑容相應請旨將昌圖府知府陳震即行革職永不敘用以爲貪婪苛虐者戒劉起田以商人

出入府署實屬不安本分應交地方官嚴加管束戶書單子寶亦非守分之徒應酌示懲戒革卯不准復充通江糧行賊款實係爲官勢所逼情有可原應請免究並請 飭下將軍增祺分別辦理再奉天省東北各股賊匪除王四喇嘛海紅已拏獲外餘股以滿堂紅大結半二結半小喇嘛李春爲最著名現聞又有在懷德奉化一帶肆擾之信已商由增祺派隊探蹤往捕務獲以靖地方所有查明知府被參各款謹據實繕摺臚陳伏乞 皇太后 皇上聖鑒訓示謹 奏

奏請嘉獎懷德縣知縣范貴良片

光緒二十五年九月二十四日

再臣在瀋陽查辦事件已及一月近復體察得署承德縣京縣懷

德縣知縣范貴良幹練有爲善於聽訟留心民間疾苦遇事整頓
悉臻妥協歷任開原等縣官聲俱好誠爲廉能較著之員可否請
旨嘉獎以資風勵謹附片具陳伏乞 聖鑒訓示謹 奏

奏馬民澤等偽造電報片 光緒二十五年十月初四日

再本月初一日由瀋陽電報局送來總理衙門寄臣秉衡電一件
當用己亥密本譯出電碼詞語種種可疑詢據來差張國祥稱係
司事馬民澤交給令其投送當飭該局委員余華柏查覆據稱電
簿並無此號係屬偽造除將原電並送電之張國祥交電之馬民
澤一併咨送將軍增祺飭委澈訊嚴究外事關偽造總理衙門寄
電情節較重臣秉衡謹附片奏 聞伏乞 聖鑒謹 奏

奏請收回巡閱長江水師成命摺

光緒二十五年十月十八日

奏爲素於長江水師未切講求無以圖效恭摺仰祈 聖鑒事竊

臣於光緒二十五年十月十六日接奉軍機處交片本日軍機大

臣面奉 諭旨長江水師前經彭玉麟按年巡閱以資整頓現在

沿江各營誠恐不無懈弛著派李秉衡馳赴長江上下周歷查看

仿照彭玉麟巡閱章程辦理等因欽此欽奉之下感悚莫名伏念

臣以拙庸衰憊過荷 九重殊遇亟應不辭勞瘁報稱力圖惟查

事必收效於素習才原各有所短長當水師初設彭玉麟實身自

經營迹其始終功績亦多在長江是固彭玉麟之所習所長也今

臣起家牧令海任封圻即偶涉軍事亦皆籌備於陸路而於礮艇

快划上下風濤從未經歷百種茫然是實臣所未習尤所未能也
臣連年衰病此番力疾恭應 恩召自審犬馬之力難任職事之
勞曾於奏對謹自陳明惟矢此不敢欺蒙愚忱冀以少酬 高厚
恩慈期於事言之得失臣工之賢否苟有聞知甘任嫌怨不避忌
諱只圖裨補萬一斷不計及其他此微臣區區所蓄實即仰邀
聖明洞察者也所有長江水師自揣不能勝任據實懇求 收回
成命以免貽誤而遂初心謹繕摺瀝陳伏乞 皇太后 皇上聖
鑒謹 奏

奏謝不准辭巡閱長江摺 光緒二十五年十月二十日

奏爲叩謝 天恩仰祈 聖鑒事竊臣於十八日具摺奏辭巡閱

長江 恩命本日接到軍機大臣交片面奉 諭旨著不准辭欽
此臣自顧衰庸又未從事水師自揣不勝實出懇款茲復奉 旨
不敢再三上瀆惟當勉遵 恩命整飭成規俟一半年後粗有條
緒仰懇 天恩許 臣養疴田野實感 矜全蒙 恩賞銀兩到差
後即由該管衙門支取 臣此次拜 命巡閱與各督撫皆有關涉
文移謹擬刊刻木質關防文曰 欽差巡閱長江水師前四川總
督關防以便擇吉開用 臣猶有鰓鰓過慮者 臣素性迂拘不善辦
理洋務久荷 聖明洞察在 臣初心豈欲爲 朝廷多生枝節此
番奉 命巡閱長江沿江一帶人心浮動毀堂闢教之案層見疊
出痞棍必假 臣之姓名洋人必以 臣爲口實惴悚不安意實由此

非敢避難就易避勞就逸也所有微臣力疾拜 命叩謝 天恩
緣由謹繕摺具陳伏乞 皇太后 皇上聖鑒謹 奏

奏懇賞假一箇月摺 光緒二十五年十月二十五日

奏爲懇 恩賞假恭摺仰祈 聖鑒事竊臣奉 命巡閱長江水
師應即疾馳前往惟念臣衰病侵尋歷時已久雖經醫治小愈而
血氣已虧精神未能復舊每當思慮少過即頭暈眼昏兩骸亦時
形麻木南方卑溼之地恐其觸發不時日益增劇向在河南安陽
縣寄寓得有醫士施以鍼灸之法頗著成效擬由陸路啟行順道
安陽暫行停駐仍按舊法診治一俟稍痊即當取道樊城馳赴長
江上游按次巡閱爲此籲懇 天恩賞假一個月俾得少資休息

安心調攝無任屏營待 命之至謹據實奏陳伏乞 皇太后
皇上聖鑒謹 奏

奏懇續假一個月摺光緒二十五年十二月初四日

奏爲假期將滿尙難尅日登程懇 恩再賞假一月恭摺仰祈

聖鑒事竊 臣於十月二十六日叩辭 廷陛渥蒙 訓誨周至並

諭以醫藥所宜勿施鍼灸感 垂慈之逾格實沒齒以不忘遵即

敬謹誌心束裝就道旋於十一月初十日行抵河南安陽縣寄寓

滿擬醫調速效銷假如期迺因長途勞頓瞬將假滿步履仍復維

艱竊念巡閱爲水師所關長江實跨越五省若遽以病體邁行勢

難力圖整頓籌度至再仍惟叩懇 天恩許 臣暫緩行期續假一

月一俟開春氣候稍和立即就道藉效犬馬微勞所有擬請續假緣由理合恭摺瀆懇伏乞 皇太后 皇上聖鑒訓示再臣曾奏請刊刻木質關防以昭憑信此次繕摺敬即印用合並陳明謹奏

奏銷假前往長江摺 光緒二十六年二月初二日

奏爲銷假起程前往長江恭摺仰祈 聖鑒事竊臣於光緒二十五年十二月初四日在河南安陽縣寄寓奏請續假一摺二十八日奉到 硃批著再賞假一月欽此欽遵之下感激莫明現在假期已滿所患外風骸疾諸症服藥調攝雖稍見輕仍未如常交春嚴寒漸退不敢久曠要差茲定於二十六年二月初四日由安陽

寓所雇覓車輛力疾登程先至武昌以便考求彭玉麟舊日規模仍就近晤商湖廣督撫臣冀可稍知今昔情形又以長江全局未從探討竊自懸擬各營水隊初到暫不閱看先自岳州沿江順流而東至瓜州以下巡歷一周俾大江上下舟師扼割處所山川形勢險夷粗得大概於胸並與五省督撫臣先行一一晤面再商之長江提臣黃少春或會同或分起自東而西湖流巡閱以爲講求之基至於微臣往來停駐之所尙須重行酌定以及調員差遣之處統俟到武昌後隨時奏明請旨遵行所有假滿起程日期理合繕摺具陳伏乞 皇太后 皇上聖鑒謹 奏

奏報巡閱長江行抵差次日期摺

光緒二十六年三月十二日

奏爲奉 命巡閱長江行抵差次日期恭摺具陳仰祈 聖鑒事
竊臣於光緒二十六年二月初二日由河南安陽縣寄寓專弁入
都謹將銷假起程並先巡後閱各緣由奏明在案拜摺後遵即束
裝首塗水陸按程二月二十八日馳抵湖北省城長江差次二十
九日差弁賚回原摺奉 硃批知道了欽此欽遵 臣抵鄂後當即
會晤兩湖總督臣張之洞湖北巡撫臣于蔭霖並漢陽鎮水師總
兵臣周芳明其管帶礮船將弁亦一一接見連日體察漢防水師
情形總兵周芳明辦事認真似於前兵部尙書臣彭玉麟釐定章
程尙能恪守未至廢弛現已在鄂籌度粗定即當溯流而上巡視
岳州鎮標水師再赴長沙省城與湖南巡撫臣俞廉三晤面仍順

流東下駛赴瓜洲江陰一帶查勘沿江形勢至將來停駐處所上游已與湖北督撫臣商定即在武昌省城下游則俟巡歷周徧再行擇要酌定隨時奏明請旨遵行所有行抵長江差次日期並酌定上游停駐處所緣由理合繕摺具陳伏乞皇太后皇上聖鑒再臣此次經過河南地方因去冬雨雪缺少農田種麥無多盼澤頗切自南陽府以迄湖北省城陽雨應時麥田鬯發沿途民情一律安謐堪以仰紓宸廑合併陳明謹奏光緒二十六年四月二十六日奉 硃批知道了欽此

奏謝賞頭品頂戴摺 光緒二十六年三月初九日

奏為恭謝 天恩仰祈 聖鑒事竊臣於鄂省差次恭閱邸抄光

緒二十六年二月十六日奉 上諭本年朕三旬壽辰所有年逾

七旬之文武一品大臣業經分別加恩降調四川總督李秉衡加

恩著賞給頭品頂戴欽此當即恭設香案望 闕叩頭謝 恩訖

伏念臣猥以凡庸渥蒙 高厚曾膺疆寄既慙奉職之多愆謬監

舟師尤媿軍旅之未學迺者恭逢 慶典復承 寵錫恩綸 昇

以極品之頭銜彌覺撫躬而抱疚臣惟有力圖報稱殫竭愚誠罔

計馬齒加增冀答 鴻慈萬一瞻依 仁宇時殷嵩呼華祝之情

慎固江防願上鏡清砥平之頌所有微臣感激下忱謹繕摺叩謝

天恩伏乞 皇太后 皇上聖鑒謹 奏 光緒二十六年四

月二十六日奉 硃批知道了欽此

奏密劾長江提臣摺 光緒二十六年四月二十六日

奏爲江防緊要伏莽可虞提臣異常庸妄懇請 迅賜另簡廉勇宿將以維五省長江大局恭摺密陳仰祈 聖鑒事竊查長江提督黃少春統轄水師二十二營加募江勝六營任大責重事亟時危宜如何振奮精神實力整頓以弭鉅患而圖報稱迺臣上下五千里沿途訪聞該提督徇縱營私貪賭嗜好廢弛戎務勇額多虛以致水陸軍隊百弊日滋舟次鎮江面晤該提督語及瓜鎮巨梟徐老虎即徐懷禮行將大有變端詎該提督以徐某多行好事且非水師所可與聞爲詞訪聞水師多與該匪聲息相通未便深向究詰轉致枝節橫生惟值外侮紛乘內奸思逞之際即使竭力圖

維猶恐後時更何堪再任此等貪劣大員敗壞貽誤耶除長江防務另行妥籌並就近會商伏莽辦法再專摺具奏外仰求 宸斷立將黃少春開去水師提督並撤去江勝六營統領差使應請

另簡廉勇大員速往任事藉資補救所有長江提督斷難久任貽誤緣由恭摺據實密陳伏乞 皇太后 皇上聖鑒訓示謹 奏

奏密保提督彭楚漢片

光緒二十六年四月二十六日

再前福建提督署長江水師提督彭楚漢廉勇素著爲水師名將所歷之處軍民無不悅服曾經彭玉麟屢次力保最爲出色賢員嗣因患病開缺回籍此番臣道出湖南聞得該提督鄉居力田因選派安人託故密往探訪見其勇健猶昔一無驕將惡習語及時

事猶復忠義奮發出白血誠是該提督尙堪重任值茲 國家多事宿將半多驕貪暮氣如該提督之忠勇老而彌堅求諸今日實難再得現當需才萬急敢敬附片密陳伏乞 聖明垂察 微臣迫切愚忱 迅賜錄用實爲至幸謹 奏

奏報巡閱行抵蘇省酌定下游駐所摺

光緒二十六年四月二十六日

奏爲長江水師汎地巡歷已周及行抵蘇省酌量下游駐所各情恭摺仰祈 聖鑒事竊臣於光緒二十六年三月十二日在武昌行次謹將到鄂省日期並酌定上游停駐處所各緣由奏明在案拜摺後溯流上駛先至岳州與該鎮水師總兵臣魯洪達接見即渡洞庭湖至長沙省晤湖南撫臣俞廉三又西至荊州是爲長江

汎地最上游處再順流而下以迄江陰水師下游界限亦即至此而止於湖口鎮接見該鎮水師總兵臣許雲發由鄱陽湖赴南昌省與江西撫臣松壽相晤過此則順道晤安徽巡撫臣王之春於安慶晤兩江督臣劉坤一於江甯晤水師提督臣黃少春於鎮江晤瓜洲水師總兵臣高光効於該鎮汎地一切江防事宜先後與五省督撫提鎮臣妥爲籌議每於行途地勢形勝設立礮臺處所必登岸履勘水師各營哨員弁來謁者必諄諄訓誡告以嚴約兵丁慎守汎地訓練巡緝必謹必勤期於振作益加緩急可資得力其有不職員弁難以勝任者即咨行各鎮立予撤任遴員接署遂出吳淞口入蘇河現於四月二十一日行抵蘇省與江蘇撫臣鹿

傳霖相晤籌度 微臣擬即在此作爲下游停駐處所既便照料水師且臣駭疾夙疴及口眼外風等證迄未就痊自河南就道周歷長江五省水陸幾及萬里益形困憊蘇省舊多名醫藉可稍資調理除將江防應行整飭變通事宜詳細籌議續陳外所有巡歷已周並下游停駐處所緣由理合繕摺具陳伏乞 皇太后 皇上聖鑒再臣經過兩湖地方春雨稍多後幸晴霽田禾未至過受損傷江西至江蘇一帶雨水尙屬調勻二麥將漸登場合併陳明謹奏

奏參不職之總兵遊擊摺 光緒二十六年四月二十六日

奏爲長江水師總兵遊擊不職據實糾參仰祈 聖鑒事竊維長

江防務最關緊要若將領不得其人貪邪營私必致貽誤戎事使再有意姑容何以仰副 委任查有湖口鎮水師總兵許雲發嗜好荒惰廢弛營務湖口水師中軍遊擊黎受田專媚本管上司罔利朋比兵民怨咨實於江防大有關係相應請 旨將湖口鎮總兵許雲發湖口中軍遊擊黎受田立行罷黜以儆貪劣而肅戎行如蒙 俞允除遊擊一缺由外遴員推補所遺總兵員缺應敬請 迅賜簡放以重官守所有糾參總兵遊擊不職緣由理合恭摺具陳伏乞 皇太后 皇上聖鑒訓示謹 奏

奏請嘉獎周芳明高光劾李金彪等片

光緒二十六年四月二十六日

再查漢陽鎮水師總兵周芳明勤樸勇敢力求整頓瓜州鎮水師

總兵銳勇巴圖魯高光効樸直血誠盡力江防當此水師疲敝競以酬應欺飾相尙該二鎮俱能潔已奉公毫無習氣於應辦之事餘力不遺洵爲水師不可多得之員相應請 旨嘉獎以示優異而資觀感又記名總兵瓜州鎮標江陰協副將爽勇巴圖魯李金彪年久在軍不染惡習勤奮沉實兵隊帖服均爲可用之才敢併仰懇 天恩同賜嘉獎俾益知振勉理合附片具陳伏乞 聖鑒訓示謹 奏

奏派兵北上並親率衛隊前進摺

光緒二十六年五月三十日

奏爲遵 旨派兵北上恭摺馳陳仰祈 聖鑒事竊臣坤一臣傳霖承准軍機大臣字寄光緒二十六年五月二十一日奉 上諭

近因民教尋仇匪徒乘機燒搶京城內外擾亂已極著各直省督撫迅速挑選馬步隊伍各就地方兵力餉力酌派得力將弁統帶數營星夜馳赴京師聽候調用根本之地情形急迫勿得刻延將此由六百里加緊各諭令知之欽此瞻望 闕廷萬分企念伏查江南兵力苦無大枝勁旅可抽沿江一帶防務正形喫緊駐防各軍萬難調動且距京較遠亦慮緩不濟急然京畿情形如此之亟諭旨盼望如此之切無論如何總須設法抽調迅速馳援臣坤一查有統帶銘元鎮字等營旗記名提督前徐州鎮總兵陳鳳樓忠勇性成不避艱險爲淮軍著名宿將於北地亦極熟悉所部銘字馬隊三營元字鎮字步隊四旗久經訓練堪稱節制之師駐紮

徐州宿遷一帶就近調集星馳赴京最爲便捷惟元鎮步隊四旗
人數較少並經電飭該提督刻日增募改旗爲營每營添足五百
人以資厚集徐宿地方緊要南北運道所關復飭徐州鎮總兵劉
青煦添招馬隊一營步隊三營分赴各要隘填紮俾免疏虞抑臣
等更有請者前接張春發等來電武衛先鋒左右兩軍現亦欽奉
諭旨飭調赴京定於本月二十七日拔隊計該兩軍二十營兵
力尙厚均食江南之餉第須有統率之員相機調度方有實濟臣
等受 恩深重誼同休戚值國事艱難之際正臣子圖報之秋公
同商酌 臣秉衡奉 命巡閱長江目前尙可暫離擬即招募衛隊
二百人親率星夜北上惟有仰懇 天恩准將武衛先鋒左右兩

軍暫歸臣秉衡節制以資鈐束於軍務實有神益謹合詞恭摺由
驛六百里加緊馳陳伏乞 皇太后 皇上聖鑒訓示謹 奏

奏報遵旨赴京起程日期摺光緒二十六年六月初三日

奏爲遵 旨赴京馳報起程日期恭摺仰祈 聖鑒事竊臣於六

月初三日揚州途次承准軍機大臣字寄光緒二十六年五月二

十八日奉 上諭李秉衡著即來京陛見毋稍刻延將此由六百

里加緊諭令知之欽此祗誦之下萬分焦急臣前在江甯巡次恭

讀五月二十一日 上諭著各直省督撫迅速挑選馬步隊伍各

就地方兵力餉力酌派得力將弁統帶數營星夜馳赴京師聽候

調用等因欽此遵即會同兩江督臣劉坤一江蘇撫臣鹿傳霖奏

請由臣秉衡暫統武衛先鋒左右兩軍並招募衛隊二百人星夜北上聽候調用各情由業於五月三十日敬謹由驛馳奏拜摺後臣即迅速部署渡江駛抵揚州茲復欽奉寄諭更不容稍涉遲延並以武衛先鋒左右兩軍二十營必須次第開拔恐緩時日除一面咨令提臣張春發等各帥所部星馳赴京外臣謹擬六月初四日由揚州起程親率衛隊兩哨先行入都叩覲天顏藉得展效馳驅少盡犬馬之力感奮涕零情不自己闕廷瞻望馳念莫名所有微臣起程日期理合專摺由驛具陳伏乞皇太后皇

上聖鑒謹奏

奏報與敵兵接戰情形摺

光緒二十六年七月十七日

奏爲馳報近日接戰情形恭摺仰祈 聖鑒事竊臣於七月十四日抵河西務西北八里之楊房十五日卯刻正在督夏辛酉六營拔隊開赴河西務敵兵已以大隊來撲河西務張春發列隊接戰萬本華一軍在河西務里許同時整隊抵禦惟兩軍有槍無礮而敵軍開花礮子如雨張春發力不能支萬本華祇帶四營遠道而來即接應馬玉崑之軍連日鏖戰本有傷亡遂同敗退而賊又包抄西南西北兩路夏辛酉一軍立時分軍迎敵力過其鋒槍礮齊施自卯至午互有殺傷敵兵向西南退去馬玉崑於次日早初甫與臣途間相晤方擬合隊於河西務併力禦敵奈行後即遇賊開仗旋即向西北路敗退隊伍散失遂多實因苦戰連旬精銳過傷

兵氣不能驟振宋慶軍爲賊所隔尙未見面臣身臨前敵終日督戰升允馬隊兩旗亦同時分馳惟河西務已陷各軍潰退實少駐紮之處只得退紮河西務北三十六里之馬頭地方亦苦平原無險可扼夏辛酉六營傷折無多萬本華一軍收集尙得三營江西臬司陳澤霖適過此間約令合力再圖一戰十六日馬頭又失萬本華尙能一戰傷亡數十人張春發十營僅剩一營尋又招集三營夏辛酉猶在馬頭西南東退陳澤霖只有數營趕到勉強列隊亦未足恃此連日前敵接戰之情形也臣刻自馬頭退抵張家灣就連日日擊軍隊數萬充塞道塗見敵輒潰實未一戰巨鎮如河西務張家灣俱焚掠無遺小邨亦然臣自少至老屢經兵火實所

未見兵將如此豈旦夕之故哉臣此次奉命督師事出倉猝中軍無一師一旅僅張陳夏萬四軍歸臣節制張春發勇於戰而軍皆新募紀律毫無陳澤霖人無足道軍事更所未嫻夏辛酉萬本華雖甚能軍惜兵力太單不敷調撥此次主客各軍或因久戰而疲或因新募而怯臣出都之前一日北倉楊卹相繼失陷河西務未立營壘即被敵人衝破各軍紛紛逃潰勢將不支加以倉猝之間萬難布置臣惟有殫竭心力決一死戰上報君父之恩下盡臣子之職成敗利鈍不敢預料臣奉職無狀相應請旨嚴譴所有各路將領應如何懲處之處恭候聖裁所有前敵危迫軍力難支並自請議處緣由謹恭摺具陳伏乞皇太后皇上聖鑒

謹 奏

李忠節公奏議卷十六終

跋

金鑑年十七讀書村東曹官寺從吾鄉曹子鐸先生振聲遊一日聽先生論本省人才謂董達川太史執有言奉人官中外者以岫巖李鑑堂獨出冠時其勳績風節必爲不朽人物後十年金鑑館於省垣適公來奉查辦仁育兩軍案以行營總理雷鈞衡置諸法人心震駭草木皆驚街行見白鬚叟隱有懼心論者比於宋之包孝肅明之海剛峯其威望震人如此往年金鑑在清史館極意搜求公之傳畧並於翟省長熙人文選處得奏議數十冊又設位東三省會館之鄉賢祠今清史稿有公傳復檢奏稿刪其無關係者存若干篇付印以廣其傳讀之見體國公忠關心民瘼躍然如在

紙上論公者於庚子一役每有微詞實則公之心以身衛國知有忠而已以身殉國知有節而已人臣若此可以不朽允堪媲美古人炳耀乾坤豈徒增光鄉里已哉金鎧未獲見公之顏色而仰止之思積四十餘年茲以校讐奏稿謹抒所見著於篇末而爲之跋

民國二十年一月一日遼陽袁金鎧